

Auala e Tumau ai i le Alofa o le Atua





IVS-SM
220310

Auala e Tumau ai i le Alofa o le Atua

O LE TUSI LENEI A

Ē e Ana Ata:

- Itulau 16: Buena Vista Images
- Itulau 161: Mixa/age fotostock

E lē faatauina lenei tusi. Ua saunia e a'oa'oina ai le Tusi Paia i le lalolagi aoao, ma ua lagolagoina e ala i foa'i tauofo.

Mo le faia o foa'i tauofo, taga'i i le www.jw.org.

Se'i vaganā ua faailoa atu, ae o mau uma o loo i lenei tusi ua sii mai i le faaliliuga *O le Tusi Paia—O le Faaliliuga a le Lalolagi Fou*.

How to Remain in God's Love

Lomia iā Setema 2018

Samoan (*Ivs-SM*)

© 2018

Watch Tower Bible and Tract Society of Pennsylvania

O Ē Lomia

Watchtower Bible and Tract Society of New York, Inc.

Wallkill, New York, U.S.A.

Made in Japan

MATAUPU

ITULAU

1. E Tumau e Faavavau le Alofa o le Atua	5
2. Se Lotofuatiaifo Lelei ma le Atua	16
3. Ia Filifili Uō e Alolofa i le Atua	31
4. Aiseā e Faaaloalo ai i le Pule?	45
5. Auala e Vavaeese ai Mai i le Lalolagi	60
6. Auala e Filifili ai a Tatou Faafiafiaga	75
7. Pe e Tāua iā te Oe le Ola e Pei Ona Tāua i le Atua?	89
8. E Finagalo leova ia Mamā Ona Tagata	104
9. “Ia Sosola Ese i le Faitaaga”	118
10. O le Faaipoipoga o se Meaalofa Mai i le Atua	132
11. Ua Mavae le Faaipoipoga	147
12. Ia Tautala i “Upu Lelei e Atia’e Ai”	159
13. Pe e Fiafia le Atua i Aso Faamanatu Uma?	172
14. Ia Faamaoni i Mea Uma	187
15. Ia Fiafia i Au Galuega	200
16. Ia Teteē Atu i le Tiapolo	213
17. Ia Tumau i le Alofa o le Atua	226
Faaopoopoga	238

Mo ē e alolofa iā Ieova le Atua ma naunau i lana Afioga, le Tusi Paia:

Na fetalai Iesu: “E iloa e outou le upu moni, e tuusa’oloto fo’i outou e le upu moni.” (Ioane 8:32) Se’i mafaufau i le taimi faato’ā e maua ai le upu moni mai i le Tusi Paia! O se fiafiaga le iloaina e mafai ona tatou a’oa’oina le upu moni a o iai i se lalolagi ua tumu i pepelo.—2 Timoteo 3:1.

E finagalo Ieova ia tatou iloa le upu moni. E tatou te manana’o fo’i ia ta’u atu i tagata le upu moni ona e tatou te alolofa iā i latou. Peita’i, e tele mea e aofia ai i le auauauna i le Atua. E tataua ona tatou fai le mea sili e mafai ina ia ola e oġatusa ai o ni Kerisiano, ona e tatou te matuā talisapaia mataupu silisili a Ieova. Na faamatala e Iesu se auala tāua e faamaonia atu ai i le Atua e tatou te alolofa iā te ia. Na fetalai o ia: “Afai tou te tausi i a’u poloa’iga, tou te tumau ai i lo’u alofa, e pei ona ou tausi i poloa’iga a le Tamā, ma ou tumau ai i lona alofa.” —Ioane 15:10.

E alofa tele Iesu i lona Tamā, ma e na te faia mea uma e finagalo i ai lona Tamā. Pe afai e tatou te faaa’oa’o iā Iesu i le auala e tatou te ola ai, o le a alofa mai Ieova ma o le a tatou maua le fiafia moni. Na fetalai Iesu, “afai ua outou iloa nei mea, e fiafia outou pe a outou faia.” —Ioane 13:17.

E matou te faamoemoe o le a fesoasoani lenei tusi iā te oe ina ia ola e tusa ai ma le upu moni mai le Tusi Paia, ma avea ma uō a le Atua. E matou te tatalo ia tuputupu a’e lou alofa mo le Atua, ma tumau “i le alofa o le Atua . . . lea e i’u ai i le ola e faavavau.”—Iuta 21.

Vaega Pule o Molimau a Ieova



E TUMAU E FAAVAVAU LE ALOFA O LE ATUA

“O le alofa lenei i le Atua,
ia tatou tausī i ana poloa’iga;
ma e lē mamafa ana poloa’iga.”—1 IOANE 5:3.

PE E te alofa i le Atua? Atonu o lou alofa tele i le Atua na e tuuina atu ai iā te ia. E te ono lagona o ia o lau Uō moni. Peita’i, na mua’i alofa mai Ieova a o le’i faaalua atu lou alofa iā te ia. Ua ta’ua i le Tusi Paia: “Ua tatou alolofa auā na mua’i alofa mai le Atua iā i tatou.”—1 Ioane 4:19.

² Se’i mafaufau i auala ua faaalua mai ai e Ieova lona alofa mo i tatou. Ua ia tuuina mai le lalolagi matagofie e tatou te nonofo ai, faapea isi mea uma e tatou te olioli ai i le olaga. (Mataio 5:43-48; Faaaliga 4:11) E finagalo Ieova ia iai sa tatou faiā lelei ma ia, ma fesoasoani mai ina ia tatou a’oa’oina e faatatau iā te ia. Pe a tatou faitauina le Tusi Paia, ua tatou faalogo atu iā Ieova. Ae a tatou tatalo, o loo faafofoga mai o ia iā i tatou. (Salamo 65:2) E na te ta’ita’ia ma faamalosiā i tatou e ala i lona agaga paia. (Luka 11:13) Sa ia auina mai fo’i lona Alo pele i le lalolagi ina ia faasa’oloto i tatou mai i le agasala ma le oti.—**Faitau le Ioane 3:16; Roma 5:8.**

1, 2. Aiseā e te alofa ai iā Ieova le Atua?

³ Se'i manatunatu mo sina taimi i sau uō mamae, o sē na oulua faatasi i taimi fiafia ma taimi faanoanoa. E tele ni taumafaiga ina ia faatumauina le māfana ma le malosi o lenā faauōga. E faapena fo'i la tatou faauōga ma Ieova, o ia o se Uō e sili ona māfana ua tatou maua. E mafai ona tumau e faavavau la tatou faauōga ma ia. Ua ta'ua i le Tusi Paia: "Ia outou faatumau iā te outou i le alofa o le Atua." (Iuta 21) E faapefea? Ua tali mai le Tusi Paia: "O le alofa lenei i le Atua, ia tatou tausi i ana poloa'iga; ma e lē mamafa ana poloa'iga." —1 Ioane 5:3.

"O LE ALOFA LENEI I LE ATUA"

⁴ O le ā e uiga i ai le Tusi Paia ina ua faapea mai "o le alofa i le Atua"? O loo uiga atu i o tatou faalogona loloto mo le Atua. Po o e manatua le ulua'i taimi na amata ai ona e alofa iā Ieova?


⁵ Se'i mafaufau i ou faalogona ina ua e faato'ā iloa-ina, e finagalo Ieova ia e ola e faavavau i lana lalolagi fou. Sa e a'oa'oina ai mea uma ua ia faia ina ia faatau-nuu ai lea fuafuaga, ma e iloa ai e ma'eu se mea-alofa matagofie ua aumaia e Ieova mo i tatou, e ala i le auina mai o lona Alo i le lalolagi. (Mataio 20:28; Ioane 8:29; Roma 5:12, 18) A o e a'oa'oina le alofa tele o Ieova iā te oe, sa pā'ia ai lou loto ma amata ai ona e faaalua le alofa iā te ia.—**Faitau le 1 Ioane 4:9, 10.**

⁶ Ae o lenā faalogona alofa i le Atua ua na o se amata. O se faaa'oa'oga, pe a e alofa i se tasi, e tele mea

3. E faapefea ona tatou faatumauina se faiā lelei ma Ieova?

4, 5. Na faapefea ona amata tuputupu a'e lou alofa mo Ieova?

6. O le ā e aofia ai i le alofa i se tasi? O le ā ua uuna'ia oe e fai ona o lou alofa i le Atua?



**Ina ua e tuuina atu iā leova
ma papatisoina, ua e faailoa
atu ai e te alofa ma mana’o
e usiusita’i e faavavau iā te ia**



e te faia nai lo o le tau ina faapea atu “ou te alofa iā te oe.” O le alofa e māfua ai ona tatou faia mea e faafiafia ai lenā tagata. I se tulaga talitutusa, o lou alofa mo Ieova e te mana’o ai e ola i se olaga e faafiafiaina ai o ia. A o tuputupu a’e lenā alofa, o le a tuuina atu lou ola iā Ieova ma papatisoina. O lou faia faapea ua e tautō atu ai iā Ieova o le a e auauna e faavavau iā te ia. (**Faitau le Roma 14:7, 8.**) E faapefea ona e tausisi i lenā tautoga?

“IA TATOU TAUSI I ANA POLOA’IGA”

⁷ O lo tatou alolofa iā Ieova ua ‘tatou tausisi ai i ana poloa’iga.’ E faapefea ona tatou faia faapea? E ala i lo tatou usiusita’i iā te ia. Ua faailoa mai i le Tusi Paia le auala e finagalo Ieova e tatou te ola ai. O se faata’ita’iga, ua ia faailoa mai e sesē le onā, gaoui, pepelo, faia o feusua’iga ma se tasi e le’i faaipoipo i ai, po o le tapua’i i se tasi po o se isi mea nai lo o ia.—1 Korinito 5:11; 6:18; 10:14; Efeso 4:28; Kolose 3:9.

⁸ Ae e tele isi mea e ao ona tatou faia ina ia faafiafiaina ai Ieova, nai lo o le tau ina usiusita’i i ana poloa’iga. E na te le’i aumaia se lisi umī o tulafono e aofia ai vala uma o lo tatou olaga. O lea la, o nisi taimi e leai ni tulafono ma’oti i le Tusi Paia e faailoa mai ai le mea e ao ona fai. E faapefea la ona tatou faia ni fili-filiga lelei? (Efeso 5:17) Ua iai i le Tusi Paia mataupu silisili, o upu moni faavae ua a’oa’oina ai i tatou i auala e silasila ai Ieova i mea. A o tatou faitauina le

7. O le ā e tatou te faia pe afai e tatou te alolofa iā Ieova? O ā nisi o ana poloa’iga?

8, 9. E faapefea ona tatou iloa le silafaga a Ieova i tulaga e lē o iai ni tulafono ma’oti i le Tusi Paia? Aumai se faaa’oa’oga.

Tusi Paia, o le a tatou iloa lelei ai le ituaiga Atua e iai Ieova. Ua tatou iloa ai lona finagalo, e aofia ai mea e fiafia i ai ma mea e 'ino'ino i ai.—**Faitau le Salamo 97:10; Faataoto 6:16-19; taga'i i le Faaopoopoga 1.**

⁹ O se faaa'oa'oga, o le ā le auala e te filifilia ai polokalame o le TV po o le Initaneti e te matamata ai? E lē o ta'u patino mai e Ieova le mea e tatau ona tatou faia. Ae e fesoasoani mataupu silisili ua ia tuuina mai ina ia tatou faia ai ni filifiliga lelei. O le tele o faafiafiaga i aso nei ua tumu i feusua'iga ma faiga sauā. Ua faailoa mai e Ieova i le Tusi Paia, “e inosia lava e Ia le tagata e fiafia i le faasauā,” ma ‘e faamasino e ia o ē e faitaaga ma ē e mulilulua.’ (Salamo 11:5; Eperu 13:4) E faapefea ona fesoasoani nei mataupu silisili ina ia tatou faia ai filifiliga lelei? Pe afai ua tatou iloa se mea e 'ino'ino pe e silasila i ai Ieova o se amioga lē mamā, e tatau la ona tatou 'alofia.

¹⁰ Aiseā e tatou te usiusita'i ai iā Ieova? E lē tau ina ia 'alofia ai faasalaga po o faafitauli ona o le faia o filifiliga sesē. (Kalatia 6:7) Nai lo o lea, e tatou te usiusita'i iā Ieova ona e tatou te alolofa iā te ia. E pei lava ona manana'o le fanau e faafiafia lo latou tamā, e tatou te manana'o fo'i e faafiafia lo tatou Tamā i le lagi. E leai se mea e sili atu nai lo o le iloa ua tatou maua le finagalo malie o Ieova!—Salamo 5:12; Faataoto 12:2; taga'i i le Faaopoopoga 2.

¹¹ E lē na o taimi e faigofie ai po o ua leai fo'i se isi filifiliga e mafai ona fai, e tatou te usiusita'i ai iā Ieova. E tatou te lē filifili fo'i po o lē fea o ana

10, 11. Aiseā e tatou te usiusita'i ai iā Ieova?

tulafono ma tapulaa e usita'ia, a o lē fea e lē usita'ia. (Teuteronome 12:32) Nai lo o lea, e tatou te usiusita'i atoatoa iā te ia, e pei o le faisalamo o lē na faapea mai: "Ou te fiafia lava i au poloa'iga ua ou naunau i ai." (Salamo 119:47; Roma 6:17) E tatou te fia pei fo'i o Noa, o lē sa faaalua lona alofa mo Ieova e ala i le usita'ia o poloa'iga uma na tuuina atu iā te ia. Ua ta'ua i le Tusi Paia sa 'faapea lava ona faia' e Noa. (Kenesa 6:22) Pe e te mana'o e fetalai mai faapena Ieova iā te oe?

12 O ā faalogona o Ieova pe a tatou usiusita'i iā te ia? Ua tatou "faafiafia ai [lona] loto." (Faataoto 11:20; 27:11) Se'i manatu i lenā mea! E tatou te faafiafiaina Lē na foafoaina le vateatea pe a usiusita'i iā te ia. Ae e na te lē faamalosi i tatou e faia faapea. Ua ia tuuina mai iā i tatou le filifiliga sa'oloto. O lona uiga, ua iā i tatou le sa'olotoga e filifili ai e fai le mea sa'o po o le mea sesē. E finagalo Ieova ia avea lo tatou alolofa iā te ia, ma uuna'iga e tatou te faia ai filifiliga lelei ina ia tatou maua se olaga e sili ona lelei.—Teuteronome 30:15, 16, 19, 20; taga'i i le Faaopoopoga 3.

"E LĒ MAMAFA ANA POLOA'IGA"

13 Ae faapefea pe a tatou manatu e faigatā ona usita'ia poloa'iga a Ieova, po ua aveesea ai lo tatou sa'olotoga? Ua ta'ua ma le manino i le Tusi Paia: "E lē mafa mafa ana poloa'iga." (1 Ioane 5:3) Ua faamatalaina i le *New English Translation* e faapea: "E tatou te lē

12. E faapefea ona tatou faafiafiaina Ieova?

13, 14. E faapefea ona tatou iloa e lē matuā faigatā ona usita'ia poloa'iga a le Atua? Ia faata'ita'i.

mafatia i ana poloa'iga." E lē "mamafa" poloa'iga a Ieova, o lona uiga e lē matuā faigatā ona tatou usita'ia. E fetuutuuna'i pea o Ia e tusa ma mea ua ia faa-finagaloina mai iā i tatou.

14 O se faaa'oa'oga, se'i faapea o loo e fesoasoani i sau uō e siitia atu i se fale fou. Ua ia tuu ana mea uma i atigipusa. O nisi atigipusa e māmā e faigofie ona sii, ae o isi e mamafa e mana'omia ona sii e ni tagata se to'alua. Pe afai e alofa lau uō iā te oe, po o le a fai atu e te siina na o oe se pusa e matuā mamafa? E mautinoa e leai! Aiseā? E lē mana'o o ia e te afāina ai. E faapena fo'i Ieova, e lē mafai ona ia fetalai mai e tatou te faia se mea e matuā faigatā. (Teuteronomie 30:11-14) E silafia lelei e Ieova i tatou. "Ua silafia lelei e ia le mea na faia ai i tatou, ua ia manatu o le efuefu lava i tatou."—Salamo 103:14.

15 Na ta'u atu e Mose i le nuu o Isaraelu, o poloa'iga a Ieova e mo lo latou "lelei i aso uma," ma o le a "ola ai pea" i latou pe a ususita'i i ai. (Teuteronomie 5:28-33; 6:24) E faapena fo'i i aso nei. O so o se mea lava e finagalo Ieova e tatou te faia, e mo lo tatou lelei. (**Faitau le Isaia 48:17.**) E silafia pea e lo tatou Tamā o Ieova mea e sili ona lelei mo i tatou. (Roma 11:33) Ua ta'ua i le 1 Ioane 4:8: "O le Atua o le alofa lava ia." O lona uiga, o mea uma e faia ma fetalai mai ai Ieova e uuna'ia e le alofa.

16 E lē o taimi uma e faigofie ai ona tatou ususita'i

15. Aiseā e tatou te mautinoa ai o poloa'iga a Ieova e mo lo tatou lelei?

16. E faapefea ona iloa e mafai ona tatou ususita'i e ui i le lē lelei atoatoa ma ola i se lalolagi amioleaga?

i le Atua. O loo tatou ola i se lalolagi amioleaga ua pulea e le Tiapolo. O loo taumafai o ia e taa'ina tagata ia fai le mea leaga. (1 Ioane 5:19) E mana'omia fo'i ona tau faasaga i o tatou manatu ma faalogona lē lelei atoatoa, ona e mafai ona tatou lē usiusita'i ai i le Atua. (Roma 7:21-25) Peita'i, o lo tatou alolofa iā Ieova e faamalosia ai i tatou e fai le mea sa'o. E na te silafia a tatou taumafaiga ia usiusita'i iā te ia, ma fesoasoani mai e ala i lona agaga paia e sili ona malosi. (1 Samu-elu 15:22, 23; Galuega 5:32) E fesoasoani mai le agaga paia e tatou te atia'e uiga e faigofie ai ona usiusita'i iā Ieova.—Kalatia 5:22, 23.

17 O le a tatou a'oa'oina i lenei lomiga le auala e ola ai i se olaga e faafiafia ai le finagalo o Ieova. O le a tatou a'oa'oina pe faapefea ona faatatau ana mataupu silisili ma tapulaa tauamio i o tatou olaga. Ia manatua e lē faamalosia e Ieova i tatou ia usiusita'i iā te ia. Pe a tatou filifili e usiusita'i, o le a faaleleia o tatou olaga ma maua se lumana'i matagofie. Ae sili atu ona tāua, o lo tatou usiusita'i e faaalua atu ai i le Atua le tele o lo tatou alofa mo ia.—Taga'i i le Faaopoopoga 4.

18 Ua tuu mai e Ieova iā i tatou ta'ito'atasi se lotofuatiaifo ina ia fesoasoani e iloa ai le mea sa'o ma le mea sesē. Pe a a'oa'oina o tatou lotofuatiaifo, o le a fesoasoani iā i tatou e “tausi i ana poloa'iga.” O le ā la le lotofuatiaifo ma e faapefea ona tatou a'oa'oina? Se'i o tatou iloiloina.

17, 18. (a) O le ā o le a tatou a'oa'oina i lenei lomiga? (e) O le ā o le a tatou iloiloina i le mataupu o loo sosoo mai?

1 E ALOFA LE ATUA IĀ TE OE

“Ia outou faatumau iā te outou i le alofa o le Atua . . . lea e i’u ai i le ola e faavavau.”

—luta 21

Aiseā e te mautinoa ai e alofa le Atua iā te oe?

Ioane 3:16;

1 Ioane 4:8-10;

Faaaliga 4:11

Na foafoaina e leova mea uma i le lalolagi ina ia tatou olioli ai i le olaga.

E le’i suia ai le fuafuaga a le Atua ina ua agasala Atamu ma Eva. Na ia auina mai lona Alo e fai ma togio-la ina ia maua ai e tagata uma le avanoa mo le ola e faavavau.

Salamo 65:2;

Galuega 5:32

Ua tuuina mai e leova le Tusi Paia, lona agaga paia, ma le meaalofa o le tatalo, ina ia fesoasoani i o tatou olaga i aso nei. Pe a tatou tatalo atu iā te ia, e faafofoga mai o ia.

2 O LE USIUSITA’I IĀ IEOVA E TATOU TE MAUA AI PEA AOGĀ

“O a’u o Ieova, lou Atua, o Lē o loo a’oa’o oe
i mea e aogā iā te oe.”—Isaia 48:17

O ā aogā o lou usita’i iā Ieova?

Teuteronome 5:28-33; 6:24

E silafia e Ieova a tatou tau-
mafaiga ia usiusita’i iā te ia.

O le usiusita’i e faaleleia ai
o tatou olaga i le taimi lenei
ma maua ai se lumana’i
matagofie.

3 E MAFAI ONA E FAAALIA ATU E TE ALOFA IĀ IEOVA

“O le alofa lenei i le Atua, ia tatou tausi i ana poloa’iga.”—1 Ioane 5:3

Pe e mafai ona tatou usiusita’i i le Atua?

Teuteronomie 30:11;

Salamo 103:14

E silafia e leova e tatou te lē lelei atoatoa. E na te lē faatalitalia i tatou e fai se mea e lē mafai ona tatou faia.

Faataoto 27:11;

Roma 7:21-25

O lo tatou alolofa iā leova e faamalosia ai i tatou e usiusita’i iā te ia, e tusa lava pe e faigatā.

Faataoto 6:16-19;

Efeso 5:17

O mataupu silisili o le Tusi Paia e a’oa’oina ai i tatou i le finagalo o le Atua. O nei mataupu silisili e faatonu-tonu ai o tatou manatu ma faaloloto ai lo tatou alofa mo leova. E fesoasoani iā i tatou e iloa ai le mea e ao ona fai e tusa lava pe lē o ta’ua patino mai i le Tusi Paia.

SE LOTOFUATIAIFO LELEI MA LE ATUA

“Ia taofimau i se lotofuatiaifo lelei.”

—1 PETERU 3:16.

SE'I faapea o loo e malaga i se nofoaga e ui atu i se toafa telē lava. Peita'i, ua e iloa afai e te ui atu i lenā toafa telē e aunoa ma se ta'iala, e mafai ona e sē solo pe sesē le nofoaga e te taunuu i ai. O le ā e te faia ina ia taunuu ai i le nofoaga o loo e fia alu i ai? E te mana'omia se tasi e masani lelei i le toafa ina ia ta'ita'ia oe, pe e ao fo'i ona e faalagolago i le lā po o fetu. E tāua le iai o se ta'iala,

1, 2. Aiseā e te mana'omia ai se ta'iala pe a e malaga i se nofoaga e te lē masani ai? O le ā le ta'iala ua tuuina mai e leova iā i tatou?



ona o le iloaina o le mea e te alu i ai e mafai ona faasao-ina ai lou ola.

² O i tatou uma lava o loo fesaga'ia le tele o lu'i i le olaga, ma o nisi taimi e faigofie ona tatou lē iloa po o le ā le mea o le a fai. Peita'i, ua tuuina mai e Ieova iā i tatou ta'ito'atasi se lotofuatiaifo e ta'ita'ia ai i tatou. (Iakopo 1:17) Se'i o tatou iloiloaina po o le ā le lotofuatiaifo ma pe faapefea ona gaoioi. O le a tatou iloiloaina fo'i auala e a'oa'oina ai o tatou lotofuatiaifo, le pogai e tatau ai ona tatou manatu mamafa i lotofuatiaifo o isi, ma pe faapefea i se lotofuatiaifo mamā ona faaleleia ai o tatou olaga.

O LE Ā LE LOTOFUTIAIFO MA E FAAPEFEA ONA GAOIOI?

³ O o tatou lotofuatiaifo o se meaalofo matagofie mai iā Ieova. O se lagona e i totonu o i tatou e iloa ai le mea sa'o ma le mea sesē. O le upu Eleni o loo faaaogā i le Tusi Paia mo le “lotofuatiaifo,” e uiga atu i le “iloaina e le tagata o ia lava.” Pe a lelei ona gaoioi o tatou lotofuatiaifo, e fesoasoani iā i tatou e iloilo ai ituaiga tagata moni e iai i tatou. E mafai ona fesoasoani iā i tatou ia faamaoni e faatatau i o tatou mafaufauga ma faaloga loloto. E mafai ona ta'ita'ia atu i tatou i le lelei ae 'alo ese mai i le leaga. E tatou te lagona ai fo'i le fiafia pe a faia se filifiliga atamai, pe lagona le nofosala ona o le faia o se filifiliga sesē.—Taga'i i le Faaopoopoga 5.

⁴ E ta'ito'atasi i tatou ma filifili pe faalogo i o tatou lotofuatiaifo pe leai. Na filifili Atamu ma Eva e lē

3. O le ā e uiga atu i ai o tatou lotofuatiaifo?

4, 5. (a) O le ā na tupu ina ua lē amana'ia e Atamu ma Eva o la lotofuatiaifo? (e) O ā nisi o faaa'oa'oga i le Tusi Paia i auala e gaoioi ai le lotofuatiaifo?

faalogo i o la'ua lotofuatiaifo, ma o le i'uga na la agasala ai. Mulimuli ane na lagona le nofosala ae ua tuai. Ua la lē usiusita'i i le Atua. (Kenese 3:7, 8) E ui lava sa lelei atoatoa o la lotofuatiaifo ma la iloa e sesē le lē usiusita'i i le Atua, ae na filifili lava e lē amana'ia o la lotofuatiaifo.

⁵ I le isi itu, e to'atele tagata lē lelei atoatoa na faalogo i o latou lotofuatiaifo. O Iopu o se tasi o faaa'oa'oga lelei. Talu ai sa faalogo o ia i lona lotofuatiaifo ma faia filifiliga lelei, o lea na ia ta'ua ai: "E lē faifai mai fo'i lo'u loto iā te a'u i o'u aso uma." (Iopu 27:6) Ina ua ta'ua e Iopu lona "loto," sa ia faasino atu i lona lotofuatiaifo, o le lagona e iloa ai le mea sa'o ma le mea sesē. A o Tavita e iai taimi na ia lē amana'ia ai lona lotofuatiaifo ma lē usiusita'i ai iā Ieova. Mulimuli ane na ia lagona le nofosala ma na pei ua "tuia" ai lona loto. (1 Samuelu 24:5) Na ta'u atu e le lotofuatiaifo o Tavita e sesē lana gaoioiga na fai. O lona faalogo i lona lotofuatiaifo na ia a'oa'oina ai e 'alofia le toe faia o lenā mea sesē.

⁶ E oo fo'i i tagata e lē iloaina Ieova, e masani ona latou iloa e i ai mea e sa'o ma mea e sesē. Ua faapea mai le Tusi Paia ua "faasalaina pe ta'utonuina i latou i o latou lava manatu." (Roma 2:14, 15) O se faaa'oa'oga, ua iloa e le to'atele e sesē le fasioti tagata po o le gaoi. E ui atonu e latou te lē o iloaina, ae o loo faalogo i o latou lotofuatiaifo, o le lagona na tuu e Ieova i totonu iā i latou e iloa ai le mea sa'o ma le mea sesē. O loo latou mulimuli fo'i i mataupu silisili a le Atua, po o upu moni faavae ua saunia mai e Ieova ina ia tatou faia ai filifiliga lelei i le olaga.

6. Aiseā e faapea atu ai o le lotofuatiaifo o se meaalofo ua tuuina mai e le Atua i tagata uma?

⁷ Peita'i, o nisi taimi e mafai ona sesē ai o tatou lotofuatiaifo. O se faaa'oa'oga, e mafai ona faaleagaina o tatou lotofuatiaifo i o tatou lava mafaufauga ma faalogona lē lelei atoatoa, ma ta'ita'ia atu ai i le ala sesē. E lē faafuase'i ona maua se lotofuatiaifo lelei, ae e mana'omia ona a'oa'oina. O se lotofuatiaifo lelei na fesoasoani iā Iosefa e teena ai faaosoosoga. (Kenese 39: 1, 2, 7-12) Ua aumaia e Ieova le agaga paia ma mataupu silisili faale-Tusi Paia ina ia fesoasoani iā i tatou. (Roma 9:1) Se'i o tatou iloilo pe faapefea ona a'oa'oina o tatou lotofuatiaifo.

E FAAPEFEA ONA A'OA'OINA O TATOU LOTOFUATIAIFO?

⁸ Ua manatu nisi tagata o le faalogo i o latou lotofuatiaifo, e uiga atu i le mulimuli i o latou faalogona. Ua latou manatu e mafai ona fai so o se mea e mana'oa' i ai, ae o le mea tāua ia lelei o latou faalogona. Peita'i, e lē lelei atoatoa o tatou faalogona ma e mafai ona faasesēina ai i tatou. E mafai ona matuā malolosi o tatou faalogona ma aafia ai o tatou lotofuatiaifo. Ua ta'ua i le Jeremia 17:9: "E sili ona faa'ole'ole le loto nai lo o mea uma, ma e matuā leaga lava. O ai sē e mafai ona iloa?" E ono amata ona tatou mafaufau e sa'o se mea e ui lava e sesē. O se faaa'oa'oga, a o le'i avea Paulo ma Kerisiano, sa matuā faasauā o ia i tagata o le Atua ma manatu e sa'o lana gaoioiga sa fai. Sa manatu o ia e lelei lona lotofuatiaifo. Ae na mulimuli ane faapea mai o ia: "O Ieova e na te faamasinoina a'u." (1 Korinito 4:4; Galuega 23:1;

7. Aiseā e mafai ai ona sesē o tatou lotofuatiaifo i nisi taimi?

8. (a) E faapefea i o tatou faalogona ona aafia ai o tatou lotofuatiaifo? (e) O le ā e ao ona tatou fesili ifo ai a o le'i faia se gaoioiga?

2 Timoteo 1:3) Ina ua a'oa'oina e Paulo le finagalo o Ieova e faatatau i lana gaoioiga, na ia iloa ai e mana'omia ona ia fai ni suiga. O lea la, a o tatou le'i faia se gaoioiga, e ao ona fesili ifo, 'O le ā e finagalo Ieova ou te faia?'

⁹ Pe a e alofa i se tasi, e te lē mana'o e fai se mea e lē fiafia ai o ia. Talu ai e tatou te alolofa iā Ieova, e tatou te lē faia la se mea e lē fiafia i ai lona finagalo. E ao ona matuā faamalosia lo tatou matata'u ia lē faatigā i le finagalo o Ieova. Ua tatou iloa lenei mea mai i le faaa'oa'oga a Neemia. E na te le'i faaogāina lona tulaga o se kovana ina ia maua ai ni ana 'oa. Aiseā? Na ia ta'ua "ona o le mata'u i le Atua." (Neemia 5:15) E le'i mana'o Neemia e fai se mea e faatigā ai le finagalo o Ieova. E tatou te lē manana'o fo'i e fai se mea sesē e faatigā ai i le finagalo o Ieova. E tatou te a'oa'oina mea e fiafia i ai Ieova e ala i le faitau o le Tusi Paia.—Taga'i i le Faaopoopoga 6.

¹⁰ O se faaa'oa'oga, e ono filifili se Kerisiano pe inu i le 'ava malosi pe leai. O ā mataupu silisili o le a fesoasoani e na te faia ai se filifiliga lelei? O nisi nei o mataupu silisili: E lē o fa'asā i le Tusi Paia le inu i le 'ava malosi. O loo ta'ua ai o le uaina o se meaalofa mai i le Atua. (Salamo 104:14, 15) Ae na fetalai Iesu i ona soo ia aua le "inu tele." (Luka 21:34) Na ta'u atu fo'i e Paulo i Kerisiano ia 'alofia "patī e lē taupulea ma onāga." (Roma 13:13) Na ia ta'ua o ē e onanā "e lē fai mo latou tofi le malo o le Atua."—1 Korinito 6:9, 10.

9. O le ā e uiga i ai le mata'u i le Atua?

10, 11. O ā mataupu silisili o le Tusi Paia e fesoasoani e tatou te faia ai filifiliga lelei e faatatau i le 'ava malosi?

11 E ono fesili ifo se Kerisiano: ‘O le ā le aogā o le ‘ava malosi iā te a’u? Po ou te mana’omia ina ia to’a-filemu ai? Po ou te inu le ‘ava malosi ina ia maua ai le lagona mautinoa? Pe e mafai ona ou pulea le tele o la’u inu ma le tele o le taimi e inu ai? Pe e mafai ona matou fiafia ma a’u uō e tusa lava pe e leai se ‘ava malosi e inuina?’ E mafai ona tatou tatalo atu iā Ieova mo se fesoasoani e fai ai filifiliga atamai. (**Faitau le Sallamo 139:23, 24.**) O le manatunatu i mataupu silisili o le Tusi Paia ma iloilo ma le faamaoni i tatou lava, ua a’oa’oina ai o tatou lotofuatiaifo ia gaua’i i mataupu silisili o le Tusi Paia. Ae se’i o tatou iloilo nisi vala e aofia ai.

AISEĀ E TATOU TE MANATU MAMAFĀ AI I LOTOFUATIAIFO O ISI?

12 E lē tutusa uma lotofuatiaifo o tagata. Atonu e faataga oe e lou lotofuatiaifo e faia se mea e lē mafai e le isi tagata ona fai. O se faaa’oa’oga, atonu e te filifili e inu le ‘ava malosi, ae ua manatu le isi tagata e lē tatau ona ia inuina. Aiseā e ono eseese ai manatu o tagata e faatatau i lenei mataupu?

13 E masani ona taa’ina faalogona o se tasi e faatatau i se mea ona o le vaipanoa na ola a’e ai, le auala e manatu ai lona aiga i lenā mea, o mea e tutupu i lona olaga, ma isi vala. Pe a oo mai i le ‘ava malosi, atonu e filifili se tasi sa iai lona vaivaiga i le puleaina o le inu, e aua ne’i

* Ua faapea mai le tele o foma’i, o tagata e lē pulea le inu ‘ava malosi, e matuā faigatā ona pulea le tele o la latou inu. Ua fautua mai foma’i e tatau i na tagata ona tuu le inu i le ‘ava malosi.

12, 13. Aiseā atonu e eseese ai o tatou lotofuatiaifo ma isi? E faapefea ona tatou taulima nei eseesea?

toe inu. (1 Tupu 8:38, 39) O lea, pe afai e te ofo atu le 'ava malosi i se tagata faapena ae ia teena, o le ā lau tali? Po o le a e ita? Po o le a e faatauana atu pea? Po o le a e taumafai e fesiligia le māfuaaga ua ia teena ai? E leai, talu ai e te manatu mamafa i lona lotofuatiaifo.

¹⁴ I aso o le aposetolo o Paulo, e i ai se mea na tupu e faaalua mai ai e mafai ona eseese lotofuatiaifo. Na faatau atu i le maketi nisi o aano o manu sa faaaogā i tapua'iga sesē ma ifoga i tupua. (1 Korinito 10:25) Na manatu Paulo e lē sesē ona faatau ma 'aina aano o nei manu. O lona manatu o mea'ai uma e aumai iā leova. Peita'i, sa ese le manatu o nisi o uso sa tapua'i muamua i tupua. Na latou manatu e sesē le aai i aano o nei manu. Pe na faapea ifo Paulo: 'E lē o afāina ai lo'u lotofuatiaifo. E iai la'u aiā tatau e 'ai ai so o se mea ou te mana'o i ai'?

¹⁵ E le'i mafaufau faapena Paulo. Na matuā tāua iā te ia faalogona o ona uso, o lea na ia lotomalie ai e lē amana'ia nisi o ana aiā tatau. Na faapea mai Paulo e lē tatau ona tatou "faafiafia i o tatou lava loto." Na ia toe faaopopo mai: "Auā e oo lava i le Keriso, na te le'i faafiafia i lona lava loto." (Roma 15:1, 3) I le pei o Iesu, sa sili atu ona manatu mamafa Paulo i isi nai lo o ia lava.—**Faitau le 1 Korinito 8:13; 10:23, 24, 31-33.**

¹⁶ Ae faapefea pe a faataga e le lotofuatiaifo o se tasi o ia e faia se mea e foliga mai e sesē iā i tatou? E tatau ona tatou faaeteete ia aua ne'i faitio ma mau-maututū e sa'o i tatou ae sesē lenā tagata. (**Faitau le**

14, 15. O le ā se mea na tupu i aso o Paulo? O ā fautuaga aogā na avatu e Paulo?

16. Aiseā e lē tatau ai ona tatou faamasino i lo tatou uso ona ua faataga o ia e lona lotofuatiaifo e fai se mea?



E mafai ona fesoasoani se lotofuatiaifo ua a'oa'oina e te filifili ai pe taumafa i le 'ava malosi pe leai

Roma 14:10.) Na tuu mai e Ieova lo tatou lotofuatiaifo ina ia faamasino ai i tatou lava, ae lē o isi. (Mataio 7:1) E tatou te lē manana'o e faatupu ni fevaevaea'iga i le faapotopotoga ona o o tatou manatu. Nai lo o lea, e tatou te sa'ili auala e faatupu ai le alofa ma le autasi. —Roma 14:19.

E TATOU TE MAUA AOGĀ ONA O SE LOTOFUATIAIFO LELEI

¹⁷ Na tusi Peteru: “Ia taofimau i se lotofuatiaifo lelei.” (1 Peteru 3:16) Pe a faaauau ona lē amana'ia

17. O le ā ua tupu i lotofuatiaifo o nisi tagata?

O se lotofuataiaifo lelei
e mafai ona ta'ita'ia
ai i tatou i le ola,
ma maua ai le olioli
ma le filemu o le loto



e tagata mataupu silisili a Ieova, o le a i'u ina lē toe gaoioi o latou lotofuataiaifo. Na faapea mai Paulo, o lenā ituaiga o lotofuataiaifo ua 'faailogaina i le u'amea aasa.' (1 Timoteo 4:2) Pe na e matuā mū leaga i se afi? Pe a tupu se mea faapena, e matuā ma'ila'ila ai lou pa'u ma e lē toe lagona ai se mea. Pe afai e faaauau ona faia e se tasi mea sesē, e mafai ona "faailogaina" lona lotofuataiaifo ma lē toe gaoioi ai.

18 Pe a tatou lagona le nofosala, atonu ua ta'u mai e o tatou lotofuataiaifo ua tatou faia se mea sesē. E mafai ona uuna'ia ai i tatou ia iloa le mea na tatou faia ma lē toe faia ai. E ao ona tatou a'oa'o ni lesona mai i a

18, 19. (a) O le ā ua ta'u mai iā i tatou pe a tatou lagona le nofosala ma le faalumaina? (e) O le ā e mafai ona tatou faia pe a lagona le nofosala i agasala ua tatou salamō mai ai?



tatou mea sesē ina ia lē toe faia ai. O se faaa'oa'oga, e ui sa agasala le tupu o Tavita, ae na uuna'ia o ia e lona lotofuatiaifo ia salamō. Na 'ino'ino o ia i lana mea na fai ma maumaua'i e usiusita'i iā Ieova i le lumana'i. O mea na tutupu iā Tavita na mafai ai ona ia faapea mai, o Ieova 'e lelei ma ua nofosauni e faamagalo.' —Salamo 51:1-19; 86:5; taga'i i le Faaopoopoga 7.

19 Ae atonu e lagona pea e se tasi le nofosalala ona o se agasala na ia faia i le taimi ua te'a, e ui ua salamō o ia. E tigā faalogona o le nofosalala ma e mafai ona lagona ai e se tasi le lē aogā. Afai o ou lagona na i nisi taimi, ia manatua e lē mafai ona e toe suia le mea na tupu. E tusa pe na e malamalama lelei pe leai i le mea e sa'o ma le mea e sesē, ae ua faamagalo atoatoa oe e Ieova, ma ua soloiesea na agasala. Ua e mamā i

le silafaga a Ieova ma iloa ua e faia le mea sa'ou. E ono ta'usala pea oe e lou loto, ae ua faapea mai le Tusi Paia: "E sili atu le Atua i o tatou loto." (**Faitau le 1 Ioane 3:19, 20.**) O lona uiga, e mafai ona fesoasoani lona alofa ma lana faamagaloga ina ia aveesea ai so o se lagona nofosala pe faalumaina o loo iā i tatou. Ia e mauintinoa ua faamagalalo oe e Ieova. Pe a talia e se tasi le faamagaloga a Ieova, o le a ia maua se lotofuatiaifo filemu ma fiafia i le auunaga i le Atua.—1 Korinito 6:11; Eperu 10:22.

20 Ua saunia lenei tusi e fesoasoani iā te oe ina ia a'oa'oina lou lotofuatiaifo, ma mafai ona lapata'ia ma puipuia ai oe i nei aso faigatā. O le a fesoasoani fo'i iā te oe e faatatau mataupu silisili o le Tusi Paia i vala eseese o lou olaga. E lē o aumaia i lenei tusi se lisi o tulafono o mea e fai i tulaga uma. Ua tatou ola e tusa ma "le tulafono a le Keriso," lea e faavae i mataupu silisili a le Atua. (Kalatia 6:2) E tatou te lē faia ni faamolemolega o le faia o mea sesē ona o le leai o se tulafono patino i se mataupu. (2 Korinito 4:1, 2; Eperu 4:13; 1 Peteru 2:16) Nai lo o lea, ia faaogā lo tatou sa'olotoga e faaalua atu ai lo tatou alolofa mo Ieova.

21 Pe a tatou mafaufau loloto i mataupu silisili o le Tusi Paia ma faatatau, ua a'oa'oina ai i tatou e 'faaogā o tatou mafaufau' ma ia mafaufau e pei o Ieova. (Eperu 5:14) O le i'uga, o le a maua se lotofuatiaifo ua a'oa'oina e ta'ita'ia ai i tatou i le ola, ma fesoasoani ina ia tatou tumau ai i le alofa o le Atua.

20, 21. (a) O le ā o le a fesoasoani ai lenei tusi iā te oe? (e) O le ā le sa'olotoga ua tuuina mai e Ieova iā i tatou? E faapefea ona tatou faaogā?

1 O TATOU LOTOFUATIAIFO O SE MEAALOFA MAI I LE ATUA

‘Ua faasalaina pe ta’utonuina i latou i o latou lava manatu.’—Roma 2:14, 15

E mafai faapefea ona fesoasoani lou lotofuatiaifo iā te oe?

Salamo 139:23, 24

O o tatou lotofuatiaifo o se lagona e i totonu o i tatou e iloa ai le mea sa’o ma le mea sesē. E fesoasoani ia faamaoni ai iā i tatou lava e faatatau i o tatou mafau-fauga ma faalogona loloto.

1 Samuelu 24:5;

Iopu 27:6

E mafai e o tatou lotofuatiaifo ona ta’ita’ia i tatou i le lelei ae aveese mai i le leaga. E mafai ona tatou lagona ai le nofosala pe a faia se filifiliga sesē, pe lagona fo’i le fiafia pe a faia se filifiliga atamai.

2 E AO ONA A'OA'OINA O TATOU LOTOFUATIAIFO

“E sili ona faa’ole’ole le loto nai lo o mea uma, ma e matuā leaga lava.”—Jeremia 17:9

O le ā ua tuuina mai e leova ina ia fesoasoani e a’oa’oina ai o tatou lotofuatiaifo?

Roma 9:1;

1 Korinito 4:4

E mafai ona sesē o tatou lotofuatiaifo lē lelei atoa-toa. E mana’omia ona ta’i-ta’ia i le agaga paia ae lē o tatou faalogona.

Eperu 5:14;

1 Peteru 3:16

Ua tatou a’oa’oina mai i le Tusi Paia le finagalo o leova, lea e fesoasoani e tatou te iloa ai le mea e sa’o ma le mea e sesē, ma fesoasoani e a’oa’oina ai o tatou lotofuatiaifo.

3 E LĒ TUTUSA UMA LOTOFUATIAIFO O TAGATA

“Aua ne’i sa’ilia e se tasi lona lava lelei,
a ia faaauau ona sa’ili le lelei o isi.”

—1 Korinito 10:23, 24

E faapefea ona faaalua lo tatou manatu mamafa i lotofuatiaifo o isi?

Roma 15:1, 3

E lē tutusa le auala e gaoioi ai lotofuatiaifo o tagata. Atonu e faataga oe e lou lotofuatiaifo e faia se mea e lē mafai e le isi tagata ona fai.

1 Korinito 10:31-33

Na sili ona manatu mamafa Paulo i faalogona o ona uso ma tuafāfine nai lo o ia lava. Sa sili ona tāua iā te ia o latou faalogona nai lo o ia.

Roma 14:10, 19

Na tuu mai e leova o tatou lotofuatiaifo ina ia faamasino ai i tatou lava, ae lē o isi. E tatau ona tatou faateete ia aua ne’i mau-maututū e sa’o i tatou ae sesē isi.

4 E FESOASOANI MAI IEOVA IA TATOU MAUA SE LOTOFUATIAIFO LELEI

“Ua tatou mautinoa i o tatou loto e alofa o ia iā i tatou . . . auā e sili atu le Atua i o tatou loto, e na te silafia fo’i mea uma lava.”

—1 Ioane 3:19, 20

Aiseā e lē tatau ai ona tatou lotovaivai pe a lagona pea le nofosala ona o se agasala sa fai i le taimi ua te’a?

Salamo 86:5;
1 Korinito 6:11

E ui ua tatou salamō mai i agasala na faia i le taimi ua te’a, ae e matuā tigā faalagona o le nofosala ma e lagona ai le lē aogā. Ae e lē mafai ona tatou suia mea ua te’a. Ua faamagalo i tatou e leova, ma ua soloi-esea na agasala. Ua mamā i tatou i le silafaga a leova.

Kalatia 6:2;
1 Peteru 2:16

O le “tulafono a le Keriso,” e faavae i mataupu silisili o le Tusi Paia ae e lē o tulafono. E tusa pe e leai se tulafono e faatatau i se mataupu, ae e lē tatau i se Kerisiano ona sa’ili i se auala e faia ai se mea sesē.

IA FILIFILI UŌ E ALOLOFA I LE ATUA

“O lē e savali ma tagata atamamai, e atamai ai o ia.”

—FAATAOTO 13:20.

PO UA e mātauina le auala e mata’i ai e se pepe ona mātua? E tusa lava pe e le’i tautala, ae e na te mātauina mea uma lava e vaai ma faalogo i ai. A o tupu-tupu a’e, e amata ona ia faata’ita’i i ona mātua. E faapena fo’i tagata matutua, e latou te ono mafau-fau ma gaoioi e pei o tagata e latou te faifaimea faatasi i le tele o taimi.

² Ua tatou a’oa’oina mai i le Faataoto 13:20: “O le e savali ma tagata atamamai, e atamai ai o ia.” O le “savali” ma se tasi, e lē uiga atu i le na o le faatasitasi ma lenā tagata, ae e aofia ai le filifili e faaalu le taimi faatasi ma ia. Ua faapea mai se faitofā o le Tusi Paia, o le savavali ma se tasi e aofia ai le alofa ma faaloga māfana i lenā tagata. E taa’ina i tatou i tagata e tele ina tatou faifaimea faatasi, aemaise lava pe afai e tatou te māfana atu iā i latou.

³ E mafai ona tatou aafia i se auala lelei pe leaga mai i a tatou uō. Ua faaauau mai le Faataoto 13:20: “O lē e faifaimea faatasi ma tagata vālea, e leaga ai

1-3. (a) O le ā ua tatou a’oa’oina mai i le Faataoto 13:20? (e) Aiseā e ao ai ona filifili ma le atamai a tatou uō?

lava o ia.” I le gagana Eperu, o le “faifaimea faatasi” ma se tasi e uiga atu i le “faauō” ma lenā tagata. (Faataoto 22:24; Faamasino 14:20) O uō e alolofa i le Atua, o le a latou faalaeiau i tatou e tumau faamaoni iā te ia. Se’i o tatou iloilo po o ai ituaiga tagata e filifilia e Ieova e avea ma ana uō, ina ia fesoasoani e filifili ai ma le potō a tatou uō.

O AI UŌ A LE ATUA?

⁴ Ua tuuina mai e Ieova o le Pule Silisili Ese i le aoao o mea, iā i tatou le avanoa e avea ai ma ana uō. O se faaeaga tautele lea. E filifili ma le faaeteete e Ieova ana uō. E na te filifilia i latou e alolofa ma faatuatua iā te ia. Se’i manatu iā Aperamo. Na nofo-sauni o ia e faia so o se mea mo le Atua. Sa faaalua pea e Aperamo lona faamaoni ma le usiusita’i. Na lotomalie o ia e ofo atu lona atalii o Isaako e fai ai le taulaga. Na faatuatua Aperamo “e mafai e le Atua ona toe faatūina o ia mai i le oti.” (Eperu 11:17-19; Kenese 22:1, 2, 9-13) Na faamaoni ma usita’i Aperamo, ma na ta’ua o ia e Ieova o ‘lana uō.’—Isaia 41:8; Iakopo 2:21-23.

⁵ E tautele i le silafaga a Ieova ana uō. E sili atu ona tāua i ana uō lo latou faamaoni iā te ia nai lo o se isi lava mea. (**Faitau le 2 Samuelu 22:26.**) E latou te faamaoni ma usiusita’i ona e alolofa iā Ieova. Ua ta’ua i le Tusi Paia, “e mafuta vavalalata atu o Ia i ē ua amio sa’o,” o i latou ia e usiusita’i iā te ia. (Faata-

4. Aiseā o se faaeaga tautele ai le avea ma uō a le Atua? Aiseā na ta’ua ai e Ieova Aperamo o ‘lana uō’?

5. O ā faalogona o Ieova iā i latou e faamaoni iā te ia?

oto 3:32) E valaaulia e Ieova ana uō e avea ma mālō faapitoa i lona “fale’ie.” E na te valaaulia i latou e tapua’i ma tatalo atu iā te ia i so o se taimi.—Salamo 15:1-5.

⁶ Na fetalai Iesu: “Afai e alofa mai se tasi iā te a’u, e tausia e ia a’u upu, ma e alofa fo’i lo’u Tamā iā te ia.” (Ioane 14:23) O lea, ina ia avea ma uō a Ieova, e ao ona tatou alolofa iā Iesu ma faia mea ua ia a’oa’o-ina ai i tatou. O se faaa’oa’oga, e tatou te usiusita’i i faatonuga a Iesu e tala’i le tala lelei ma faia isi ma soo. (Mataio 28:19, 20; Ioane 14:15, 21) Talu ai e tatou te alolofa iā Iesu, o lea e tatou te “mulimulitu’i ai i ona tulaga aao.” (1 Peteru 2:21) E fiafia le finagalo o Ieova pe a silasila mai ua tatou faia le mea sili e faaa’oa’o ai i lona Alo e ala i upu ma gaoioiga.

⁷ O uō a Ieova o i latou e faatuatua, faamaoni, usiusita’i, ma alolofa i lona Alo. Pe e tatou te filifilia fo’i ituaiga uō e pei o uō a Ieova? Pe afai e faaa’oa’o au uō iā Iesu ma tō’aaga e a’oa’o isi e uiga i le Malo o le Atua, o le a latou fesoasoani iā te oe e avea o se tagata lelei ma tumau faamaoni iā Ieova.

LESONA MAI I FAAA’OA’OGA I LE TUSI PAIA

⁸ Ua tatou faitau i le tele o faauōga i le Tusi Paia, e pei o le faauōga a Ruta ma le tinā o lona to’alua, o Naomi. E eseese atunuu ma talaaga o nei fafine, ma e matua mamao atu Naomi iā Ruta. Ae na avea i la’ua ma uō mamae ona sa alolofa uma i la’ua iā

6. E faapefea ona faaalua e tatou te alolofa iā Iesu?

7. Aiseā e ao ai ona faamautinoa o a tatou uō o uō a Ieova?

8. O le ā se mea e te fiafia ai i le faauōga a Ruta ma Naomi?

leova. Ina ua mana'ō Naomi e tuua le nuu o Moapi ae toe fo'i i Isaraelu, sa "pipii atu pea Ruta iā te ia." Na faapea atu Ruta iā Naomi: "O lou nuu e fai ma o'u nuu, ma o lou Atua, o lo'u Atua fo'i lea." (Ruta 1:14, 16) Na matuā agalelei Ruta iā Naomi. Ina ua la taunuu i Isaraelu, sa galue mamafa Ruta e tausia lana uō. Na matuā alofa Naomi iā Ruta ma avatu iā te ia ni fautuaga aogā. Na usita'i Ruta iā Naomi, ma o le i'uga na la maua le tele o faamanu-iaga.—Ruta 3:6.

⁹ O Tavita ma Ionatana o se isi faaa'oa'oga o ni uō lelei sa faamaoni iā leova. E tusa ma le 30 tausaga e matua ai Ionatana iā Tavita, ma o Ionatana o le tupu e sosoo ai o Isaraelu. (1 Samuelu 17:33; 31:2; 2 Samuelu 5:4) Ae ina ua iloa e Ionatana ua filifilia e leova Tavita e avea ma tupu, e le'i lotoleaga ai o ia pe faatautavā. Nai lo o lea, sa ia faia mea uma e lagoonaina ai Tavita. O se faaa'oa'oga, ina ua lamatia le ola o Tavita, na fesoasoani Ionatana "ia faamalosia . . . lona faatuatua i le Atua." Na oo lava fo'i ina lamatia lona ola ona o Tavita. (1 Samuelu 23:16, 17) Sa avea fo'i Tavita o se uō faamaoni. Na ia folafola atu o le a ia tausia le aiga o Ionatana, ma sa ia tausisi i lenā folafolaga e oo lava ina ua maliu Ionatana.—1 Samuelu 18:1; 20:15-17, 30-34; 2 Samuelu 9:1-7.

¹⁰ O Sataraka, Mesako, ma Apeteniko, o ni uō talavou Eperu e to'atolu na aveesea mai i o latou aiga a o lāiti. A o mamao ese mai i o latou aiga, sa fesoaso-

9. O le ā ua tatou a'oa'oina mai i le faauōga a Tavita ma Ionatana?

10. O le ā ua e a'oa'oina e faatatau i faauōga mai i le faaa'oa'oga a talavou Eperu e to'atolu?

ani le tasi i le isi ina ia tutumau faamaoni iā Ieova. Mulimuli ane ina ua avea ma tagata matutua, na tofotofoina lo latou faatuatua ina ua faatonuina e le tupu o Nepukanesa ia tapua'i i se tupua auro. Na mumusu Sataraka, Mesako, ma Apeteniko e tapua'i i le tupua ma faapea atu i le tupu: "E matou te lē au-auna i ou atua ma e matou te lē tapua'i fo'i i le tupua auro ua e faatūina." Sa tumau faamaoni nei uō e to'atolu i lo latou Atua ina ua tofotofoina lo latou faatuatua.—Tanielu 1:1-17; 3:12, 16-28.

¹¹ Ina ua feiloa'i Paulo i le talavou o Timoteo, na ia iloa e alofa Timoteo iā Ieova ma e matuā manatu mamafa i le faapotopotoga. O lea na a'oa'o ai e Paulo Timoteo ia fesoasoani i uso ma tuafāfine i le tele o vaipanoa eseese. (Galuega 16:1-8; 17:10-14) Sa matuā galue mamafa Timoteo, o lea na faapea mai ai Paulo: "Na ma pologa faatasi i le tala'ia o le tala lelei." Na iloa e Paulo "e manatu mamafa" Timoteo i uso ma tuafāfine. A o la galulue mamafa e au-auna iā Ieova, na avea ai Timoteo ma Paulo o ni uō mamae.—Filipi 2:20-22; 1 Korinito 4:17.

LE AUALA E FILIFILI AI A TATOU UŌ

¹² I totonu o le faapotopotoga, e mafai ona tatou a'oa'o mai i uso ma tuafāfine ma fesoasoani le tasi i le isi ia tumau faamaoni. (**Faitau le Roma 1:11, 12.**) Ae e tatau fo'i ona tatou faaeteete pe a filifilia tagata

11. E faapefea ona tatou iloa na avea Paulo ma Timoteo o ni uō mamae?

12, 13. (a) Aiseā e ao ai ona filifili ma le faaeteete a tatou uō, e oo lava i totonu o le faapotopotoga? (e) Aiseā na aumaia ai e Paulo le lapata'iga o loo i le 1 Korinito 15:33?

e avea ma a tatou uō mamae i le faapotopotoga. O se mea matagofie le eseese o aganuu ma talaaga a o tatou uso ma tuafāfine. O nisi e fou i le faapotopotoga, ae o nisi ua tele tausaga o auaua iā Ieova. E umi se taimi e tuputupu a'e ai le faiā a se tasi ma Ieova, e pei ona umi le taimi e faatalitali ai ia pula se fua o se laau 'aina. O lea, e ao ona tatou faaalua le onosa'i ma le alofa o le tasi i le isi, ma filifili ma le atamai a tatou uō i taimi uma.—Roma 14:1; 15:1; Eperu 5:12–6:3.

E mafai ona e
maua ni uō lelei
e alolofa iā Ieova



13 E iai taimi e ono tula'i mai ai ni faafitauli matuiā i le faapotopotoga, ma e mana'omia ai ona tatou matuā faaeteete. Atonu ua faia e se uso po o se tuafafine se gaoioiga ua ta'ua i le Tusi Paia e sesē. Po ua amata fo'i ona atia'e e se tasi se uiga faitio e ono faaleagaina ai le faapotopotoga. E lē faate'ia ai i tatou auā e oo fo'i i le ulua'i senituri sa iai faafitauli i le faapotopotoga i nisi taimi. Na lapata'ia e Paulo Kerisiano i lenā vaitaimi: "Aua ne'i faasesēina outou. O aumea leaga e faaleagaina ai mea lelei ua masani ai tagata." (1 Korinito 15:12, 33) Na lapata'ia fo'i e Paulo Timoteo ia faaeteete i ē e na te filifilia e avea ma ana uō mamae. E tatau fo'i ona tatou faia faapea i aso nei.—**Faitau le 2 Timoteo 2:20-22.**

14 O la tatou faiā ma Ieova o se mea e aupito i sili ona tāua, ma e tatau ona tatou puipuimalu i ai. O lea, ia 'alofia le māfana atu i se tasi e ono faavaivaia ai lo tatou faatuatua ma faaleagaina ai lenā faiā. E lē mafai ona tatou fufui le omomi i se vai palapalā ae faatalitalia o le a tumu i le vai mamā. E lē mafai fo'i la ona tatou faauō i ē e faia mea sesē, ae faatalitalia o le a faigofie ona tatou faia mea sa'o. E ao ona filifili ma le faaeteete a tatou uō mamae.—1 Korinito 5:6; 2 Tesalonia 3:6, 7, 14.

15 E te maua tagata e alolofa moni iā Ieova i le faapotopotoga. E mafai ona avea i latou ma au uō mamae. (Salamo 133:1) Aua e te faauō na o tagata o

14. E faapefea i uō e tatou te filifilia ona aafia ai la tatou faiā ma Ieova?

15. O le ā e mafai ona e faia ina ia maua ai ni uō lelei i le faapotopotoga?

lau tupulaga po o i latou e tutusa o outou talaaga. Ia manatua e matua mamao Ionatana iā Tavita, ma e matuā la'itiiti lava Ruta iā Naomi. E ao ona tatou mulimuli i le fautuaga a le Tusi Paia: "Ia faalautele atu o outou loto." (2 Korinito 6:13; **faitau le 1 Peteru 2:17.**) O le tele e te faaa'oa'o ai iā Ieova, o le atili fia uō atu fo'i lenā o isi iā te oe.

PE A TULA'I MAI FAAFITAU LI

16 E eseese uiga, manatu, ma auala e faia ai mea e tagata i totonu o aiga ta'itasi. E faapena fo'i i se faapotopotoga. O uiga eseese o tagata ua matagofie ai le olaga, ma e tele ni lesona e tatou te a'oa'oina mai ai. Ae o nisi taimi o lenā eseese e ono sesē ai la tatou vaai i uso ma tuafāfine ma lē fiafia ai iā i latou. E tatou te ono feita ma tigā ai o tatou faalogona. (Faataoto 12:18) Pe e tatau ona avea na faafitauli ma pogai e faavaivaia pe faaesea ai i tatou mai i le faapotopotoga?

17 E leai. E tusa pe faatigā mai se tasi iā i tatou, ae e lē tatau lava ona faaesea i tatou mai i le faapotopotoga. E lē o Ieova na faatigā mai iā i tatou. Na ia tuuina mai le ola ma isi mea uma. Ua alagatau ona tatou alolofa ma faamaoni iā te ia. (Faaaliga 4:11) O le faapotopotoga o se meaalofa mai iā Ieova e feosoani e faamalosia ai lo tatou faatuatua. (Eperu 13:17) E lē tatau ona tatou teena lana meaalofa ona o le faatigā mai o se tasi iā i tatou.—**Faitau le Salamo 119:165.**

16, 17. O le ā e tatau ona tatou 'alofia pe a faatigā mai se tasi o le faapotopotoga?

18 E tatou te alolofa i o tatou uso ma tuafāfine ma manana’o e tausia le filemu ma i latou. E lē faatalitalia e Ieova tagata ia lelei atoatoa, e faapena fo’i la i tatou. (Faataoto 17:9; 1 Peteru 4:8) E tatou te faia uma mea sesē, ae o le alofa o le a fesoasoani iā i tatou e faaauau ai ona “fefaamagaloa’i ma le lototoa.” (Kolose 3:13) O le alofa e taofia ai i tatou mai le avea o se feeseesea’iga itiiti e fai ma faafitauli telē. E faigatā ona faagalo pe a faatigā mai se tasi iā i tatou. E faigofie ona teuloto le ita i lenā tagata. Ae e pau le mea e i’u i ai e na o le lē fiafia ma le lototigā. Ae i le isi itu, pe a tatou faamagalo atu i se tasi na faatigā mai, e maua ai le filemu o le mafaufau, autasi o le faapotopotoga, ae e sili ona tāua o le a maua ai se faiā lelei ma Ieova.—Mataio 6:14, 15; Luka 17:3, 4; Roma 14:19.

PE A FAATE’AINA SE TASI

19 O se aiga e iai le alofa, e saosaolaumea sui uma ina ia maua le fiafia i le aiga. Ae se’i faapea ua iai se tasi o le aiga e fouvale. E taumafai pea tagata uma o le aiga e fesoasoani iā te ia, ae e na te lē taliaina le fesoasoani. E ono filifili o ia e tuua le aiga, pe faatonu fo’i e le ulu o le aiga e alu ese. E mafai ona tupu se mea faapena i le faapotopotoga. E ono filifili se tasi e faia pea mea e lē fiafia i ai Ieova ma lamatia ai le faapotopotoga. E na te teena le fesoasoani ma

18. (a) O le ā e fesoasoani iā i tatou e tausia ai le filemu ma uso ma tuafāfine? (e) Aiseā e tatau ai ona tatou faamagalo atu i isi?

19. O le ā le taimi e ao ona faamuta ai ona tatou faifaimea faatasi ma se tasi o le faapotopotoga?

faaaliala i ana gaoioiga e lē o toe mana’o e avea ma sui o le faapotopotoga. E ono filifili o ia e tuua le faapotopotoga pe e ono faate’aina fo’i. Pe a tupu lenei tulaga, ua ta’ua manino i le Tusi Paia ia “aua ne’i outou toe faifaimea faatasi” ma lenā tagata. (**Faitau le 1 Korinito 5:11-13; 2 Ioane 9-11**) E matuā faigatā lenei tulaga pe afai o sa tatou uō po o se tasi o le aiga. Ae i se tulaga faapea, e tatau ona sili atu ona malosilaga lo tatou faamaoni iā Ieova nai lo o se isi lava.—Taga’i i le Faaopoopoga 8.

20 O le faate’aina o se faatulagaga alofa mai iā Ieova. E puipuia ai le faapotopotoga mai i ē e lē amana’ia tapulaa a Ieova. (1 Korinito 5:7; Eperu 12:15, 16) E fesoasoani iā i tatou e faaaliala ai le manatu mamafa i le suafa paia o Ieova, ana tapulaa maualuluga, ma le alofa mo ia. (1 Peteru 1:15, 16) O le faatulagaga o le faate’aina e faaaliala ai le alofa mo lē ua lē o toe avea ma sui o le faapotopotoga. O lenei a’o-a’iga malosilaga e ono fesoasoani iā te ia e iloa ai lana mea sesē na fai, ma uuna’ia ai o ia e fai se suiga. Ua toe fo’i mai iā Ieova le to’atele sa faate’aina, ma ua talia ma le māfana i le faapotopotoga.—Eperu 12:11.

21 E iai aafiaga o a tatou uō iā i tatou. O le mea lea e tāua ai ona filifili ma le faaeteete a tatou uō. Pe afai e tatou te alolofa i ē e alofa i ai Ieova, o le a si’omia la i tatou i tagata e mafai ona fesoasoani mai ia tatou faamaoni e faavavau iā Ieova.

20, 21. (a) E faapefea i le faatulagaga o le faate’aina ona faaaliala ai le alofa? (e) Aiseā e tāua ai ona filifili ma le atamai a tatou uō?

1 E MAFAI ONA AVEA OE MA UŌ A IEOVA

‘Na ta‘ua Aperaamo o le uŌ a Ieova.’

—Iakopo 2:23

E faapefea ona avea i tatou ma uŌ a Ieova?

2 Samuelu 22:26;

Salamo 15:1-5;

Ioane 14:21

E filifili e Ieova uŌ e alo-
lofa, usiusita‘i, ma faa-
maoni iā te ia.

Faataoto 13:20;

1 Korinito 15:33;

2 Timoteo 2:22

E masani ona tatou pei
o tagata e tatou te faifai-
mea faatasi.

2 E TATAU ONA TATOU FILIFILI UŌ E ALOLOFA IĀ IEOVA

“E mafuta vavalalata atu o Ia i ē ua amio sa’o.”—Faataoto 3:32

E faapefea ona filifili ma le atamai a tatou uō?

Roma 1:11, 12;

2 Korinito 6:13;

1 Peteru 2:17

E ono eseese aganuu ma talaaga o a tatou uō. O le itu tāua ia alolofa a tatou uō iā leova.

Ruta 1:14, 16;

1 Samuelu 18:1;

Filipi 2:20-22

E tele faaa’oa’oga o uō lelei o loo ta’ua i le Tusi Paia.

3 IA AVEA OE MA ITUAIGA UŌ E FINAGALO I AI IEOVA

“O le uō moni e alofa i taimi uma,
ma o ia o se uso ua fanau mo taimi
o puapuaga.”—Faataoto 17:17

**O le ā e mafai ona tatou faia pe a tupu se
feeseesea’iga ma sa tatou uō?**

Salamo 133:1;

Mataio 6:14, 15;

Roma 14:19

la tausolomua e tausia le
filemu ma faatumauiina le
autasi.

Faataoto 17:9;

Kolose 3:13;

1 Peteru 4:8

O le alofa e taofia ai i tatou
mai le avea o se feeseese-
a’iga itiiti e fai ma faafita-
uli telē. O le a fesoasoani
iā i tatou e faamagalo atu
ma faamaoni.

Salamo 141:5;

Faataoto 27:6

la manatua o le uō moni
e lē fefe e ta’u atu le mea
sa’o e faatatau iā te oe.

Faataoto 12:18; 18:24;

1 Ioane 3:16-18

la māfana atu i au uō e ala
i le avea o oe ma uō lelei.

4 O LE FAAMAONI E SILI ONA MALOSI O LO TATOU FAAMAONI IĀ IEOVA

“E moni, e foliga mai o a’oa’iga e lē o se mea e olioli ai i le taimi lenā, . . . peita’i, mulimuli ane e fua mai ai . . . le amiotonu.”

—Eperu 12:11

O le ā e ao ona tatou faia pe a filifili se uō e teena leova?

1 Korinito 5:11-13;

2 Ioane 9-11

Pe afai e filifili se tasi e faia pea mea leaga ma teena le fesoasoani, ua ia faaalia mai ai e lē o toe mana’o e avea ma sui o le faapopotoga.

1 Peteru 1:15, 16

O le faatulagaga o le faate’aina e faaalia ai le alofa mo leova, ma le manatu mamafa mo lona suafa ma ana tapulaa.

AISEĀ E FAAALOALO AI I LE PULE?

“Ia āva i ituaiga uma o tagata, ia alolofa i le ‘auuso atoa, ia matata’u i le Atua, ma ia āva i le tupu.”—1 PETERU 2:17.

ATONU e iai taimi na faatonu ai oe e ou mātua a o e la’itiiti, e faia se mea e te le’i mana’o e fai. E te alofa i ou mātua ma e te iloa e tatau ona e usita’i iā i la’ua. Ae atonu e lē o taimi uma na e **mana’o** ai e usita’i i ou mātua.

² Ua tatou iloa e alofa Ieova lo tatou Tamā iā i tatou. E na te tausia i tatou ma faamautinoa ua tatou maua mea uma e mana’omia ina ia olioli ai i le olaga. Ua ia aumaia ta’iala ina ia tatou taulau ai. O nisi taimi e na te faaaogāina isi tagata e aumaia ta’iala mo i tatou. E ao ona tatou faaaloalo i le pule a Ieova. (Faataoto 24:21) Ae aiseā e faigatā ai i nisi taimi ona tatou taliaina ta’iala? Aiseā ua faatonuina ai i tatou e Ieova ia mulimuli i ta’iala? E faapefea ona faaalua e tatou te faaaloalo i lana pule?—Taga’i i le Faaopoopoga 9.

AISEĀ E FAIGATĀ AI?

³ I le avea ai ma tagata, e iai faanaunauga fouvale iā i tatou. Ua moni lenei manatu talu mai ona agasala le

1, 2. (a) O ta’iala a ai e ao ona tatou mulimuli i ai? (e) O ā fesili o le a tatou iloiloina i lenei mataupu?

3, 4. Aiseā ua lē lelei atoatoa ai tagata? Aiseā e faigatā ai ona tatou taliaina ta’iala mai i isi?

ulua'i tamāloa ma le fafine, o Atamu ma Eva. E ui lava na lelei atoatoa ona faia i la'ua, ae sa la fouvale i le pule a le Atua. Talu mai lenā taimi, ua fananau mai tagata uma e lē lelei atoatoa. O lo tatou tulaga lē lelei atoatoa o se tasi lea o māfuaaga e faigatā ai ona tatou talia ta'iala mai iā Ieova ma tagata. O se isi māfuaaga ona e lē lelei atoatoa i latou ua faaogā e Ieova e aumaia ta'iala.—Kenese 2:15-17; 3:1-7; Salamo 51:5; Roma 5:12.

⁴ Talu ai e tatou te lē lelei atoatoa, e faigofie la ona iā i tatou le uiga faamaualuga. O le faamaualuga e faigatā ai ona tatou taliaina ta'iala. O se faaa'oa'oga, na filifilia e Ieova Mose e ta'ita'ia Ona tagata i Isaraelu anamua. Ae o Koru, o lē sa auauna iā Ieova mo le tele o tausaga, na faamaualuga o ia ma matuā lē faaloalo iā Mose. E ui sa ta'ita'ia e Mose tagata o le Atua, ae e le'i faamaualuga o ia. Na faamatalaina o ia o lē e sili ona agamalu i tagata uma i lenā vaitaimi. Ae e le'i talia e Koru le ta'ita'iga a Mose. Na oo lava ina ia faatalitonu se vaega to'atele o tagata ina ia aufaatasi ma ia e fouvale iā Mose. O le ā na tupu iā Koru ma le 'aufouvale? Na fasiotia uma i latou. (Numerā 12:3; 16:1-3, 31-35) Ua iai i le Tusi Paia le tele o faaa'oa'oga e a'oa'oina ai i tatou e mata'utia le faamaualuga.—2 Nofoaiga a Tupu 26:16-21; taga'i i le Faaopopoga 10.

⁵ Atonu ua e faalogo i le faaupuga, "O le pule e faaleagaina ai." A o faagasolo le talafaasolopito, ua faaogā sesē e le to'atele o tagata le pule ua tuuina atu i ai. (**Faitau le Failauga 8:9.**) O se faaa'oa'oga, o Saulo

5. Na faapefea ona faaogā sesē e nisi la latou pule?

o se tagata lelei ma lotomaulalo ina ua filifilia e Ieova e avea ma tupu o Isaraelu. Peita'i, na tuputupu a'e i lona loto le faamaualuga ma le lotoleaga, ma i'u ai ina ia faasauā iā Tavita o lē e lē sala. (1 Samuelu 9:20, 21; 10:20-22; 18:7-11) Mulimuli ane na avea Tavita ma tupu, ma o ia o se tasi o tupu e sili ona lelei i Isaraelu. Ae e iai le taimi na faaaogā sesē ai fo'i e Tavita lana pule. Na la faia feusua'iga ma Patesepa, o le avā a Uria, ona ia taumafai lea e nanā lana agasala e ala i le auina atu o Uria ina ia fasiotia i le taua.—2 Samuelu 11:1-17.

MĀFUAAGA E FAAALOALO AI I LE PULE A IEOVA

⁶ E tatou te faaaloalo i le ta'ita'iga mai iā Ieova ona e tatou te alolofa iā te ia. E tatou te manana'o e faafiafia Ieova ona e sili atu lo tatou alolofa iā te ia nai lo o se isi lava mea po o se isi tagata. (**Faitau le Faataoto 27:11; Mareko 12:29, 30.**) Talu mai le taimi na iai le ulua'i ulugalii i le faato'aga i Etena, ua mana'o Satani e fesiligia e tagata le pule a Ieova. E mana'o le Tiapolo ia tatou manatu e lē o iā Ieova le aiā e faatonu ai i tatou i le mea e fai. Ae ua tatou iloa e pepelo lenā manatu. Ua tatou ioe i upu o loo i le Faaaliga 4:11: "Ieova e, lo matou Atua, ua tatau lava oe ona e mauaina le viiga, ma le mamalu, ma le mana, auā na e foafoaina mea uma lava."

⁷ A o e la'ititi, atonu na a'oa'oina oe ia usita'i i ou mātua e tusa pe e te lē mana'o i ai. I se tulaga talitutura, e iai taimi e lē faigofie ai iā i tatou o auauna a Ieova ona ususita'i iā te ia. Peita'i, e tatou te alolofa ma faaaloalo iā Ieova, o lea e tatou te faia ai mea uma

6, 7. (a) O le ā e uuna'ia i tatou e fai ona o le alofa mo Ieova? (e) O le ā e fesoasoani iā i tatou e ususita'i ai e tusa lava pe e lē faigofie?

e mafai ina ia usiusita'i ai iā te ia. Na faataatia e Iesu se faaa'oa'oga mo i tatou. Na usita'i o ia iā Ieova e tusa lava pe e le'i faigofie. O le pogai lenā na ia faapea atu ai i lona Tamā: "E lē o lo'u loto, ae ia faia lou finagalo."—Luka 22:42; taga'i i le Faaopoopoga 11.

⁸ E eseese auala ua ta'ita'ia ai i tatou e Ieova i aso nei. O se faaa'oa'oga, ua ia aumaia iā i tatou le Tusi Paia. Ua ia saunia fo'i toeaina o le faapotopotoga. E tatou te faaalua le faaaloalo i le pule a Ieova pe a faaaloalo iā i latou ua ia faaaogāina e ta'ita'ia i tatou. Pe afai e tatou te teena la latou fesoasoani, o lona uiga ua tatou teena Ieova. E le'i māmā i le silafaga a Ieova le taimi na teena ai e Isaraelu Mose. Na silasila i ai Ieova e pei ua latou teena o ia.—Numerā 14:26, 27; taga'i i le Faaopoopoga 12.

⁹ Pe a tatou faaaloalo i le pule, e faaalua atu ai e tatou te alolofa fo'i i o tatou uso ma tuafāfine. Se'i mafaufau i le tulaga lenei. Pe a tupu se mala faalenatura, e masani ona galulue faatasi le vaega e saunia fesoasoani lavea'i ina ia faasaoina le to'atele o tagata e mafai ai. Ina ia galulue faatasi ma maua e tagata aogā mai i lenei vaega lavea'i, e tatau ona iai se tasi e faamaopoopoina ma e ao i sui ta'itasi ona mulimuli i faatonuga. O le ā e tupu pe afai e lē amana'ia e se tasi faatonuga ma fai lava le mea e mana'o i ai? E tusa pe e lelei lona faanaunauga, ae o lona teena o faatonuga e faapogaia ai faafitauli i lana vaega, ma atonu e tugā ai le lavea o se tasi. I se tulaga talitutusa, pe afai e tatou te lē mulimuli i le

8. O ā nisi o auala o loo ta'ita'ia ai i tatou e Ieova? (Taga'i i le pusa "Ia Faalogo i Fautuaga.")

9. E faapefea i le alofa ona uuna'ia ai i tatou ia mulimuli i ta'iala?

IA FAALOGO I FAUTUAGA

E MAI lea taimi i lea taimi, e ono aumai e se tasi iā i tatou se fautuaga e faavae i mataupu silisili o le Tusi Paia. O mā-fuaaga nei e tolu e ono faigatā ai ona talia se fautuaga. —Faataoto 19:20.

- **E tatou te manatu e lē fetau i le fautuaga iā i tatou.**
Atonu e tatou te manatu e lē o malamalama le tagata o loo fautua mai i lo tatou tulaga. (Eperu 12:5) Ae ia fesili ifo iā te oe, pe e i ai se māfuaaga lelei ua fautua mai ai lenā tagata. (Faataoto 19:3) Pe a e malamalama i le māfuaaga o le fautuaga, e ono faigofie ai ona e talia. —Faitau le Faataoto 4:13.
- **E tatou te lē fiafia i le auala na aumai ai le fautuaga.**
E na o se tagata e lelei atoatoa e mafai ona ia aumaia se fautuaga e lelei atoatoa i se auala e lelei atoatoa. (Roma 3:23; Iakopo 3:2) Nai lo o le ua’i atu la i le auala e aumai ai e se tasi se fautuaga, ia ua’i atu i le fautuaga ma mafau-fau i le auala e te faatatauina ai.
- **E tatou te manatu e lē mana’omia ni fautuaga ona ua tatou matutua ma ua lava le poto masani.** E oo lava i se tupu i Isaraelu anamua na ia maua fautuaga mai i perofeta, ositaulaga, ma isi i lona malo. (2 Samuelu 12:1-13; 2 Nofoaiga a Tupu 26:16-20) Pe a tatou taliaina ma le lotomaulalo fautuaga e faavae mai i le Tusi Paia, o le a fesoasoani e tatou te mafuta vavalalata atu ai iā leova. —Tito 3:2.

Ia manatua o le fautuaga e faavae mai i le Tusi Paia, o se meaalofo lenā mai iā leova, o lē e alofa ma finagalo ia tatou maua mea e sili ona lelei. Ia fai le mea sili e te mafaia ina ia talia ai ma faatatau fautuaga.—Eperu 12:6-11.



ta'ita'iga a Ieova ma i latou ua ia tuuina i ai se pule, e ono mafatia ai isi. Ae afai e tatou te usiusita'i iā Ieova, e faaalua atu ai lo tatou alolofa i le 'auuso ma faaaloalo i le faatulagaga a Ieova.—1 Korinito 12:14, 25, 26.

10 O so o se mea e faatonu i tatou e Ieova e fai e mo lo tatou lelei. Pe a tatou faaaloalo i le pule i o tatou aiga, i le faapotopotoga, ma a tatou feutaga'iga ma pule o malo, o le a aogā i tagata uma.—Teuteronome 5:16; Roma 13:4; Efeso 6:2, 3; Eperu 13:17.

11 O le malamalama i māfuaaga e finagalo ai Ieova ia tatou faaalua le faaaloalo i isi, e fesoasoani iā i tatou ia faia ai faapea. Se'i o tatou iloiloaina au'ili'ili auala e mafai ona tatou faaalua ai le faaaloalo i vala e tolu o le olaga.

10, 11. O le ā o le a tatou iloiloaina?

E faaa'oa'o se tamā
Kerisiano iā Keriso
a o tausia lona aiga



FAALOALO I LE AIGA

12 O Ieova na amataina aiga ma tuu atu tiute tauave i sui ta'itasi o le aiga. Pe a malamalama sui ta'itasi i le mea ua faafinagaloina e Ieova mai iā te ia, o le a sologa lelei le faatulagaga i le aiga ma maua ai e tagata uma aogā. (1 Korinito 14:33) Ua tofia e Ieova le tane e avea ma ulu o le aiga. O lona uiga, ua faatalitalia e Ieova o ia e tausia ma ta'ita'ia ma le alofa lana avā ma le fanau. O lea, e tali atu le tane iā Ieova i le auala e na te tausia ai lona aiga. O le tane Kerisiano, e agalelei, alofa, ma feutaga'i ma lona aiga i le auala na feutaga'i ai Iesu ma le faapotopotoga. Pe a faia faapea e se tane, ua faaalai ai lona faaloalo iā Ieova.—Efeso 5:23; taga'i i le Faaopoopoga 13.

12. E faapefea ona faaalai e se tane le faaloalo i le pule?

13 E iai fo'i le tiute tauave tāua ma faaaloologia a se avā Kerisiano. E na te lagolagoina lana tane a o galue mamafa e avea ma ulu lelei o le aiga. Ua iā i la'ua le tiute tauave o le a'oa'oina o le fanau. O se tasi o auala e a'oa'oina ai e le avā lana fanau ia faaaloalo, e ala lea i lana faaa'oa'oga. (Faataoto 1:8) E faaaloalo o ia i lana tane ma lagolagosua i ana faai'uga. E tusa pe e lē ioe i lana tane e faatatau i se mataupu, ae e na te faailoa atu ona manatu i se auala agalelei ma faaaloalo. Pe a faaipoipo se tuafafine Kerisiano i se tagata e lē o se Molimau, e fesaga'i o ia ma lu'i faigatā. Ae pe afai e faaauau ona ia feutaga'i ma lana tane i se auala alofa ma faaaloalo, atonu e iai se aso o le a mana'o ai le tane e iloa Ieova ma tapua'i atu iā te ia.—**Faitau le 1 Peteru 3:1.**

14 E tautele le fanau iā Ieova ma e latou te matuā mana'omia le puipuiga ma le ta'ita'iga. Pe a usiusita'i le fanau e faafiafiaina ai mātua. Ae sili atu ona tāua, o lo latou usiusita'i e faaalua atu ai le faaaloalo iā Ieova ma faafiafiaina ai lona finagalo. (Faataoto 10:1) O le tele o aiga e tausia a'e le fanau e se matua e to'atasi. E matuā faigatā lenei tulaga mo le matua ma le fanau. Ae pe a usiusita'i ma lagolagosua le fanau i lo latou tinā po o le tamā, o le a matuā faaleleia le tulaga o le aiga. Po o le ā lava le tulaga, e leai se aiga e lelei atoa-toa. Ae e mafai ona matuā fialia aiga ta'itasi pe a muli-muli sui uma i ta'iala a Ieova. O le faia faapea o le a faamamaluina ai Ieova o Lē na amataina aiga uma.—Efeso 3:14, 15.

13. E faapefea ona faaalua e se avā le faaaloalo i le pule?

14. E faapefea ona faaalua e le fanau le faaaloalo i le pule?

FAALOALO I LE FAAPOTOPOTOGA

15 O loo ta'ita'ia i tatou e Ieova e ala i le faapotopotoga Kerisiano, ma ua ia tuuina atu iā Iesu le pule uma i le faapotopotoga. (Kolose 1:18) Ua tuuina atu fo'i e Iesu i le "pologa faamaoni ma le faautauta," le tiute tauave ia tausia tagata o le Atua i le lalolagi. (Mataio 24:45-47) O le "pologa faamaoni ma le faautauta" i aso nei, o le Vaega Pule lea. E saunia e le Vaega Pule mea e tatou te mana'omia i le taimi tatau, ina ia faamalosia ai pea lo tatou faatuatua. E lagolagoina e toeaina, auauna o le faiva, ma ovasia o matagaluega faapotopotoga uma i le lalolagi aoao, ma e latou te maua ta'iala mai i le Vaega Pule. Ua iai i nei uso uma le tiute tauave o le tausia o i tatou. E latou te tali atu iā Ieova i le auala e faatino ai lenei tiute tauave. Pe a tatou faaloalo la i nei tane, ua tatou faaloalo fo'i iā Ieova.—**Faitau le 1 Tesalonia 5:12; Eperu 13:17; taga'i i le Faaopoopoga 14.**

16 E fesoasoani toeaina ma auauna o le faiva i le faapotopotoga ia tumau faamaoni ma autasi. O i latou o ni tagata e lē lelei atoatoa e pei fo'i o i tatou. E faapefea la ona filifilia i latou? E tatau ona ausia e nei uso agavaa o loo ta'ua i le Tusi Paia. (1 Timoteo 3:1-7, 12; Tito 1:5-9) Sa faaogā e Ieova le agaga paia e fesoasoani i tusitala o le Tusi Paia ia faamatala mai nei agavaa. E tatalo toeaina o le faapotopotoga iā Ieova mo lona agaga paia, pe a talanoaina po o ai e tatau ona tofia e avea o se toeaina po o se auauna o le faiva. E manino mai la, o loo ta'ita'ia faapotopotoga e

15. E faapefea ona tatou faaalua le faaloalo i le pule i le faapotopotoga?

16. Aiseā e tatou te faapea atu ai o toeaina ma auauna o le faiva e tofia e le agaga paia?

Ieova ma Iesu. (Galuega 20:28) O nei tane na tofia e lagolago ma tausia i tatou, o ni meaalofo mai i le Atua.—Efeso 4:8.

¹⁷ O nisi taimi atonu e lē avanoa toaina po o au-auna o le faiva e faatino se tofiga i le faapotopotoga. E masani la ona fesoasoani i ai isi uso papatiso. Ae afai lava e leai se uso e avanoa, e ono mana'omia la ona faia e se tuafafine se tiute e masani ona faia e se uso papatiso. Pe afai o le tulaga lenā, e tatau ona ufiufi e le tuafafine lona ulu i se pulou po o se sikafu. (1 Korinito 11:3-10) O le faia faapea, ua ia faaalua ai lona faaaloalo i le faatulagaga a Ieova o le tulaga ulu i le aiga ma le faapotopotoga.—Taga'i i le Faaopoopoga 15.

FAAALOALO I PULE O MALO

¹⁸ Ua faataga e Ieova malo i aso nei e maua sina pule ma e tatau ona tatou faaaloalo iā i latou. Ua latou faamaopopo atunuu ma nuu ina ia sologa lelei a latou pulega, ma saunia auunaga talafeagai mo tagata. E ususita'i Kerisiano i le faatonuga o loo i le **Roma 13:1-7. (Faitau.)** E tatou te faaaloalo i “faipule silisili” ma ususita'i i tulafono a le atunuu po o le nuu o loo tatou nonofo ai. O nei tulafono e ono aafia ai o tatou aiga, pisinisi, po o meatotino. O se faaa'oa'oga, e totogi a tatou lafoga ma saunia faamatalaga e mana'omia e le malo. Ae o le ā e tatau ona tatou faia pe a faatonu i tatou e le malo e fai se mea e feteena'i ma tulafono a le Atua? Ua faapea mai le aposetolo o

17. O le ā e tatau ona faia e se tuafafine i nisi taimi ina ia faaalua ai lona faaaloalo?

18, 19. (a) O le ā ua tatou a'oa'oina mai i le Roma 13:1-7? (e) E faapefea ona tatou faaalua le faaaloalo i pule o malo?

Peteru: “E tatau ona matou usiusita’i i le Atua o le pule, nai lo o tagata.”—Galuega 5:28, 29.

19 E tatau ona tatou faaaloalo i taimi uma pe a feutaga’i ma se tagata o le malo, e pei o se faamasino po o se leoleo. E faaaloalo Kerisiano talavou i o latou faia’oga ma isi tagata faigaluega i le a’oga. E tatou te faaalua le faaaloalo i pule o galuega e tusa lava pe e lē o faia faapea e isi tagata faigaluega. O le faia faapea ua tatou faaa’oa’o ai i le apusetolo o Paulo, o lē sa faaaloalo i pule o malo e ui sa faigatā i nisi taimi. (Galuega 26:2, 25) E tusa lava pe lē lelei le auala e feutaga’i mai ai isi iā i tatou, ae ia tatou faaalua pea le faaaloalo.—**Faitau le Roma 12:17, 18; 1 Peteru 3:15.**

20 I le lalolagi aoao, ua faatupula’ia le lē faaaloalo o tagata. Peita’i, ua ese mai ai tagata o leova. O lo tatou sini ia faaalua le faaaloalo i tagata uma. E tatou te mulimuli i le ta’iala a le apusetolo o Peteru: “Ia āva i ituaiga uma o tagata.” (1 Peteru 2:17) Pe a tatou faaaloalo i isi, o le a latou mātauina. Na fetalai Iesu: “Ia faapea fo’i ona susulu atu lo outou malamalama i luma o tagata, ina ia latou iloa a outou galuega lelei ma vivii atu ai i lo outou Tamā o i le lagi.”—Mataio 5:16.

21 Pe a tatou faaalua le faaaloalo i le aiga, i le faapotopotoga, ma isi vala o le olaga, o lenā faaa’oa’oga lelei e ono uuna’ia ai isi e a’oa’o atili e uiga iā leova. O le faaalua fo’i o le faaaloalo i isi ua faaalua ai lo tatou faaaloalo iā leova. O le faia faapea e faafiafiaina ai le finagalo o leova, ma faaalua atu ai e tatou te alolofa iā te ia.

20, 21. O ā mea lelei e mafai ona tutupu pe a tatou faaaloalo i isi?

1 E FAAAOGĀ E IEOVA ISI TAGATA E TA'ITA'IA I TATO

“Ia āva i ituaiga uma o tagata, . . . ia matata'u i le Atua.”—1 Peteru 2:17

Aiseā e ono faigatā ai ona mulimuli i ta'iala?

Numera 16:1-3;

Failauga 8:9;

Roma 5:12

E faaaogā e leova tagata lē lelei atoatoa e pei o i tatou, ina ia ta'ita'ia i tatou.

Luka 22:42

Na faataatia e Iesu le faa-a'oa'oga sili o le usita'i. E faaaauau ona usita'i o ia iā leova.

Faataoto 27:11;

Mareko 12:29, 30

O le alofa iā leova e uuna'ia ai i tatou e faaaloalo i ana faatulagaga. I le aiga, ua iai le ulu o le aiga. I le a'oga, ua iai faia'oga. I le faapotopotoga, ua iai toeaina.

2 O IEOVA E ANA LE FAATULAGAGA O LE AIGA

‘Ou te tootuli i le Tamā o lē ua maua ai e aiga uma o latou igoa.’—Efeso 3:14, 15

Aiseā e finagalo ai leova ia tatou faaaloalo i le faatulagaga o le aiga?

Faataoto 10:1

Na faatulaga e leova le aiga ia avea o se nofoaga saogalemu e ola a’e ai le fanau, ma olioli ai tagata uma i ni faiā māfana.

Faataoto 1:8;

1 Korinito 11:3;

Efeso 6:1-3;

1 Peteru 3:1

E maua e le aiga aogā pe a faatino e sui ta’itasi a latou tiute tauave.

3 NA TUUINA ATU E IEOVA IĀ IESU LE PULE I LE FAAPOTOPOTOGA

“O Keriso o le ulu ia o le faapotopotoga.”

—Efeso 5:23

Aiseā e tatau ai ona tatou lagolagosua i le faatulagaga i le faapotopotoga?

Mataio 24:45-47

Ua faaaogā e Iesu “le pologa faamaoni ma le faautauta” e tausia tagata o le Atua i le lalolagi.

1 Tesalonia 5:12;

Eperu 13:17

E fesoasoani toeaina ma auauna o le faiva i le faapotopotoga ina ia tumau ona malolosi. E tatou te faaalua le faaaloalo i le pule a Ieova e ala i le lagolagosua i nei uso.

Galuega 20:28

E maua e tagata uma aogā pe a lagolagosua atoatoa i le faapotopotoga. O le faatulagaga lea a Ieova mo le tapua’iga.

4 UA FAATAGA E IEOVA MALO E MAUA SINA PULE

“E leai se pule pe a lē mai i le Atua; o faipule o loo iai nei, ua faatagaina e le Atua e pule i o latou tulaga eseese.”—Roma 13:1

E faapefea ona tatou faaalua le faaaloalo i pule o malo?

Mataio 5:16;

1 Peteru 3:15

E tatou te faaalua le faaaloalo e ala i a tatou upu ma gaoioiga. O le faia faapea e faamamaluina ai leova.

Galuega 26:2, 25;

Roma 12:17, 18

E usiusita’i Kerisiano i tulafofono a le atunuu o loo latou nonofo ai. E latou te faaalua pea le faaaloalo e tusa pe lē lelei le auala e feutaga’i mai ai tagata iā i latou.

Roma 13:1-4

E fesoasoani mataupu sili-sili o le Tusi Paia iā te oe e usiusita’i ai iā i latou ua iai le pule.

Mataio 22:37-39; 26:52;

Ioane 18:36;

Galuega 5:27-29;

Eperu 10:24, 25

Pe afai e faatonuina oe e le malo e fai se mea e fetee-na’i ma tulafofono a leova, e mana’omia ona e filifili po o ai e te usita’i i ai.

AUALA E VAVAEESE AI MAI I LE LALOLAGI

“E lē o ni tagata o le lalolagi outou.”

—IOANE 15:19.

I LE pō a o le'i malii Iesu, na ia silafia o le a ia tuua ona soo, ma na manatu mamafa mo lo latou lumana'i. Na faapea atu o ia i ona soo: “E lē o ni tagata o le lalolagi outou.” (Ioane 15:19) Mulimuli ane, na tatalo o ia i lona Tamā ma faapea atu: “E lē o ni tagata o le lalolagi i latou, e pei fo'i o a'u, e lē o a'u o se tagata o le lalolagi.” (Ioane 17:15, 16) O le ā na uiga i ai Iesu?

² O le upu “lalolagi” o loo faasino atu i tagata e lē iloa le Atua ma o loo pulea e Satani. (Ioane 14:30; Efeso 2:2; Iakopo 4:4; 1 Ioane 5:19) E faapefea ona lē avea i tatou “o ni tagata o le lalolagi”? I lenei mataupu, o le a tatou talanoaina ai auala nei: E tatou te tumau faamaoni i le Malo o le Atua ma solitū, e leai sa tatou vaega i faiga faapolotiki. E tatou te teena le agaga o le lalolagi. E onomea o tatou la'ei ma teuga ma paleni le vaaiga i tupe. E tatou te ofuina fo'i le “ofutau” ua saunia mai e le Atua.—Taga'i i le Faaopopoga 16.

1. O le ā na manatu mamafa i ai Iesu i le pō a o le'i malii?
2. O le ā e faasino i ai “le lalolagi” lea na ta'ua e Iesu?

IA FAAMAONI I LE MALO O LE ATUA

³ A o iai Iesu i le lalolagi, na ia mātauina le tele o faafitauli o tagata ma e le'i faigofie o latou olaga. Na matuā manatu mamafa o ia iā i latou ma fia fesoasoani atu i ai. Pe sa avea o ia o se ta'ita'i faapolotiki? E leai. Na ia silafia o le mea o loo mana'omia moni e tagata, o le Malo o le Atua. O Iesu o le Tupu o lenā Malo, ma o le autū o lana tala'iga o le Malo. (Tanielu 7:13, 14; Luka 4:43; 17:20, 21) E le'i auai Iesu i faiga faapolotiki ma na solitū o ia i taimi uma. Na faapea atu Iesu a o iai i luma o le kovana Roma o Ponotio Pilato: "O lo'u malo e lē mai le lalolagi lenei." (Ioane 18:36) Na solitū fo'i ona soo. Na ta'ua i le tusi *On the Road to Civilization*, o ulua'i Kerisiano "e latou te le'i umia ni tofiga faapolotiki." E faapena fo'i Kerisiano moni i aso nei. E tatou te lagolagoina ma le faamaoni le Malo o le Atua ma solitū i mataupufai faapolotiki a le lalolagi.—Mataio 24:14.

⁴ Ua avea amepasa po o sāvali e fai ma sui o o latou malo i se isi atunuu. E latou te lē aafia la i faiga faapolotiki a lenā atunuu. E faapena fo'i le 'aufaauuina, o ē ua faamoemoe e pule faatasi ma Keriso i le lagi. Na tusi Paulo i Kerisiano faauuina: "O i matou o sāvali o sui o Keriso." (2 Korinito 5:20) O le 'aufaauuina ua fai ma sui o le malo o le Atua. E leai sa latou vaega i faiga faapolotiki ma mataupufai a malo o lenei lalolagi. (Filipi 3:20) Nai lo o lea, ua fesoasoani le 'aufaauuina i le faitau miliona o tagata ia a'oa'o e faatatau i le malo o le Atua. Ua lagolagoina le 'aufaauuina e

3. O le ā le vaaiga a Iesu i faiga faapolotiki?

4. E faapefea ona lagolagoina e Kerisiano moni le Malo o le Atua?

“isi mamoe,” o ē e faamoemoe e ola e faavavau i le lalolagi fou a le Atua. E tumau fo’i ona solitū i latou. (Ioane 10:16; Mataio 25:31-40) O lea la, e lē faia se vaega a Kerisiano moni i faiga faapolotiki a lenei lalolagi.—**Faitau le Isaia 2:2-4.**

⁵ E manatu Kerisiano moni i o latou uso talitonu o lo latou aiga, ma e latou te autasi e tusa lava po o fea le atunuu ma le talaaga e ō mai ai. (1 Korinito 1:10) Pe a tatou auai i taua, o le a tatou tau faasaga i lo tatou lava aiga, o o tatou uso talitonu, o ē na faatonu i tatou e Iesu ia alolofa i ai. (Ioane 13:34, 35; 1 Ioane 3:10-12) Na fetalai fo’i Iesu i ona soo ia alolofa i o latou fili. —Mataio 5:44; 26:52.

5. Aiseā e lē auai ai Kerisiano i taua?

Pe e mafai ona e faamatala atu māfuaaga e te lagolagoina ai ma le faamaoni le Malo o le Atua?



⁶ E ui lava e tumau ona tatou solitū o ni Kerisiano, ae e tatou te tauivi malosi ia avea o ni tagatānuu lelei. O se faaa'oa'oga, e tatou te faaaloalo i faigāmalo e ala i le usiusita'i i a latou tulafono ma totogi a tatou lafoga. Ae e tatou te faamautinoa i taimi uma “o mea a le Atua ia avatu i le Atua.” (Mareko 12:17; Roma 13:1-7; 1 Korinito 6:19, 20) “O mea a le Atua” e aofia ai lo tatou alolofa mo ia, lo tatou usiusita'i, ma la tatou tapua'iga. O lea la, e tatou te lotomalilie e faataulaga o tatou ola nai lo o le lē usiusita'i iā Ieova.—Luka 4:8; 10:27; faitau le Galuega 5:29; Roma 14:8.

IA TEENA “LE AGAGA O LE LALOLAGI”

⁷ Ina ia vavaeese mai i le lalolagi a Satani, e tatou te lē faatagaina le “agaga o le lalolagi” e pulea ai i tatou. O lenā agaga, e faasino atu i le auala e mafau-fau ma amioa'i ai, lea e pogai mai iā Satani ma e pulea ai i latou e lē auauna iā Ieova. Peita'i, e teena e Kerisiano lenei uiga. Na faapea mai Paulo, “tatou te le'i maua le agaga o le lalolagi, a o le agaga mai i le Atua.”—1 Korinito 2:12; Efeso 2:2, 3; taga'i i le Faaopoopoga 17.

⁸ O le agaga o le lalolagi ua faapogaia ai tagata e manatu faapito, faamaualuga, ma fouvale. Ua manatu ai e lē mana'omia ona latou usiusita'i i le Atua. E mana'o Satani ia faia e tagata so o se mea e latou te manana'o i ai, e aunoa ma le mafau-fau i āuga e i'u i ai. E mana'o ia talitonu tagata “o tu'inanauga

6. O le ā le vaaiga a auauna tuuina atu a leova i faigāmalo?

7, 8. O le ā le “agaga o le lalolagi,” ma e faapefea ona aafia ai tagata?

o le tino, ma tu‘inanauga o mata,” o mea ia e sili ona tāua i le olaga. (1 Ioane 2:16; 1 Timoteo 6:9, 10) O loo taumafai malosi le Tiapolo e faasesē auauna a Ieova, ma maileia i tatou ia mafaufau e pei o ia.—Ioane 8:44; Galuega 13:10; 1 Ioane 3:8.

⁹ Ua si‘omia i tatou e le agaga o le lalolagi, e pei lava o le ‘ea o loo tatou mānavaina. Pe afai e tatou te lē tau-mafai malosi e teena lenā agaga, o le a aafia ai i tatou. (**Faitau le Faataoto 4:23.**) E mafai ona amata tupu lenei tulaga i ni auala e foliga mai e lē leaga, e pei o le faa-taga o i tatou e taa‘ina i mafauauga ma uiga o tagata e lē tapua‘i iā Ieova. (Faataoto 13:20; 1 Korinito 15:33) E mafai fo‘i ona tatou aafia i mea e pei o ata ma faamata-laga matagā tau feusua‘iga, i latou ua liliuese mai i le upu moni, po o taaloga e matuā matilatila mai ai le agaga faa-tautavā.—Taga‘i i le Faaopoopoga 18.

¹⁰ E faapefea la ona tatou ‘alofia le puleaina e le agaga o le lalolagi? E tatau ona tatou mafuta vavalalata atu iā Ieova ma ta‘ita‘ia e lona atamai. Ia tatalo e lē aunoa mo lona agaga paia ma maelega i la tatou auaunaga iā te ia. O Ieova o Lē e sili ona malosi i le aoao o mea. E tatou te mautinoa e mafai ona ia fesoasoani mai ina ia tatou teena le agaga o le lalolagi.—1 Ioane 4:4.

IA LA‘EI I SE AUALA E FAAMAMALUINA AI LE ATUA

¹¹ E faaalua fo‘i e lē o i tatou o ni tagata o le lalolagi, e ala i o tatou la‘ei ma teuga. O le to‘atele o tagata o le lalo-

9. E faapefea ona aafia i tatou i le agaga o le lalolagi?

10. E mafai faapefea ona tatou teena le agaga o le lalolagi?

11. Ua faapefea i le agaga o le lalolagi ona taa‘ina ai le auala e la‘ei ai tagata?



Po o faamamaluina leova i le auala ou te la’ei ai?

lagi e la’ei i se auala ina ia faaua’i mai ai tagata iā i latou, faagaee ai mafaufauga lē mamā i isi, faaalua ai le fouvale, po o le faaaluaia vale i le tele o a latou tupe. O isi tagata e lē popole i o latou foliga vaaia, e tueleelea ma e lē teu-teu faaaulelei. E tatou te lē faatagaina nei uiga e taa’ina ai a tatou filifiliga i la’ei ma teuga.

12 Talu ai o i tatou o auuana a leova, e tatou te mana-na’o la ia mamā, onomea, ma talafeagai o tatou la’ei i taimi uma. E tatou te la’ei i ofu e “onomea ma ia

12, 13. O ā mataupu silisili e fesoasoani iā i tatou pe a filifili la’ei?

mafaufau lelei,” ina ia faaalua ai lo tatou “matata’u i le Atua.”—1 Timoteo 2:9, 10; Iuta 21.

13 O le auala e tatou te la’ei ai e mafai ona aafia ai le vaaiga a isi e uiga iā Ieova ma ona tagata. E ao ona tatou faia “mea uma lava ina ia faamamaluina ai le Atua.” (1 Korinito 10:31) O le onomea e aafia ai le faaaloalo i faalogona ma manatu o isi. O lea, pe a filifili o tatou la’ei po o le auala e teuteu ai o tatou foliga, ia manatua o a tatou filifiliga e aafia ai isi.—1 Korinito 4:9; 2 Korinito 6:3, 4; 7:1.

14 O le ā le auala e tatou te la’ei ai i sauniga ma le galuega tala’i? Po ua soona faaua’i mai ai tagata iā i tatou? Po o māsiasi isi ona o o tatou la’ei? Pe e tatou te manatu o le auala e tatou te la’ei ai o la tatou aiā lenā? (Filipi 4:5; 1 Peteru 5:6) O le tulaga masani e tatou te manana’o ia lelei o tatou foliga vaaia. Peita’i, o uiga faa-Kerisiano o uiga ia e sili ona faaulelei ai i tatou. O uiga na e fia silasila mai i ai Ieova. E faaalua mai ai le tagata moni e iai i tatou, “o le tagata lilo i tonu,” ma “o le mea tautele lava lea i le silafaga a le Atua.”—1 Peteru 3:3, 4.

15 E lē o aumaia e Ieova se lisi o tulafono o la’ei e tatau ma la’ei e lē tatau ona tatou ofuina. Ae ua ia saunia mai mataupu silisili o le Tusi Paia, e fesoasoani iā i tatou e faia ai filifiliga lelei. (Eperu 5:14) E finagalo Ieova ia faavae a tatou filifiliga i le alofa iā te ia ma isi, e tusa pe tetelē pe lāiti. **(Faitau le Mareko 12:**

14. O le ā e tatau ona tatou mafaufau i ai pe a filifili o tatou la’ei mo faatasitaisiga faa-Kerisiano?

15. Aiseā ua lē ta’ua patino mai ai e Ieova ni auala e tatau ona tatou la’ei ma teu ai?



30, 31.) E eseese auala e la'ei ai tagata o Ieova i le lalolagi aoao, e fua i a latou aganuu ma mea e fiafia i ai. O lenei eseese e matagofie ma faafouina ai.

SE VAAIGA PALENI I TUPE

¹⁶ E mana'o Satani ia manatu tagata e latou te maua le fiafia i tupe ma meafaitino, ae ua iloa e au-auna a Ieova e sesē lenei manatu. E tatou te maufaa-tuatuaina upu nei a Iesu: "E lē ola se tasi i le tele o ana mea ua iā te ia." (Luka 12:15) E lē mafai e tupe ona

16. E faapefea i le vaaiga a le lalolagi e faatatau i tupe ona fetee-na'i ma le a'oa'oga a Iesu? O ā fesili e tatau ona tatou fesili ifo ai?

aumaia ai iā i tatou le fiafia moni. E lē mafai ona tatou maua ai ni uō moni, le filemu moni o le mafaufau, po o le ola e faavavau. E moni e tatou te mana'omia ni meafaitino ma ia olioli o tatou olaga. Peita'i, na a'oa'o e Iesu o le a maua le fiafia pe a iai sa tatou faiā vavalalata ma le Atua, ma avea le tapua'iga ma mea e sili ona tāua i o tatou olaga. (Mataio 5:3; 6:22) Ia fesili ifo: 'Po o aafia a'u i le vaaiga a le lalolagi e faata-tau i tupe? Po o avea tupe ma taula'iga o o'u manatu ma talanoaga?'—Luka 6:45; 21:34-36; 2 Ioane 6.

¹⁷ Pe afai e tatou te taula'i atu i le auunaga iā Ieova ma teena le vaaiga a le lalolagi e uiga i tupe, o le a faamalieina o tatou olaga. (Mataio 11:29, 30) O le a tatou maua le lotomalie ma le filemu o le mafaufau ma le loto. (Mataio 6:31, 32; Roma 15:13) O le a tatou lē soona popole ai i meafaitino. (**Faitau le 1 Timoteo 6:9, 10.**) O le a tatou lagona le fiafia ona o le foa'i atu. (Galuega 20:35) O le a tele le taimi e faaalu ma i latou e tatou te alolofa i ai. Atonu e lelei ai fo'i la tatou moe. —Failauga 5:12.

“LE OFUTAU ATOATOA”

¹⁸ O loo taumafai Satani e faaleaga la tatou faiā ma Ieova. O lea e tatau ai ona tatou faia mea uma e pui-puia ai lenā faiā. O loo tatou tau faasaga i “agaga leaga uma.” (Efeso 6:12) E lē manana'o Satani ma ana temoni ia tatou maua le fiafia po o le ola e faavavau. (1 Peteru 5:8) O loo faasagatau mai nei fili malolosi

17. E faapefea ona faaleleia lou olaga pe afai e te teena le vaaiga a le lalolagi e uiga i tupe?

18. O le ā o loo taumafai Satani e fai iā i tatou?

iā i tatou, ae o le fesoasoani a Ieova e tatou te manu-malo ai i lenā taua!

19 I aso anamua, na ofu e fitafita “ofutau” ina ia puipuia ai i latou i le taua. I se tulaga talitutusa, e tatau ona tatou ofu le “ofutau” mai iā Ieova. (Efeso 6: 13) O le a puipuia ai i tatou. O loo faamatala lenei ofutau i le Efeso 6:14-18: “O lenei, ia tutū mausalī, a o fusia o outou sulugātiti i le upu moni, ma oofu i le ufifatafata o le amiotonu, ia faaseevaeina o outou vae e nofosauni e tala’i le tala lelei o le filemu. A o le mea e sili ona tāua, ia outou ave le talita telē o le faatuatua, lea e mafai ai ona outou tineia ai aū fanafana mū uma a lē o loo leaga. Ia talia fo’i le puloutau o le faaolataga, ma le pelu a le agaga, o le afioga lea a le Atua, ma ia faaaauau ona tatalo i le Atua i taimi uma i le agaga, ma tatalo eseese uma, ma faatoga eseese uma.”

20 Pe afai e galo i se fitafita se vaega o lona ofutau ma lē puipuia se vaega o lona tino, o le vaega lenā o le a osofa’ia ai o ia e lona fili. Pe a manana’o e puipuia e lo tatou “ofutau” i tatou, e lē tatau la ona galo se vaega o lenā ofu. E tatau ona ofu i taimi uma ma ia tausia i se tulaga lelei. O le a faaaauau la tatou taua se’ia faaumatia le lalolagi a Satani, ma aveesea Satani ma ana temoni mai le lalolagi. (Faaaliga 12:17; 20: 1-3) O lea, pe afai o loo tatou tau faasaga i ni tu’ina-nauga sesē pe tauivi ma ni vaivaiga, e lē tatau ona tatou faavaivai!—1 Korinito 9:27.

19. Ua faapefea ona faamatalaina i le Efeso 6:14-18 le “ofutau” o se Kerisiano?

20. O le ā e tatau ona fai ina ia fesoasoani ai le “ofutau” iā i tatou?

21 E lē mafai ona tatou manumalo i so tatou lava malosi, ona e malosi atu le Tiapolo iā i tatou. Peita'i, e tatou te maua le malosi ona o le fesoasoani a Ieova! Ina ia tumau faamaoni, e ao ona tatou tatalo iā Ieova, su'esu'e lana Afioga, ma faatasitasi ma o tatou uso ma tuafāfine. (Eperu 10:24, 25) O le a fesoasoani nei vala e tatou te tumau faamaoni ai i le Atua, ma nofosauni e puipuia lo tatou faatuatua.

IA NOFOSAUNI E PUIPUIA LOU FAATUATUA

22 E ao ona tatou nofosauni i taimi uma e puipuia lo tatou faatuatua. (Ioane 15:19) E iai nisi mataupu e matuā tū ese ai Molimau a Ieova mai i le to'atele o tagata. Ia fesili ifo: 'Po o ou matuā malamalama i le mā-fuaaga ua ou faia ai lenei faai'uga? Po o ou talitonu e sa'o mea ua fai mai ai le Tusi Paia ma le pologa faamaoni ma le faautauta? Po o ou mitamita i le avea ai o se Molimau a Ieova? (Salamo 34:2; Mataio 10:32, 33) Pe e mafai ona ou faamatala atu i isi o'u talitonuga?' —Mataio 24:45; Ioane 17:17; **faitau le 1 Peteru 3:15.**

23 I le tele o tulaga, ua matuā manino mai le mea e tatau ona tatou faia ina ia tumau ona vavaeese ai mai i le lalolagi. Ae i nisi taimi, e lē faigofie ona iloa. Ua taumafai Satani e maileia i tatou i auala eseese. O se tasi o mailei ua ia faaaogā, o faafiafiaga. E faapefea ona tatou filifili ma le atamai faafiafiaga? O le a tatou iloiloina i le mataupu o loo sosoo ai.

21. E faapefea ona tatou manumalo i la tatou taua?

22, 23. (a) E faapefea ona tatou nofosauni i taimi uma e puipuia lo tatou faatuatua? (e) O le ā o le a tatou iloiloina i le mataupu o loo sosoo mai?

1 E FAAMAONI KERISIANO I LE MALO O LE ATUA

“O lo’u malo e lē mai le lalolagi lenei.”

—Ioane 18:36

E faapefea ona faaalua e tatou te solitū ma lagolagoina le Malo o le Atua?

Isaia 2:2-4;

Ioane 6:15;

1 Peteru 3:15

E tatou te lē auai i taua pe
fai sa tatou vaega i faiga
faapolotiki.

Esoto 20:4, 5;

1 Ioane 5:21

E tatou te lē tapua’i i tagā-
vai a atunuu. O se faaa’o-
a’oga, e tatou te lē fa’alo
i le fu’a.

Mataio 26:52

O faiga sauā e na o le faa-
tuputeleina ai o le sauā.

E tatou te faatalitali iā
leova e na te fo’ia e faa-
vavau faafitauli o lenei
lalolagi.

Ioane 13:34, 35;

1 Ioane 3:10-12

O le ‘auuso talitonu uma,
ua avea i latou ma o tatou
uso ma tuafāfine e tusa
lava po o fea le atunuu,
ituaiga, po o talaaga e
latou te ō mai ai. E lē
mafai ona tatou fetaua’i.

2 “E LĒ O NI TAGATA O LE LALOLAGI” KERISIANO

“E lē o ni tagata o le lalolagi i latou, e pei fo’i o a’u, e lē o a’u o se tagata o le lalolagi.” –Ioane 17:16

Aiseā e ao ai ona tatou vavaeese mai i le lalolagi a Satani?

1 Ioane 5:19

O le “lalolagi” e faasino atu i tagata e lē iloa le Atua ma ua taa’ina e Satani, le pule o le lalolagi.

Iakopo 4:4

E tatou te manana’o ia silasila leova iā i tatou o ni ana uō. E tatou te faaa’oa’o iā leova ma Iesu i o tatou uiga, upu, ma gaoioiga.

3 E 'ALOFIA E KERISIANO UIGA O LE LALOLAGI

“O le mea e sili ona leoleoina o mea uma,
ia leoleoina lou loto.”—Faataoto 4:23

**O le ā e uiga iai le tetee atu i uiga o le lalolagi
a Satani?**

Efeso 2:2;

1 Ioane 2:16

E manatu faapito, faa-
maualuga, ma fouvale
Satani. E mana’o ia tali-
tonu tagata e lē mana’o-
mia ona latou usiusita’i
i le Atua.

1 Korinito 2:12;

1 Ioane 4:4

Ina ia teena uiga o le lalo-
lagi a Satani, e ao ona
tatou mafuta vavalalata
atu pea iā leova, ma faa-
tumu o tatou mafaufau
i lona finagalo.

1 Korinito 10:31

O a tatou upu ma gaoi-
oiga e faaalua atu ai e lē
o i tatou o ni tagata o le
lalolagi. E faaalua atu fo’i
i mataupu e fitoitonu iā i
tatou lava.

4 E LĒ AUMAIA E TUPE LE SAOGALEMU TUMAU PO O LE FILEMU MONI O LE MAFAUFAU

“E lē ola se tasi i le tele o ana mea ua iā te ia.”

—Luka 12:15

O le ā e fesoasoani iā i tatou ia maua ai le silafaga a leova e faatatau i meafaitino?

Galuega 20:35;

1 Timoteo 6:9, 10

E mana’o Satani ia tatou talitonu o faafiafiaga ma le tamaoaiga o le a aumaia ai iā i tatou le fiafia. Ae na a’oa’o e Iesu e maua le fiafia i le iai o se faiā lelei ma le Atua ma le foa’i atu i isi.

Mataio 6:31, 32;

Mareko 12:30, 31;

Luka 21:34-36

Pe afai e tatou te taula’i atu i le auaunaga iā leova, o le a faamalieina o tatou olaga. E mafai ona tatou maua ai le lotomalie ma le filemu o le mafaufau ma le loto.

AUALA E FILIFILI AI A TATOU FAAFIAFIAGA

“Ia faia mea uma lava ina ia faamamaluina ai le Atua.”

—1 KORINITO 10:31.

SE'I faapea o le a e taumafaina se fua o se laau 'aina, ae ua e vaai atu e pala le isi itu. O le ā lau mea e fai? Po o le a e taumafaina pea? Po o le a e ti'ai ese? Pe e te tipi ese le itu pala ae taumafa le itu o loo lelei?

² E mafai ona faatusaina faafiafiaga i lenā fualaau 'aina. O nisi faafiafiaga atonu e manaia, ae o le tele o faafiafiaga e pala ona e lē mamā, e sauā, pe faate-moni. O lea, pe a filifili au faafiafiaga, pe e te faapea

1, 2. Aiseā e tatau ai ona filifili ma le faaeteete a tatou faafiafiaga?



ifo: “E pule lava a’u. E mafai lava ona ou filifili so o se faafiafiaga ou te mana’o i ai”? Pe e te faapea ifo: “E leaga faafiafiaga uma”? Po o e filifili fo’i ma le faaete-ete au faafiafiaga, ina ia ‘alofia ai mea leaga ae fiafia i mea lelei?

³ E tatou te mana’omia uma ni tafaoga ma faafiafiaga, ma e tatou te manana’o ia filifili lelei. E ao la ona tatou fesili ifo, pe faapefea i a tatou filifiliga i faafiafiaga ona aafia ai la tatou tapua’iga iā Ieova.

**“IA FAIA MEA UMA LAVA
INA IA FAAMAMALUINA AI LE ATUA”**

⁴ Ina ua tuuina atu i tatou iā Ieova, ua tatou tautō iā te ia o le a faaaogā o tatou ola e auauna ai mo ia. (**Faitau le Failauga 5:4.**) Ua tatou tautō o le a “faia mea uma lava ina ia faamamaluina ai le Atua.” (1 Korinito 10:31) O lona uiga ua tatou tuuina atu atoatoa i le Atua e aofia ai ma taimi e tatou te auai ai i tafaoga po o faafiafiaga, ae e lē na o taimi e tatou te auai ai i sauniga po o le tala’iga.

⁵ O mea uma e tatou te faia i le olaga e fesoota’i atu i la tatou tapua’iga iā Ieova. Na faamatala e Paulo leni mea ina ua faapea mai: “Ia tuuina atu o outou tino o le taulaga ola, e paia, ma e mālīe i le Atua.” (Roma 12:1) Na fetalai Iesu: “Ia e alofa atu iā Ieova lou Atua ma lou lotoatoa, ma lou ola atoa, ma lou mafaufau atoa, ma lou malosi atoa.” (Mareko 12:30)

3. O le ā e tatau ona tatou mafaufau i ai pe a filifili a tatou faafiafiaga?

4. O le ā se mataupu silisili o le Tusi Paia e fesoasoani iā i tatou pe a filifili faafiafiaga?

5. O le ā le ituaiga tapua’iga e tatau ona tatou tuuina atu iā Ieova?

E tatou te manana'ō e avatu pea iā Ieova le mea sili e tatou te mafai. I Isaraelu anamua, pe a avatu e tagata se manu e fai ai le taulaga iā Ieova, sa faatalitalia e latou te avatu se manu e matuā lelei. E le'i taliaina e le Atua se taulaga pe a faalētonu. (Levitiko 22:18-20) I se tulaga talitutusa, e ono lē talia e Ieova la tatou tapua'iga. E faapefea?

⁶ Ua fetalai mai Ieova: “E tatau ona paia outou, auā o a'u nei e paia lava a'u.” (1 Peteru 1:14-16; 2 Peteru 3:11) E faato'ā talia e Ieova la tatou tapua'iga pe afai e paia pe mamā. (Teuteronome 15:21) E mafai ona lē mamā la tatou tapua'iga pe afai tatou te faia mea e inosia e Ieova, e pei o amioga lē mama, faiga sauā, po o mea e fesoota'i atu i faiga faatemoni. (Roma 6:12-14; 8:13) Ae e lē fiafia fo'i le finagalo o Ieova pe afai e faaogā nei mea ina ia faafiifiaina ai i tatou. O le faia faapea e mafai ona lē mamā ai la tatou tapua'iga ma lē taliaina e Ieova, ma matuā faaleagaina ai la tatou faiā ma ia.

⁷ E faapefea la ona filifili ma le atamai a tatou faafiifiaga? O ā mataupu silisili e fesoasoani iā i tatou e iloa ai faafiifiaga e talia ma faafiifiaga e lē taliaina?

IA 'INO'INO I LE LEAGA

⁸ E tele ituaiga o faafiifiaga ua iai i aso nei. O nisi o na faafiifiaga e talia e Kerisiano, ae o le tele o faafiifiaga e latou te lē taliaina. Muamua, se'i o tatou iloilo ituaiga o faafiifiaga e tatau ona tatou 'alofia.

6, 7. E faapefea i a tatou faafiifiaga ona aafia ai la tatou tapua'iga iā Ieova?

8, 9. O ā ituaiga o faafiifiaga e tatou te 'alofia? Aiseā?

9 O le tele o ata tifaga, upega tafa'ilagi, polokalamame i televise, taaloga vitiō, ma pese, ua faalauiloa ai amioga lē mamā, faiga sauā, po o faiga faatemoni. E masani ona faaalua mai ai mea leaga i se auala e foliga mai e lelei ma mālie. Peita'i, e faaeteete Kerisiano ia teena faafiafiaga e lē o atagia mai ai tapulaa mamā a Ieova. (Galuega 15:28, 29; 1 Korinito 6:9, 10) Pe a tatou teena na faafiafiaga, ua faaalua atu ai iā Ieova e tatou te 'ino'ino i le leaga.—Salamo 34:14; Roma 12:9.

10 Ae e manatu nisi e lē leaga faafiafiaga sauā, lē mamā, pe faatemoni. Ua latou manatu: 'O le ā le leaga? E lē taitai o'u faia nei mea.' Pe a tatou mafau-fau faapea, ua faasesēina la i tatou. Ua faapea mai le Ieremia 17:9: "E sili ona faa'ole'ole le loto nai lo o mea uma, ma e matuā leaga lava." Pe afai o faafiafiaina i tatou i mea e lē taliaina e Ieova, e faapefea la ona faapea atu e tatou te 'ino'ino i nei mea? O le tele e faafiafiaina ai i tatou i na mea, o le tele fo'i lenā o le amata ai ona tatou talia e avea ma mea masani o le olaga. O le i'uga, o le a faavaivaia ai le lotofuatiaifo ma lē toe gaoioi ai e lapata'ia i tatou pe a faia se filifiliga sesē.—Salamo 119:70; 1 Timoteo 4:1, 2.

11 Ua ta'ua i le Afioga a le Atua: "O le mea e lūlūina e le tagata, o le mea lava lea e na te seleseleina mai." (Kalatia 6:7) O le mea moni, pe a faafiafiaina i tatou i mea leaga, e ono i'u ai ina tatou faia na mea. O se faaa'oa'oga, ua matuā aafia nisi Kerisiano i faafia-

10. O le ā le i'uga pe a sesē a tatou filifiliga i faafiafiaga?

11. E faapefea ona fesoasoani le Kalatia 6:7 e filifili ai a tatou faafiafiaga?

fiaga lē mamā, ma i’u ai ina latou faia amioga lē mamā. Peita’i, ua aumaia e Ieova le fesoasoani mana’omia ina ia filifili ai ma le atamai a tatou faafiafiaga.

FAAOGĀ MATAUPU SILISLI O LE TUSI PAIA E FAIA AI FILIFILIGA

12 O nisi faafiafiaga e matuā manino mai e lē taliaina e Ieova, ma ua tatou iloa e tatau ona ‘alofia. Ae faapefea pe afai e lē o manino mai? E le’i aumaia e Ieova se lisi o tulafono o mea e mafai ma mea e lē mafai ona tatou matamata, faalogo, pe faitau i ai. Peita’i, e finagalo o ia e faaogā o tatou lotofuatiaifo ua a’oa’oina i le Tusi Paia. (**Faitau le Kalatia 6:5.**) Ua tuuina mai e Ieova mataupu silisili, o upu moni faavae ia, e a’oa’o ai i tatou i le auala e silasila ai o ia i mea. Ua fesoasoani nei mataupu silisili e a’oa’oina ai o tatou lotofuatiaifo. E fesoasoani e tatou te iloa ai “po o le ā le finagalo o Ieova,” ona tatou faia ai lea o ni filifiliga e faafiafiaina ai o ia.—Efeso 5:17.

13 E masani lava ona eseese filifiliga e faia e Kerisiano e faatatau i faafiafiaga. Aiseā? E eseese uma mea e tatou te fiafia i ai. E lē gata i lea, o mea e talia e se isi Kerisiano e ono lē talia e le isi. E ui i lea, e tatau ona ta’ita’ia Kerisiano uma i mataupu silisili o le Tusi Paia ina ia faia ai filifiliga lelei. (Filipi 1:9) O le a fesoasoani nei mataupu silisili iā i tatou e filifili

12. O le ā e fesoasoani iā i tatou e faia ai filifiliga lelei e faatatau i faafiafiaga?

13. Aiseā e eseese ai filifiliga a Kerisiano e faatatau i faafiafiaga? Ae o le ā le mea e tāua i Kerisiano uma?



E fesoasoani mataupu silisili o le Tusi Paia iā i tatou ina ia filifili ai faafiafiaga

ai faafiafiaga e talia e le Atua.—Salamo 119:11, 129; 1 Peteru 2:16.

14 E tatau fo’i ona iloilo le tele o le taimi o loo tatou faaalu i faafiafiaga. E faaalua mai ai po o le ā le tāua o faafiafiaga iā i tatou. I le avea ai ma Kerisiano, o la tatou auaunaga iā Ieova o le mea lea e sili ona tāua i o tatou olaga. (**Faitau le Mataio 6:33.**) Ae e mafai ona alu uma lo tatou taimi i faafiafiaga e aunoa ma le iloaina. Na fautua mai Paulo i Kerisiano: “Ia outou matuā faautauta ina ne’i outou savavali e pei o ē e vālea, ae ia pei o ē e atamamai,

14. (a) O le ā e tāua ona iloilo e faatatau i le auala o loo tatou faa-aogā ai le taimi? (e) O le ā le fautuaga a Paulo i Kerisiano?

A o le'i filifilia faafiafiaga,
e ao i Kerisiano ona fesili ifo:

- E faapefea ona aafia ai la ma faiā ma le Atua?
- O le a faapefea ona aafia ai a'u lava?
- O le a faapefea ona aafia ai isi?



ia outou faaaogā tatau le taimi.” (Efeso 5:15, 16) O lea la, ia faatapulaa le taimi e faaalu i faafiafiaga, ma ia faamautinoa pea e faamuamua i o tatou olaga la tatou auaunaga i le Atua.—Filipi 1:10.

15 E manino mai, e tatau ona tatou teena faafiafiaga e tatou te iloa e lē talia e Ieova. Ae faapefea faafiafiaga atonu e tatou te lē mautinoa i ai? Pe e ao ona tatou faaeteete pea i ai? Se’i mafaufau i le mea lenei. Pe afai o loo e savali i luga o se mauga, pe e te savali latalata lava i le pito mauga? E leai. Pe afai e tāua iā te oe lou ola, e te taumamao ese mai i mea e lamatia ai. E faapena fo’i i a tatou filifiliga i faafiafiaga. Ua ta’ua i le Afioga a le Atua: “Ia laa ese lou vae mai i le mea leaga.” (Faataoto 4:25-27) O lea, e lē na ona tatou ‘alofia o faafiafiaga e tatou te **iloa** e leaga, ae e tatou te taumamao ese fo’i mai i faafiafiaga e tatou te **lē mautinoa** pe lelei ma ono faaleagaina ai la tatou faiā ma Ieova.

IA MAUA LE SILAFAGA A IEOVA

16 Na tusi le faisalamo: “O outou o ē e alolofa iā Ieova, ia outou ‘ino’ino i le leaga.” (Salamo 97:10) Ua a’oa’o i tatou e le Tusi Paia i manatu ma faaloga o Ieova. Ia fesili ifo pe faapefea i mea ua e a’oa’o ona fesoasoani iā te oe e vaai ai i mea e pei ona silasila i ai Ieova. O se faaa’oa’oga, ua tatou a’oa’oina e inosia e Ieova le “lauaufaiva pepelo, o lima e sasaa le toto o ē e lē sala, o le loto e fafau faufauga

15. E faapefea ona puipuia i tatou mai i faafiafiaga e ono faaleagaina ai la tatou faiā ma Ieova?

16. (a) O ā nisi o mea e inosia e Ieova? (e) E faapefea ona faaalua atu e tatou te ‘ino’ino i mea e inosia e Ieova?

leaga, o vae e vave ona tamo'e e fai le mea leaga." (Faataoto 6:16-19) Ua a'oa'oina i tatou e tatau ona 'alofia "le faitaaga, . . . o le ifo i tupua, o faiga faa-agaga, . . . o le lotoleaga, o le lotoa, . . . o le mata'ua, o onāga, o patī lē taupulea, ma mea faapena." (Kalatia 5:19-21) Pe e te iloa le auala e fesoasoani ai nei mataupu silisili o le Tusi Paia iā te oe e filifili ai faafiafiaga? E tatou te manana'o e usita'ia tapulaa a Ieova i vala uma o o tatou olaga, pe a tatou faatasi ma isi pe na o i tatou fo'i. (2 Korinito 3:18) O filifiliga e tatou te faia pe a na o i tatou, e masani ona faaalua mai ai le tagata moni e iai i tatou.—Salamo 11:4; 16:8.

17 O lea, pe a tatou filifili faafiafiaga, ia fesili ifo: 'E faapefea i la'u filifiliga ona aafia ai la ma faiā ma Ieova? E faapefea ona aafia ai lo'u lotofuatiaifo?' Se'i o tatou iloilo nisi mataupu silisili e fesoasoani iā i tatou pe a filifili faafiafiaga.

18 Pe a filifili faafiafiaga, ua tatou filifilia mea e faatumu ai o tatou mafaufau. Na tusi Paulo: "O mea uma ua moni, o mea uma ua matuā tāua, o mea uma ua tonu, o mea uma ua mamā, o mea uma e faatupu ai le lotofiafia, o mea uma ua ta'uleleia, o amioga lelei uma lava ma mea e viia ai se tasi, ia faaaauu ona manatunatu i nei mea." (Filipi 4:8) Pe a faatumu o tatou mafaufau i na mea lelei, e mafai ona tatou faapea atu: "Ia mālīe iā te oe upu a lo'u gutu ma manatunatuga o lo'u loto Ieova e."—Salamo 19:14.

17. O ā fesili e ao ona tatou fesili ifo ai a o le'i filifilia faafiafiaga?
 18, 19. (a) O le ā le fautuaga na avatu e Paulo i Kerisiano? (e) O ā mataupu silisili o le a fesoasoani iā i tatou e filifili ai faafiafiaga?

19 Ia fesili ifo: ‘O ā mea o loo faatumu ai lo’u mafaufau? Pe a uma ona matamata i se ata po o se faafiafiaga, pe ou te maua ai ni mafaufauga lelei ma faafouina ai? Pe ou te lagona ai le filemu ma maua ai se lotofuatiaifo lelei? (Efeso 5:5; 1 Timoteo 1:5, 19) Pe ou te sa’oloto ai e tatalo atu iā Ieova? Po o le a leaga ai o’u faalogona? Po ua avea le faafiafiaga ma pogai ou te mafaufau ai i faiga sauā po o amioga lē mamā? (Mataio 12:33; Mareko 7:20-23) Po o o’u “mulimuli i lenei faiga o mea a le lalolagi” pe a filifili a’u faafiafiaga? (Roma 12:2) O a tatou tali faamaoni e fesoasoani e iloa ai mea e ao ona tatou faia ina ia faamalosia ai pea la tatou faiā ma Ieova. E tatou te fia tatalo e pei o le faisalamo: “Ia e liliuese o’u mata mai i le vaai atu i mea e lē aogā.”*—Salamo 119:37.

E AAFIA ISI I A TATOU FILIFILIGA

20 O le isi mataupu silisili tāua lenei ia manatua: “E taga mea uma lava; ae e lē o mea uma e aogā. E taga mea uma lava; ae e lē o mea uma e atia’e ai. Aua ne’i sa’ilia e se tasi lona lava lelei, a ia faaauau ona sa’ili le lelei o isi.” (1 Korinito 10:23, 24) O le iai o le sa’olotoga iā i tatou e faia ai se mea, e lē uiga ai e faapea e tatau lava ona tatou faia lenā mea. E tatau ona tatou mafaufau ma le faaeteete i auala e aafia ai uso ma tuafāfine i a tatou filifiliga.

* E mafai ona maua isi mataupu silisili e fesoasoani iā i tatou i le filifilia o faafiafiaga, i le Faataoto 3:31; 13:20; Efeso 5:3, 4; ma le Kolose 3:5, 8, 20.

20, 21. Aiseā e ao ai ona tatou amana’ia faalogona o isi pe a filifili a tatou faafiafiaga?

21 E lē tutusa lotofuatiaifo o tagata uma. O se faa-a'oa'oga, e ono faataga e lou lotofuatiaifo oe e matamata i se polokalame o le televise. Ae mulimuli ane e iloa, o lenā polokalame e aafia ai le lotofuatiaifo o le isi uso po o se tuafafine. O le ā e te faia? E ui lava e iai lau aiā e matamata ai i lenā polokalame, ae e te ono filifili e te lē matamata ai. Aiseā? Talu ai e te lē mana'o e 'agasala i lou uso,' po o le sili atu fo'i ona leaga, o le 'agasala iā Keriso.' (1 Korinito 8:12) E tatou te lē manana'o e faia se mea e tausuai ai o tatou uso Kerisiano.—Roma 14:1; 15:1; 1 Korinito 10:32.

22 Ae faapefea pe afai e lē faatagaina oe e lou lotofuatiaifo e matamata, faitau, pe faia fo'i se mea o loo talia e le isi tagata? Talu ai e te alofa ma faaloalo i lou uso, e te lē faamalosiā la o ia e tutusa a oulua filifiliga. E iloa e se ave taavale e ono saoasaoa pe lemū fo'i le aveave a isi nai lo o ia, ae o i latou uma o ni ave taavale lelei. I se tulaga talitutusa, atonu o loo oulua mulimuli uma ma le isi uso i mataupu silisili o le Tusi Paia, e ui e iai sina eseesea i o oulua manatu e faatatau i faafiafiaga e talia.—Failauga 7:16; Filipi 4:5.

23 O le ā la e fesoasoani ina ia filifili lelei ai a tatou faafiafiaga? O le a tatou faia filifiliga lelei pe a faa-aogā o tatou lotofuatiaifo ua a'oa'oina i mataupu silisili o le Tusi Paia, ma matuā manatu mamafa i uso ma tuafafine. O le a tatou fiafia ona ua tatou faia “mea uma lava ina ia faamamaluina ai le Atua.”

22. E faapefea ona faaalua lo tatou magafagafa pe a faia filifiliga a isi Kerisiano?

23. O le ā e fesoasoani ina ia filifili lelei ai a tatou faafiafiaga?

1 O A TATOU FILIFILIGA I
FAAFIAFIAGA E FAAALIA
ATU AI LE TELE O LO
TATOU ALOFA IĀ IEOVA

“Ia faia mea uma lava ina ia faamamaluina ai
le Atua.”—1 Korinito 10:31

**Aiseā e ao ai ona tatou faaeteete pe a filifili
faafiafiaga?**

Salamo 11:5, 7; 34:14;

Roma 12:9;

1 Korinito 6:9, 10

O le tele o faafiafiaga i aso
nei—e tusa po o ata tifaga,
upega tafa'ilagi, poloka-
lame o le televise, taaloga
vitiō, musika, po o isi
auala—e lē mamā, e sauā,
pe faatemoni.

Mareko 12:30;

Roma 12:1, 2

O a tatou faafiafiaga e
mafai ona faafouina ai i
tatou, pe matuā faigatā
ai ona tatou tumau faa-
maoni iā leova.

Ieremia 17:9;

Kalatia 6:7

E aafia i tatou ona o a
tatou faafiafiaga.

2 E MAFAI ONA FESOASOANI MATAUPU SILISILI O LE TUSI PAIA PE A FILIFILI A TATOU FAAFIAFIAGA

“Ia malamalama po o le ā le finagalo
o Ieova.”—Efeso 5:17

O ā mataupu silisili o le Tusi Paia e fesoasoani iā
i tatou ina ia faia ai ni filifiliga lelei i faafiafiaga?

Salamo 16:8;

Faataoto 6:16-19;

Kalatia 5:19-21

E tatau ona tatou ‘ino’ino
i mea e inosia e Ieova, e
pei o faiga sauā, faiga
faatemoni, ma amioga
lē mamā.

Salamo 19:14;

Filipi 4:8

Pe a faatumu o tatou ma-
faufau i mea lelei ma ma-
faufau loloto i ai, ua tatou
faafiafiaina Ieova.

Mataio 6:33;

Efeso 5:15, 16

E tatau ona tatou faaeteete
i le tele o le taimi e tatou
te faaalu i faafiafiaga. O la
tatou tapua’iga iā Ieova e
tatau ona avea ma mea e
sili ona tāua i o tatou
olaga.

3 E AAFIA ISI I A TATOU FILIFILIGA

“Aua ne’i sa’ilia e se tasi lona lava lelei,
a ia faaauau ona sa’ili le lelei o isi.”

—1 Korinito 10:24

Aiseā e tatau ai ona tatou manatu mamafa i faalogona o isi pe a filifili a tatou faafiafiaga?

Failauga 7:16;

Roma 2:21

E ono eseese filifiliga a Kerisiano i faafiafiaga. Nai lo o le faamasinosino i filifiliga a isi, e tatou te taumafai e fai ni filifiliga lelei.

Kalatia 6:5;

Filipi 4:5

E aafia a tatou filifiliga ona o o tatou lotofuatiaifo, ma e lē tutusa lotofuatiaifo o tagata uma.

1 Korinito 10:32;

Filipi 1:10

E tatou te lē manana’o e tausuai o tatou uso ma tuafāfine, o lea e tatou te filifili ai ma le faaeteete faafiafiaga.

PE E TĀUA IĀ TE OE LE OLA E PEI ONA TĀUA I LE ATUA?

“Auā o loo iā te oe le puna o le ola.”

—SALAMO 36:9.

UA FOA’I mai e Ieova iā i tatou se meaalofa matagofie. O lenā meaalofa o le ola. (Kenese 1:27) E finagalo Ieova ia tatou maua se olaga e sili ona lelei. O lea ua ia saunia mai ai mataupu silisili e a’oa’o ai i tatou ina ia faia filifiliga aogā. E tatau ona tatou faaaogā nei mataupu silisili e fesoasoani iā i tatou e “iloa le mea sa’o ma le mea sesē.” (Eperu 5:14) O le faia faapea, ua tatou faa-tagata ai Ieova e a’oa’o i tatou ia mafaufau lelei. O le ola i mataupu silisili a le Atua ma iloa po ua faapefea ona faaleleia ai o tatou olaga, e tatou te malamalama ai i le matuā tāua o na mataupu silisili.

² E matuā lavelave le olaga. E iai tulaga e masani ona tula’i mai e leai se tulafono patino o le Tusi Paia e faa-tatau i ai. O se faaa’oa’oga, e tatou te ono mana’omia ona faia ni filifiliga i togafitiga faafoma’i e faaaogā ai le toto. E faapefea ona tatou faia ni filifiliga e faafiafia ai Ieova? Ua iai i le Tusi Paia mataupu silisili e tatou te iloa ai le silafaga a Ieova i le ola ma le toto. Pe afai e tatou te malamalama i nei mataupu silisili, o le a tatou faia la ni

1, 2. (a) O le ā le meaalofa matagofie ua foa’i mai e Ieova iā i tatou? (e) O le ā ua tuuina mai e Ieova e fesoasoani iā i tatou e maua ai se olaga e sili ona lelei?

filifiliga atamai ma maua ai se lotofuatiiaifo lelei. (Faataoto 2:6-11) Se'i o tatou iloilo nisi o na mataupu silisili.

LE SILAFAGA A LE ATUA I LE OLA MA LE TOTO

³ Ua a'oa'o mai e le Tusi Paia e paia le toto auā ua fai ma sui o le ola. E tautele la iā Ieova le ola. Ina ua fasiotia e Kaino lona uso, na fetalai atu i ai Ieova: "O loo alaga mai iā te a'u le toto o lou uso mai i le eleele." (Kenese 4:10) O le toto o Apelu na fai ma sui o lona ola. Ina ua ta'ua e Ieova le toto o Apelu, sa faasino atu o ia i le ola o Apelu.

⁴ Ina ua mavae le Lolo i aso o Noa, na fetalai atu le Atua i tagata e mafai ona latou aai i aano o manu. Peita'i, na fetalai patino atu o ia: "O le aano o le manu ma lona toto, o lona ola lea, aua tou te aai ai." (Kenese 9:4) E faatatau atu lenei poloa'iga i fanau uma a Noa e aofia ai ma i tatou. Ua manino mai la, i le silafaga a Ieova, o le toto ua fai ma sui o le ola. E ao ona tatou vaai i le toto e pei ona silasila i ai Ieova.—Salamo 36:9.

⁵ E tusa ai ma le Tulafono na tuu atu e Ieova iā Mose, na fetalai Ieova: "O so o se tasi . . . na te 'aina so o se toto, ou te teena lea tagata ua 'ai i le toto, ma ou te fasiotia o ia. Auā o le ola o le meaola ua iai i lona toto." —Levitiko 17:10, 11.

⁶ Na ta'ua i le Tulafono a Mose, pe a tapē e se tasi se manu mo meataumafa, e tatau ona ia sasaa le toto i le eleele. O le faia faapea e faaalua ai ua toe faafo'i atu le ola o le manu i Lē na faia o ia, o Ieova lea. (Teutero-

3, 4. (a) Na faapefea ona faailoa mai e Ieova lana silafaga i le toto? (e) O le ā ua fai ma sui o le toto?

5, 6. Na faapefea ona faaalua mai i le Tulafono a Mose le silafaga a Ieova i le ola ma le toto?

nome 12:16; Esekielu 18:4) Ae e le'i faatalitalia e Ieova tagata Isaraelu e mafai ona latou aveesea atoatoa le toto o se manu pe a tapē. Pe a faia le mea sili e latou te mafaia e aveese ai le toto, o le a latou aai i le aano o le manu ma se lotofuatiaifo mamā. O le faatāua o le toto o le manu, na faaalua ai lo latou faaaloalo i Lē na foa'iina mai le ola, o Ieova. Na faatonuina fo'i e le Tulafono tagata Isaraelu e ofo atu manu e fai ai taulaga e ufiufi ai agasala.—Taga'i i Faaopoopoga 19 ma le 20.

⁷ E mafai ona tatou iloa le tāua o le toto i le gaoioiga a Tavita sa fai ina ua tau ma tagata Filisitua. Ina ua iloa e ona tagata totoa ua fia inu o ia, na latou ō atu loa i le togālauapi a le fili, o se nofoaga na lamatia ai o latou ola, ina ia asu mai se vai mo ia. Ae ina ua latou aumai le vai iā Tavita, e le'i inu ai o ia “a ua ia sasaa atu iā Ieova.” Na faapea ane Tavita: “Ieova e, ia mamao mai iā te a'u ona faia o lenei mea! Po ou te inu ea i le toto o tagata na lamatia o latou ola?” Na malamalama Tavita e tautele i le Atua le ola ma le toto.—2 Samuelu 23:15-17.

⁸ E oo ane i taimi o ulua'i Kerisiano, ua lē toe faia e tagata o le Atua ni taulaga e faaogā ai manu. Peita'i sa mana'omia pea ona iai le vaauga sa'o i le toto. O le 'taumamao mai i le toto' o se tasi lenā o vaega o le Tulafono na finagalo Ieova ia tausia pea e Kerisiano. Sa tāua tele lenei tulafono e pei lava o le 'alofia o le faitaaga ma le ifo i tupua.—Galuega 15:28, 29.

⁹ E faapena fo'i i aso nei. I le avea ai ma Kerisiano, ua tatou iloa o Ieova o le Puna o le ola ma o Ieova e ana ola

7. Na faapefea ona faaalua e Tavita lona faatāuaina o le toto?

8, 9. O le ā le vaauga e tatau ona iai i Kerisiano i aso nei e faata-tau i le toto?

uma. Ua tatou iloa fo'i o le toto e paia ma o le sui o le ola. O lea ia faamautinoa ua tatou iloilo mataupu sili-sili o le Tusi Paia, pe a faia filifiliga e faatatau i togafitiga faafoma'i e faaogā ai le toto.

LE FAAAOGĀINA O LE TOTO I TOGAFITIGA FAAFOMA'I

10 Ua malamalama Molimau a Ieova o le 'taumamao mai i le toto,' e sili atu mea e aofia ai i lo o le tau ina lē 'aina pe inu le toto. E uiga atu i le lē taliaina o se tuigā-toto, lē tuiina atu o lou toto i se isi tagata, ma le lē teuina o o tatou lava toto ina ia fai ai ni tuigātoto. E uiga atu fo'i i le lē taliaina o le tuiina mai o so o se vaega o vaega autū e fā o le toto—o sela mūmū, sela papa'e, sela faato'a toto, ma le vaega faasuavaia o le toto.

11 O nei vaega autū e fā o le toto e ono vaevaeina i ni vaega ninii. E tatau ona filifili se Kerisiano pe talia pe lē talia ia vaega ninii o le toto. E faapena fo'i i togafitiga e faaogā ai le toto o le ma'i lava ia. E filifili le Kerisiano lava ia po o le a faapefea ona faaogā lona toto *pe a faia sona taotoga, se su'esu'ega faafoma'i, po o se isi togafitiga o loo faia i le taimi lenei.*—Taga'i i le Faaopoopoga 21.

12 Pe e tāua iā Ieova a tatou filifiliga i mataupu e faaogā ai le lotofuatiaifo? Ioe, e tāua. E naunau mai Ieova i manatu ma uuna'iga o o tatou loto. (**Faitau le Faataoto 17:3; 24:12.**) O lea la, pe a tatou faia se filifiliga mo togafitiga faafoma'i, e ao ona tatou tatalo mo

10, 11. (a) O le ā le vaaiga a Molimau a Ieova i tuigātoto e faaogā ai le toto atoa po o vaega autū e fā o le toto? (e) O ā filifiliga e patino i le Kerisiano lava ia?

12. (a) Aiseā e tāua ai iā Ieova a tatou filifiliga i mataupu e faaogā ai le lotofuatiaifo? (e) E faapefea ona tatou faia ni filifiliga atamai e faatatau i togafitiga faafoma'i?

O le a faapefea ona
ou faamatala atu la'u
filifiliga e faatatau i le
faaaogāina o vaega
ninii o le toto?



le ta'ita'iga a Ieova ma faia ni sa'ililiga i na togafitiga. Pe a māe'a, ona faaaogā lea o o tatou lotofuatiaifo ua a'oa'oina i le Tusi Paia e fai ai la tatou filifiliga. E lē tatau ona tatou fesili atu i isi po o le ā e latou te faia pe afai e iai i lea tulaga, ma e lē tatau fo'i i isi ona taumafai e aiāina a tatou filifiliga. E ta'itasi le Kerisiano ma 'tauave lana avega.'—Kalatia 6:5; Roma 14:12.

O TULAFONO A IEOVA E FAAALIA AI LONA ALOFA IĀ I TATOU

13 O so o se mea e finagalo Ieova e tatou te faia, e mo lo tatou lelei ma e faailoa mai ai lona alofa iā i tatou. (Salamo 19:7-11) E lē na o le pau le māfuaaga e tatou te ususita'i ai iā Ieova ona e tatou te maua ai aogā mai i ana tulafono. E tatou te ususita'i iā Ieova ona e tatou te alolofa iā te ia. E tatou te teena tuigātoto ona e tatou te alolofa iā Ieova. (Galuega 15:20) O lo tatou ususita'i fo'i e puipuia ai lo tatou soifua mālōlōina. Ua iloa e le to'atele o tagata i aso nei lamatiaga o tuigātoto, ma e talitonu le to'atele o foma'i o togafitiga e lē faaaogāina ai le toto, e sili atu ona lelei mo le soifua mālōlōina o le ma'i. Ua manino mai e atamai ma alofa ala o Ieova. —**Faitau le Isaia 55:9; Ioane 14:21, 23.**

14 O tulafono a Ieova e mo le lelei o ona tagata i taimi uma. Na tuuina atu e Ieova iā Isaraelu anamua tulafono e puipuia ai i latou mai faalavelave mata'utia. O se faa-a'oa'oga, ua ta'ua i se tasi o tulafono, e tatau i lē e ana se

13. O le ā ua tatou a'oa'oina e faatatau iā Ieova mai i ana tulafono ma mataupu silisili e faatatau i le toto?

14, 15. (a) O ā tulafono na tuuina atu e Ieova i ona tagata ina ia puipuia ai i latou? (e) E faapefea ona e faatatauina mataupu silisili o loo i na tulafono?

fale ona fausia se puipui e si’o ai le tualuga mafolafola o le fale, ina ne’i pa’ū ai se tasi. (Teuteronome 22:8) O se tasi o tulafono e faatatau atu i meaola. Pe afai e iai i se tasi se povi po’a taufesua, e ao ona ia faamautinoa ua tuu i se nofoaga malu ina ia aua ne’i osofa’ia ai se tasi pe oti ai. (Esoto 21:28, 29) Pe afai e le’i usita’ia e se tagata Isaraelu nei tulafono, na pa’ū i luga o ia pe a maliu ai se tasi.

15 Ua ta’u mai ai iā i tatou i nei tulafono le tautele o le ola iā Ieova. O le ā se aafiaga iā i tatou o le iloaina o lenei mea? E tatau ona faaalua lo tatou faatāua o le ola i le auala e tausia ai o tatou fale ma taavale, le auala e ave ai le taavale, ma le auala e filifili ai a tatou faafiafiaga. O nisi tagata, aemaise lava talavou, e latou te manatu e leai ni mea leaga e mafai ona tutupu iā i latou, o lea ua latou faia ai ni gaoioiga e lamatia ai ma lē amana’ia i’uga mata’utia. Ae e lē finagalo Ieova e tatou te faia ni amioga faapena. E finagalo Ieova ia tatou faatāua o tatou ola faapea fo’i ma ola o isi.—Failauga 11:9, 10.

16 E tāua iā Ieova ola o tagata uma. E oo lava i se pepe e le’i fanau mai e tautele iā te ia. I le Tulafono a Mose, pe afai e faafuase’i ona aafia se fafine tō i se faalavelave ma maliu ai **pe** oti ai fo’i lana pepe, e nofosala lenā tagata iā Ieova i le fasioti tagata pa’ivalea. O lona uiga e tusa lava po o se faalavelave faafuase’i, e ao lava ona totogi le ola ona o lea ua maliu le tagata. (**Faitau le Esoto 21: 22, 23.**) I le silafaga a le Atua, o le pepe e le’i fanau mai o se tagata ola. I le iloaina o lenā mea, o le ā sou manatu i faalogona o Ieova e faatatau i le faapa’ū tama? O ā ni ona faalogona a o silasila mai i le faitau miliona o pepe e le’i fananau mai ua fasiotia i tausaga ta’itasi?

16. O le ā le silafaga a Ieova e faatatau i le faapa’ū tama?

17 Ae faapefea la pe afai na faia e se fafine le faapa'ū tama a o le'i a'oa'oina le silafaga a Ieova i lenā mea? E mafai ona ia mautinoa e faamagalalo o ia e Ieova e faavae i le taulaga a Iesu. (Luka 5:32; Efeso 1:7) E lē mana'omia ona lagona pea le nofosala e se fafine na faia se mea sesē faapena i le taimi ua te'a, pe afai ua salamō moni o ia. "E alofa mutimutivale Ieova ma alofa fua . . . E pei ona vavamamao o le mea e oso a'e ai le lā mai i le mea e goto ifo ai, e faapea fo'i ona faamamao e ia o a tatou solitulafono mai iā i tatou."—Salamo 103:8-14.

IA 'ALOFIA LE LOTO ITA

18 O le faatāua o le meaalofa o le ola mai i le Atua, e amata mai i o tatou loto. E aofia ai le auala e tatou te manatu ai i isi. Na tusi le aposetolo o Ioane: "O lē e 'ino'ino i lona uso o le fasioti tagata o ia." (1 Ioane 3:15) O le lē fiafia i se tagata e mafai ona tupu ai le ita e aunoa ma lo tatou iloaina. O le 'ino'ino e mafai ona uuna'ia ai se tasi e lē faaaloalo i isi, faia tuua'iga sesē e faatatau iā i latou, ma oo lava ina talotalo ia latou feoti. E silafia e Ieova o tatou faalogona e faatatau i isi tagata. (Levitiko 19:16; Teuteronomie 19:18-21; Mataio 5:22) Pe afai ua tatou iloa o loo iā i tatou le loto ita i se tasi, e mana'omia ona tatou galulue mamafa ina ia lia'iese na faalogona.—Iakopo 1:14, 15; 4:1-3.

19 E iai se isi auala e faailoa atu ai lo tatou faatāuaina

17. O le ā e mafai ona faamāfanafanaina ai se tinā sa faia le faapa'ū tama a o le'i a'oa'oina e faatatau iā Ieova?

18. Aiseā e tatau ai ona tatou faia taumafaiga uma ina ia lia'iese le loto ita?

19. E faapefea i le silafaga a Ieova i faiga sauā ona iai se aafiaga iā i tatou?

o le ola. Ua tatou a'oa'oina mai i le Salamo 11:5, 'e ino-sia lava e Ieova le tagata e fiafia i le faasauā.' Pe a tatou filifilia faafiafiaga sauā, e faailoa atu ai e tatou te fiafia i faiga sauā. E tatou te lē manana'o e tuu i o tatou mafau-fau ni upu, manatu, ma ata sauā. Nai lo o lea, e tatou te manana'o e faatumu o tatou mafaufau i manatu mamā ma filemu.—**Faitau le Filipi 4:8, 9.**

AUA NE'I IAI SE VAEGA I FAALAPOTOPOTOGA E LĒ FAATĀUAINA LE OLA

20 E lē faatāua e le lalolagi a Satani le ola, ma i le sila-faga a Ieova, ua latou nofosala i le toto ona o le fasioti tagata. E faitau miliona tagata ua fasiotia i le tele o senituri ona o pulega faapolotiki, e aofia ai ma le to'atele o auauna a Ieova. Ua faamatalaina i le Tusi Paia nei pulega po o malo o ni manufe'ai. (Tanielu 8:3, 4, 20-22; Faaaliga 13:1, 2, 7, 8) I aso nei, ua matuā taulau pisinisi o loo faatauina atu meatau. Ua maua e tagata le tele o tupe faasili mai i le faatau atu o na meatau mata'utia. E manino mai, "o le lalolagi atoa o loo nofo to'ilalo i le pule a lē o loo leaga."—1 Ioane 5:19.

21 Ae o Kerisiano moni, "e lē o ni tagata o le lalolagi" i latou. E solitū tagata o Ieova i faiga faapolotiki ma taua. Talu ai e latou te lē fasioti tagata, e latou te lē lagoonoina fo'i so o se faalapotopotoga e fasiotia tagata. (Ioane 15:19; 17:16) Pe a sauāina Kerisiano, e latou te lē tali atu i ni uiga sauā. Na a'oa'oina e Iesu i tatou e ao ona alolofa atu e oo lava i o tatou fili.—Mataio 5:44; Roma 12:17-21.

20-22. (a) O le ā le silafaga a Ieova i le lalolagi a Satani? (e) E faapefea ona faaaliga e tagata o le Atua "e lē o ni tagata o le lalolagi" i latou?

22 Ua tuua'ia lotu i le faitau miliona o tagata ua fasiotia. Ina ua ta'ua e le Tusi Paia Papelonia le Aai Tele, po o lotu sesē uma a le lalolagi, ua faapea mai: "Ua maua i lenei aai le toto o le 'auperofeta, ma le 'aupaiia, ma tagata uma ua fasiotia i le lalolagi." Po o e malamalama i le māfuaaga ua poloa'ia ai i tatou e Ieova: "Lo'u nuu e, ia outou ō ese mai iā te ia"? O i latou e tapua'i iā Ieova e lē faia sa latou vaega i lotu sesē.—Faaaliga 17:6; 18:2, 4, 24.

23 O le "ō ese mai" iā Papelonia le Aai Tele e aofia ai le faailoa manino atu e lē o toe avea i tatou ma vaega o se lotu sesē. O se faaa'oa'oga, e mana'omia ona tatou faamautinoa ua aveese o tatou igoa mai i le lisi o sui auai o se lotu. Ae e lē na o le pau lenā. E tatau fo'i ona tatou 'ino'ino ma teena mea leaga o loo faia e lotu sesē. Ua faataga ma faaauiluma e lotu sesē amioga lē mamā, faiga faapolotiki, ma le matape'ape'a. (**Faitau le Salamo 97:10**; Faaaliga 18:7, 9, 11-17) O le i'uga, e faitau miliona soifua ua maumau i le tele o tausaga.

24 A o tatou le'i iloaina Ieova, sa iai nisi o auala na tatou lagolagoina ai mea leaga e faia e le lalolagi a Sātani. Ae ua suia i tatou i le taimi nei. Ua tatou talia le togiola ma tuuina atu o tatou ola i le Atua. Ua tatou tofo i le "taimi e toe faafouina ai mai iā Ieova." O lona uiga ua tatou maua le filemu ma se lotofuatiaifo lelei, i le iloaina ua tatou faafiafiaina le Atua.—Galuega 3:19; Isaia 1:18.

25 E tusa lava pe sa avea i tatou ma sui o se faalapoto-

23. O le ā e aofia ai i le "ō ese mai" iā Papelonia le Aai Tele?

24, 25. E faapefea i le iloaina o Ieova ona tatou maua ai le filemu ma se lotofuatiaifo lelei?

potoga e lē faatāuaina le ola, e mafai ona faamagalo i tatou e Ieova e faavae i le togiola. E tatou te matuā talisapaia le meaalofo a Ieova o le ola. E faaalua lo tatou talisapaia e ala i le faia o mea uma e tatou te mafaia, e fesoasoani ai i isi ia a'oa'oina e faataua iā Ieova, tuua le lalolagi a Satani, ma olioli i se faauōga māfana ma le Atua.—2 Korinito 6:1, 2.

FAAILOA ATU LE MALO I ISI

26 I Isaraelu anamua, sa ta'u atu e Ieova i le perofeta o Esekielu ia lapata'i tagata ua toeitiiti oo mai le faaumatiaga o Ierusalem, ma a'oa'o i latou i mea e tatau ona fai ina ia faasaoina ai. Pe afai e lē lapata'ia e Esekielu tagata, o le a tau atu e Ieova iā te ia ola o tagata. (Esekielu 33:7-9) Na faaalua e Esekielu le tāua o le ola e ala i le faia o mea uma na te mafaia ina ia faaoo atu ai lenā fe'au tāua.

27 Ua tuuina mai e Ieova iā i tatou le tofiga ia lapata'i tagata ua lata mai le faaumatiaga o le lalolagi a Satani, ma fesoasoani ia latou iloa Ieova ma faasaoina atu i le lalolagi fou. (Isaia 61:2; Mataio 24:14) E ao ona faia mea uma e tatou te mafaia ina ia faaoo atu ai lenā fe'au i isi. E tatou te faamoemoe e faapea atu e pei o Paulo: "Ua mamā a'u mai i le toto o tagata uma, auā ou te le'i tao-fia le ta'uina atu iā te outou o le finagalo uma o le Atua." —Galuega 20:26, 27.

28 E iai isi vala o le olaga e mana'omia ona tatou mamā ai. O le a tatou iloilo ina nei vala i le mataupu o loo sosoo mai.

26-28. (a) O le ā le galuega faapitoa na tuuina atu e Ieova iā Esekielu? (e) O le ā ua poloa'ia i tatou e Ieova e fai i aso nei?

1 E TAUTELE IĀ IEOVA LE OLA

“Auā o loo iā te oe le puna o le ola.”

—Salamo 36:9

Aiseā e tatau ai ona tatou manatu i le ola o se meaalofa e tautele?

Kenese 1:27;

Salamo 19:7-11;

Faataoto 2:6-11

Na faia e Ieova meaola uma, e aofia ai ma tagata. E tautele i tatou iā te ia, ma e finagalo ia maua e tagata uma se olaga fiafia ma aogā.

Roma 14:12;

Kalatia 6:5

E le'i faia e Ieova i tatou ia pei o ni masini. Na ia tuuina mai le filifiliga sa'oloto ma le atamai e fai ai filifiliga e iloa ai le matuā tāua o le ola iā i tatou.

2 E PAIA LE TOTO IĀ IEOVA

“Auā o le ola o le meaola ua iai i lona toto.”

—Levitiko 17:11

O le ā le silafaga a leova e faatatau i le toto?

Levitiko 17:10;

Faataoto 13:16;

Galuega 15:20;

Roma 12:2

E ono tula’i mai se tulaga e mana’omia ai ona tatou faia ni filifiliga tāua e uiga i ni togafitiga faafoma’i e faaaogā ai le toto, e aofia ai le taliaina po o le lē taliaina o vaega ninii o le toto. E lē tatau ona faia e isi nei filifiliga mo i tatou. A o le’i tula’i mai se tulaga faapena, e tatau ona tatou tatalo mo le ta’ita’iga ma faia sa’ili’iliga talafeagai.

Kenese 9:4, 5, 9;

Teuteronome 12:16;

Galuega 15:28, 29

I le Tusi Paia, o le toto ua fai ma sui o le ola. E le’i suia lava le tulafono a le Atua i le toto. O loo tumau pea talu mai le taimi o Noa, i le taimi na tuuina atu ai e le Atua iā Isaraelu le Tulafono a Mose, se’ia oo mai i taimi o Kerisiano.

3 E AO ONA TATOU VAAI I LE OLA E PEI ONA SILASILA I AI IEOVA

“E faapena ona maualuga o o’u ala i o outou ala, ma o’u manatu i o outou manatu.” —Isaia 55:9

O ā nisi o auala e faaalua ai e tautele iā i tatou le ola?

Esoto 21:22, 23

E tāua iā leova ola o tagata uma. E sesē le faapa’ū tama auā i le silafaga a le Atua, e oo lava i se pepe e le’i fanau mai ua avea ma tagata ola.

Salamo 103:8-14;

Galuega 3:19;

Efeso 1:7

Pe afai na faia e se tinā se faapa’ū tama i le taimi ua te’a ae ua salamō i le taimi lenei, o le a faamagalō o ia e leova.

Salamo 11:5;

Failauga 11:9, 10

E tatou te faatāua le ola e ala i le ‘alofia o taaloga e lamatia ai le ola po o amioga sauā. E tatou te faateete fo’i ia tausia le saogalemu o o tatou fale ma taavale.

4 UA NOFOSALA LE LALOLAGI A SATANI I LE SILAFAGA A IEOVA

“Ua ou iloa atu le fafine ua onā i le toto o le ‘aupaia.”—Faaaliga 17:6

Aiseā ua nofosala ai i le toto le lalolagi a Satani?

Faaaliga 18:2, 4, 9, 24

E faitau miliona ē ua fasiotia ona o faiga faalotu, faiga faapolotiki, ma le matape‘ape‘a.

Mataio 24:14;

Ioane 17:16;

Galuega 20:26, 27

E solitū pea Kerisiano ma e latou te lē lagolagoina so o se faalapopotoga e fesoota’i atu i faigātaua po o fasiotiga tagata. E tatou te fesoasoani i tagata ia maua le ola e ala i le tala’i atu i ai o le fe‘au o le Malo.

E FINAGALO IEOVA IA MAMĀ ONA TAGATA

“E te amio mamā i le tagata e amio mamā.”

—SALAMO 18:26.

SE'I faapea o loo sauni e se tinā alofa lana tama mo le a'oga. Ua faamautinoa e le tinā ua uma ona ta'ele ma ua mamā ona ofu a'oga. O le faia faapea e ola mālōlōina ai le tamaitiiti ma faailoa atu ai i isi o loo tausia lelei o ia e ona mātua.

² E finagalo lo tatou Tamā o Ieova ia tatou mamā ma amio mamā. (Salamo 18:26) E na te silafia e tatou te

1-3. (a) Aiseā e faamautinoa ai e se tinā ua mamā lana tama?
(e) Aiseā e finagalo ai Ieova ia mamā ona tagata?



maua aogā pe a tausia le mamā. E tatou te faamamaluina fo’i o ia pe a tatou mamā.—Esekielu 36:22; **faitau le 1 Peteru 2:12.**

³ O le ā e uiga i ai le tausia o le mamā? Aiseā e tāua ai ona tatou tausia le mamā? A o iloiloaina nei fesili, e tatou te ono iloa ai ni suiga e mana’omia ona tatou faia.

AISEĀ E MANA’OMIA AI ONA TATOU MAMĀ?

⁴ Ua tatou a’oa’oina mai i le faaa’oa’oga a Ieova, e tatau ona tatou mamā. (Levitiko 11:44, 45) O lea la, o le māfuaaga autū e tatau ai ona tatou mamā, ona e tatou te fia “faaa’oa’o i le Atua.”—Efeso 5:1.

⁵ E tele mea ua tatou a’oa’oina mai le foafoaga e faatatau i le silafaga a Ieova i le mamā. Ua saunia e Ieova faataamilosaga faalenatura e tausia ai lo tatou ‘ea ma le vai ia mamā. (Jeremia 10:12) Se’i manatu i le tele o auala e faamamā ai e le lalolagi ia lava, e tusa lava po ua faaleagaina e tagata. O se faaa’oa’oga, na saunia e Ieova meaola ninii ia e faato’ā mafai ona iloa pe a faa-aogā se tioata e faalapopo’a ai mea. E mafai e nei meaola ninii ona suia otaota oona ia avea ma mea mamā. E mata’ina lenei faiga. Ua faaaogā fo’i e saienitisi nisi o nei meaola ninii e toe faamamā ai mea ua faaona-ina.—Roma 1:20.

⁶ Ua tatou iloa fo’i le tāua o le mamā e ala mai i le Tulafono na tuuina atu e Ieova iā Isaraelu e ala iā Mose. O se faaa’oa’oga, sa tatau i tagata ona mamā

4, 5. (a) Aiseā e ao ai ona tatou mamā? (e) O le ā ua tatou a’oa’oina mai i le foafoaga e faatatau i le silafaga a Ieova i le mamā? 6, 7. Na faapefea ona faaalua i le Tulafono a Mose e tatau ona mamā i latou e tapua’i iā Ieova?

faaletino ina ia talia ai e Ieova la latou tapua'iga. Na tatau i le ositaulaga sili ona ta'ele faalua i le Aso o le Togisala. (Levitiko 16:4, 23, 24) Sa tatau fo'i i isi ositaulaga ona fufulu o latou lima ma vae a o le'i ofoina atu taulaga. (Esoto 30:17-21; 2 Nofoaiga a Tupu 4:6) I nisi tulaga, o le lē usiusita'i i tulafono o le tausia o le mamā, o lona faasalaga o le oti.—Levitiko 15:31; Numera 19:17-20.

⁷ Ae faapefea aso nei? E tatou te a'oa'oina mai i le Tulafono le tele o mea e faatatau i tapulaa a Ieova. (Malaki 3:6) Ua faaalua manino mai ai e tatau i tagata tapua'i o Ieova ona mamā. E le'i suia tapulaa a Ieova. O loo faatalitalia e Ieova ona tagata tapua'i i aso nei ia mamā.—Iakopo 1:27.

O LE Ā E UIGA I AI LE TAUSIA O LE MAMĀ?

⁸ I le silafaga a Ieova, e tele mea e aofia ai i le mamā i lo o le tau ina tausia o o tatou tino, lavalava, ma fale ia mamā. O le mamā e aofia ai vala uma o le olaga. E aofia ai la tatou tapua'iga, amio, ma le mafaufau. E tatau ona tatou mamā i vala uma o le olaga ina ia tatou mamā ai i le silafaga a Ieova.

⁹ **Mamā le tapua'iga.** E lē tatau ona tatou aafia i tapua'iga sesē i so o se auala. A o avea tagata Isaraelu o ni pagota i Papelonia, sa si'omia i latou i tagata na aafia i tapua'iga lē mamā faapaupau. Na valoia e Isaia o le a toe fo'i tagata Isaraelu i o latou laueleele ma toe atia'e le tapua'iga mamā. Na fetalai atu Ieova iā i latou: “Ia ō ese mai i inā, aua tou te papa'i atu i se mea e lē

8. O ā auala e tatau ona tatou mamā ai?

9, 10. O le ā e uiga i ai le mamā i la tatou tapua'iga?

mamā, ia ō ese mai i totonu iā te ia, ia outou tausisi i le mamā.” E lē tatau ona nini faatasi la latou tapua’iga i le Atua ma a’oa’oga, masaniga, po o tū a lotu sesē o Papelonía.—Isaia 52:11.

10 E ‘alofia fo’i e Kerisiano moni i aso nei lotu sesē. (Faitau le 1 Korinito 10:21.) I le lalolagi atoa, e tele aganuu, tū, ma talitonuga e faavae mai i a’oa’oga a lotu sesē. O se faaa’oa’oga, o le tele o aganuu e talitonu tagata e iai se mea i totonu o le tagata e ola pea pe a oti, ma e tele tū ua faavae a’e i na talitonuga. (Failauga 9: 5, 6, 10) E tatau i Kerisiano ona ‘alofia na tū ma aganuu. E ono uuna’ia i tatou e o tatou aiga ia lagolagoina nei faiga. E tatou te lē lolo atu i na uuna’iga ona e tatou te manana’o ia mamā i le silafaga a Ieova.—Galuega 5:29.

11 Mamā le amio. Ina ia mamā i le silafaga a Ieova, e tatau ona tatou ‘alofia so o se amioga lē mamā tau fe-usua’iga. (Faitau le Efeso 5:5.) I le tusi Paia, ua faatonuina i tatou e Ieova “ia sosola ese i le faitaaga.” Ua ia faamanino mai o i latou e faia amioga lē mamā ae e le salamō, “e lē fai mo latou tofi le malo o le Atua.”—1 Korinito 6:9, 10, 18; taga’i i le Faaopoopoga 22.

12 Mamā le mafaufaufau. O mafaufauga e i’u atu ai i le faia o ni gaioioiga. (Mataio 5:28; 15:18, 19) O mafaufauga mamā e uuna’ia ai i tatou e faia gaioioiga mamā. E moni e tatou te lē lelei atoatoa, o lea e iai taimi e oso a’e ai iā i tatou ni mafaufauga sesē. Pe a oso a’e na mafaufauga, e tatau ona tatou teena i le taimi lava lenā. Pe a lē faia faapea, o le a oo ai ina lē mamā o tatou loto.

11. O le ā e uiga i ai le mamā o le amio?

12, 13. Aiseā e mana’omia ai ona mamā o tatou mafaufaufau?

E ono amata ona tatou manana'ō e faia mea o loo tatou mafaufau pea i ai. Nai lo lea, e tatau ona faatumu o tatou mafaufau i manatu mamā. (**Faitau le Filipi 4:8.**) O lea e tatou te 'alofia ai faafiafiaga lē mamā pe sauā. E tatou te filifili fo'i ma le faaeteete mea e tatou te faitau, matamata, pe talanoa ai.—Salamo 19:8, 9.

13 Ina ia tumau i le alofa o le Atua, e tatau ona mamā la tatou tapua'iga, amio, ma le mafaufau. Ae e tāua fo'i iā Ieova ona tatou mamā faaletino.

E FAAPEFEA ONA TATOU MAMĀ FAALETINO?

14 Pe a tausia ia mamā o tatou tino ma le si'omaga, o le a aogā iā i tatou ma o tatou tuaoi. O le a lelei ai o tatou faalogona ma o le a fiafia fo'i isi e faatasitasi ma i tatou. Ae e iai le isi māfuaaga e sili ona tāua e tatau ai ona tatou mamā faaletino. Pe afai e tatou te mamā, e faamamaluina ai Ieova. Se'i manatu i le mea lenei: Pe a e vaai i se tamaitiiti e palapalā i taimi uma, e ono lē lelei ou manatu e faatatau i ona mātua. I se tulaga talitutusa, pe afai e tatou te lē tumamā, e ono lē lelei manatu o tagata e faatatau iā Ieova. Na faapea mai Paulo: "Ua matou lē faia se mea e tausuai ai, ina ia aua ne'i ta'uleagaina la matou faiva; ae i mea uma lava ua matou faailoa atu ai i matou o ni auauna a le Atua." —2 Korinito 6:3, 4.

15 O tatou tino ma lavalava. E mana'omia ona tatou tumamā i aso uma. O se faaa'oa'oga, e ao ona tatou taele i aso uma pe a mafai. Ia fufulu o tatou lima i se fasimoli ma le vai, aemaise lava a o le'i aai pe

14. Aiseā e tāua ai ona mamā faaletino?

15, 16. O ā mea e tatou te faia ina ia tausua ai lo tatou tumamā?



I le avea ai ma tagata o leova, e ao ona tausia
ia mamā i tatou lava ma o tatou si'omaga

saunia se mea'ai, ma pe a uma ona faaaogā le faleese pe tago i se mea palapalā. E foliga mai o le fufuluina o lima e lē o se mea e tāua tele, ae e tatau lava ona faia faapea ina ia taofia ai le pipisi o siama ma faama'i. E faasaoina ai fo'i ola. Pe afai e leai se faleese, e iai lava auala talafeagai e lafoa'i ai otaotavale. E le'i iai se nofoaga faapitoa i Isaraelu anamua e lafoa'i ai o latou otaotavale. O lea la, sa tanu o latou otaotavale i le palapala e mamao ese mai i o latou fale ma nofoaga e maua ai le suāvai.—Teuteronome 23:12, 13.

16 E lē mana'omia ona taugatā o tatou lavalava pe mulimuli i ni ā'ega fou. Ae e tatau ona mamā ma onomea. (**Faitau le 1 Timoteo 2:9, 10.**) E ao ona faamaluina leova i taimi uma i o tatou foliga vaaia.—Tito 2:10.

17 O tatou fale ma si'omaga. Po o fea lava e tatou te nonofo ai, ia tausia pea le mamā o o tatou fale. Ia faamautinoa ua mamā a tatou taavale, uila, pasika, po o so o se ituaiga taavale, aemaise lava pe afai o loo tatou faa-aogāina e o ai i sauniga po o le tala'iga. Auā pe a tatou tala'i, e tatou te talanoa atu i tagata e faatatau i se lalolagi parataiso mamā. (Luka 23:43; Faaaliga 11:18) O foliga o o tatou fale ma si'omaga, e mafai ona faaalua atu ai o loo tatou sauniuni e ola i lenā lalolagi fou mamā.

18 O tatou maota tapua'i. E tatou te faaalua le tāua o le mamā e ala i le tausia mamā o nofoaga mo a tatou tapua'iga, e tusa lava po o Maota mo Sauniga po o nofoaga mo fonotaga. E masani ona mātāuina e tagata le mamā o le Maota mo Sauniga i le ulua'i taimi e auai mai ai. O lenei tulaga e faamamaluina ai Ieova. I le avea ai ma sui o le faapotopotoga, ua maua e i tatou uma le avanoa e faamamā ai a tatou Maota mo Sauniga ma tausia pea i se tulaga lelei.—2 Nofoaiga a Tupu 34:10.

LIA'I ESE MASANIGA LEAGA

19 E ui e lē o ta'uina mai i le Tusi Paia masaniga leaga uma e ao ona tatou 'alofia, ae ua saunia mai mataupu silisili e fesoasoani iā i tatou e malamalama ai i le finagalo o Ieova i na mea. E lē finagalo o ia e tatou te ulaula pe faaaogā sesē le 'ava malosi ma fualaau faasāina. Afai o i tatou o uō a le Atua, o le a tatou 'alofia la le faia o nei mea. Aiseā? Talu ai e tatou te matuā faatāua le meaalofa o le ola. O na masaniga e mafai ona puupuu

17. Aiseā e ao ai ona tausia pea le mamā o o tatou fale ma si'omaga?

18. Aiseā e ao ai ona tausia ia mamā a tatou Maota mo Sauniga?

19. O ā mea e ao ona tatou 'alofia?

ai lo tatou ola, faaleagaina ai le soifua mālōlōina, ma aafia ai isi tagata. E to'atele tagata ua taumafai e taofia nei masaniga leaga mo le lelei o o latou soifua mālōlōina. Peita'i, o i tatou o uō a Ieova, o le māfuaaga sili la e taofia ai nei masaniga leaga, ona e tatou te alolofa i le Atua. Na faapea mai se tama'ita'i talavou: "O le fesoasoani a Ieova ua mafai ai ona faamamā lo'u olaga ma ou sa'oloto ai mai i a'u masaniga leaga. . . . Ou te manatu e lē mafai ona ou faia nei suiga i so'u lava malosi." Se'i o tatou iloiloina mataupu silisili e lima o le Tusi Paia e fesoasoani i se tasi e taofia ai masaniga leaga.

20 "Le 'aupele e, ona ua tuuina mai iā i tatou o nei folafolaga, o lea se'i o tatou faamamā ai iā i tatou mai i mea uma e faaleagaina ai le tino ma le agaga, a ia faaatoatoaina le faapaiaina i le mata'u i le Atua." (2 Korinito 7:1) E finagalo Ieova ia tatou sa'oloto mai i masaniga leaga ia e faaleagaina ai o tatou tino ma mafafau.

21 O se tasi o māfuaaga sili e "faamamā ai iā i tatou mai i mea uma e faaleagaina ai," o loo ta'ua i le 2 Korinito 6:17, 18. Ua fetalai mai Ieova: "Aua tou te toe papa'i atu i se mea e lē mamā." Ina ua uma ona ia folafola mai lea: "Ona ou talia ai lea o outou. E avea a'u ma o outou tamā, e fai fo'i outou ma o'u atalii ma o'u afafine." Ioe, o le a alofa Ieova iā i tatou e pei o se tamā i lana fanau, pe afai e tatou te 'alofia so o se mea e tatou te lē mamā ai i luma o lana silafaga.

22 "Ia e alofa atu iā Ieova lou Atua ma lou lotoatoa,

20, 21. O ā masaniga e finagalo Ieova ia tatou sa'oloto mai ai?
22-25. O ā mataupu silisili o le Tusi Paia e mafai ona fesoasoani iā i tatou e 'alofia ai masaniga lē mamā?

ma lou ola atoa, ma lou mafaufau atoa.” (Mataio 22:37) O le poloa’iga lea e sili ona tāua. (Mataio 22:38) E alagatatau ona tatou alolofa atoatoa iā Ieova. E faapefea ona tatou alolofa atoatoa iā te ia pe afai e tatou te filifili e fai mea e puupuu ai o tatou ola pe faaleagaina ai o tatou mafaufau? Nai lo o lea, e tatou te faia mea uma e mafai ina ia faaalua ai e tatou te faatāua le ola ua ia tuuina mai.

23 “Ua ia [Ieova] foa’i mai lava i tagata uma le ola, ma le mānava, ma mea uma lava.” (Galuega 17:24, 25) Pe a avatu e sau uō se meaalofo faapitoa mo oe, po o le a e tia’ia pe faaleagaina? O le ola o se meaalofo matagofie mai iā Ieova. E tatou te matuā talisapaia lenei meaalofo. O lea e tatou te manana’o ai e faa-aogā lo tatou ola i se auala e faamamaluina ai o ia. —Salamo 36:9.

24 “Ia e alofa atu i lou tuaoi e pei o oe lava iā te oe.” (Mataio 22:39) E lē na o i tatou e afāina ai i a tatou masaniga leaga. E mafai ona afāina ai fo’i isi o loo tatou faatasi, o ē e sili ona tatou alolofa i ai. O se faaa’oa’oga, e afāina le soifua mālōlōina o se tasi e iai faatasi ma se tagata e ulaula, ona e na te mānavaina le asu o le tapaa. Ae pe afai e taofia masaniga leaga, e faaalua atu ai i ē o loo tatou faatasi lo tatou alolofa iā i latou.—1 Ioane 4:20, 21.

25 “Ia faamanatu atu pea iā i latou ina ia gaua’i ma usiusita’i i malo ma pule.” (Tito 3:1) I le tele o atunuu, o se solitulafono le umia po o le faaaogāina o fualaau ma vailaau faasāina. E tatou te usiusita’i i na tulafono ona ua faatonuina i tatou e Ieova e faaaloalo i le pule. —Roma 13:1.



E faamamaluina leova pe afai e tausia pea lo tatou mamā

26 Pe a fia avea i tatou ma uō a leova, atonu e tatou te iloa e mana'omia ona faia ni suiga. Pe afai o lea, e tatau loa ona fai i le taimi lenei. E lē faigofie ona tuu se masaniga lē mamā, ae e mafai lava ona tatou faia! Ua folafola mai e leova o le a ia fesoasoani mai. Ua fetalai mai o ia: "O a'u o leova, lou Atua, o Lē o loo a'oa'o oe i mea e aogā iā te oe, o Lē e ta'ita'iina oe i le ala e ao ona e ui ai." (Isaia 48:17) Pe a tatou faia le mea sili e tausia ai le mamā, e tatou te mautinoa e faamamaluina ai lo tatou Atua.

26. (a) O le ā e ao ona tatou faia ina ia talia ai e leova la tatou tapua'iga? (e) Aiseā o se auala sili e ola ai le tausia o le mamā i le silafaga a le Atua?

1 E PAIA IEOVA I MEA UMA E NA TE FAIA

“E ao ona paia outou, auā e paia lava a’u.”

—Levitiko 11:45

O le ā lona uiga ia paia?

2 Korinito 6:3, 4, 17, 18

O le paia po o le mamā, e aofia ai vala uma o lo tatou olaga. E aofia ai le tausia mamā o o tatou tino, lava-lava, ma fale. E aofia ai fo’i le tausia mamā o la tatou tapua’iga, amioga, ma le mafaufau.

Esoto 30:17-21;

Ieremia 10:12

E tāua iā

leova le mamā.

Salamo 19:8, 9;

Mataio 15:18, 19;

Filipi 4:8

O mafaufauga e i’u atu ai i le faia o gaoioiga, e ao la ona faia mea uma e tatou te mafaia ina ia tausia ai le mamā o o tatou mafaufau.

2 E TATAU ONA MAMĀ LA TATOU TAPUA'IGA

“Ia outou tausisi i le mamā, o outou o ē e tauave ipu a Ieova.”—Isaia 52:11

E faapefea ona tausia pea le mamā o la tatou tapua'iga?

1 Korinito 10:21;

Iakopo 1:27

la tatou 'alofia tū, aganuu, ma talitonuga e fesoota'i atu i lotu sesē.

Levitiko 11:44;

Malaki 3:6

E puipuia e Ieova ona tagata i taimi uma e ala i le tuuina atu i ai o tulafono ma mataupu silisili.

3 O MASANIGA LEAGA E FAALEAGAINA AI LA TATOU FAIĀ MA IEOVA

‘Se’i o tatou faamamā iā i tatou mai i mea uma e faaleagaina ai le tino ma le agaga.’—2 Korinito 7:1

O ā masaniga e finagalo leova ia tatou ‘alofia?

Mataio 22:39;

Galuega 17:25;

Tito 3:1

Ia ‘alofia mea e faaleaga ai lou tino pe puupuu ai lou ola, e pei o le ulaula, ma le faaaogā sesē o le ‘ava malosi po o vailaau ma fua-laau faasāina. E tatou te ‘alofia nei masaniga ona e tāua o tatou ola faapea ola o isi, ma e tatou te faa-aloalo i tulafono a le atunuu o loo tatou nonofo ai.

Roma 7:21-25

E tusa pe matuā faigatā ona tuua masaniga leaga, ae e tatou te lē faavaivai ai. E mafai ona tatou manu-malo i lenei tauiviga ona o le fesoasoani a leova.

4 E MAFAI ONA TATOU TAOFIA MASANIGA LEAGA

“Ou te tatu’i lo’u tino e fai ma pologa.”

—1 Korinito 9:27

O le ā e fesoasoani iā i tatou e taofia ai se masaniga leaga?

Mataio 6:13

la tatalo mo le agaga paia e fesoasoani iā te oe ia teena tu’inanauga sesē.

1 Peteru 4:3, 4

la ‘alofia ata tifaga, musika, po o tagata e fai-gatā ai ona e tauivi ma masaniga leaga.

Roma 12:1, 2

la nofosauni e faaaogā mataupu silisili o le Tusi Paia e faamatala atu ai māfuaaga ua e filifili ai e ‘alofia nisi o masaniga, e pei o le ulaula.

“IA SOSOLA ESE I LE FAITAAGA”

“O le mea lea, ia fasiotia tu’inanauga i o outou itutino, o le faitaaga, o amioga lē mamā, le tu’inanau i feusua’iga, o tu’inanauga leaga ma le mana’o tele, o le ifo i tupua lava lea.”—KOLOSE 3:5.

UA ALU atu se tagata faifaiva i se nofoaga e maua ai itu-aiga o i’a e mana’o i ai. Ua ia filifili le maunu ma lafo lana ofe i le sami. Ua ia faatalitali ma le onosa’i, ma ina ua ‘ai le maunu, ua ia se’i faafuase’i lana ofe ma ua mau le mātau i le gutu o le i’a, ma maua ai loa lana i’a.

² I se tulaga talitutusa, e mafai fo’i ona maileia tagata. O se faaa’oa’oga, na toetoe a ulu atu Isaraelu i le Nuu Folafolaina ina ua latou tolauapi i Fanua Laugatasi o Moapi. Na folafola e le tupu o Moapi o le a ia avatu tupe e tele i se tamāloa e igoa iā Palaamo, pe afai e na te faamalalaia Isaraelu. Mulimuli ane, na maua e Palaamo se auala e faamalalaia ai e Isaraelu i latou lava. Sa ia filifilia ma le faaeteete le maunu. Na ia auina atu fafine talavou Moapi i le mea na tolauapi ai Isaraelu, ina ia faatosina i tamāloloa Isaraelu.—Numera 22:1-7; 31:15, 16; Faaaliga 2:14.

³ Pe na taulau le maunu a Palaamo? Ioe. E faitau afe tane Isaraelu na faia “feusua’iga lē mamā ma afafine o

1, 2. Na faapefea ona taumafai Palaamo e maileia tagata o leova?
3. Na faapefea ona taulau le maunu a Palaamo i tagata Isaraelu?

tagata Moapi.” Na latou tapua’i fo’i i atua sesē, e aofia ai Paala o Peoro le atua o feusua’iga. O le i’uga, e 24,000 tagata Isaraelu na fasiotia i le tuaoi o le Nuu Folafolaina.—Numera 25:1-9.

⁴ Aiseā e matuā to’atele ai tagata Isaraelu na aafia i le mailei a Palaamo? Talu ai e na o o latou faanaunauga manatu faapito lava na mafaufau i ai, ae na galo iā i latou mea uma na faia e Ieova mo i latou. E tele māfuaaga na tatau ai ona faamaoni tagata Isaraelu i le Atua. Na ia faasa’olotoina i latou mai i le nofo pologa i Aikupito, fafaga i latou i le toafa, ma avatu ma le saogalemu i tuaoi o le Nuu Folafolaina. (Eperu 3:12) Peita’i, na tosina atu i latou i le faia o feusua’iga lē mamā. Na tusi le aposetolo o Paulo: “Aua fo’i ne’i faaaauau ona tatou faitaaga, e pei ona faitaaga o nisi o i latou, ma fano ai.”—1 Korinito 10:8.

⁵ Ua lata tele mai le lalolagi fou. O lea, ua pei i tatou o tagata Isaraelu i tuaoi o le Nuu Folafolaina. (1 Korinito 10:11) Ua sili atu ona tu’inanauga le lalolagi i aso nei i feusua’iga nai lo o tagata Moapi. E faigofie ona aafia tagata o Ieova i nei tu’inanauga. O le mailei aupito i sili ona taulau a le Tiapolo i aso nei, o feusua’iga lē mamā.—Numera 25:6, 14; 2 Korinito 2:11; Iuta 4.

⁶ Ia fesili ifo iā te oe lava, ‘Pe e sili iā te a’u le fiafia puu-puu lea e maua mai i tu’inanauga manatu faapito, po o le mauaina o le fiafia i le ola e faavavau i le lalolagi fou?’ Pe e aogā so o se taumafaiga ia usiusita’i i le poloa’iga a Ieova: “Ia sosola ese i le faitaaga?”—1 Korinito 6:18.

4. Aiseā na faia ai e le faitau afe o tagata Isaraelu feusua’iga lē mamā?

5, 6. O le ā e tatou te a’oa’oina mai i le mea na tupu i Fanua Lau-gatasi o Moapi?

O LE Ā LE FAITAAGA?

⁷ E to'atele tagata i aso nei ua faia amioga lē kea faa-uamaaa ma lē faaaloalo i tulafono a le Atua e uiga i fe-usua'iga. I le Tusi Paia, o le faitaaga e faasino atu i le faia o feusua'iga i le va o tagata e to'alua e le'i faaipoipo e tusa ai ma le faatulagaga a le Tusi Paia. E aofia ai feusu-a'iga i le va o tagata o le ituaiga e tasi, ma feusua'iga i le va o tagata ma manu. O gaoioiga tau feusua'iga e mafai ona aofia ai feusua'iga e faaaogā ai le gutu, alāfe'au, po o le loteloteina o le totogasā o le isi tagata ina ia faagae ai faalogona taufeusua'iga.—Taga'i i le Faaopoopoga 23.

⁸ Ua ta'ua manino i le Tusi Paia, pe a faaauau ona faia e se tasi le faitaaga, e lē mafai ona iai pea o ia i le faa-potopotoga. (1 Korinito 6:9; Faaaliga 22:15) O le tagata fo'i e faitaaga ua lē faaaloalo o ia iā te ia lava ma lē mau-faatuatuaina ai e isi. E masani lava o le faitaaga e i'u ai i faafitauli. E maua ai se lotofuatiaifo ua oia, ma'itaga e le'i faatalitalia, faafitauli i le faaipoipoga, faama'i, po o le oti. (**Faitau le Kalatia 6:7, 8.**) Pe afai e mafaufau se tasi i āuga o le faitaaga, atonu la o le a lē mana'o o ia e faia ni amioga lē mamā. Peita'i, pe afai e uia e se tasi le laasaga muamua lea e i'u ai i amioga lē mamā, e ma-sani lava ona ia mafaufau mo na o le faamalieina o ona tu'inanauga. O lenā laasaga muamua e aofia ai ata ma faamatalaga matagā tau feusua'iga.

LAASAGA MUAMUA—ATA MA FAAMATALAGA MATAGĀ TAU FEUSUA'IGA

⁹ O le fuafuaga o ata ma faamatalaga matagā tau feusua'iga, ina ia faagae ai o tatou tu'inanauga i

7, 8. O le ā le faitaaga? Aiseā e matuiā ai lenei mataupu?

9. Aiseā o se matuā lamatiaga ai ata ma faamatalaga matagā tau feusua'iga?

feusua'iga. I aso nei, ua iai i so o se mea ata ma faamatalaga matagā tau feusua'iga—i mekasini, tusi, musika, polokalame i le televise, faapea le Initaneti. E manatu le to'atele e lē leaga nei ata ma faamatalaga, peita'i e matuā telē lona lamatiaga. E mafai ona faapogaia ai se tasi e mana'o tele i feusua'iga ma atia'e ai tu'ina-nauga e lē talafeagai. E aafia loa se tasi i ata ma faamatalaga matagā tau feusua'iga, e amata ona ia uia se ala e i'u atu ai i masaniga e pei o le taaloalo i totogasā, faafitauli i le faaipoipoga, ma oo lava ina tatala le faaipoipoga.—Roma 1:24-27; Efeso 4:19; taga'i i le Faaopopoga 24.

10 E tāua lo tatou malamalama i le auala e maileia ai i tatou i le faitaaga. Mātau le lapata'iga lenei o loo i le Iakopo 1:14, 15: “Ua faaosoosoina tagata ta'ito'atasi ona ua tosina ma maileia i ona lava tu'inanau. Auā a tō le tu'inanau, ona fanau mai ai lea o le agasala, a matua le agasala ona fanau mai ai lea o le oti.” O lea, pe a oso a'e ni mafaufauga sesē, ia vave ona lia'i ese. Pe afai e faafuase'i ona e vaai i ni ata matagā, ia tilotilo ese! Ia tapē le komepiuta pe sui i se isi ālaata. Aua ne'i faatagaina ni tu'inanauga sesē i lou olaga, auā e mafai ona malolosi ou tu'inanauga sesē ma o le a matuā faigatā ai ona e pulea.—**Faitau le Mataio 5:29, 30.**

11 E sili atu ona silafia e Ieova i tatou nai lo o i tatou lava. O lea, e na te silafia lelei lo tatou tulaga lē lelei atoatoa. Ae e na te silafia fo'i e mafai ona tatou manumalo

10. E faapefea ona fesoasoani le mataupu silisili o loo i le Iakopo 1:14, 15 ina ia tatou 'alofia ai le faia o le faitaaga?

11. E faapefea ona fesoasoani mai Ieova pe a iā i tatou ni mafaufauga sesē?



O se mea atamai le faaeteete pe a faaaogā le Initaneti

i tu'inauga sesē. Ua fetalai mai Ieova: “O le mea lea, ia fasiotia tu'inauga i o outou itutino, o le faitaaga, o amioga lē mamā, le tu'inanau i feusua'iga, o tu'inauga leaga ma le mana'otele, o le ifo i tupua lava lea.” (Kolose 3:5) E ui lava e lē faigofie ona faia faapea, ae e onosa'i Ieova ma o le a ia fesoasoani mai iā i tatou. (Salamo 68:19) Na maileia se uso talavou i le masaniga o le matamata i ata matagā taufeusua'iga ma le taaloalo i totogasā. Na manatu ana uō i le a'oga o nei mea o ni vala masani o le olaga a o tuputupu a'e. Ae na faapea mai o ia: “Na faaleagaina ai lo'u lotofuatiaifo, ma na ou ola ai i se olaga lē mamā.” Na ia iloa e mana'omia ona pulea ona tu'inauga, ma na mafai ona ia manumalo i na masaniga ona o le fesoasoani a Ieova. Pe afai o iai ni ou mafaufauga lē mamā, ia ōle atu iā Ieova mo le “mana lea e sili atu i le malosia o tagata,” ina ia e tausisi

ai i ni mafaufauga mamā.—2 Korinito 4:7; 1 Korinito 9:27.

12 Na tusi Solomona: “O le mea e sili ona leoleoina o mea uma, ia leoleoina lou loto, auā e tupu mai ai vaipuna o le ola.” (Faataoto 4:23) O o tatou “loto” e faasino atu i o tatou tagata i totonu, o tagata o loo sila-fia lelei e Ieova. E telē se aafiaga iā i tatou o mea e tatou te vāai i ai. Na faapea mai le tane faamaoni o Iopu: “Ua ou osia le feagaiga ma o’u mata. E faapefea la ona ou mana’ona’o i se taupou?” (Iopu 31:1) I le pei o Iopu, e mana’omia ona pulea mea e tatou te vāai ma mafaufau i ai. Ia tatou tatalo e pei o le faisalamo: “Ia e liliuese o’u mata mai i le vaai atu i mea e lē aogā.”—Salamo 119:37.

LE FILIFILIGA SESĒ A TINA

13 E malolosi taa’iga a a tatou uō iā i tatou, a lē i se auala lelei po o se auala lē lelei fo’i. Pe a e filifilia ni uō e usiusita’i i tapulaa a le Atua, e mafai ona latou fesoasoani iā te oe e faia fo’i faapea. (Faataoto 13:20; **faitau le 1 Korinito 15:33.**) E tatou te iloa le tāua o ituaiga uō e tatou te filifilia, mai i le mea na tupu iā Tina. O ia o se tasi o afafine o Iakopo ma na ola a’e i se aiga na tapua’i iā Ieova. Sa ola Tina i se olaga mamā, peita’i na faauō atu i teine Kanana e le’i tapua’i iā Ieova. Sa matuā ese le vaaiga a tagata Kanana e faatatau i feusua’iga mai i le va-aiga a tagata o le Atua, ma na lauiloa tagata Kanana i le amio lē mamā. (Levitiko 18:6-25) A o iai Tina faatasi ma ana uō, sa feiloa’i ai i se taule’ale’a Kanana e igoa iā

12. Aiseā e mana’omia ai ona ‘leoleoina o tatou loto’?

13. O ā ituaiga uō na filifilia e Tina?

Sekema na fia alu iā te ia. O Sekema o se taule'ale'a sa "sili ona aga faatamālii" i lona aiga, peita'i e le'i alofa iā leova.—Kenese 34:18, 19.

14 Na faia e Sekema se gaoioiga na foliga mai o se tulaga masani ma na ia taliaina. Talu ai na fia alu Sekema iā Tina, o lea na ia "faamalosiā" ai loa Tina. (**Faitau le Kenese 34:1-4.**) O lenei solitulafono na amata ai ni vevesi na i'u ai i mafatiaga mo Tina ma lona aiga atoa.—Kenese 34:7, 25-31; Kalatia 6:7, 8.

15 E lē tatau ona tatou faia le mea sesē na faia e Tina, e faapea ina ia iloa ai pe e aogā tapulaa tauamio a leova mo i tatou. Ua ta'ua i le Faataoto 13:20: "O lē e savali ma tagata atamamai, e atamai ai o ia, a o lē e faifaimea faatasi ma tagata vālea, e leaga ai lava o ia." Ia fai ma ou sini le taumafai e malamalama i "ala lelei uma," ona e 'alofia ai lea o tigā ma mafatiaga e lē mana'omia.—Faataoto 2:6-9; Salamo 1:1-3.

16 E mafai ona tatou atamamai e ala i le su'esu'e o le Afioga a le Atua, tatalo atu iā te ia a o le'i faia ni filifiliga, ma mulimuli i fautuaga aogā mai i le pologa faamaoni ma le faautauta. (Mataio 24:45; Iakopo 1:5) Ua tatou iloa o i tatou uma e vaivai ma e lē lelei atoatoa. (Ieremia 17:9) Ae e faapefea ona e tali atu pe a lapata'ia oe e se tasi, ua e i se tulaga lamatia e i'u atu ai i le faia o le faitaaga? Po o le a e lē fiafia, pe e te talia ma le lotomaulalo lana fesoasoani?—2 Tupu 22:18, 19.

17 O se faaa'oa'oga, se'i mafaufau i le tulaga lenei. I le fale faigaluega a se tuafafine, ua amata ona fiafia atu

14. O le ā na tupu iā Tina?

15, 16. E mafai faapefea ona tatou atamamai?


17. Faata'ita'i mai pe faapefea ona fesoasoani iā i tatou se fautuaga mai i se isi Kerisiano.

se tama iā te ia ma valaaulia o ia e la te eva. E lē auauna le tama iā Ieova, ae e foliga mai e lelei ma agalelei. Ua vaai se isi tuafafine iā i la’ua ma mulimuli ane taumafai e lapata’i le tuafafine e faatatau i lenei tulaga. O le a faapefea ona tali atu le tuafafine muamua? Po o le a ia taumafai e pupuni lana gaoioiga o loo fai, pe vaai i le atamai o le lapata’iga? Atonu e alofa le tuafafine iā Ieova ma mana’o e fai le mea sa’o. Ae afai e faaaauu pea ona uō ma lenei tama, po o ‘sola ese o ia i le faitaaga’ pe o loo ia “faatuatuaaina lona lava loto”?—Faataoto 22:3; 28:26; Mataio 6:13; 26:41.

LESONA MAI I LE FAAA’OA’OGA A IOSEFA

18 A o talavou Iosefa, sa fai o ia ma pologa i Aikupito. Sa fai ma masani a le avā a le matai o Iosefa le fai atu

18, 19. Faamatala pe na faapefea ona sola ese Iosefa mai le faitaaga.



soo iā te ia e la te faia ni feusua'iga. Peita'i na iloa e Iosefa e sesē lenā gaoioiga. Sa alofa Iosefa iā Ieova ma na mana'o ia faafiafia Ieova. O lea, sa musu Iosefa i taimi uma lava na taumafai ai le fafine e tauanau o ia. Talu ai o ia o se pologa, e le'i mafai la ona ia tuua lona matai. I se tasi aso ina ua taumafai le avā a lona matai e faamalosi o ia e la te faia ni feusua'iga, sa sola ese Iosefa ma "alu i fafo."—**Faitau le Kenese 39:7-12.**

19 Sa ono matuā ese le tulaga e tupu pe ana faapea na iai ni mafaufauga lē mamā o Iosefa, pe moemiti fo'i e faatatau i le fafine. Peita'i, sa sili atu ona tāua iā Iosefa le la faiā ma Ieova nai lo o se isi lava mea. Na faapea atu Iosefa i le fafine, ua tuu mai e lona matai iā te ia le pule i mea uma, "se'i vaganā ai oe [le fafine], auā o oe o lona faletua. Pe faapefea ona ou faia lenei mea leaga tele ma ou agasala ai i le Atua?"—**Kenese 39:8, 9.**

20 E ui lava sa mamao ese Iosefa mai i lona aiga, ae sa faamaoni pea o ia iā Ieova, ma na faamanuiaina ai o ia. (Kenese 41:39-49) Sa fiafia le finagalo o Ieova i le faamaoni o Iosefa. (Faataoto 27:11) E lē faigofie ona teena faaosoosoga tau feusua'iga. Ae ia manatua upu nei: "O outou o ē e alolofa iā Ieova, ia outou 'ino'ino i le leaga. O loo ia leoleoina ona tagata faamaoni; e na te lavea'iina i latou mai i lima o ē e amioleaga."—**Salamo 97:10.**

21 E faaalua ma le lototetele e tagata o Ieova i aso uma e latou te "'ino'ino i le leaga ae naunau i le lelei." (Amosa 5:15) Po o le ā lava lou matua, e mafai ona e faa-

20. E faapefea ona tatou iloa sa fiafia Ieova iā Iosefa?

21. Na faapefea ona faaa'oa'o se uso talavou iā Iosefa?

maoni iā Ieova. Sa tofotofoina le faamaoni o se uso talavou i le a’oga. Na fai i ai se teine e mafai ona la momoe pe afai e fesoasoani mai i lana su’ega o le matematika. O le ā na faia e lenei uso? Sa gaoioi o ia e pei o Iosefa. Ua faapea mai o ia: “Na vave ona ou teena le mea na ia mana’o i ai. E ala i le tumau i le faamaoni, na ou tausia ai pea lo’u tulaga mamalu ma le faaaloaloga o a’u lava.” O so o se “fiafia puupuu” lava e maua mai i le faia o le faitaaga, e masani ona i’u atu ai i tigā ma le lotomafatia. (Eperu 11:25) O le usiusita’i iā Ieova e maua ai i taimi uma le fiafia tumau.—Faataoto 10:22.

IA TALIA LE FESOASOANI A IEOVA

22 O le a taumafai Satani e faaaogā le faitaaga e mai-leia ai i tatou, ma e mafai ona avea o se lu’i. Atonu o i tatou uma lava e iai ni mafauauga sesē mai i lea taimi i lea taimi. (Roma 7:21-25) E silafia lelei e Ieova lenei tulaga ma e na te manatua o le “efuefu lava i tatou.” (Salamo 103:14) E faapefea la pe a faia e se Kerisiano le agasala matuiā o le faitaaga? Po o lona uiga ua leai sona faamoemoe? Leai. Pe afai e salamō moni le tagata, o le a fesoasoani Ieova iā te ia ma e “nofosauni e faamagalō” o ia.—Salamo 86:5; Iakopo 5:16; **faitau le Faataoto 28:13.**

23 Ua saunia mai fo’i e Ieova “meaalofa i tagata,” o toeaina alolofa o ē e manatu mamafa iā i tatou. (Efeso 4:8, 12; Iakopo 5:14, 15) Ua ia saunia mai toeaina ina ia fesoasoani e toe faaleleia la tatou faiā ma ia.—Faataoto 15:32.

22, 23. E faapefea ona fesoasoani mai Ieova e tusa lava pe na tatou faia se agasala matuiā?

IA FAAAOGĀ LE “LOTO UA POTO”

24 Ina ia faia ni filifiliga lelei, e mana'omia ona tatou malamalama i aogā e maua mai i tulafono a Ieova. E tatou te lē fia pei o le taule'ale'a lea e faamatala i le Faataoto 7:6-23. E le'i iā te ia le “loto ua poto,” o lea na mai-leia ai o ia i le faia o le faitaaga. O le loto ua poto e tele mea e aofia ai nai lo o le tau ina poto. Pe a iai iā i tatou le loto ua poto e tatou te taumafai ia malamalama i manatu o le Atua ma faatatau i o tatou olaga. Ia manatua nei upu atamai: “O lē ua maua le loto ua poto, ua alofa o ia iā te ia lava. O lē ua leoleoina le faautaga loloto, e na te maua mea lelei.”—Faataoto 19:8.

25 Po o e talitonu atoatoa e sa'o tapulaa a le Atua? Pe e te talitonu moni lava o le a e maua le fiafia pe a e usita'i i na tapulaa? (Salamo 19:7-10; Isaia 48:17, 18) Pe afai e te lē o mautinoa, ia manatua mea lelei uma ua faia e Ieova mo oe. “Inā outou tofotofa ia ma iloa ai e lelei Ieova.” (Salamo 34:8) O le a e iloa ai o le tele o lou faia faapea, o le tele fo'i lenā o lou alofa i le Atua. Ia fiafia i mea e fiafia i ai Ieova, ma ia 'ino'ino i mea e na te ino-sia. Ia faatumu lou mafaufau i mea lelei, o mea moni, o mea ua tonu, o mea mamā, o mea e faatupu ai le fiafia, ma amioga lelei uma lava. (Filipi 4:8, 9) E mafai ona pei i tatou o Iosefa, o lē na maua aogā mai i le atamai o Ieova.—Isaia 64:8.

26 E tusa pe e te nofofua po ua e faaipoipo, e finagalo Ieova ia fiafia lou olaga. O loo iai i mataupu e lua o loo sosoo mai, manatu e mafai ona fesoasoani ina ia tatou maua ai ni faaipoipoga taulau manuia.

24, 25. E faapefea i le “loto ua poto” ona fesoasoani e tatou te 'alofia ai le faia o le faitaaga?

26. O ā manatu o loo sosoo mai o le a tatou talanoaina?

1 O LE FAITAAGA O SE MAILEI

“Ia sosola ese i le faitaaga.”

—1 Korinito 6:18

Aiseā o se lamatiaga ai le faitaaga?

Numera 25:1-9;

2 Korinito 2:11

Ua matuā tu’inanau le lalolagi a Satani i feusu-a’iga, ma o lenei uiga e mafai ona aafia ai tagata o leova. O le faitaaga o se tasi lea o mailei aupito i sili ona taulau a Satani, ma e mana’omia ona puipuia mai ai i tatou.

Faataoto 22:3;

Kalatia 6:7, 8

Ia mafaufau i tigā ma mafatiaga e i’u i ai ona o le faitaaga

1 Korinito 6:9, 10

Pe afai e faaauau ona faia e se tasi le faitaaga, e lē mafai ona iai pea o ia i le faapotopotoga.

2 E MAFAI ONA TATOU TEENA LE FAITAAGA

“Ua faaosoosoina tagata ta‘ito‘atasi ona ua tosina ma maileia i ona lava tu‘inanau. Auā a tō le tu‘inanau, ona fanau mai ai lea o le agasala.”—Iakopo 1:14, 15

E mafai faapefea ona tatou teena le faitaaga?

Iopu 31:1;

Ieremia 17:9;

Mataio 5:27, 28;

Kolose 3:5

la vave ona teena mafau-fauga lē mamā a o le‘i tutupu a‘e ai ni tu‘inanauga sesē. la ‘alofia ata ma faa-matalaga matagā tau feusua‘iga.

Kenese 39:7-12;

2 Korinito 4:7;

Iakopo 1:5

la fai se gaoioiga pe a mana‘omia. la ōle atu mo le fesoasoani a leova.

Faataoto 27:11

la manatunatu loloto i aogā o le usiusita‘i i tula-fono a le Atua.

Faataoto 13:20;

1 Korinito 15:33

la filifili uō e alolofa iā leova ma e tutusa a outou tapulaa.

3 AUA LE FAAVAIVAI; E FESOASOANI MAI IEOVA

“Ieova e, o oe e lelei ma ua e nofosauni e faamagalo.”—Salamo 86:5

E faapefea ona fesoasoani mai leova pe afai ua tatou faia se agasala matuiā?

Salamo 103:14;

Faataoto 28:13;

Roma 7:21-25

Pe a salamō se tagata, o le a faamagalo o ia e leova.

Kalatia 6:1, 2;

Iakopo 5:14-16

E mafai ona fesoasoani mai toeaina o le faapoto-potoga ina ia toe faaleleia la tatou faiā ma le Atua.

Faataoto 3:5, 6;

Filipi 4:8, 9

la mafaufau i se auala e faafiafiaina ai leova. O le i’uga o le a e faia ni fili-filiga atamai.

O LE FAAIPOIPOGA O SE MEAALOFA MAI I LE ATUA

“O le maea sautuatolu e lē vave motusia.”

—FAILAUGA 4:12.

SE'I faaāta le fiafia o se tama ma se teine faaipoipo i le aso o le la faaipoipoga. Ua la tulimata'i ma le fiafia lo la olaga i le lumana'i, ma e tele mea ua la faamoemoe ma moemiti i ai. Ua la moomoo talosia o le a tumau ma fiafia le la faaipoipoga.

² Peita'i, e tele faaipoipoga na lelei le amataga ae e lē o tumau ai i lenā tulaga. Ina ia tumau ma fiafia se faaipoipoga, e mana'omia e le ulugalii ta'iala mai i le Atua. O lea, se'i o tatou iloilo tali a le Tusi Paia i fesili nei: O ā nisi o aogā o le faaipoipoga? Pe afai e te faaipoipo, e faapefea ona e filifili lelei sau paaga? E faapefea ona avea oe o se tane po o se avā lelei? O le ā e fesoasoani ina ia tumau ai se faaipoipoga?—**Faitau le Faataoto 3:5, 6.**

PE E TATAU ONA OU FAAIPOIPO?

³ E manatu nisi e lē mafai ona maua e se tasi le fiafia se'i vaganā lava ua faaipoipo. Peita'i, e lē moni lenei manatu. Na fetalai Iesu o le nofofua o se mea-

1, 2. (a) O le ā e moomoo i ai se ulugalii faato'ā faaipoipo? (e) O ā fesili o le a tatou talanoaina i lenei mataupu?

3. Pe e te manatu e tatau ona faaipoipo se tasi ina ia maua ai le fiafia? Faamatala.

alofa. (Mataio 19:11, 12) Na ta'ua fo'i e le aposetolo o Paulo e iai aogā o le nofofua. (1 Korinito 7:32-38) O oe lava la e faia le filifiliga pe e te faaiipoipo. E lē tatau ona avea au uō, lou aiga, po o le aganuu, ma pogai e faa-malosi ai oe ina ia faaiipoipo.

⁴ Ua ta'ua i le Tusi Paia o le faaiipoipoga o se mea-alofa mai i le Atua, ma e iai ona aogā. Na fetalai Ieova e faatatau i le ulua'i tamāloa o Atamu: "E lē lelei mo le tagata ona ola na o ia. Ou te faia se fesoasoani mo ia, o sē e talafeagai lelei mo ia." (Kenese 2:18) Na faia e Ieova Eva ina ia avea ma avā a Atamu, ma o i la'ua o le ulua'i aiga. Pe afai e iai se fanau a se ulugalii, e tatau ona iai se si'omaga mautū o le la faaiipoipoga e tausia a'e ai le la fanau. Peita'i, o le faia o se fanau e lē na o le pau lenā o le fuafuaga o le faaiipoipoga.—Salamo 127:3; Efeso 6:1-4.

⁵ Na tusi le tupu o Solomona: "E sili ona lelei o le to'alua nai lo o le to'atasi, auā ua iā te i la'ua le tau'i lelei o la la'ua galuega mamafa. Auā afai e pa'ū le tasi, e toe faatūina o ia e lē la te to'alua. Ae faapefea la pe afai e pa'ū le tasi ae e leai se isi e toe faatūina o ia? . . . O le maea sautuatuolu e lē vave motusia."—Failauga 4:9-12.

⁶ O se faaiipoipoga lelei o se faauōga māfana i le va o ni tagata se to'alua e fesoasoani, faamāfanafana, ma puipui e le tasi le isi. E mafai ona malosi se faaiipoipoga pe a iai le alofa, ae o le a atili ona malosi pe afai e tapua'i le tane ma le avā iā Ieova. O le i'uga, o le a pei

4. O ā nisi o aogā o se faaiipoipoga lelei?

5, 6. E mafai faapefea ona avea se faaiipoipoga e pei o se "maea sautuatuolu"?

le la faaipoipoga o se “maea sautuatuolu,” o se maea ua fili faatasi ni maea se tolu. O lenā ituaiga maea e sili atu ona malosi nai lo o se maea sautualua. O le a malosi se faaipoipoga pe a aofia ai leova.

⁷ Pe a uma ona faaipoipo se ulugalii, e mafai ona la olioli i le faamalieina o o la mana’oga masani tau feusua’iga. (Faataoto 5:18) Peita’i, pe afai e faaipoipo se tasi e tau ina ia faamalie ai nei mana’oga, atonu la e na te lē filifilia ma le atamai sana paaga. O le pogai lenā ua faapea mai ai le Tusi Paia, e tatau ona faaipoipo se tasi pe afai ua te’a le “malaulau o lona talavou,” po o le taimi e malolosi ai ona faalogona tau feusua’iga. (1 Korinito 7:36) E sili ona lelei le faatali se’i faaipoipo pe afai ua mafai ona pulea na faalogona. O le a mafai ai ona mafaufau lelei se tasi ma faia se filifiliga e sili ona lelei.—1 Korinito 7:9; Iakopo 1:15.

⁸ Pe afai o e mafaufau e faaipoipo, e lelei ona tau-mafai e malamalama i le tulaga moni o mea, ma ia iloa e iai faafitauli i so o se faaipoipoga. Na ta’ua e Paulo o ē e faaipoipo “e oo puapuaga i o latou tino.” (1 Korinito 7:28) E oo lava i se faaipoipoga e sili ona lelei, e iai taimi e tula’i mai ai faafitauli. O lea, pe afai e te filifili e faaipoipo, ia faamautinoa e te filifili ma le atamai lau paaga.

O AI E TATAU ONA OU FAAIPOIPO I AI?

⁹ Ia manatua le mataupu silisili tāua lenei i le Tusi Paia pe a filifilia sau paaga: “Aua ne’i amo faalēgatasi ma ē e lē talitonu.” (2 Korinito 6:14) O lenei talafaa-

7, 8. O ā fautuaga na ta’ua e Paulo e faatatau i le faaipoipoga?

9, 10. O le ā e tupu pe a tatou faaipoipo i se tasi e lē tapua’i iā leova?

tusa e faavae mai i se faiga sa faaaogā i faato'aga. Pe afai e matuā eseese le lapopo'a ma le malolosi o ni manu se lua, e lē mafai ona nonoa faatasi e se faifaato'aga nei manu e galulue i le fanua. E lē o se gaoioiga alofa le faia faapea i nei manu ona o le a matuā tigāina ai. I se tulaga talitutusa, pe a faaipoipo se tasi e tapua'i ma se isi e lē tapua'i iā Ieova, e ono i'u ai i le tele o faa-fitauli. O lea, ua aumaia ai i le Tusi Paia le fautuaga atamai ia faaipoipo "tau lava o lē ua i le Alii."—1 Korinito 7:39.

10 E iai taimi e manatu ai nisi Kerisiano e sili pe a faaipoipo i se tasi e lē tapua'i iā Ieova nai lo o le nofo to'atasi. Ae pe afai e tatou te lē amana'ia fautuaga a le Tusi Paia, e masani ona i'u ai i tigā ma le faanoanoa. I le avea ai ma tagata tapua'i o Ieova, o le mea e sili ona tāua i o tatou olaga o le tapua'i atu lea iā te ia. O ā ni ou faalogona pe afai e te lua lē faia faatasi ma lau paaga lenā vala e sili ona tāua o lou olaga? Ua filifili le to'atele e nonofofua nai lo o le faaipoipo atu i se tasi e lē alofa ma auauna iā Ieova.—**Faitau le Salamo 32:8.**

11 E lē uiga ai e faapea o so o se tasi lava e auauna iā Ieova e mafai ona avea ma se tane po o se avā lelei mo oe. Pe afai o loo e mafaufau e faaipoipo, ia sa'ili se tasi e te fiafia moni lava i ai ma mafai ona lua faifaimea faatasi. Ia faatali se'i e maua se tasi e tutusa mea e te lua manana'oa e fai, ma o sē e faamuamua le auau-naga i le Atua. Ia faaalu se taimi e faitau ma manatunatu loloto ai i fautuaga aogā mo faaipoipoga, ia o loo maua i lomiga mai i le pologa faamaoni.—**Faitau le Salamo 119:105.**

11. E mafai faapefea ona e filifili lelei sau paaga faaipoipo?



la faaalu se taimi e faitau ma manatunatu loloto ai i fautuaga e faatatau i faaipoipoga o loo i le Afioga a le Atua

12 O nisi o aganuu e filifili e mātua paaga faaipoipo a latou fanau. E manatu le to’atele e iloa lelei e mātua ē e sili ona fetai mo a latou fanau. Sa taatele fo’i lenei aganuu i taimi o le Tusi Paia. O lea, pe afai e mulimuli lou aiga i lenā aganuu, e mafai ona fesoasoani le Tusi Paia i mātua ina ia iloa po o ā uiga e ao ona tilotilo i ai. O se faaa’oa’oga, ina ua filifilia e Aperamo se avā mo lona atalii o Isaako, e lē o tupe po o le tulaga tau-aloa sa ia faatāuaina, ae o le alofa o le teine iā Ieova. —Kenese 24:3, 67; taga’i i le Faaopoopoga 25.

12. O le ā e tatou te a’oa’oina mai i faaipoipoga na filifili e mātua paaga faaipoipo i taimi o le Tusi Paia?

E FAAPEFEA ONA OU SAUNIUNI MO LE FAAIPOIPOGA?

13 Pe afai ua e mafaufau e faaiipoipo, ia faamautinoa ua e sauni. Atonu e te mafaufau ua e sauni, ae se'i o tatou iloilo le uiga moni lava o le sauniuni mo le faaiipoipoga. E ono faate'ia oe i le tali.

14 Ua ta'ua i le Tusi Paia e eseese matafaioi a tane ma avā i le aiga. O lea, e eseese sauniuniga e faia e se tama ma se teine o loo fuafua e faaiipoipo. Pe a mafaufau se tama e faaiipoipo, e ao ona ia fesili ifo po ua nofosauni e avea ma ulu o se aiga. E finagalo Ieova i le tane ia tausia lana avā ma le fanau i le itu faaletino ma tau faalogona. Ae sili ona tāua, e ao i se tane ona ta'imua i lona aiga i le tapua'iga i le Atua. O se tane e na te lē tausia lona aiga, ua faamatala i le Tusi Paia “e sili lona leaga i lo le tagata e lē faatuatua.” (1 Timoteo 5:8) O lea pe afai o oe o se tane o loo mafaufau e faaiipoipo, ia mafaufau i le auala e faatatau ai le mataupu silisili lenei: “Ia sauniuni lau galuega i fafo, ma ia tapena mea mo le galuega i le fanua. Mulimuli ane, ia e atia'e lou aiga o loo i le fale.” I nisi faaupuga, a o e le'i faaiipoipo, ia faamautinoa e mafai ona avea oe ma ituaiga tane o loo finagalo i ai Ieova.—Faataoto 24:27.

15 E ao i se tama'ita'i o loo mafaufau e faaiipoipo ona fesili ifo, po ua nofosauni mo tiute tauave o le avea ma avā ma atonu o se tinā. O loo ta'ua i le Tusi Paia le tele o auala lelei e mafai ona tausia ai e se avā lelei lana tane ma le fanau. (Faataoto 31:10-31) E to'a-tele tane ma fafine i aso nei e mafaufau lava na o mea

13-15. (a) E faapefea ona sauniuni se tama e avea ma se tane lelei?
(e) E faapefea ona sauniuni se tama'ita'i e avea ma se avā lelei?

e fai mai e a latou paaga mo i latou. Peita'i, e finagalo Ieova ia tatou mafaufau i mea e mafai ona tatou faia mo a tatou paaga.

16 A o e le'i faaipoipo, ia manatunatu loloto i fetalaiga a Ieova e faatatau i tane ma avā. O le avea ma ulu o le aiga, e lē uiga ai e faapea e mafai ona sauā se tane i le itu faaletino po o le itu tau faalogona. O sē e avea ma ulu lelei i lona aiga, e faaa'oa'o iā Iesu o lē na alofa ma agalelei i taimi uma i ē na ia tausia. (Efeso 5:23) E ao ona mafaufau se fafine po o le ā e uiga i ai le lagoonoina o faai'uga a lana tane ma felagolagoma'i ma ia. (Roma 7:2) E ao ona fesili ifo po o le a ia gaua'i atu ma le fiafia i se tane e lē lelei atoatoa. Pe afai e manatu e lē mafai ona ia faia, atonu la e sili pe a filifili o ia e nofofua mo le taimi nei.

17 E ao i tane ma avā ona manatu mamafa i le fiafia o a latou paaga nai lo o i latou lava. (**Faitau le Filipi 2:4.**) Na tusi Paulo e faapea: "Ia ta'itasi outou ma alofa i lana lava avā e pei ona ia alofa iā te ia lava; a o le avā, ia matuā faaloalo o ia i lana tane." (Efeso 5:21-33) E mana'omia uma e tane ma avā ona lagona o loo alofagia ma faaloalogia i latou. Ae ina ia taulau manuia se faaipoipoga, e matuā mana'omia ona iloa e se tane o loo faaloalo lana avā iā te ia, ma e ao ona iloa e se fafine e alofa lana tane iā te ia.

18 E tatau ona avea le taimi e uō ai se alii ma se tama'ita'i o se taimi fiafia, a o la taumafai e iloa lelei e

16, 17. Pe afai o e mafaufau e faaipoipo, o ā mea e tatau ona e manatunatu loloto i ai?

18. Aiseā e mana'omia ai ona faaeteete se alii ma se tama'ita'i a o uō?

le tasi le isi. O se taimi fo'i e mana'omia ai ona la malamalama i le tulaga moni o mea ma ia faamaoni, ina ia mafai ona la filifili po o la manana'o moni lava e mafuta faatasi. I le taimi a o uō, ia iloa e se alii ma se tama'ita'i le auala e la te fesoota'i ai ma taumafai le tasi e iloa le mea moni o loo i le loto o le isi. A o mā-fana le la faiā, o se tulaga masani le tosina atu o le tasi i le isi i le itu faaletino. Peita'i, e ao ona la pulea le auala e faaali ai nei faalogona a o le'i faaiipoipo, ina ia aua ne'i o la faia se gaoioiga lē mamā. O le alofa moni

**I le taimi a o uō, ia iloa e se alii ma se tama'ita'i
le auala e la te fesoota'i ai**



o le a fesoasoani iā i la'ua e amio pulea ai, ma la 'alofia ai le faia o se mea e faaleaga ai la la'ua faiā, faapea la latou faiā ma Ieova.—1 Tesalonia 4:6.

E MAFAI FAAPFFEA ONA FAATUMAU LA'U FAAIPOIPOGA?

19 O le tele o tusi ma ata tifaga e faai'u lava i se faaipoipoga telē ma fiafia. Ae o le tulaga moni lava, o le faaipoipoga ua na o se amataga. Na finagalo Ieova i faaipoipoga ia avea o se mafutaga tumau.—Kenese 2:24.

20 E to'atele tagata i aso nei e manatu i le faaipoipoga o se faatulagaga e lē tumau. E faigofie ona faaipoipo e faigofie fo'i ona tatala. E manatu nisi pe a tutupu ni faafitauli, o le taimi lenā e tuua ai le paaga ma faamuta le faaipoipoga. Ae ia manatua le talafaatasa a le Tusi Paia e faatatau i se maea malosi ua faia a'e i ni maea e tolu ua fili faatasi. E lē mafai ona motu se maea faapena e tusa lava po o ā tulaga faigatā. E mafai ona tumau a tatou faaipoipoga pe a sa'ili atu iā Ieova mo se fesoasoani. Na fetalai Iesu: "O ē ua faatasia e le Atua, aua ne'i tuueseeseina e se tagata."—Mataio 19:6.

21 O i tatou uma lava e iai o tatou uiga lelei ma vai-vaiga. E faigofie tele ona ua'i atu i vaivaiga o isi, aemaise lava vaivaiga o a tatou paaga faaipoipo. O le faia faapea e lē mafai ona tatou maua ai le fiafia. I le isi itu, pe afai e taula'i atu i uiga lelei o a tatou paaga, e mafai ona tatou maua ni faaipoipoga fiafia. Pe e mafai ona tatou faia faapea i se paaga e lē lelei atoatoa? Ioe! E

19, 20. O le ā le vaaiga a Kerisiano i le faaipoipoga?

21. O le ā o le a fesoasoani i se tane ma se avā ina ia alofa ai le tasi i le isi?

silafia e Ieova e tatou te lē lelei atoatoa, peita'i o loo ia taula'i atu i o tatou uiga lelei. Se'i faaāta pe ana faapea e lē faia faapena e Ieova! Ua ta'ua i le Salamo 130:3: "Ioa e, ana faapea e te mātaulia mea sesē, Ieova e, o ai sē e mafai ona tū atu i ou luma?" E mafai ona faaa'o-a'o tane ma avā iā Ieova e ala i le vaai i uiga lelei o a latou paaga, ma vave ona faamagalo atu.—**Faitau le Kolose 3:13.**

Ia avea le Afioga a le Atua ma vaega o la
oulua faaipoipoga mai lava i le amataga



22 E mafai ona matuā malosi se faaipoipoga a o faagasolo tausaga. Sa umi ma fiafia le faaipoipoga a Aperamo ma Sara. Ina ua fetalai Ieova iā Aperamo ia tuua lo latou aiga i le aai o Uro, o le taimi lenā atonu ua silia i le 60 tausaga o Sara. Se'i mafaufau i le faigatā iā Sara ona tuua lo latou fale lelei ae nofo i fale'ie. Peita'i, sa avea Sara o se uō lelei ma se paaga lelei a lana tane, ma sa matuā faaaloalo o ia i lana tane. O lea sa ia lagolagoina ai faai'uga a Aperamo ma fesoasoani ia faataunuu na faai'uga.—Kenese 18:12; 1 Peteru 3:6.

23 O le mauaina o se faaipoipoga lelei, e lē faapea ai o taimi uma lava o le a malilie faatasi se tane ma se avā i mea uma. I se tasi taimi ina ua lē faalogo Aperamo iā Sara, na fetalai Ieova iā Aperamo: "Ia faalogo iā te ia." Sa faia faapea e Aperamo ma i'u ai i ni i'uga lelei. (Kenese 21:9-13) Pe a iai ni taimi e te lua lē malilie faatasi ai ma lau paaga i se mea, aua le lotovaivai. E tusa lava pe e te lua lē malilie faatasi, o le mea tāua ia lua feutaga'i i le alofa ma le faaaloalo.

24 E faitau afe ulugalii faaipoipo fiafia i totonu o le faapotopotoga Kerisiano. Pe a e fia faaipoipo, ia manatua o le filifilia o lau paaga o se tasi na o filifiliga e sili ona tāua o le a e faia. O le a aafia ai lou olaga atoa. O lea ia sa'ili atu iā Ieova mo ni ta'iala. O le i'uga, o le a mafai ona e filifilia ma le atamai sau paaga, sauniuni lelei mo le faaipoipoga, ma taumafai e atia'e se faiā malosi ma alofa e faamamaluina ai Ieova.

22, 23. Na faapefea ona faataatia e Aperamo ma Sara se faaa'oga lelei mo ulugalii faaipoipo?

24. E mafai faapefea ona faamamaluina Ieova i a tatou faaipoipoga?

1 O LE FAAIPOIPOGA O SE FAAMANUIAGA MAI IĀ IEOVA

“O le maea sautuatuolu e lē vave motusia.”

—Failauga 4:12

Aiseā e faaipoipo ai tagata?

Kenese 2:18;

Salamo 127:3;

Faataoto 5:18;

Failauga 4:9, 10

O le faaipoipoga e mafai ona maua ai se faauōga, lagolagosua, ma se si'omaga lelei e tausia a'e ai le fanau.

2 FILIFILI MA LE ATAMAI LAU PAAGA

“Ou te . . . faatonu oe i le ala e ao ona e savali ai.”—Salamo 32:8

O le ā e tatau ona tatou iloiloina pe afai e tatou te fia faaipoipo?

1 Korinito 7:39;

2 Korinito 6:14

E atamai le faaipoipo atu tau lava o se tasi e taula’i atu lona olaga e auauna iā leova.

1 Korinito 7:36

E sili ona lelei pe a faa- talitali se’i faaipoipo pe a te’a le taimi e matuā malolosi ai faalogona tau feusu- a’iga.

1 Korinito 7:28

la malamalama i le tulaga moni o mea e faatatau i le faaipoipoga. E iai faafitauli i faaipoipoga uma lava.

3 E ESEESE MATAFAIOI A TANE MA AVĀ I LE AIGA

“E lē lelei mo le tagata ona ola na o ia. Ou te faia se fesoasoani mo ia, o sē e talafeagai lelei mo ia.”—Kenese 2:18

O le ā e faatalitalia e leova mai i se tane ma se avā?

Efeso 5:23;

1 Timoteo 3:1-7; 5:8

E ta’imua se tane i le tapu-a’iga a lona aiga ma tausia lana avā ma le fanau i le itu faaletino ma tau faaloga. E ta’imua o ia i le a’oa’oina ma le a’oa’ia o le fanau.

Faataoto 31:10-31;

Roma 7:2

O le avā o se uō lelei ma o se paaga lelei i lana tane. E lagolagosua i faai’uga a le tane ma vaaia mea fai a lona aiga. E fesoasoani o ia i lana tane i le a’oa’oina o le la fanau.

Efeso 5:33;

Filipi 2:4

E ao i le tane ma le avā ona manatu mamafa i le fiafia o le isi nai lo o lona lava fiafia.

4 E MAFAI ONA FESOASOANI MAI IEOVA IA TUMAU A TATOU FAAIPOIPOGA

“Ona avea ai lea o i la‘ua ma tino e tasi.”

—Kenese 2:24

E faapefea ona faatumauina le malosi o a tatou faaiipoipoga?

Faataoto 3:5, 6;

Mataio 19:6

Na finagalo leova ia avea le faaiipoipoga o se mafutaga e tumau. Ua ia saunia mai fautuaga e sili ona aogā mo faaiipoipoga.

Salamo 130:3;

Kolose 3:13

E ao i se ulugalii ona talia vaivaiga o le tasi. E ao ona la fefaamagaloa‘i ma ua’i atu i uiga lelei o le tasi.

UA MAVAE LE FAAIPOIPOGA

“E lē uma le alofa.”

—1 KORINITO 13:8.

O LE faaiipoipoga o se meaalofo mai iā Ieova. E mafai ona maua ai e se tasi se olaga fiafia. Peita’i, o faaiipoipoga uma lava e iai faafitauli. E ono foliga mai e lē muta na faafitauli, ma e ono avea ma māfuaaga e lē toe māfana ai le tane ma le avā.

² E lē tatau ona faate’ia i tatou pe a tula’i mai ni faafitauli i a tatou faaiipoipoga mai lea taimi i lea taimi. Peita’i, e lē faapea ai ua lē taulau a tatou faaiipoipoga. E oo lava i ulugalii sa matuā ogaoga o latou faafitauli, na maua auala e toe faaleleia ai a latou faiā ma faamalosia ai a latou faaiipoipoga. E faapefea?

MAFUTA VAVALALATA I LE ATUA MA LAU PAAGA

³ O le faaiipoipoga e tuufaatasia ai ni tagata eseese se to’alua. E eseese mea e la te fiafia ma mea e lē fiafia i ai, o manatu, ma auala e faia ai mea. Atonu fo’i e eseese talaaga ma aganuu a se tane ma se avā. E mana’omia e se ulugalii le taimi ma taumafaiga ina ia iloa ma malamalama lelei ai le tasi i le isi.

⁴ A o faagasolo taimi, e ono ua’i atu le tane ma le avā

1, 2. Po o lona uiga ua lē taulau se faaiipoipoga pe a iai ni faafitauli? Faamatala.

3, 4. O le ā e mafai ona tupu i se faaiipoipoga i nisi taimi?



E aogā fautuaga a le Tusi Paia mo se faaipoipoga lelei

i popolega o le tagata lava ia ma lē lelei ai a la fesoota'iga. E foliga mai ua fai lava le mea e loto i ai le tagata ia. O le ā e fesoasoani iā i la'ua ina ia māfana ai le la mafutaga?

⁵ Ua saunia mai e Ieova fautuaga e sili ona lelei e fesoasoani iā te oe ma lau paaga, ina ia lua mafuta vavalalata atu ai iā te ia faapea le tasi i le isi. (Salamo 25:4; Isaia 48:17, 18) Ua fetalai mai Ieova: “Ia faamamaluina e tagata uma le faaipoipoga.” (Eperu 13:4) Pe a e faamamaluina se mea, o lona uiga e tāua ma tautele iā te oe. E te lē manatu mamā i ai ae e te puipui i ai. O le auala lenā e finagalo Ieova ia tatou manatu i ai i le faaipoipoga.

5. (a) O le ā e fesoasoani i se Kerisiano ina ia mafuta vavalalata ai i lana paaga? (e) E tusa ai o le Eperu 13:4, o le ā le manatu e tatau ona iā i tatou e faatatau i le faaipoipoga?

O LE ALOFA IĀ IEOVA E FESOASOANI I LAU FAAIPOIPOGA

6 Na faia e Ieova le ulua'i faaiipoipoga. Na fetalai lona Alo o Iesu: "Tou te le'i faitaulia ea o lē na foafoaina i la'ua i le amataga, na ia faia i la'ua o le tane ma le fafine, ma na ia fetalai atu, 'O le mea lea e tuua ai e le tane lona tamā ma lona tinā, ae nonofo faatasi ma lana avā, ona avea ai lea o i la'ua ma tino e tasi'? O lea ua lē toe to'alua ai, ae ua avea i la'ua ma tino e tasi. O ē ua faatasia e le Atua, aua ne'i tuueseeseina e se tagata." (Mataio 19:4-6) Talu mai le amataga, na finagalo Ieova ia tumau le faaiipoipoga, ia māfana, fiafia, ma olioli faatasi le aiga.

7 Peita'i, ua sili atu faigatā ma faafitauli ua feagai ma ulugalii faaiipoipo i aso nei i lo o se isi lava taimi. O nisi taimi ua matuā faigatā nei faafitauli, ma ua manatu ai e lē mafai ona faasaoina a latou faaiipoipoga. Ua oo lava fo'i ina manana'o e faamuta a latou faaiipoipoga. Ae o le malamalama i le finagalo o Ieova e uiga i faaiipoipoga, e mafai ona fesoasoani iā i tatou.—1 Ioane 5:3.

8 O ta'iala a Ieova e mo lo tatou lelei i taimi uma. Ua ia lapata'i mai: 'Ia faamamaluina le faaiipoipoga.' (Eperu 13:4; Failauga 5:4) E mautinoa o le a tatou maua aogā pe a tatou mulimuli i ta'iala a Ieova e tusa lava pe e faigatā.—1 Tesalonia 1:3; Eperu 6:10.

6. O le ā ua ta'u mai iā i tatou i le Mataio 19:4-6, e faatatau i le silafaga a Ieova i le faaiipoipoga?

7. E faapefea ona faamalosiā e tane ma avā a latou faaiipoipoga?

8, 9. (a) O ā taimi e tatau ona tatou mulimuli ai i ta'iala a Ieova i faaiipoipoga? (e) E faapefea ona faaalii e tautele iā i tatou a tatou faaiipoipoga?

9 Talu ai e tautele iā i tatou a tatou faaipoipoga, o lea e tatou te 'alofia ai le faia o gaoioiga po o faamatalaga e faaleagaina ai. Nai lo o lea, e tatou te manana'o ia faamalosiā a tatou faia ma a tatou paaga faaipoipo. E faapefea ona tatou faia faapea?

FAAMAMALUINA LAU FAAIPOIPOGA E ALA I UPU MA GAOIOIGA

10 E tele auala e ono faatigā ai se tasi i lana paaga. Ua tatou iloa e lē tatau i Kerisiano ona sauā i a latou paaga, pe fai se mea e faamanu'alia ai i latou. Peita'i, e ono faatigā le tasi i le isi e ala i a tatou upu. E mafai ona avea upu ma auupega. Ua faapea mai se tasi fafine: "E fasi a'u e la'u tane i upu. Atonu e lē o iloa mai ni manu'a i lo'u tino, ae ua faamanu'alia lo'u loto ona o ana faamatalaga tutui e masani ona fai mai, e pei o le 'Ua fai oe ma faalavelave!' ma 'E leai sou aogā!'" Ua ta'ua e se tasi tane e masani ona fai atu e lana avā faamatalaga e ta'ufaatauvaa ma faalumaluma ai o ia. Ua faapea mai o ia: "E lē mafai ona ou faamatala atu i ni tagata e lelei mafaufau, faamatalaga a la'u avā e fai mai iā te a'u. O le mea lenā e lē mafai ai ona ou talanoa atu iā te ia, ma e faato'ā ou alu ese mai i le ofisa ua leva le pō. E sili atu ona malupuipuia le nofo i le ofisa nai lo o le alu i le fale." Ua taatele i aso nei le faia o upu masoā, upu sauā ma lē alofa lea e māfua ai le loto tigā.

11 Pe a tautatala se tane ma se avā i ni upu sauā, e faapogaia ai faalogona mafatia lea e umi se taimi e toe tau faaleleia ai. E manino mai e lē o le auala lenei e finagalo leova e feutaga'i ai le tane ma le avā. Peita'i, e mafai ona

10, 11. (a) O le ā le faafitauli matuiā o loo tupu i nisi faaipoipoga? (e) Aiseā e tāua ai le auala e tatou te talanoa ai i a tatou tane po o avā?

e faatigā i lau paaga e aunoa ma lou iloaina. Atonu e te manatu o loo e agalelei i lau paaga, ae o ā ni ona faaloga? Pe a e fai atu se faamatalaga e faatigā ai i lau paaga, po o le a e lotomalie e sui?—Kalatia 5:15; **faitau le Efeso 4:31.**

12 E tāua iā Ieova le auala e te talanoa ai i lau paaga, e tusa pe e na o oulua pe a o iai fo’i nisi tagata. (**Faitau le 1 Peteru 3:7.**) Ua faamanatu mai i le Iakopo 1:26 e faapea: “Afai e manatu se tasi iā te ia lava o sē e to’aga i le tapua’iga ae lē pulea lona laulaufaiva, ua faasesēina e ia lona lava loto, ua lē aogā la lana tapua’iga.”

12. O le ā e mafai ona aafia ai le faiā a se tagata faaiipoipo ma leova?



13 E iai isi auala e tatau i se ulugalii ona manatu mafa ai le tasi i faalogona o le isi. O se faaa'oa'oga, o ā ni faalogona o lau paaga pe afai e te faaalu le tele o lou taimi i se isi tagata? E ui lava atonu o loo e faia faapea ona o se māfuaaga lelei, e pei o le galulue faatasi i le faiva pe fesoasoani atu i se faafitauli, ae po o tigā ai faalogona o lau paaga? Na faapea mai se avā Kerisiano: “E tigā o’u faalogona pe a vaai atu ua tele le taimi o la’u tane e alu ma ua’i atu ai i se isi tuafafine i le faapopotoga. Ou te lagona ai le faatauva.”

14 I le avea ai ma Kerisiano, e iai o tatou tiute tauave i o tatou mātua ma uso ma tuafāfine o a tatou faapopotoga. Peita’i, e tatou te faaipoipo loa, o la tatou tiute tauave autū o a tatou tane po o avā. Na fetalai Ieova o le a ‘nonofo faatasi le tane ma lana avā.’ (Kenese 2:24) E tatau ona matuā tāua iā i tatou faalogona o a tatou paaga. Ia fesili ifo: ‘Po o o’u faaalu le taimi, ua’i atu, ma faaalua atu le alofa lea e mana’omia ma e tatau ona maua e la’u paaga?’

15 Pe afai e tatou te soona māfana atu i se isi tagata e ese mai i a tatou paaga faaipoipo, o le a alia’e mai ai faafitauli i a tatou faaipoipoga. O le a tatou māfana atu fo’i ma atia’e ni faalogona fetosinaa’i i le isi tagata. (Mataio 5:28) E mafai ona tutupu a’e na faalogona, ma faapogaia ai oe e faia se gaoioiga e lē faamamaluina ai lau faaipoipoga.

13. O le ā se isi auala e ono faatigā ai e se tasi lana paaga faaipoipo?

14. (a) O le ā le mataupu silisili e tatou te a’oa’oina mai i le Kenese 2:24? (e) O le ā le fesili e tatau ona tatou fesili ifo ai?

15. Aiseā e tatau ai i se Kerisiano faaipoipo ona ‘alofia le soona māfana atu i se tasi e ese mai i lana paaga faaipoipo?

**“AUA NE’I FAALEAGAINA
LE MOEGA O LE FAAIPOIPOGA”**

16 Ina ua uma ona ta’ua i le Tusi Paia: ‘Ia faamamaluina le faaiipoipoga,’ ona faapea atili mai lea: “Ia aua ne’i faaleagaina le moega o le faaiipoipoga, auā e faamasino e le Atua o ē e faitaaga ma ē e mulilulua.” (Eperu 13:4) O le “moega o le faaiipoipoga,” o loo faasino atu i feusua’iga i le va o le tane ma le avā. (Faataoto 5:18) E faapefea ona tatou faaalua le faaloalo i lenei vala ma lē faaleagaina?

17 E manatu nisi i aso nei e lē o se mea sesē le lē faamaoni i a latou paaga. E lē tatau ona taa’ina i tatou i lenā uiga. Ua ta’ua manino mai e Ieova e ‘ino’ino o ia i le faitaaga ma le mulilua. (**Faitau le Roma 12:9**; Eperu 10:31; 12:29) Pe a tatou faia se feusua’iga ma se tasi e lē o sa tatou paaga faaiipoipo, o le a tatou faaleagaina la tatou faaiipoipoga. E faaalua atu ai e tatou te lē amana’ia tapulaa a Ieova, ma o le a faaleagaina ai la tatou faiā ma ia. O lea, e tatau ona tatou “‘ino’ino i le leaga,” ma ‘alofia le uia o le laasaga muamua e i’u atu ai i le faia o le mulilua. E aofia ai le ‘alofia o mafaufauga lē talafeagai e faatatau i le isi tagata.—Iopu 31:1.

18 I le Tulafono a Mose na tuu atu iā Isaraelu anamua, o le mulilua o se agasala e matuiā tele, e tutusa lona matuiā ma le tapua’i i atua sesē. O le faasalaga o nei agasala uma e lua o le oti. (Levitiko 20:2, 10) Na faapefea ona tutusa le mulilua ma le tapua’i i atua sesē? Pe afai

16. O le ā le poloa’iga a le Tusi Paia e faatatau i le faaiipoipoga?

17. (a) O le ā le manatu o le to’atele i aso nei e faatatau i le mulilua? (e) O le ā le manatu e tatau ona iai i Kerisiano e faatatau i le mulilua?

18. (a) Aiseā e tutusa ai le mulilua ma le tapua’i i atua sesē? (e) O le ā le silafaga a Ieova i le mulilua?

na tapua'i se tagata Isaraelu i atua sesē, ua ia solia lana folafolaga e faamaoni iā Ieova. Pe afai e mulilua o ia, ua ia solia lana folafolaga e faamaoni i lana paaga faaipoipo. (Esoto 19:5, 6; Teuteronome 5:9; **faitau le Malaki 2:14.**) E manino mai, i taimi ua mavae, sa silasila Ieova i le mulilua o se agasala e matuiā tele.

19 Ae faapefea aso nei? E ui lava e tatou te lē o toe tausia le Tulafono a Mose, ae e lē o suia ai le silasila a Ieova e faatatau i le mulilua. E pei lava ona lē mafai ona tatou tapua'i atu i se atua sesē, e lē tatau fo'i la ona tatou lē faamaoni i a tatou paaga faaipoipo. (Salamo 51:1, 4; Kolose 3:5) Pe afai e tatou te lē faamaoni, ua tatou lē faamamaluina a tatou faaipoipoga ma lo tatou Atua o Ieova.—Taga'i i le Faaopoopoga 26.

AUALA E FAAMALOSIA ATILI AI LAU FAAIPOIPOGA

20 E mafai faapefea ona e faamalosia atili lau faaipoipoga? Ua faapea mai le Faataoto 24:3: “Ua atia'e le aiga o i le fale i le atamai, ma ua faamausaliina i le faautaga loloto.” E mafai ona mālūlū ma gaogao se fale, pe māfanafana, lelei, ma saogalemu i le nofo. E tai faapena fo'i se faaipoipoga. O le tagata atamai e na te faamautinoa e malupuipua, lelei, ma fiafia lana faaipoipoga.

21 Ua ta'ua atili i le Tusi Paia e faatatau i lenā fale: “O le poto fo'i e faatumuina ai potu i totonu i mea tautele ma mea tāua mananaia.” (Faataoto 24:4) E mafai ona faaleleia atili lau faaipoipoga i mea ua e a'oa'oina mai i le Afioga a le Atua. (Roma 12:2; Filipi 1:9) Pe a lua faitau faatasi ma lau paaga le Tusi Paia ma a tatou lomiga,

19. O le ā e fesoasoani iā i tatou ina ia maumaua'i ai e lē faia le mulilua?

20. E faapefea ona aogā le atamai i se faaipoipoga?

21. E faapefea i le poto ona faamalosia atili ai se faaipoipoga?

ia talanoa pe faapefea ona lua faatatau mea ua lua a’o-a’oina. Ia sa’ili ni auala e te lua faaalua ai le alofa ma le faaaloalo o le tasi i le isi, ma auala e faaalua ai le agalelei ma le magafagafa. Ia ole atu ia Ieova e fesoasoani mai e atia’e uiga o le a faamalosi ai la oulua faaiipoiga, ma atili ai ona alofa lau paaga ia te oe.—Faataoto 15:16, 17; 1 Peteru 1:7.

22 E tatau ona tatou faia mea uma e gata ai le mafai, ina ia feutaga’i ma a tatou paaga faaiipoigo i le alofa, faaaloalo, ma le mamalu. O le a atili ai ona mafana ma malosi a tatou faaiipoiga. A o le mea e sili ona taua, o le a tatou faafiafiaina ai le finagalo o Ieova.—Salamo 147:11; Roma 12:10.

22. Aisea e tatau ai ona tatou faaalua le alofa, faaaloalo, ma le mamalu i a tatou paaga faaiipoigo?

la faalagolago ia leova mo le ta’ita’iga
i taimi o le tapua’iga a le aiga



1 E MAFAI ONA FAAMAMALUINA IEOVA I A TATOU FAAIPOIPOGA

“E lē uma le alofa.”—1 Korinito 13:8

**O le ā e fesoasoani e fo’ia ai faafitauli
i a tatou faaipoipoga?**

Failauga 5:4;

Mataio 19:4-6

O faaipoipoga uma lava
e iai faafitauli. Peita’i, ia
aua ne’i vave ona e fiu i
lau faaipoipoga.

Salamo 25:4;

Isaia 48:17, 18;

Mataio 6:33, 34

E mafai ona faamalosia
atili le faaipoipoga a se
tane ma se avā, pe afai e
la te mafuta vavalalata atu
iā leova.

2 E AAFIA A TATOU FAAIPOIPOGA I A TATOU UPU MA GAOIOIGA

“Ona avea ai lea o i la’ua ma tino e tasi.”

—Kenese 2:24

E mafai faapefea ona ‘alofia le faatigā i a tatou paaga faaipoipo?

Mataio 5:28;

Efeso 4:31

la faamaoni i lau paaga e oo lava i ou mafaufauga. la mataalia i faalogona o lau paaga. la lotomalie e sui pe afai e te iloa o loo e faia se mea e faatigā ai iā te ia.

Kalatia 5:15

E lē tatau ona tatou faatigā i a tatou paaga i le tino po o faalogona. O upu sauā e na o le faaleagaina ai o se faaipoipoga.

Faataoto 5:18;

Eperu 13:4

E silasila leova i le mulilua o se agasala e matuiā. la maumaua’i e faamaoni i a tatou paaga faaipoipo, ma faapelepele i a tatou faaipoipoga. E lē tatau ona tatou faia se mea e lē faamamaluina ai leova po o a tatou paaga faaipoipo.

3 IA FAAMALOSIA ATILI LAU FAAIPOIPOGA

“Ua atia’e le aiga o i le fale i le atamai.”

—Faataoto 24:3

O le ā e mafai ona e faia ina ia maua ai se faaiipoipoga malosi ma fiafia?

Faataoto 24:4;

Mataio 6:14, 15;

Roma 12:2;

1 Peteru 3:1

Ia faaalu se taimi e talanoa ai ma lau paaga. Ia feuta-ga’i ma lau paaga i le alofa, faaaloalo, ma le agalelei. Ia vave ona faamagalo atu.

Faataoto 14:1; 31:29;

Filipi 1:9; 2:4;

1 Peteru 3:7

Ia ōle atu iā leova e fesoasoani mai ina ia avea oe ma se tane po o se avā lelei. Ia sa’ili ni auala e faaalia atili ai le agalelei ma le magafagafa.

Roma 12:10;

1 Peteru 4:8

Pe afai e te faia mea uma e mafai ina ia faaalia ai le faapelepele ma le faamaluina o lau paaga, o le a faamalosia atili ai la oulua faaiipoipoga, ma faafiafiaina ai le finagalo o leova.

IA TAUTALA I “UPU LELEI E ATIA’E AI”

“Ia aua ne’i alu atu se upuleaga mai i o outou gutu,
a ia fai atu ni upu lelei e atia’e ai.”

—EFESO 4:29.

UA FOA’I atu e se tamā se uilavilivae i lona atalii talavou. Ua fiafia le tamā e foa’i atu lenā meaalofo faapitoa. Ae faapefea pe afai e faatamala le atalii i le aveina o le uila, ua so’a ai se tasi ma manu’a ai? O ā ni faalogona o le tamā?

² O Ieova o Lē e foa’iina mai “meaalofo lelei uma ma mea uma e atoatoa ona lelei.” (Iakopo 1:17) O se tasi o ana meaalofo lelei mo i tatou, o le tomai e tautala ai. O le meaalofo o le tautala ua mafai ai ona faaleo atu o tatou manatu ma faalogona. E mafai ai ona tatou fai atu ni faamatalaga e fesoasoani i tagata ma latou maua ai le fiafia. Peita’i, e mafai fo’i ona aafia ma tigā isi i a tatou upu.

³ E malolosi tele aafiaga o le tautala, ma ua a’oa’oina i tatou e Ieova i auala e faaaogā lelei ai lenā meaalofo. Ua fetalai o ia: “Ia aua ne’i alu atu se upuleaga mai i o outou gutu, a ia fai atu ni upu lelei e atia’e ai i taimi e tatau ai, ina ia aogā i ē o faalogologo i ai.” (Efeso 4:29)

1-3. (a) O le ā se tasi o meaalofo lelei ua foa’iina mai e Ieova mo i tatou? E mafai faapefea ona tatou faaaogā sesē lenā meaalofo? (e) E faapefea ona tatou faaaogā tatau le meaalofo o le tautala?

Se'i o tatou iloilo pe faapefea ona tatou faaaogā lenei meaalofa mai i le Atua, i se auala e faafiafiaina ai o ia ma faalaeiau ai isi.

IA FAAETEETE I UPU E TE TAUTALA AI

4 E malolosi aafiaga o upu. O lea e mana'omia ai ona faaeteete i a tatou upu e fai ma le auala e fai atu ai. Ua ta'ua i le Faataoto 15:4: "O le laulaufaiva e pulea lelei, o le laau o le ola lea, a o le laulaufaiva faapi'opi'o e momomo ai le agaga." E pei lava ona faafouina ma aumaia e se laau matagofie le ola, e faapena fo'i ona faafouina le tagata e faalogo i upu agalelei. Ae o upu mamafa e faatigā ai i isi ma lē lelei ai o latou faalogona. —Faataoto 18:21.

5 Ua faapea mai le Faataoto 12:18: "O le tagata e tautala lē mafaufau, ua pei o le tutu'i o le pelu." O upu faatigā e mafai ona faapogaia ai faalogona tigā ma faaleagaina ai faiā. Atonu e te manatua le taimi na fai atu ai e se tasi ni upu faatigā iā te oe, ma na matuā tigā ai ou faalogona. Ae ua faapea atili mai le faataoto: "O le laulaufaiva o ē e atamamai, e mālōlō ai." O upu logolelei e mafai ona faato'a filemu ai se lototigā, ma faaleleia ai ni faauōga na faaleagaina ona o le lē femalamalamaa'i. (**Faitau le Faataoto 16:24.**) Pe afai e manatua e iai aafiaga o a tatou upu i isi, o le a tatou faaeteete la i upu e tatou te tautatala ai.

6 O le isi māfuaaga e ao ai ona tatou faaeteete i upu e tautatala ai, ona o i tatou uma lava e lē lelei atoatoa.

4, 5. O le ā e tatou te a'oa'oina mai i faataoto i le Tusi Paia, e faatatau i le malolosi o aafiaga o upu?

6. Aiseā e faigatā tele ai ona pulea upu e tatou te tautatala ai?



O upu mālū e faafouina ai

“E leaga faanaunauga o le loto o le tagata,” ma o a tatou upu e masani ona faaalua atu ai mea o loo i o tatou loto. (Kenese 8:21; Luka 6:45) E faigatā tele ona pulea upu e tatou te tautatala ai. (**Faitau le Iakopo 3:2-4.**) Peita’i, e mana’omia ona taumafai pea e faaleleia le auala e tatou te tautatala atu ai i isi.

⁷ E mana’omia fo’i ona faaeteete i a tatou upu e fai, ona e **tatou te tali atu iā Ieova** mo a tatou upu e fai ma le auala e fai atu ai. Ua ta’ua i le Iakopo 1:26: “Afai e manatu se tasi iā te ia lava o sē e to’aga i le tapua’iga ae lē pulea lona laulaufaiva, ua faasesēina e ia lona lava loto, ua lē aogā la lana tapua’iga.” O lea la, pe a lē faaeteete i a tatou upu e fai, e mafai ona faaleagaina ai la tatou faiā ma Ieova.—Iakopo 3:8-10.

⁸ E manino mai, e iai mǎfuaaga lelei e ao ai ona faaeteete i a tatou upu e fai ma le auala e fai atu ai. Ina ia

7, 8. E mafai faapefea ona aafia la tatou faiā ma Ieova i a tatou upu e fai?

tatou faaaogā le meaalofa o le tautala i le auala e finalo i ai Ieova, e mana'omia ona tatou iloa ituaiga upu e ao ona 'alofia.

UPU E FAAVAIVAIA AI

⁹ Ua matuā taatele i aso nei **upu masoā po o gagana lē mamā**. E manatu le to'atele e ao ona latou palalauvale ma faaaogā upu masoā ina ia faailoa atu ai o latou manatu. E masani ona faaaogā e le 'aufaifaleaitu tausuga lē mamā ma gagana matagā ina ia toē ai tagata. Peita'i, na faapea mai le aposetolo o Paulo: "Ia outou tuu ese mai iā te outou le lotoa, o le ita, o le leaga, o upuleaga, ma e lē tatau ona sau se upu masoā mai i o outou gutu." (Kolose 3:8) Na ia ta'ua fo'i, o "tausuga matagā" ia "aua lava ne'i ta'ua" i Kerisiano moni.—Efeso 5:3, 4.

¹⁰ E inosia e Ieova ma ē e alolofa iā te ia upu masoā, ona e lē mamā. O le faaupuga "amio lē mamā" i le Tusi Paia, e aofia ai i "galuega a le tino." (Kalatia 5:19-21) O le "amio lē mamā" e mafai ona aofia ai ituaiga agasala eseese, ma o le faia o se masaniga lē mamā e ta'ita'ia atu ai i le faia o se isi fo'i masaniga lē mamā. Pe a fai ma masani a se tasi le tautala i gagana e matuā lē mamā ma masoā, ma e musu e tuu lenā masaniga, e faaalua mai ai e lē tatau ona toe iai o ia i le faapopotoga.—2 Korinito 12:21; Efeso 4:19; taga'i i le Faaopopoga 23.

¹¹ E ao fo'i ona tatou 'alofia le **faitala taufaaleaga**. O se tulaga masani lo tatou fiafia i isi ma faamatala atu i

9, 10. (a) O ā ituaiga gagana ua taatele i le lalolagi i aso nei? (e) Aiseā e tatou te 'alofia ai le tautatala i upu masoā?

11, 12. (a) O le ā e uiga i ai le faitala taufaaleaga? (e) Aiseā e tatou ai ona tatou 'alofia le faitala taufaaleaga e faatatau i se isi tagata?

ai ni tala e faatatau i a tatou uō ma aiga. Sa fia iloa fo'i e Kerisiano i le ulua'i senituri po o ā mai o latou uso ma tuafāfine, ma pe faapefea ona latou fesoasoani atu i ai. (Efeso 6:21, 22; Kolose 4:8, 9) Ae e faigofie ona suia ni talanoaga e faatatau i isi i ni tala taufaaleaga. Pe a tatou faamatala atu i isi na tala, e tatou te ono faia ai ni faamatalaga e lē moni, pe talanoa fo'i e faatatau i mea e lē tatau ona faailoaina atu i isi. Pe afai e tatou te lē faaeteete, o na faamatalaga e mafai ona i'u atu ai i ni tuua'iga pepelo pe **taufaaleaga**. Sa taufaaleaga le 'au Faresaio iā Iesu ina ua latou tuua'ia o ia i mea e na te le'i faia. (Mataio 9:32-34; 12:22-24) O tala taufaaleaga e faaleagaina ai le talaaga o se tasi, e i'u atu ai i finauga ma tigā, ma faaleagaina ai ni faauōga.—Faataoto 26:20.

12 E finagalo Ieova ia aogā a tatou upu e fesoasoani ma faalaeiau ai i isi, nai lo o le suia ai o uō e avea ma fili. E inosia e Ieova i latou "e faatupuina maseiga i le va o uso." (Faataoto 6:16-19) O Satani le Tiapolo o ia lea na muamua avea ma taufaaleaga, o lē na taufaaleaga i le Atua. (Faaaliga 12:9, 10) Ua taatele i le lalolagi i aso nei le faia o tala pepelo e faatatau i isi tagata. Ae e lē tatau ona tupu lenei tulaga i le faapotopotoga Kerisiano. (Kalatia 5:19-21) E tatau la ona faaeteete i a tatou faamatalaga e fai, ma ia mafaufau muamua i taimi uma a o le'i fai atu se faamatalaga. A o e le'i toe faamatala atu se tala e faatatau i se isi tagata, ia fesili ifo: 'Pe e moni faamatalaga ia o le a ou faamatala atu? Pe e agalelei? Pe e aogā? Pe ou te mana'o ia iloa e le tagata lea ou te talanoa e faatatau i ai, faamatalaga ia ou te faia? O ā ni o'u faalogona pe afai e faia e se tasi nei faamatalaga e faatatau iā te a'u?'—**Faitau le 1 Tesalonia 4:11.**

13 O i tatou uma lava e iai taimi e tatou te faia ai ni faa-matalaga e mulimuli ane toe salamō ai. Ae e tatou te lē manana’o e avea o se masaniga le faitio i isi, pe faia fo’i ni faamatalaga lē alofa pe sauā. E lē tatau ona avea ma vala o o tatou olaga le faia o **upu faatigā**. Na faapea mai Paulo: “Ia tuu lo outou ita umi, ma le itaitagofie, ma le lotoa, ma le soona ‘e’ē, ma upu masoā.” (Efeso 4:31) O upu faatigā ua lē faaaloologia ai tagata ma oo ai iā i latou lagona e leai so latou aogā. O le fanauti o i latou ia e pito i sili ona faigofie ona tigā o latou faalogona. O lea, e mana’omia ona tatou faaeteete i le fai atu o ni upu mamafa iā i latou.—Kolose 3:21.

14 O loo lapata’ia i tatou e le Tusi Paia e faatatau i itu-aiga upu faatigā e sili ona malolosi, o le **upuleaga** lea i isi. O le upuleaga o le faaaauau lea ona faalumaluma i isi ma le fuafuaga ia faatigā iā i latou. Pagā le faanoanoa pe afai o le auala lenā e feutaga’i ai se tasi ma lana paaga po o le fanau! Pe afai e musu se tasi e taofia le upuleaga i isi, o le a lē toe agavaa o ia e avea ma sui o le faapotopotoga. (1 Korinito 5:11-13; 6:9, 10) Na tatou a’oa’oina pe afai e tatou te faia ni upu masoā, lē moni, pe lē alofa, o le a faaleagaina ai la tatou faiā ma Ieova faapea ma isi.

UPU E ATIA’E AI

15 E faapefea ona tatou faaaogā le meaalofa o le tautala i le auala e finagalo i ai Ieova? E ui lava e lē o ta’u patino mai i le Tusi Paia upu e tatau ma upu e lē tatau ona tatou tautatala ai, ae ua faapea mai ia “fai atu ni upu lelei e atia’e ai.” (Efeso 4:29) O upu e atia’e ai, e mamā, agalelei,

13, 14. (a) O le ā le aafiaga o upu faatigā i tagata? (e) O le ā e uiga atu i ai le fai upuleaga? Aiseā e tatau ai i Kerisiano ona ’alofia le fai upuleaga i isi?

15. O ā ituaiga upu e faamalosi ai faiā?

ma moni. E finagalo Ieova ia avea a tatou upu e faalaeiau ma fesoasoani ai i isi. E lē faigofie ona faia faapea. E mana'omia ni taumafaiga ina ia fai atu ni upu lelei nai lo o ni upu sauā ma soona lafo. (Tito 2:8) Se'i o tatou iloilo nisi o auala e mafai ona atia'e ai isi i a tatou upu.

16 E fiafia Ieova ma Iesu e **faamālō atu** i tagata. E tatou te fia faaa'oa'o iā i la'ua. (Mataio 3:17; 25:19-23; Ioane 1:47) O le avatu o le faamālō e faalaeiauina moni ai se tasi, e aofia ai le magafagafa ma faaaliala le naunau moni i le tagata. Ua faapea mai le Faataoto 15:23: "E ma'eu le matagofie o le upu e fai i le taimi talafeagai!" E faalaeiauina i tatou pe a faamālō mai ma le faamaoni se tasi mo a tatou galuega mamafa, pe faaaliala mai fo'i le talisapaia o se mea ua tatou faia.—**Faitau le Mataio 7:12**; taga'i i le Faaopopoga 27.

17 Pe a fai ma au masani le vaai i uiga lelei o isi, o le a faigofie ona e faamālō atu ma le faamaoni. O se faaa'oa'oga, atonu e te mātatauina se tasi i le faapotopotoga e sauniuni lelei ana lauga, pe taumafai e fai se tali i sauniga. Atonu o se talavou o loo faamaoni e tausisi i le upu moni i le a'oga, po o se tagata matua o loo auai e lē aunoa i le tala'iga. O au upu e faaaliala ai lou talisapaia atonu o le mea moni lenā o loo latou mana'omia. E tāua tele fo'i mo se tane ona ta'u atu i lana avā lona alofa ma le talisapaia o ia. (Faataoto 31:10, 28) E pei lava ona mana'omia e le laau le malamalama ma le vai, e faapena fo'i ona mana'omia ona lagona e tagata le talisapaia o i latou. E moni lenei manatu aemaise lava i le fanau. Ia sa'ili ni avanoa e faamālō atu ai mo o latou uiga ma taumafaiga lelei. O le faamālō atu e mafai ona atia'e ai lo latou

16, 17. (a) Aiseā e tatau ai ona tatou faamālō atu i isi? (e) O ai e mafai ona tatou faamālō atu i ai?

lototetele ma le mautinoa, ma uuna'ia ai i latou ia taumafai atili e fai le mea sa'o.

18 Ua tatou faaa'oa'o iā Ieova pe a tatou **faalaeiau** ma **faamāfanafana** atu i isi. E matuā manatu mamafa o ia i “ē ua faatauvaā” ma “ē ua nutimomoia.” (Isaia 57:15) E finagalo Ieova ia tatou “fefaamāfanafanaa'i” ma ia “faamāfanafana i ē mafatia.” (1 Tesalonia 5:11, 14) Pe a tatou taumafai e faia faapea, e na te silafia ma talisapaia a tatou taumafaiga.

19 Atonu e te mātāuina se tasi i le faapotopotoga ua lotovaivai ma mafatia. O le ā se tala e te fai atu e fesoa-

18, 19. Aiseā e tatau ai ona tatou taumafai malosi ia faalaeiau ma faamāfanafana i isi? E faapefea ona tatou faia faapea?



soani ai iā te ia? Atonu e lē mafai ona e fo'ia le faafitauli, ae e mafai ona e faailoa atu i ai lou manatu mamafa mo ia. O se faaa'oa'oga, e mafai ona fai se fuafuaga e faaalu se taimi faatasi ma ia. E mafai ona e faitau atu i ai se mau faalaeiau ma fai se tatalo mo ia. (Salamo 34:18; Mataio 10:29-31) Ia faamautinoa i ai e alolofa tele uso ma tuafāfine o le faapotopotoga iā te ia. (1 Korinito 12:12-26; Iakopo 5:14, 15) Ia talanoa atu i se auala e faalia ai lou naunau moni ma e te talitonu i mea o loo e fai atu ai. —**Faitau le Faataoto 12:25.**

20 E tatou te atia'e fo'i isi pe a ave i ai ni **fautuaga**

20, 21. O le ā e faigofie ai ona talia e tagata fautuaga?



E mafai ona tatou faalaeiau ma faamāfanafana i isi e ala i a tatou upu e fai ma le auala e fai atu ai

lelei. O i tatou uma lava e iai taimi e mana'omia ai ni fautuaga ona e tatou te lē lelei atoatoa. Ua ta'ua i le Faataoto 19:20: "Ia faalogo i le fautuaga ma talia le a'o-a'iga, ina ia e atamai ai i aso o i luma." E lē na o toea-ina e mafai ona tuuina atu fautuaga. E ao i mātua ona avatu ni ta'ita'iga aogā i a latou fanau. (Efeso 6:4) E mafai fo'i e tuafāfine ona avatu fautuaga lelei i isi tuafāfine. (Tito 2:3-5) Talu ai e tatou te alolofa i o tatou uso ma tuafāfine, o lea e tatou te manana'o ai e faamautino-a ua avatu fautuaga i se auala o le a lē faatigā ai iā i latou. O le ā e mafai ona fesoasoani iā i tatou?

21 Atonu e te manatua se taimi na avatu ai e se tasi iā te oe ni fautuaga lelei i se auala na faigofie ona e taliaina ai. Aiseā na aogā ai na fautuaga? Atonu na e lagona le naunau moni o lenā tagata iā te oe. Pe atonu fo'i na talanoa atu iā te oe i se auala alofa ma agalelei. (Kolose 4:6) Sa faavae mai fo'i le fautuaga i le Tusi Paia. (2 Timoteo 3:16) E tusa pe e tatou te sii sa'o atu upu mai le Tusi Paia pe leai, ae e tatau lava ona faavae mai i le Tusi Paia so o se fautuaga e tatou te avatu. E lē tatau i se tasi ona faamalosi-a atu ona manatu i isi, pe sesē ona faatatauina ni mau ina ia lagolagoina ai ona manatu. O le manatuaina o le auala na aumai ai ni fautuaga iā te oe, e mafai ona fesoasoani iā te oe pe a e avatu ni fautuaga i isi.

22 O le tomai e tautala ai o se meaalofo mai i le Atua. O lo tatou alolofa mo ia e tatau ona uuna'ia ai i tatou e faaaogā lelei lenā meaalofo. Ia manatua, e malolosi aafiaga o upu, e mafai ona faavaivaia ai pe atia'e ai fo'i. O lea, se'i o tatou faia mea uma ina ia faaaogā a tatou upu e faamalosi-a ma faalaeiau ai isi.

22. O le ā le auala e te mana'o e faaaogā ai lau meaalofo o le tautala?

1 O LO TATOU TOMAI E TAUTALA AI O SE MEAALOFA MAI I LE ATUA

“O meaalofa lelei uma ma mea uma e
atoatoa ona lelei, e mai i lugā.”—Iakopo 1:17

E faapefea ona faaalua e tatou te talisapaia lenei meaalofa?

Efeso 4:29;

Iakopo 1:26

E malolosi aafiaga o upu.
E ao ona tatou mafaufau
lelei i upu e fai atu ma le
auala e tatou te fai atu ai.

Faataoto 12:18; 15:23;

Mataio 7:12

Pe a sesē upu ma sesē le
taimi e fai ai, e mafai ona
i’u ai i finauga ma tigā.

Faataoto 16:24;

Isaia 57:15;

1 Tesalonia 5:11

Ia faaaogā lau meaalofa
o le tautala i le auala na
finagalo ai leova. Ia faa-
aogā au upu e faafouina,
faalaeiaiu, a’oa’o, faamā-
fanafana, uuna’ia, ma
fesoasoani ai i isi.

2 TAUTALA I SE AUALA E FAAFIAFIAINA AI LE ATUA

“Ia lē aunoa ona outou tautatala atu i upu e logolelei.”—Kolose 4:6

E faapefea i la tatou tautala ona aafia ai o tatou aiga ma uō?

Faataoto 31:28;

Faaaliga 2:1-3

E mana’omia e tagata uma le alofa ma le talisapaia, aemaise lava mai i sui o le aiga.

Faataoto 6:16-19; 26:20;

Kolose 3:8, 21;

1 Tesalonia 4:11

O upu faatigā po o upu masoā ma faaupuga faitio faifai pea, e matuā telē lona aafiaga. O tuua’iga sesē e mafai ona faaleaga-ina ai le talaaga o se tasi ma save’u ai le filemu.

Faataoto 15:1, 2;

Filipi 2:3, 4;

Iakopo 1:19

Ia faaalua i au upu e te manatu mamafa i isi nai lo o oe lava. Ia faalogologo lelei.

3 E TATAU ONA AVATU FAUTUAGA I SE AUALA ALOFA

“Ia faalogo i le fautuaga ma talia le a’oa’iga,
ina ia e atamai ai i aso o i luma.”

—Faataoto 19:20

E faapefea ona tatou avatu fautuaga lelei?

Salamo 34:18;

Mataio 10:29-31;

2 Timoteo 3:16

E tatau ona faavae fautu-
aga i le Tusi Paia ma avatu
i se auala agalelei.

Faataoto 12:25;

1 Tesalonia 5:14;

Iakopo 3:2-4

Ia faaaogā lau meaalofa o
le tautala e faamalosia ma
faalaeiau ai i isi.

PE E FIAFIA LE ATUA I ASO FAAMANATU UMA?

“Ia faamautinoa pea po o ā mea e fiafia
i ai le Alii.”—EFESO 5:10.

NA FETALAI Iesu: “O ē o loo i le tapua’iga moni, latou te tapua’i i le Tamā i le agaga ma le upu moni, auā o loo sa’ilia e le Tamā tagata faapena e tapua’i atu iā te ia.” (Ioane 4:23; 6:44) E tatau iā i tatou ta’ito’atasi ona “faamautinoa pea po o ā mea e fiafia i ai le Alii.” (Efeso 5:10) E lē o taimi uma e faigofie ai ona faia lenei mea. E taumafai Satani e faasesē i tatou ina ia faia mea e lē fiafia i ai leova.—Faaaliga 12:9.

² E faapefea ona taumafai Satani e faasesē i tatou? E ala lea i le faafenunia’i o i tatou i le mea sa’o ma le mea e sesē. Se’i mātāu le mea na tupu i le nuu o Isaraelu ina ua tolauapi e latalata i le mauga o Sinai. Sa alu atu Mose i luga o le mauga, ma na faatalitali tagata i lona toe fo’i mai. Mulimuli ane, na latou fiu e faatalitali ma fai atu loa iā Arona e fai se atua mo i latou. Sa faia e Arona se faatusa o se tama’i povi auro, ma faia ai loa e tagata se tausamiga. Sa latou sisiva faataamilo i le tama’i povi ma ifo atu i ai. Na latou manatu o le ifo i le tama’i povi, o le tapua’i lenā iā leova. Peita’i, sa sesē lo latou manatu e

1. O le ā e tatau ona tatou faia ina ia faamautinoa ai e fiafia leova i la tatou tapua’iga, ma aiseā?

2. Faamatala le mea na tupu e lata i le mauga o Sinai.

faapea o lenā sauniga o se “tausamiga iā Ieova.” Sa silasila i ai Ieova o le ifo i tupua ma e to’atele i latou na fasiotia ai. (Esoto 32:1-6, 10, 28) O le ā le lesona mo i tatou? Aua ne’i faasesēina i tatou. Aua ne’i o tatou “papa’i atu i se mea e lē mamā,” o lona uiga e lē tatau ona faia sa tatou vaega i lotu sesē. Ia tuu atu iā Ieova e a’oa’o i tatou i le mea e sa’o ma le mea e sesē.—Isaia 52:11; Esekielu 44:23; Kalatia 5:9.

³ A o iai Iesu i le lalolagi, sa ia toleni ona soo ina ia faataatia se faaa’oa’oga i le tapua’iga mamā. Ina ua mavae lona maliu, na faaauau ona a’oa’o atu e le ‘auaposestolo mataupu silisili a Ieova i soo fou. Ae ina ua maliliu le ‘auaposestolo, na amata ona aumaia e a’oa’o pepelo manatu sesē ma tū ma aso faamanatu faapaupau i le faapotopotoga. Na latou suia fo’i igoa o nisi aso faamanatu faapaupau ina ia foliga mai ai e faa-Kerisiano. (Galuega 20:29, 30; 2 Tesalonia 2:7, 10; 2 Ioane 6, 7) O le tele o nei aso faamanatu o loo lauiloa pea i aso nei, ma faaauiluma ai talitonuga sesē faapea faiga faatemoni.*—Faaaliga 18:2-4, 23.

⁴ I le lalolagi i aso nei, ua avefa aso faamanatu ma aso mālōlō o se vala tāua i olaga o tagata. Peita’i, a o faaauau ona e a’oa’o ina le auala e silasila ai Ieova i mea, e te ono iloa ai e mana’omia ona sui ou manatu e faataata i nisi o aso faamanatu. E lē faigofie le faia faapea, ae e mafai ona e mautinoa o le a fesoasoani mai Ieova. Se’i

* E te maua nisi faamatalaga e faatatau i nisi o aso faamanatu i le *Watch Tower Publications Index, Tusi Ta’iala mo Sa’ili’iliga a Moli-mau a Ieova*, ma le jw.org.

3, 4. Aiseā e tāua ai ona iloilo amataga o le tele o aso faamanatu lauiloa?

o tatou iloilo mea na amata mai ai nisi o aso faamanatu lauiloa, ina ia tatou iloa ai po o le ā le finagalo o Ieova e faatatau i na aso.

NA FAAPEFEA ONA AMATA MAI LE KERISIMASI?

⁵ O le tele o vaega o le lalolagi e faamanatu le Kerisimasi iā Tesema 25, lea e manatu le to'atele o le aso lenā sa fanau ai Iesu. E lē o ta'uina mai i le Tusi Paia le aso po o le masina na fanau ai Iesu, ae o loo faailoa mai ai le vaitaimi o le tausaga. Na tusi Luka e faapea ina ua fanau Iesu i Peteleema, sa iai 'leoleo mamoe na nonofo i fafo' ma vaavaai a latou lafu. (Luka 2:8-11) I le masina o Tesema, e mālūlū, timuga, ma aisā Peteleema. E lē mafai la ona nonofo i fafo ni leoleo mamoe ma a latou lafu i le pō. O le ā e tatou te a'oa'oina mai i lenei mea? E le'i fanau Iesu iā Tesema, ae na fanau i le tau māfanafana. Ua iloa mai i le Tusi Paia ma faamaoniga o le tala faasolopito na fanau o ia i se taimi o masina ua ta'ua nei o Setema ma Oketopa.

⁶ Na faapefea la ona amata mai le Kerisimasi? Na amata mai i aso faamanatu faapaupau, e pei o le aso faamanatu a Roma e ta'u o le Saturnalia, o se aso faamanatu mo Satana le atua o faato'aga. Ua ta'ua i le *Encyclopedia Americana*: "O le tausamiga a tagata Roma e ta'u o le Saturnalia, lea e faamanatu i le oga-tononu o Tesema, ua avea ma faavae o le tele o tū ma aga o le Kerisimasi. O se faaa'oa'oga, o le aso faamanatu lenei na māfua mai ai faiga'ai tetele, le foa'i atu o mea alofa, ma le tutuina o molī ga'o." E lē gata i lea, sa faa-

5. O ā faamaoniga e iloa ai e le'i fanau Iesu iā Tesema 25?

6, 7. (a) Na faapefea ona amata mai le tele o tū lauiloa o le Kerisimasi? (e) O le ā le māfuaaga e tatau ai ona tatou foa'i mea alofa?



O le iloaina o amataga o aso faamanatu, e fesoasoani e tatou te iloa ai mea e ao ona 'alofia

manatu fo'i iā Tesema 25 le aso fanau o Mithra, o le atua o le lā a Peresia.

⁷ Peita'i, o le to'atele o tagata o loo faamanatuina le Kerisimasi i aso nei, e lē o mafaufau i le faapaupau o lona amataga. E pau mea e latou te tulimata'ia i le Kerisimasi, o le faatasitasi ma aiga, olioli i ni mea'ai mananaia, ma foa'i atu meaalofoa. E tatou te alolofa i o tatou aiga ma uō, ma e finagalo Ieova i ana auauna ia fetufaa'i ma isi. Ua ta'ua i le 2 Korinito 9:7: "E alofa le

Atua i lē e foa'i ma le lotofiafia." E lē na o ni aso faa-pitoa e finagalo Ieova e tatou te foa'i atu ai i isi. E fiafia tagata o Ieova e foa'i atu meaalofa ma faatasitasi ma aiga ma uō i so o se taimi o le tausaga, e aunoa ma le faatalitalia e toe maua mai se tau. E latou te foa'i atu ona o le alolofa i isi.—Luka 14:12-14.

8 Ina ia lagolagoina le manatu o le foa'i o meaalofa i le Kerisimasi, e to'atele e faapea mai sa avatu e ni tamā-loloa atamamai e to'atolu ni meaalofa i le pepe faato'ā fanau mai o Iesu i le fale o manu. E sa'o na iai tamā-loloa na asiasi atu iā Iesu ma avatu i ai meaalofa. O se tū masani i taimi o le Tusi Paia le foa'i atu o meaalofa i se tagata tāua. (1 Tupu 10:1, 2, 10, 13) Ae pe e te iloa o loo ta'ua i le Tusi Paia o nei tamā-loloa o ni tagata na sa'ili'ili i fetu, sa faia faiga faaagaga ma e le'i tapua'i iā Ieova? E lē gata i lea, e latou te le'i asiasi atu iā Iesu ina ua faato'ā fanau i le fale o manu. Na latou asiasi atu i se taimi mulimuli ane ina ua "tamaitiiti" o ia ma ua nofo i se fale.—Mataio 2:1, 2, 11.

O LE Ā LE A'OA'OGA A LE TUSI PAIA E FAATATAU I ASO FANAU?

9 O se taimi fiafia le aso e fanau mai ai se pepe. (Salamo 127:3) Ae e lē faapea ai e tatau ona tatou faamanatu aso fanau. Se'i mafaufau i le vala lenei: E na o le lua aso fanau o loo faamatala i le Tusi Paia. O le aso fanau o se Farao o Aikupito, ma le aso fanau o le tupu o Herota Anetipa. **(Faitau le Kenese 40:20-22; Mareko**

8. Pe na foa'i atu e tagata na sa'ili'ili i fetu ni meaalofa iā Iesu i le aso na faato'ā fanau ai? Faamatala.

9. O ā aso fanau na faamanatu o loo faamatala i le Tusi Paia?

6:21-29.) O nei ta'ita'i e to'alua e lē o ni auauna a Ieova. O le mea moni, e leai se vaega o le Tusi Paia o ta'ua ai se tagata tapua'i o Ieova na faamanatu se aso fanau.

¹⁰ Ua ta'ua i le tusi *The World Book Encyclopedia*, na manatu ulua'i Kerisiano i le "faamanatuina o le aso fanau o so o se tasi o se aganuu faapaupau." O na aganuu sa faavae mai i talitonuga sesē. O se faaa'oa'oga, na talitonu tagata Eleni anamua, o tagata uma lava e pui-puia e se agaga na iai i le taimi na fananau mai ai. Na latou manatu o lenā agaga e iai sona sootaga i se atua na pa'ū lona aso fanau i le aso lea na fanau ai lenā tagata. E lē gata o na talitonuga faapaupau, ae e iai fo'i le sootaga o aso fanau i sa'ili'iliga i fetu ma valovaloga.

¹¹ E manatu le to'atele o tagata o ō latou aso fanau o se aso faapitoa, ma e tataua ona talisapaia ma alofagia ai i latou. Peita'i, e mafai ona faaalua le alofa i o tatou aiga ma uō i so o se taimi o le tausaga, nai lo na o se aso faapitoa se tasi. E finagalo Ieova ia tatou agalelei ma limafoa'i i taimi uma. (**Faitau le Galuega 20:35.**) E tatou te faafetai iā Ieova i aso uma mo le meaalofoa tāua o le ola, ae e lē na o aso na tatou fananau ai.—Salamo 8:3, 4; 36:9.

¹² Ua faapea mai le Failauga 7:1: "E sili le igoa lelei nai lo o le suāuu lelei, e sili fo'i le aso e oti ai nai lo o le aso e fanau mai ai." E faapefea ona sili le aso e oti ai nai lo o le aso na fanau mai ai? Ina ua tatou fananau mai, o le taimi lenā e tatou te le'i faia se mea lelei po o se mea

10. O le ā le vaaiga a ulua'i Kerisiano i le faamanatuina o aso fanau?

11. O ā faaloga o Ieova e faatatau i lo tatou limafoa'i?

12. E faapefea ona sili le aso e tatou te feoti ai nai lo o le aso na tatou fananau mai ai?



E limafoa'i Kerisiano moni i isi ona e alolofa

leaga i o tatou olaga. Ae ina ua faaaogā o tatou ola e au-auna ai iā Ieova ma faia mea lelei mo isi, ua tatou faia se “igoa lelei” po o se talaaga, ma o le a manatua e Ieova i tatou e tusa lava po ua tatou feoti. (Iopu 14:14, 15) E lē faamanatuina e tagata o Ieova o latou aso fanau po o le aso fanau o Iesu. E pau le aso na poloa'ia i tatou e Iesu ia faamanatu, o le Faamanatuga o Iona maliu.—Luka 22:17-20; Eperu 1:3, 4.

LE AMATAGA O LE ESETA

13 E talitonu le to'atele e faapea o loo latou faamanatuina le toetū o Iesu pe a faamanatu le Eseta. Ae o le mea moni, o le faamanatuina o le Eseta e fesoota'i atu iā Eostre le atua fafine o le tafa o ata ma le tau e totogo ai mea, o se atua o tagata Peretania anamua. Ua faamatata i le tusi *The Dictionary of Mythology*, o ia fo'i o se atua fafine o le faaautama. O nisi tū o le Eseta e fesoota'i atu i lenā mea. Mo se faaa'oa'oga, ua ta'ua i le tusi *Encyclopædia Britannica*, o fuāmoa "ua fai ma faailoga tāua o le ola fou ma le toetū." Ua leva fo'i ona avea rapiti ma faailoga o le faaautama i tapua'iga faapaupau. E manino mai e leai se sootaga o le Eseta i le toetū o Iesu.

14 Pe e fiafia le finagalo o Ieova pe a silasila mai o nini faatasi e tagata aganuu a lotu sesē ma le toetū o lona Alo? E leai. (2 Korinito 6:17, 18) O le mea moni e le'i poloa'i mai Ieova iā i tatou e faamanatu le toetū o Iesu.

FAAMANATUINA O LE TAUSAGA FOU

15 E ui lava ina eseese tū ma aga a atunuu ta'itasi, ae o le masani a le to'atele o tagata, o le feala se'ia oo i le po o le vaeluaga o Tesema 31, e faamavae atu ai i le tausaga tuai. O lenā pō e tele ina fai ai patī e onanā ai, e fai ai amioga lē mamā, e foa'i atu ai meaalofa, ma folafola atu o le a sui a latou amioga i le tausaga fou. O tū ma aga i aso nei i le tele o atunuu, e fesoota'i lelei ma aso faamanatu faapaupau. *O le isi mea e fai e tagata i lenei pō, o le faapāpā lea o mea (e pei o faga ofe) e tutuli ese ai*

13, 14. O le ā e fesoota'i atu i ai le faamanatuina o le Eseta?

15. O fea na tupuga mai ai tū ma aga o le faamanatuina o le Tausaga Fou?

temoni. Ua faapea mai se tasi tusi: “O le ulua’i aso o le tausaga i Roma i aso anamua, na faamamaluina ai Ianu, o le atua o pā puipui ma faitoto’a, o le atua fo’i o le amataga ma le faai’uga. . . . Na avea le Tausaga Fou o se aso faamanatu i le Lotu Kerisiano i le 487 T.A., ina ua ta’ua o le Tausamiga o le Peritomeina. I le taimi muamua, na faasā ona faia ni patī i lenā aso, auā o le tū ma aga lenā a tagata faapaupau. Ae na faasolosolo ina sui lenā tulaga, ma amata ai ona toe fai patī.”—*World Book Encyclopedia*, 1966, Tusi 14, itulau 237.

FAAIPOIPOGA E FAAFIAFIAINA AI LE ATUA

16 O se aso fiafia le aso o se faaipoipoga. E eseese auala e fai ai faaipoipoga i le lalolagi. E masani lava e lē mafau-fau tagata i mea na amata mai ai tū ma aganuu o faaipoipoga. O lea atonu e latou te lē iloa ai o nisi o na tū ma aganuu na faavae mai i talitonuga a lotu faapaupau. Ae o se ulugalii Kerisiano o loo fuafua e faaipoipo, e manana’o ia faamautinoa o le a faafiafiaina Ieova i le la faaipoipoga. Pe afai e la te iloa le amataga mai o tū ma aganuu o faaipoipoga, o le a la faia la ni filifiliga lelei.—Mareko 10:6-9.

17 O nisi o tū ma aganuu o faaipoipoga e manatu i ai e ‘laki’ ai le ulugalii fou. (Isaia 65:11) O se faaa’oa’oga, o nisi vaipanoa e togi e tagata araisa po o mea faapena i le tama ma le teine faaipoipo. E latou te manatu o lenei faiga e maua ai se fanau a le ulugalii, o le a la fiafia, ola umi, ma puipuia ai i la’ua mai i mea leaga e tutupu. Peita’i, e matuā faaeteete Kerisiano ia ‘alofia so o se tū ma aganuu e fesoota’i atu i lotu sesē.—**Faitau le 2 Korinito 6: 14-18.**

16, 17. O le ā e tatau ona tatou mafau-fau i ai pe a fuafua se faaipoipoga?

18 E manana’o se uso ma se tuafafine Kerisiano ia fiafia ma mamalu le aso o le la faaipoipoga, ma ia fiafia tagata uma e auai ai. E lē faia e le ‘auvalaaulia i le faaipoipoga a ni Kerisiano ni lauga e lē logolelei, pe e faataatau atu i feusua’iga i se auala lē mamā, pe e lē faaaloaloga ai fo’i le ulugalii faaipoipo po o isi. (Faataoto 26:18, 19; Luka 6:31; 10:27) E lē faamatilatilaina i le faaipoipoga a ni Kerisiano “le faalialiavale o meafaitino a se tasi.” (1 Ioane 2:16) Pe afai o fuafua sau faaipoipoga, ia faamautinoa o le a e manatua pea o se aso fiafia ma manaia.—Taga’i i le Faaopoopoga 28.

LE AMATAGA O LE TŪ O LE FAAFETO’AI O IPU UAINA

19 O se faiga masani i faaipoipoga ma isi faatasiga faasamasamanoa, le faafeto’ai o ipu uaina e faamanuia atu ai. Pe a faafeto’ai ipu uaina, e faamanuia atu le isi a o tuu i luga e isi a latou ipu uaina. O le ā le vaaiga e tatau ona iai i Kerisiano e faataatau i lenei faiga?

20 Ua ta’ua i le tusi *International Handbook on Alcohol and Culture*, o le faafeto’ai o ipu uaina atonu e tupuga mai i se aganuu faapaupau anamua “sa ofo atu ai se mainu paia i atua.” Sa faia faapea “ina ia maua ai se mea o loo moomoo i ai, ma o se tatalo ua faapuupuu i upu e faapea ‘ia umi lou soifua’ pe ‘ia e manuia!’” I aso anamua sa masani ona tuu i luga e tagata a latou ipu inu ina ia talosaga atu ai i o latou atua mo se faamanuiaga. Peita’i, e lē o le auala lenā e saunia mai ai e Ieova faamanuiaga.—Ioane 14:6; 16:23.

18. O ā isi mataupu silisili o le Tusi Paia e faataatau i faaipoipoga?
19, 20. O fea na tupuga mai ai le tū o le faafeto’ai o ipu uaina?

**“O Ē E ALOLOFA IĀ IEOVA,
IA OUTOU ‘INO‘INO I LE LEAGA”**

21 Pe a e filifili e auai pe lē auai fo’i i se aso faamanatu, ia mafaufau po o ā uiga ma amioga o le a faaauiluma ai i lenā aso faamanatu. O se faaa’oa’oga, o nisi aso faamanatu e faia ai siva matagā, inuga e lē pulea, faapea amioga lē mamā. Atonu fo’i e faaauiluma ai faiga faatauatane ma tauafafine po o le lotonuu. Pe afai e tatou te auai i nei ituaiga aso faamanatu, po o tatou ‘ino’ino moni lava i mea e ‘ino’ino i ai Ieova?—Salamo 1:1, 2; 97:10; 119:37.

22 E ao ona matuā faaeteete Kerisiano ia ‘alofia so o se aso faamanatu e lē faamamaluina ai le Atua. Na tusi le aposetolo o Paulo: “Pe tou te aai, pe inu, pe faia se tasi mea, ia faia mea uma lava ina ia faamamaluina ai le Atua.” (1 Korinito 10:31; taga’i i le Faaopoopoga 29.) E lē o aso faamanatu uma e iai ni o latou sootaga i amioga lē mamā, lotu sesē, po o le lotonuu. Ae pe afai e lē o solia ai mataupu silisili o le Tusi Paia i se aso faamanatu, e filifili la le tagata lava ia pe auai ai pe leai. Ae e ao fo’i ona tatou mafaufau po o le a faapefea i la tatou filifiliga ona aafia ai isi.

IA FAAMAMALUINA IEOVA I AU UPU MA GAOIOIGA

23 Atonu e te lē o toe auai i aso faamanatu e lē o faamamaluina ai Ieova. Ae e ono mafaufau nisi o lou aiga e lē o ni Molimau a Ieova, e te lē o fiafia iā i latou pe lē o toe fia faatasitasi fo’i ma i latou. Atonu e latou te manatu o

21. O ā isi ituaiga aso faamanatu e tatau ona ‘alofia e Kerisiano?

22. O le ā e fesoasoani i se Kerisiano ina ia filifili ai pe e auai i se aso faamanatu?

23, 24. E mafai faapefea ona faamatala atu i o tatou tauaiga lē talitonu, a tatou filifiliga i nisi o aso faamanatu?

aso faamanatu e na o le pau ia o taimi e faatasitasi ai le aiga. O le ā la e mafai ona e faia? E tele auala e mafai ona e faamautinoa atu i ai e te alofa iā i latou ma e tāua i latou iā te oe. (Faataoto 11:25; Failauga 3:12, 13) E mafai ona e valaaulia i latou e faifaimea faatasi ma oe i isi faatasiga.

24 Pe a fia iloa e ou tauaiga pe aiseā ua e lē toe faamanatuina ai nisi o aso faamanatu, e mafai ona e sa'ili i a tatou lomiga ma le jw.org mo ni faamatalaga e fesoasoani iā te oe e faamatala atu ai iā i latou māfuaaga. Aua e te faia se mea e latou te manatu ai o loo e taumafai e manumalo i se finauga, pe faamalosa i latou e ioe mai i ou manatu. Ia fesoasoani i lou aiga ia iloa e tele vala na e iloiloina ona fai ai lea o lau filifiliga. Ia to'afilemu ma 'ia lē aunoa ona e tautala atu i upu e logolelei, ia faamāi i le masima.'—Kolose 4:6.

25 E tāua iā i tatou uma ona malamalama lelei i a tatou māfuaaga e lē auai ai i nisi o aso faamanatu. (Eperu 5:14) O lo tatou sini ia faafiafia Ieova. Pe a faapea o i tatou o ni mātua, ia faaalu se taimi e fesoasoani ai i a tatou fanau ia malamalama ma mulimuli i mataupu silisili o le Tusi Paia. Pe afai e matuā moni Ieova i fanau, o le a latou manana'o fo'i la e faafiafia o ia.—Isaia 48:17, 18; 1 Peteru 3:15.

26 E fiafia le finagalo o Ieova e silasila mai o loo tatou faia mea uma e mafai ai, ina ia tapua'i atu iā te ia i se auala mamā ma faamaoni. (Ioane 4:23) Ae e manatu le to'atele e lē mafai ona matuā faamaoni se tasi i lenei lalolagi lē faamaoni. Pe e moni lenā manatu? O le a tatou iloiloina lenei manatu i le mataupu o loo sosoo mai.

25, 26. E faapefea ona fesoasoani mātua i a latou fanau ia naunau i tapulaa a Ieova?

1 O MEA UMA E TATOU TE FAIA E TATAU ONA FAAMAMALUINA AI IEOVA

“Pe tou te aai, pe inu, pe faia se tasi mea, ia faia mea uma lava ina ia faamamaluina ai le Atua.”—1 Korinito 10:31

E faapefea ona tatou faia ni filifiliga lelei e faatatau i aso faamanatu?

Faataoto 15:15;

Failauga 3:12, 13;

Galuega 20:35;

2 Korinito 9:7

E finagalo leova ia tatou olioli i le olaga. E finagalo ia tatou agalelei ma limafoa’i i aso uma, ae e lē na o ni aso faapitoa.

Esoto 32:1-6;

Faaaliga 12:9

E lē o taimi uma e faigofie ai ona iloa le mea e fai. O loo taumafai Satani e faasesē i tatou e ala i le faafenunia’i o le mea e sa’o ma le mea e sesē.

Ioane 8:32;

Eperu 5:14

Ia iloilo mea na amata mai ai aso faamanatu lauiloa, ina ia iloa ai pe fiafia i ai le finagalo o leova.

2 O LE TELE O ASO FAAMANATU LAUILOA E FAAPAUPAU LE AMATAGA

“E iloa e outou le upu moni, e tuusa’oloto fo’i outou e le upu moni.”—Ioane 8:32

Na faapefea ona amata mai nisi o aso faamanatu?

2 Korinito 6:14-18;

2 Ioane 6, 7

Ina ua mavae le maliliu o le ‘auaposestolo, na au-maia e a’oa’o pepelo tū ma aso faamanatu faapau-pau i le faapotopotoga, ma faaigoa i ni igoa faa-Kerisiano. O le tele o nei aso faamanatu o loo faamanatuina pea i aso nei, e pei o le Eseta ma le Tau-saga Fou.

Luka 2:8-11

O le tele o vaega o le lalolagi e faamanatu le Kerisimasi iā Tesema 25. Ae e lē o le aso lenā na fanau ai Iesu.

Kenese 40:20-22;

Mareko 6:21-29

E le’i faamanatuina e ulua’i Kerisiano aso fanau. E na o aso fanau o tagata e le’i tapua’i iā leova o loo faamatala i le Tusi Paia, ma o na aso fanau na tutupu ai ni mea leaga.

3 IA FAI NI FILIFILIGA ATAMAI I ASO E FAAMANATU

“Ia faamautinoa pea po o ā mea e fiafia
i ai le Alii.”—Efeso 5:10

O ā ituaiga aso faamanatu e tatau ona ‘alofia e Kerisiano? Pe a faia se filifiliga e faatatau i se aso faamanatu, ia fesili ifo:

Isaia 52:11;

1 Korinito 4:6;

2 Korinito 6:14-18;

Faaaliga 18:4

Pe na amata mai o se vaega o lotu sesē po o faiga faatemoni?

Ieremia 17:5-7;

Galuega 10:25, 26;

1 Ioane 5:21

Po o faamamaluina ai se tagata, se faalapopotoga, po o le tagāvai a se atunuu?

Galuega 10:34, 35; 17:26

Po o soona faatāua ai se ituaiga po o se atunuu nai lo o isi ituaiga ma atunuu?

Salamo 97:10;

1 Korinito 2:12;

Efeso 2:2;

1 Peteru 4:3

Po o uuna’ia ai “le agaga o le lalolagi,” e pei o le uuna’ia o tagata ia onanā pe faia amioga lē mamā?

Roma 14:21

Pe afai ou te auai i lenei aso faamanatu, po o le a aafia ai lotofuatiaifo o isi?

Roma 12:1, 2;

Kolose 4:6;

1 Peteru 3:15

Pe afai ou te filifili e lē auai i lenei aso faamanatu, o le a faapefea ona ou faamatala atu i isi māfuaaga ou te lē auai ai?

IA FAAMAONI I MEA UMA

“Matou te manana’o ina ia faia mea uma
ma le faamaoni.”—EPERU 13:18.

A O SAVALI atu se tamaitiiti i le fale ina ua tuua le a’oga, sa ia mauaina se atotupe o loo tumu i tupe. O le ā nei o le a ia faia? E mafai ona ave ma ia. Ae nai lo o lea, sa ia toe faafo’i atu le atotupe i lē e ana. Ina ua faalogo i ai le tinā, sa matuā fiafia o ia i le mea na faia e lana tama.

² O le to’atele o mātua e fiafia pe a faamaoni a latou fanau. O Ieova lo tatou Tamā i le lagi o le “Atua faamaoni,” ma e fiafia o ia pe a tatou faamaoni. (Salamo 31:5) E tatou te manana’o e faafiafiaina o ia ma “ia faia mea uma ma le faamaoni.” (Eperu 13:18) Se’i o tatou iloiloaina vala e fā o le olaga e ave ai o se lu’i le faaalua o le faamaoni. O le a tatou talanoaina fo’i nisi o aogā e maua pe a tatou tumau i le faamaoni.

FAAMAONI IĀ I TATOU LAVA

³ Ina ia faamaoni i isi, e tatau ona tatou faamaoni muamua iā i tatou lava. E lē o taimi uma e faigofie ai ona faia faapea. I le ulua’i senituri, sa faasesēina e uso

1, 2. O ā faalogona o leova pe a silasila mai o loo tatou tauivi ina ia faamaoni?

3-5. (a) E faapefea ona tatou lē faamaoni iā i tatou lava? (e) O le ā e fesoasoani ina ia tatou faamaoni ai iā i tatou lava?

i le faapotopotoga i Laotikaia i latou lava i le manatu e faapea na latou faafiafiaina le Atua, a o le mea moni e leai. (Faaaliga 3:17) E mafai fo'i ona tatou faasesēina i tatou lava e faatatau i le ituaiga tagata moni e iai i tatou.

⁴ Na faapea mai le soo o Iakopo: “Afai e manatu se tasi iā te ia lava o sē e to'aga i le tapua'iga ae lē pulea lona laulaufaiva, ua faasesēina e ia lona lava loto, ua lē aogā la lana tapua'iga.” (Iakopo 1:26) O le a faasesēina i tatou lava pe a mafaufau e faapea, afai e tatou te faia ni mea lelei, e lē afāina la i le Atua pe a tatou tautatala lē mafaufau pe faatigā, ma faia ni tala pepelo. O le ā e fesoasoani iā i tatou ina ia 'alofia ai le faasesēina o i tatou lava?

⁵ Pe a tatou vaavaai i le faata, e mafai ona iloa atu ai o tatou foliga i fafo. Pe a tatou faitau i le Tusi Paia, e mafai ona iloa ai lo tatou tagata i totonu. E mafai ona fesoasoani le Tusi Paia e iloa ai o tatou lelei ma vai-vaiga. E tatou te iloa ai suiga e mana'omia ona fai i le auala e tatou te mafaufau, gaoioi, ma tautatala ai. (**Faitau le Iakopo 1:23-25.**) Ae afai e tatou te faapea ifo e leai ni o tatou sesē, e lē mafai la ona tatou faia ni suiga e mana'omia. E mana'omia la ona tatou faaaogā le Tusi Paia ina ia iloilo ai ma le faamaoni i tatou lava. (Auega 3:40; Hakai 1:5) E fesoasoani fo'i le tatalo ina ia iloa ai le ituaiga tagata moni lava e iai i tatou. E mafai ona tatou tatalo atu iā Ieova ina ia su'esu'e mai i tatou, ma fesoasoani mai ia iloa o tatou sesē ina ia toe faasa'o ai. (Salamo 139:23, 24) E tatou te manatua “e inosia e Ieova le tagata fai mea pi'opi'o, ae e mafuta vavalalata atu o ia i ē ua amio sa'o.”—Faataoto 3:32.

FAAMAONI I LE AIGA

6 E tāua tele le faamaoni i le aiga. Pe afai e lē natia e le tane po o le avā i le isi ona faalogona moni, o le a la lagona le malupuipua ma maufaatuatuaina e le tasi le isi. E tele auala e mafai ona lē faamaoni ai se tasi i le faaiipoiga. O se faaa'oa'oga, e mafai ona aafia se tagata faaiipoiga i le faatafai, matamata i ata ma faamatalaga matagā taufeusua'iga, pe uō faalilolilo fo'i ma se isi tagata. Ia mātau, na faapea mai le faisalamo: "Ou te le'i nofo faatasi ma tagata pepelo; ou te le'i alu faatasi ma tagata taufaa'ole'ole." (Salamo 26:4) O le mafaufau i faiga lē mamā, e mafai ona e lē

6. Aiseā e tatau ai i le tane ma le avā ona faamaoni le tasi i le isi?

la vave ona teena so o se mea e ono faaleagaina ai lau faaiipoiga



faamaoni ai i lau paaga ma i'u ai ina faaleagaina la oulua faaipoipoga.

⁷ E mana'omia fo'i ona a'oa'oina le fanau i le tāua o le faamaoni. E mafai ona faaaogā e mātua le Tusi Paia e a'oa'o ai le fanau i lenei vala. O loo iai faaa'oa'oga leaga a tagata lē faamaoni, e pei o Akana o lē na gaoui; Kiasi, o lē na pepelo ina ia maua ai ni ana tupe; ma Iuta, o lē na gaouia tupe ma mulimuli ane faalataina Iesu i tupe siliva e 30.—Iosua 6:17-19; 7:11-25; 2 Tupu 5:14-16, 20-27; Mataio 26:14, 15; Ioane 12:6.

⁸ O loo iai fo'i i le Tusi Paia le tele o faaa'oa'oga lelei e faatatau i tagata na faamaoni, e pei o Iakopo o lē na uuna'ia ona atalii ia toe faafo'i tupe na latou mauaina; Iefata ma lona afafine, o ē na faataunuu se tautoga i le Atua; ma Iesu, o lē na faamaoni e oo lava i tulaga faigatā. (Kenese 43:12; Faamasino 11:30-40; Ioane 18:3-11) E mafai ona fesoasoani nei faaa'oa'oga i fanau ina ia malamalama ai i le tāua o le faamaoni.

⁹ E mafai ona a'oa'o e mātua se lesona mai i le mataupu silisili tāua lenei mai i le Tusi Paia: "O lenei fo'i, o oe lē e a'oa'o atu i le tasi tagata, e te lē a'oa'o ea oe iā te oe? O oe o lē e tala'i atu 'Aua le gaoui,' pe e te gaoui ea?" (Roma 2:21) E iloa e fanau taimi e ese ai le tala e fai atu e mātua ae e ese le mea e latou te faia. Pe a tatou fai atu i le fanau ia faamaoni ae e tatou te lē o faamaoni, o le a lē mautonu o latou mafaufau. Pe afai e mātua e fanau e pepelo o latou mātua, e oo lava i mea lāiti, atonu o le mea fo'i lenā o le a latou faia. **(Faitau**

7, 8. E faapefea ona e faaaogā le Tusi Paia ina ia a'oa'o ai le fanau i le tāua o le faamaoni?

9. O le a faapefea ona fesoasoani i le fanau le faamaoni o mātua?

le Luka 16:10.) Ae afai e iloa e le fanau e faamaoni o latou mātua, atonu o le a fesoasoani ina ia avea ai le fanau ma ni mātua maufaatuatuaina pe a fai fo’i ni a latou fanau.—Faataoto 22:6; Efeso 6:4.

FAAMAONI I LE FAAPOTOPOTOGA

10 E mana’omia fo’i ona tatou faamaoni i o tatou uso ma tuafāfine Kerisiano. E faigofie ona suia talanoaga faasamasamanoa i le faitatala ma i’u ai i tala taufaaleaga. Pe afai e tatou te toe faamatala atu se tala e aunoa ma le iloaina pe e moni, e tatou te ono faasalalau atu ni tala pepelo. E sili la ona lelei pe a ‘pulea o tatou laugutu.’ (Faataoto 10:19) O le faamaoni e lē faapea ai e tatau ona tatou faamatala atu mea uma e tatou te mafaufau ai, iloaina, pe faalogo ai fo’i. E tusa lava fo’i pe e moni le tala o le a tatou faamatala atu, ae atonu e leai sa tatou aiā e toe faamatala ai, pe atonu fo’i e lē mana’omia ma e lē agalelei le toe faamatala atu. (1 Tesalonia 4:11) O nisi e fai ni faamolemolega mo lo latou lē mafaufau, e ala i le faapea mai: “O la’u tala sa’o a.” Ae ona o i tatou o tagata o Ieova, e tatou te manana’o i taimi uma ia logolelei ma agalelei a tatou upu.—**Faitau le Kolose 4:6.**

11 Ua tuu atu e Ieova i toeaina le tiute tauave o le fesoasoani i le faapotopotoga. E faigofie ona fesoasoani mai toeaina pe a tatou faamaoni iā i latou. Aiseā? Pe afai e te ma’i ma alu e vaai se foma’i mo se fesoasoani, po o le a e nanā nisi o āuga o lou ma’i? O le a faapefea ona

10. E mafai faapefea ona tatou faamaoni i a tatou talanoaga ma isi Kerisiano?

11, 12. (a) E faapefea ona faateteleina le mataupu pe a fai e lē faamaoni se tagata na faia se agasala? (e) O ā ni fesili e tatou te ono fesili ai? (i) E mafai faapefea ona tatou faamaoni i le faalapotopotoga a leova?

fesoasoani mai le foma'i pe afai e te faia faapena? I se tulaga talitutusa, e lē tatau ona tatou pepelo pe a tatou faia se agasala matuiā. Nai lo o lea, e tatau ona tatou talanoa atu i toeaina ma le faamaoni. (Salamo 12:2; Galuega 5:1-11) Se'i mafaufau i se isi tulaga lenei: E faapefea pe afai e te iloa na faia e sau uō se agasala matuiā? (Levitiko 5:1) Po o le a e faapea mai: "Ou te lē faailoaina atu lana mea sesē ona o a'u o lana uō moni?" Pe o le a e manatua o le tiute o toeaina o le avatu o le fesoasoani mana'omia, ina ia toe faaleleia ma faamalosia ai le la faiā ma Ieova? —Eperu 13:17; Iakopo 5:14, 15.

12 E mana'omia fo'i ona tatou faamaoni i le faalapotopotoga a Ieova pe a fai lipoti o le tala'iga. E tatou te faamaoni fo'i pe a faatumu se talosaga e paeonia po o se isi vala o le auaunaga.—**Faitau le Faataoto 6:16-19.**

13 E lē tatau i uso ma tuafāfine Kerisiano ona nini faatasi mataupu faapisinisi ma le tapua'iga. O se faaa'o-a'oga, e tatou te lē faia ni faiga faapisinisi a o iai i le Maota mo Sauniga po o le tala'iga. I faiga faapisinisi, e tatou te lē faaaogā sesē o tatou uso ma tuafafine ina ia taulau ai. Pe afai e te faafaigaluegaina ni Molimau, ia totogi i latou i le taimi sa'o, ia avatu atoa le aofa'iga o le totogi na e malie i ai, ma so o se faamanuiaga ua faatulafonoina mo tagata faigaluega. Atonu e aofia ai inisiua pe a ma'i po o le totogi mo aso mālōlō. (1 Timoteo 5:18; Iakopo 5:1-4) Pe afai e faafaigaluega oe e se uso po o se tuafafine, aua e te faatalitalia e fai faapitoa oe. (Efeso 6:5-8) Ia faamautinoia e te galue i le taimi na lua malilie uma i ai, ma fai galuega o loo totogi ai oe.—2 Tesalonia 3:10.

13. E faapefea ona tatou faamaoni i a tatou feutaga'iga faapisinisi ma uso ma tuafāfine?

14 Ae faapefea pe afai e tatou te faia se pisinisi faatasi ma se uso po o se tuafafine? Atonu e aofia ai le faaogā o lau tupe e faatau ai mea e faagaoioi ai le pisinisi, po o le nonō atu o lau tupe e amata ai le pisinisi. E iai se mataupu silisili o le Tusi Paia e tāua tele i tulaga faapea: Ia faamaumau i lalo mea uma! Ina ua faatau mai e le perofeta o Ieremia se fanua, sa ia tusia ni kopi se lua o le maliega, saina e molimau le isi kopi, ona teu faalelei lea o kopi uma e lua mo le lumana'i. (Ieremia 32:9-14; taga'i fo'i i le Kenese 23:16-20.) E manatu nisi o le tusia o se maliega, e foliga mai ai ua latou lē maufaatuatua o latou uso. Ae o le mea moni, o le tusia o se maliega e mafai ona 'alofia ai le tele o le lē femalamalamaa'i, le lē fiafia, ma feeseesea'iga. E oo lava fo'i i mataupu faapisinisi, e ao ona manatua e sili atu ona tāua le filemu o le faapotopotoga nai lo o maliega faapisinisi.—1 Korinito 6:1-8; taga'i i le Faaopoopoga 30.

FAAMAONI I LE LALOLAGI

15 E tatau ona tatou faamaoni i tagata uma e aofia ai i latou e lē o ni Molimau a Ieova. E tāua iā Ieova lo tatou faamaoni. "E inosia e Ieova le fua faatautau faaaimamago, ae e fiafia o ia i le maa e fua ai mea e atoa." (Faataoto 11:1; 20:10, 23) I taimi o le Tusi Paia, sa masani ona faaogā fua faatautau i faiga faapisinisi. Peita'i, e le'i faamaoni nisi 'aufaatau'oa i a latou tagata faatau, e ala i le faaititia o mea e avatu i ai nai lo o mea na malilie i ai, pe sii fo'i le tau o se oloa nai lo o le tau e tatau ona faatau ai. Ua taatele fo'i i aso nei le lē

14. O le ā e tatau ona faia e se Kerisiano a o le'i faia se pisinisi faatasi ma se uso po o se tuafafine?

15. O ā faalagona o Ieova i faiga faapisinisi lē faamaoni?

faamaoni i faiga faapisinisi, e pei lava o taimi o le Tusi Paia. Na inosia e Ieova le lē faamaoni i lenā taimi, e na te inosia fo’i i le taimi lenei.

16 O i tatou uma lava e feagai ma tulaga e mafai ona lē faamaoni ai. E pei o taimi e talosaga ai mo se galuega, faatumu ni pepa mo le malo, pe i taimi fo’i o su’ega i le a’oga. E manatu le to’atele e lē o se mea sesē pe a pepelo, soona faatele o tatou tomai, pe avatu ni tali taufaasesē. E lē faate’ia ai i tatou i lenei tulaga. Na valoia i le Tusi Paia, i aso e gata ai o lenei faiga o mea, e avea tagata ma “ē e alolofa iā i latou lava, o ē e manana’o tele i tupe, . . . o ē e lē fiafia i mea lelei.”—2 Timoteo 3:1-5.

17 O nisi taimi e foliga mai ai ua taulau manuia tagata lē faamaoni i le lalolagi i aso nei. (Salamo 73:1-8) E ono lē toe maua e se Kerisiano lana galuega, gaoia ana tupe i se auala taufaasesē, pe faileagaina i lana galuega ona o lona faamaoni. Peita’i e tāua so o se faataulaga tatou te faia ona o le faamaoni. Aiseā?

O FAAMANUIAGA ONA O LE FAAMAONI

18 O le talaaga o se tagata e faamaoni, maufaatuatua-ina, ma faamoemoeina, e tautele ma ua seāseā maua i lenei lalolagi. O i tatou uma lava e iai le avanoa e atia’e ai se talaaga faapena. (Mika 7:2) E moni e ono tauemu nisi iā te oe ma faapea mai e te valea ona o lou faamaoni. Peita’i, o le a talisapaia ma maufaatuatuaina oe e isi. Ua lauiloa Molimau a Ieova i le lalolagi aoao i lo latou faamaoni. O nisi pule o galuega e sili atu iā i latou le faafaigaluega o Molimau a Ieova ona e faamaoni. Pe

16, 17. O ā faiga lē faamaoni ua taatele e mana’omia ona tatou ‘alofia?

18. Aiseā e tautele ai le iai o se talaaga lelei?

a tutuli isi mai i a latou galuega ona o le lē faamaoni, e masani lava ona tumau Molimau a Ieova.

19 O le faamaoni i mea uma lava o le a e maua ai se lotofuatieaifo lelei ma le filemu o le mafaufau. E mafai ona tatou pei o Paulo o lē na tusi e faapea: “Ua matou talitonu ua iā i matou se lotofuatieaifo lelei.” (Eperu 13:18) A o le itu e sili ona tāua, o le a silafia mai ma talisapaia e lou Tamā alofa o Ieova, au taumafaiga ina ia faamaoni i mea uma lava.—**Faitau le Salamo 15:1, 2; Faataoto 22:1.**

19. E faapefea i le faamaoni ona aafia ai la oulua faiā ma Ieova?

E faamamaluina Ieova e ala i a tatou galuega mamafa



1 UA TATOU OLA I SE LALOLAGI LĒ FAAMAONI

“Ua latou tautatala pea o le tasi i le isi i mea e lē moni; ua latou tautatala pea fo’i . . . ma le faalotolotolua.”—Salamo 12:2

O le ā e fesoasoani iā i tatou ina ia faamaoni iā i tatou lava?

Salamo 31:5;

Eperu 13:18

E finagalo leova ia tatou faamaoni iā i tatou lava ma isi.

Salamo 139:23, 24;

Iakopo 1:23-25

E fesoasoani le tatalo ma le faitauina o le Tusi Paia iā i tatou, ina ia iloa ai le itu-aiga tagata moni e iai i tatou ma faia suiga mana’omia.

2 O LE FAAMAONI I LE AIGA E MAUA AI LE FILEMU MA LE AUTASI

“Ou te le’i alu faatasi ma tagata
taufaa’ole’ole.”—Salamo 26:4

Aiseā e tāua ai le faamaoni i totonu o le aiga?

Faataoto 6:16-19

O le faamaoni i totonu o le aiga e atia’e ai le mau-faatuatuaina. E ao i tagata o le aiga ona faamaoni le tasi i le isi e tusa lava pe e faigatā.

Faataoto 22:6;

Efeso 6:4

Pe a mātau e le fanau o loo faamaoni o latou mātua, o le a faigofie la i le fanau ona faamaoni.

3 E AOGĀ LE FAAMAONI I LE FAAPOTOPOTOGA

“E inosia e Ieova le tagata fai mea pi’opi’o,
ae e mafuta vavalalata atu o Ia i ē ua amio
sa’o.”—Faataoto 3:32

**Aiseā e tāua ai ona faamaoni i o tatou uso ma
tuafāfine i le faapotopotoga?**

Faataoto 10:19;

Kolose 4:6

E tatou te naunau ia tautala faamaoni i taimi uma, ae e tatau ona logolelei ma faaaloalo a tatou upu.

Levitiko 5:1;

Eperu 13:17;

Iakopo 5:14, 15

Pe a tatou faamaoni i toeaina o le faapotopotoga e mafai ona latou fesoasoani mai.

Ieremia 32:9-12;

Efeso 6:5-8

Pe a tatou faia se pisinisi ma uso ma tuafāfine, e tatau ona tatou matuā faamaoni, ia lelei le auala e feutaga’i ai ma i latou, ma ia tausisi i a tatou maliega.

4 O LE FAAMAONI E TATOU TE MAUA AI AOGĀ I TAIMI UMA

“E sili le mana’o i le igoa lelei nai lo o le tele o le tamaoaiga.”—Faataoto 22:1

O ā isi vala o le olaga e mana’omia ona tatou faamaoni ai?

Salamo 37:21;

Mataio 22:17-21;

Roma 13:1-7;

Efeso 4:25, 28

E tatou te faamaoni pe a feutaga’i ma pule o galuega, taulima mataupu faapisinisi, su’e su’ega a le

a’oga, ma faatumu pepa e pei o le totogiina o lafoga, po o pepa a le malo.

Aiseā e sili atu ai le faamaoni nai lo o ‘oa faaletino?

Salamo 15:1, 2;

Faataoto 11:1;

1 Timoteo 6:9, 10

E matuā tautele le talaaga o se tagata e faamaoni ma maufaatuatuaina. O le faamaoni e fesoasoani e tatou te maua ai se lotofuatiiaifo lelei. E talisapaia e leova a tatou taumafaiga uma ina ia faamaoni.

IA FIAFIA I AU GALUEGA

“Ia ta’itasi le tagata . . . ma fiafia i mea lelei ona o ana galuega mamafa uma.”—FAILAUGA 3:13.

E GALULUE mamafa tagata i le lalolagi aoao e tausia i latou ma o latou aiga. Ua lē fiafia le to’atele i a latou galuega, ma ua fā’atu nisi e faigaluega i aso ta’itasi. Po o lou lagona fo’i lenā, ma o le ā e mafai ona e faia ina ia atili avefa ai lau galuega o se si’omaga fiafia? E faapefa ona e fiafia i lau galuega?

² Ua fetalai mai Ieova: “Ia ta’itasi le tagata ma ‘ai ma inu ma fiafia i mea lelei ona o ana galuega mamafa uma. O le meaalofa lea mai i le Atua.” (Failauga 3:13) Na foafoaina i tatou e Ieova ma tuu i ai le mana’oga ma le faanaunaga e galulue. E finagalo o ia e tatou te fiafia i a tatou galuega.—**Faitau le Failauga 2:24; 5:18.**

³ O lea la, o le ā e fesoasoani iā i tatou ina ia fiafia ai i a tatou galuega? O ā galuega e tatau i Kerisiano ona ‘alofia? E faapefa ona faapaleni a tatou galuega ma le tapua’iga iā Ieova? O le ā le galuega e sili ona tāua e mafai ona tatou faia?

O I LA’UA E SILI ONA GALULUE MAMAFA

⁴ E fiafia Ieova e galue. Ua ta’ua i le Kenese 1:1: “Na foafoaina e le Atua le lagi ma le lalolagi i le amataga.”

1-3. (a) O ā lagona o le to’atele o tagata e faatatau i a latou galuega? (e) O ā fesili o le a tatou iloiloina i lenei mataupu?

4, 5. O le ā le silafaga a Ieova i galuega?

Ina ua mǎe'a ona foafoaina e le Atua le lalolagi ma mea uma o i ai, ona ia fetalai lea "ua matuā lelei lava" ana foafoaga. (Kenese 1:31) Ua faamalieina Lē na Foafoaina mea uma i ana galuega.—1 Timoteo 1:11.

⁵ O loo galue pea Ieova. Na fetalai Iesu: "O loo galue lo'u Tamā e oo mai i le aso nei." (Ioane 5:17) E ui lava e tatou te lē o iloa mea matagofie uma ua faia e Ieova, ae e iai nisi o na mea ua tatou iloaina. Ua ia filifilia i latou o le a pule faatasi ma lona Alo o Iesu Keriso i le Malo. (2 Korinito 5:17) O loo ta'ita'ia ma tausia fo'i e Ieova tagata. E faitau miliona i latou ua a'oa'o e faatatau iā Ieova ma maua le faamoemoe e ola e faavavau i se lalolagi parataiso, ona o le tala'iga i le lalolagi aoao.—Ioane 6:44; Roma 6:23.

⁶ E fiafia fo'i Iesu e galue e pei o lona Tamā. A o le'i sau Iesu i le lalolagi, sa avea o ia ma "tufuga potō" a le Atua i le foafoaina o mea uma i le lagi ma le lalolagi. (Faataoto 8:22-31; Kolose 1:15-17) Sa faaauau ona galue mamafa Iesu a o iai i le lalolagi. A o talavou sa a'oa'oina o ia e avea o se kamuta tomāi, ma atonu na ia fausiaina meafale ma fale. Sa matuā tomāi Iesu i lana galuega ma na ta'ua ai o ia "o le kamuta."—Mareko 6:3.

⁷ Ae o le galuega e sili ona tāua a Iesu i le lalolagi, o le tala'ia lea o le tala lelei ma a'oa'o tagata e uiga iā Ieova. Na tataua ona mǎe'a lana tala'iga i le tolu ma le 'afa tausaga, ma sa galue mamafa o ia mai i le taeapō se'ia oo i le leva o le pō. (Luka 21:37, 38; Ioane 3:2) E faitau selau maila na savali ai Iesu i auala pefua, ina ia

folafola atu le tala lelei i le to'atele o tagata e mafai ai.
—Luka 8:1.

8 O le faia o le galuega a le Atua sa pei o se mea'ai iā Iesu. Sa ia maua le malosi mai i lenei galuega. O nisi aso na matuā galue mamafa Iesu ma e le'i maua se taimi e taumafa ai. (Ioane 4:31-38) Na ia faaaogā avanoa uma e fesoasoani ai i tagata ia a'oa'o e faatatau i lona Tamā. O le māfuaaga lenā na ia faapea atu ai iā Ieova: "Ua ou faamamaluina oe i le lalolagi, ma ua ou faamāe'aina le galuega na e tuuina mai iā te a'u e fai." —Ioane 17:4.

9 E manino mai, sa matuā galulue mamafa Ieova ma Iesu ma sa fiafia ma faamalieina i la'ua i a la galuega. E tatau ona tatou "faaa'oa'o i le Atua" ma 'mulimulitu'i i tulaga aao' o Iesu. (Efeso 5:1; 1 Peteru 2:21) O le māfuaaga lenā e tatou te taumafai ai e galulue mamafa ma faia le mea e sili i mea uma e tatou te faia.

O LE Ā LE VAAIGA E TATAU ONA IAI I GALUEGA?

10 I le avea ai ma tagata o Ieova, e tatou te galulue mamafa e tausia i tatou lava ma o tatou aiga. E tatou te manana'o ia fiafia i a tatou galuega, ae o se lu'i lenā mea. O lea, o le ā e mafai ona faia pe a tatou lē fiafia i a tatou galuega?

11 **Ia iai se vaaiga sa'o.** Atonu e lē mafai ona suia galuega po o le tele o galuega e tatou te faia, ae e mafai ona sui la tatou vaaiga. Ina ia faia faapea, e fesoasoani lo tatou malamalama i mea o loo faatalitalia

8, 9. Aiseā na fiafia ai Iesu i lana galuega?

10, 11. O le ā e fesoasoani iā i tatou ina ia maua se vaaiga sa'o i galuega?



O le iai o se vaauga sa'o
o le a atili avea ai so o se
galuega o se si'omaga e
sili ona fiafia



mai e Ieova. O se faaa'oa'oga: E faatalitalia e Ieova le ulu o le aiga ia tausia lelei mana'oga o lona aiga i le mea e gata ai lona mafai. Ua ta'ua i le Tusi Paia, o se tasi e na te lē tausia lelei lona aiga, “e sili lona leaga i lo le tagata e lē faatuatua.” (1 Timoteo 5:8) Pe afai o oe o se ulu o le aiga, ia galue mamafa e tausia lou aiga. E tusa pe e te fiafia pe lē fiafia i lau galuega o loo fai, ae ua e iloa o lou tausia o lou aiga ua e faafiafiaina ai Ieova.

12 Ia galue mamafa ma faamaoni. O le faia faapea e faigofie ai ona e fiafia i lau galuega. (Faataoto 12:24; 22:29) O le a maufaatuatuaina ai oe e lou pule. E tāua tele i pule o galuega tagata faigaluega faamaoni, ona latou te lē gaoia tupe, meatotino, ma le taimi. (Efeso 4:28) A o le sili ona tāua, o loo silafia e Ieova lou galue mamafa ma le faamaoni. E te maua se “lotofuatiaifo lelei” ona ua e iloa o loo e faafiafiaina le Atua, o Lē e te alofa i ai.—Eperu 13:18; Kolose 3:22-24.

13 Ia e iloa e viia Ieova i lau amio i le galuega. O se tasi lea o māfuaaga e tatou te fiafia ai i a tatou galuega. (Tito 2:9, 10) Atonu fo'i o lau faaa'oa'oga lelei o le a fiafia ai se tasi lua te faigaluega e su'esu'e le Tusi Paia.—Faitau le Faataoto 27:11; 1 Peteru 2:12.

O LE Ā LE GALUEGA E TATAU ONA OU FILIFILIA?

14 E lē o ta'ua i le Tusi Paia se lisi o galuega e tatau ona talia pe lē talia e se Kerisiano. Ae o loo iai mataupu silisili e fesoasoani e tatou te faia ai filifiliga lelei

12. O ā aogā o lo tatou galulue mamafa ma faamaoni?

13. O le ā e i'u i ai pe a tatou faamaoni i galuega?

14-16. O le ā e tatau ona tatou iloiloaina pe a filifilia se galuega?

e faataau i galuega. (Faataoto 2:6) E tusa ai o mata-upu silisili o le Tusi Paia, ia fesili ifo ai iā i tatou lava i fesili o loo mulimuli mai.

15 Po o le a mana'omia ai i lenei galuega ona ou faia se mea ua fetalai Ieova e sesē? Ua a'oa'oina i tatou i faiga e inosia e Ieova e pei o le gaoi ma le pepelo. (Esoto 20:4; Galuega 15:29; Efeso 4:28; Faaaliga 21:8) E tatou te faaeteete la ina ia 'alofia galuega e feteena'i ma tapulaa a Ieova.—Faitau le 1 Ioane 5:3.

Sa'ili galuega e
lē feteena'i ma
tapulaa a Ieova



16 Po o lagolagoina pe faaauiluma e lenei galuega faiga e ta'usalaina e Ieova? Ia mafaufau i se faaa'oa'oga. E lē leaga le faigaluega e avea o se talitelefoni. Ae faapefea pe a maua e se Kerisiano se avanoa talitelefoni i se fale e faatau ai pepa Lotto? E moni e na te lē o faatauina atu ni pepa Lotto, e na o le talitelefoni lana mea e fai. Ae pe e lē o lagolagoina e lana galuega talitelefoni lenei fale e faatau ai pepa Lotto, o se faiga e lē o gatusa ma le Tusi Paia? (Efeso 5:3-5) Talu ai e tatou te alolofa iā Ieova, e tatou te lē fia aafia la i faiga e ta'usala e le Tusi Paia.

17 O le faaaogā o mataupu silisili a le Atua, e mafai ai ona avea i tatou ma tagata o loo faamatalaina i le Eperu 5:14, “o ē ua faaaogā o latou mafaufau e iloa le mea sa'oa ma le mea sesē ina ua a'oa'oina.” Ia fesili ifo iā te oe lava: ‘Po o le a tausuai ai nisi pe afai ou te taliaina lenei galuega? Po o le a ou tuua ai la'u paaga ma la'u fanau ae ou alu atu i se isi atunuu? E faapefea ona aafia ai i latou?’

IA “FAAMAUTINOA O MEA E SILI ONA TĀUA”

18 E lē faigofie ona faamuamua la tatou tapua'iga iā Ieova i nei “aso e sili ona faigatā.” (2 Timoteo 3:1) O se lu'i le sa'ilia o se galuega ma tumau ai. E mana'omia ona tausua o tatou aiga, ae ua tatou iloa e tatau ona faamuamua la tatou tapua'iga. E lē mafai ona avea meafaitino ma mea e sili ona tāua i o tatou olaga. (1 Timoteo 6:9, 10) O lea la, e faapefea ona tatou 'faa-

17. O le ā e fesoasoani iā i tatou e faia ai filifiliga e faafiafiaina ai le Atua?

18. Aiseā o se lu'i ai le ua'i atu pea i la tatou tapua'iga?

mautinoa mea e sili ona tāua,' ae i le taimi e tasi o loo tausia o tatou aiga?—Filipi 1:10.

19 Ia faatuatua atoatoa iā Ieova. (Faitau le Faataoto 3:5,6.) E tatou te iloa e silafia e le Atua mea e tatou te mana'omia moni lava, ma e matuā manatu mamafa mai o ia iā i tatou. (Salamo 37:25; 1 Peteru 5:7) Ua ta'u mai i lana Afioga: "Ia aunoa o outou olaga ma le mana'o tele i tupe, a ia outou lotomalilie i mea ua iai iā te outou. Auā na fetalai [le Atua]: 'Ou te lē tuua lava oe, ma ou te lē tuulafoa'ia lava oe.'" (Eperu 13:5) E lē finagalo Ieova e tatou te popole i taimi uma i le tausia o tatou aiga. Ua tele taimi ua ia faaalialia mai ai e mafai ona ia tausia mana'oga o tagata. (Mataio 6:25-32) E tusa lava po o ā tulaga o a tatou galuega, ae e tatou te su'e-su'e e lē aunoa le Afioga a le Atua, tala'i le tala lelei, ma auai i sauniga faa-Kerisiano.—Mataio 24:14; Eperu 10:24, 25.

20 Ia lelei pea lau vaai. (Faitau le Mataio 6:22, 23.) O lona uiga ia faafaigofie lou olaga ina ia e ua'i atu ai i le auaunaga iā Ieova. Ua tatou iloa o se mea valea le faataga o tupe, olaga sologa lelei, po o masini fou e avea ma mea e sili ona tāua nai lo o la tatou faauōga ma le Atua. O le ā la e fesoasoani ina ia tatou faamua-mua ai mea e tatau ona muamua? Tatou taumafai malosi e aua ne'i faia ni aitalafu. Pe afai o loo iai sau aitalafu, ia fai se fuafuaga e faaitiitia pe totogi uma fo'i. Pe a tatou lē faaeteete, e ono alu uma lo tatou taimi ma le malosi i le sa'ilia o meafaitino, ma ua leai

19. E faapefea i le faatuatuaina o Ieova ona fesoasoani iā i tatou ina ia paleni i a tatou galuega?

20. E faapefea ona faafaigofie o tatou olaga?

ai se taimi e tatalo, su'esu'e, ma tala'i ai. Nai lo o le faa-tagā o meafaitino e faafaigatā ai o tatou olaga, e tatau ona tatou lotomalilie i mea e mana'omia moni e pei o 'mea'ai ma mea e oofu ai.' (1 Timoteo 6:8) Po o le ā lava lo tatou tulaga, ae e lelei ona iloilo i tatou lava mai i lea taimi i lea taimi, ina ia iloa le auala e tatou te au-auna atoatoa ai iā leova.

21 Ia sa'o mea e faamuamua. Ia faaaogā tatau lo

21. Aiseā e ao ai ona tatou filifili po o le ā le mea e tatau ona faamuamua i o tatou olaga?

O le auauna iā leova
o le galuega lea e sili ona tāua



tatou taimi, malosi, ma meafaitino. Pe a tatou lē faaeteete, o le a alu uma lo tatou taimi i le sa'ilia o mea e itiiti le tāua e pei o a'oa'oga ma tupe. Na fetalai Iesu: "Ia faaaauu pea ona outou sa'ili muamua le malo." (Mataio 6:33) E faaalua mai i a tatou filifiliga, masaniga, mea fai i aso ta'itasi, ma sini, mea o loo faamuamua i o tatou loto.

LE GALUEGA E SILI ONA TĀUA E MAFAI ONA TATOU FAIA

22 O le galuega e sili ona tāua e tatou te faia, o le au-auna iā Ieova ma tala'i atu le tala lelei i isi. (Mataio 24:14; 28:19, 20) I le pei o Iesu, e ao ona tatou faia mea uma tatou te mafaia i lenei galuega. Ua siitia atu nisi i nofoaga o loo tele ai le mana'oga mo le 'autala'i. Ua a'oa'o e nisi se isi gagana ina ia tala'i atu ai i tagata e tautatala i na gagana. Ia talanoa atu iā i latou na faia faapea, ma fesili i ai e faatatau i na mea. O le a latou ta'u atu iā te oe ua sili ona fiafia ma faaaogā tatau o latou olaga.—**Faitau le Faataoto 10:22.**

23 I aso nei, ua faaalua e le to'atele o i tatou le tele o itula e faigaluega ai po o le silia fo'i ma le tasi le galuega, mo le na ona tausia ai o mana'oga masani o le aiga. E silafia e Ieova lenā mea ma e na te talisapaia mea uma o loo tatou faia ina ia tausia ai o tatou aiga. Se'i o tatou faaa'oa'o pea iā Ieova ma Iesu i le galulue mamafa, e tusa lava po o le ā le galuega e tatou te faia. Ia manatua o la tatou galuega e sili ona tāua, o le au-auna iā Ieova ma tala'i le tala lelei o le Malo o le Atua. O lea, o le a tatou maua ai le fiafia moni.

22, 23. (a) O le ā la tatou galuega e sili ona tāua o ni Kerisiano? (e) O le ā e fesoasoani iā i tatou ina ia fiafia ai i a tatou galuega?

1 NA FOAFOA E IEOVA TAGATA MA TUU IAI LE FAANAUNAUGA IA GALULUE

“Ia ta’itasi le tagata ma ‘ai ma inu ma fiafia i mea lelei ona o ana galuega mamafa uma. O le meaalofa lea mai i le Atua.”—Failauga 3:13

Aiseā e faapea atu ai o galuega o se meaalofa mai i le Atua?

Kenese 1:1, 31;

Failauga 2:24;

Ioane 5:17

E galue mamafa leova.
E fiafia o ia i ana galuega ma e finagalo ia tatou fiafia fo’i i a tatou galuega.

Mareko 6:3;

Luka 21:37, 38;

Ioane 4:31-38; 17:4

Na faia e Iesu galuega e sili ona lelei ma faauma galuega na tofia atu i ai e ui lava e le’i faigofie.

Faataoto 8:22-31;

Kolose 1:15-17

O Iesu fo’i o sē e galue mamafa i taimi uma i le lagi ma le lalolagi.

2 E MAFAI ONA FAALELEIA LA TATOU VAAIGA I A TATOU GALUEGA

“Po ua e taga’i ea i se tagata tomai i
lana galuega? O le a tū o ia i luma o
tupu.”—Faataoto 22:29

O le ā e fesoasoani ina ia tatou fiafia ai i a
tatou galuega?

Faataoto 12:24;

Kolose 3:22-24;

Eperu 13:18

E ui lava e lē mafai ona
suia a tatou galuega ae e
mafaia ona faaleleia la tatou
vaaiga. E tatou te mana-
na’o fo’i ia faamaoni ma
galulue mamafa.

Faataoto 27:11;

1 Timoteo 5:8;

1 Peteru 2:12

Pe a e tausia le itu faaletino
o lou aiga, ua e usiusita’i i
le Atua. E faamamaluina
leova i lau amio lelei i le
galuega.

Esoto 20:13-15;

Faataoto 2:6;

Roma 14:19-22;

Efeso 5:28–6:4;

1 Ioane 5:3;

Faaaliga 18:4

Ua fesoasoani le Tusi Paia
ina ia tatou malamalama
e iai galuega a tatou talia
e ono aafia ai i tatou, o
tatou aiga, isi uso ma tua-
fāfine, faapea leova o Lē e
sili ona tāua.

3 O LE SA'O O MEA E FAAMUAMUA E FESOASOANI E TATOU TE FIAFIA AI I A TATOU GALUEGA

“Ia outou faamautinoa o mea e sili ona
tāua.”—Filipi 1:10

O ā mea e tatau ona tatou faamuamua?

Salamo 37:25;

Faataoto 3:5, 6;

1 Peteru 5:7

la faatuatua e silafia e
leova mea e te mana'omia
i aso uma o le olaga.

Mataio 6:25-32;

1 Timoteo 6:8-10;

Eperu 13:5

la faamasani ona e loto-
malie i mea ua e maua.

Faataoto 10:22;

Mataio 6:33; 28:19, 20;

Eperu 10:24, 25

la ua'i atu pea i le auauna
iā leova ma tala'i le tala
lelei. O le galuega sili lea
ona tāua e mafai ona tatou
faia.

IA TETEE ATU I LE TIAPOLO

“Ia tetee atu i le Tiapolo, ona sola ese ai lea o ia mai iā te outou.”—IAKOPO 4:7.

O LE a matuā matagofie le olaga i le lalolagi fou a Ieova. O i inā o le a tatou ola ai e tusa ma le fuafuaga a le Atua mo i tatou. Ae i le taimi lenei, o loo tatou ola i se lalolagi ua pulea e Satani ma ana temoni. (2 Korinito 4:4) E ui lava e tatou te lē o vaايا i latou, ae o loo iai moni lava ma e matuā malolosi.

² O le a iloiloaina i lenei mataupu auala e tatou te mafuta vavalalata atu ai iā Ieova, ma puipuia ai i tatou mai iā Satani. Ua folafola mai e Ieova o le a ia fesoasoni mai. Peita’i, e mana’omia ona tatou malamalama i auala o loo faaaogā e Satani ma temoni e maileia ma osofa’ia ai i tatou.

“E PEI O SE LEONA O LOO TAGI LEOTELE”

³ Ua faapea mai Satani e ala ona tapua’i tagata iā Ieova ona o ni māfuaaga manatu faapito, ma o le a tatou lē toe auauna iā Ieova pe a matuā faigatā le tulaga o mea. (**Faitau le Iopu 2:4, 5.**) Pe a naunau se tasi e su’e-su’e e faatatau iā Ieova, o le a mātauina e Satani ma temoni ma taumafai e taofia o ia. E feita i latou pe a tuuina atu se tasi iā Ieova ma papatisoina. Ua faatusa e le

1, 2. O le ā le mea e ao ona tatou malamalama i ai e faatatau iā Satani ma temoni?

3. O le ā e mana’o le Tiapolo e fai iā i tatou?

Tusi Paia le Tiapolo i “se leona o loo tagi leotele, e sa’ili se tasi e na te ‘aina.” (1 Peteru 5:8) E mana’o Satani e faaleaga la tatou faiā ma leova.—Salamo 7:1, 2; 2 Timoteo 3:12.

4 Peita’i, e lē tatau ona tatou fefefe iā Satani ma ana temoni. E faatapulaa e leova mea e mafai ona latou faia iā i tatou. Ua folafola mai e leova o le a faasaoina “se motu o tagata e to’atele” o Kerisiano moni i le “pua-

4, 5. (a) O ā mea e lē mafai ona faia e Satani? (e) O le ā e uiga i ai le “teteē atu i le Tiapolo”?

E ita Satani pe a tuuina atu i tatou iā leova



puaga tele.” (Faaaliga 7:9, 14) E leai se mea e mafai ona faia e le Tiapolo e taofia ai le faataunuaina o lenā mea, auā o loo puipuia e Ieova ona tagata.

⁵ Pe afai e tatou te mafuta vavalalata atu iā Ieova, e le mafai e Satani ona faaleagaina la tatou faiā ma Ia. Ua faamautinoa mai i le Afioga a le Atua: “E ‘au Ieova ma outou pe afai tou te ‘au ma ia.” (2 Nofoaiga a Tupu 15:2; **faitau le 1 Korinito 10:13.**) E to’atele tane ma fafine faamaoni i aso anamua e pei o Apelu, Enoka, Noa, Sara, ma Mose, na tetee i le Tiapolo e ala i le mafuta vavalalata atu iā Ieova. (Eperu 11:4-40) E mafai fo’i ona tatou faia faapea. Ua folafola mai i le Afioga a le Atua: “Ia tetee atu i le Tiapolo, ona sola ese ai lea o ia mai iā te outou.”—Iakopo 4:7.

O LOO TATOU TAUINA SE TAU

⁶ E ui e iloa e Satani ua faatapulaa e Ieova mea e mafai ona ia faia iā i tatou, ae o loo taumafai pea Satani e fai so o se mea e faavaivaia ai la tatou faiā ma le Atua. E tele auala o loo osofa’ia ai i tatou e le Tiapolo i aso nei, ma ua ia faaaogā togafiti ua faitau afe tausaga o ia faaaogāina. O ā nisi o na togafiti?

⁷ Na tusi le aposetolo o Ioane: “O le lalolagi atoa o loo nofo to’ilalo i le pule a lē o loo leaga.” (1 Ioane 5: 19) Ua pulea e Satani lenei lalolagi amioleaga, ma e mana’o e na te pulea fo’i tagata o Ieova. (Mika 4:1; Ioane 15:19; Faaaliga 12:12, 17) Ua iloa e le Tiapolo ua puupuu lona taimi o totoe, o lea ua ia faateteleina ai omiga ina ia tatou lē faamaoni ai i le Atua. O nisi taimi

6. E faapefea ona osofa’ia i tatou e Satani?

7. Aiseā ua osofa’ia ai e Satani tagata o Ieova?

e faaaogā e le Tiapolo osofa'iga tuusa'o, ae o isi taimi e na te faaaogā osofa'iga e iloagatā.

8 Ua ta'ua i le Efeso 6:12 o loo 'tatou tau ma agaga leaga uma i mea o i le lagi.' O loo tau Kerisiano ta'ito'atasi faasaga i le Tiapolo ma temoni. E ao ona tatou iloa, o i latou uma e tuuina atu iā leova, e latou te tauina lenei taua. E faatolu ona uuna'ia e le apusetolo o Paulo Kerisiano i lana tusi i Efeso ia "tutū mausalī."—Efeso 6: 11, 13, 14.

9 E eseese auala e taumafai Satani ma temoni e faasesē ai i tatou. Pe a tatou teena Satani i se tofotofoga, e lē faapea ai o le a lē faasesēina ai i tatou i se isi tofotofoga. E taumafai le Tiapolo e sa'ili o tatou vaivaiga ina ia mafai ai ona ia filifilia togafiti e osofa'ia ai i tatou. Peita'i, e lē tatau ona maileia ai i tatou auā ua a'oa'oina i tatou i le Tusi Paia e faatatau i mailei a le Tiapolo. (2 Korinito 2:11; taga'i i le Faaopoopoga 31.) O se tasi o nei mailei o faiga faatemoni.

IA MATUĀ FAAMAMAO ESE MAI I TEMONI

10 O faiga faatemoni e aofia ai so o se malosiaga e lē faalenatura e fesoota'i atu ai se tasi ma temoni, e pei o valovaloga i mea o le a tutupu i le lumana'i, o faiga faaagaga, faalauatau, po o le taumafai e talanoa atu i ē ua feoti. Ua taua i le Tusi Paia e "inosia" faiga faatemoni, ma e lē mafai ona tatou tapua'i atu iā te ia a o aafia i nei faiga. (Teuteronomie 18:10-12; Faaaliga 21:8) E tatau ona matuā 'alofia e Kerisiano so o se faiga faatemoni.—Roma 12:9.

8. O le ā e ao ona iloa e Kerisiano ta'ito'atasi?

9. O le ā e taumafai Satani ma temoni e fai iā i tatou?

10. (a) O ā faiga faatemoni? (e) O le ā le silafaga a leova i faiga faatemoni?

11 Ua iloa e Satani pe afai e tatou te tosina atu i malosiaga e lē faalenatura, o le a faigofie la ona ia taa'ina i tatou i faiga faatemoni. O le a faaleagaina la tatou faiā ma Ieova i so o se faiga faatemoni.

E TAUMAFAI SATANI E FAASESĒ I TATOU

12 E taumafai Satani e faafenumia'i mafaufauga o tagata. E faasolosolo ona ia faatupu ni masalosologa se'ia oo ina manatu tagata “e lelei le leaga, ma e leaga le lelei.” (Isaia 5:20) Ua faaauiluma e le Tiapolo le manatu e faapea e lē aogā fautuaga a le Tusi Paia, ma o le a sili atu ona tatou fiafia pe a teena tapulaa a le Atua.

13 O le faatupuina o masalosologa o se tasi lea o metotia sili ona taulau manuia a Satani. Ua leva ona ia faa-aogā lenei metotia. Sa taumafai o ia e faatupu masalosologa i le faato'aga i Etena ina ua fesili atu iā Eva: “**E moni ea na fetalai mai le Atua**, e aua ne'i lua aai mai i fua o laau uma o le faato'aga?” (Kenese 3:1) Mulimuli ane i taimi o Iopu, sa fesili atu Satani iā Ieova i luma o agelu: “**Po ua mata'u fua ea Iopu i le Atua?**” (Iopu 1:9) Ina ua uma le papatisoga o Iesu, na lu'ia o ia e Satani e ala i le faapea atu i ai: “**Afai o oe o se atalii o le Atua, inā fetalai atu ia i nei maa ia liu falaoa.**”—Mataio 4:3.

14 O loo faaauau ona faatupu e le Tiapolo masalosologa i aso nei. Ua ia taumafai e uuna'ia tagata e fesiligia pe e leaga moni lava faiga faatemoni, e ala i le faafoliga mai e lelei nisi o na faiga. E oo lava

11. Pe a tatou fia iloa e faatatau i malosiaga e lē faalenatura, o le ā e i'u i ai?

12. E faapefea ona taumafai Satani e taa'ina o tatou mafaufauga?

13. Ua faapefea ona taumafai Satani e faatupu masalosologa?

14. E faapefea ona faatupu e Satani masalosologa i tagata e faatatau i lamatiaga o faiga faatemoni?

i nisi o Kerisiano ua faatauasoina i lamatiaga o faiga faatemoni. (2 Korinito 11:3) O le ā la e mafai ona tatou faia ina ia puipuia ai i tatou? E faapefea ona tatou faamautinoa e lē faasesēina i tatou i togafiti a Satani? Se’i o tatou iloilo vala e lua e ono faasesēina ai i tatou: o faafiagiaga ma togafitiga faafoma’i.

E FAAAOGĀ E SATANI FAANAUNAUGA MASANI E MAILEIA AI I TATOU

15 I aso nei, o le tele o ata tifaga, vitiō, polokalame i televise, taaloga i komepiuta, ma le Initaneti, ua faaalua ai faiga faatemoni, faiga faamaneta, ma malosia e lē faalenatura. Ua manatu le to’atele e lē leaga nei faafiagiaga, ae e latou te lē o iloa lamatiaga o le fesoota’i atu i temoni. E ono aafia fo’i se tasi i faiga faatemoni e ala i le sa’ili i fetu, faitau tositosi o alofilima, faaaogā le pelē e su’e ai le lumana’i, ma polo tioata. E natia e le Tiapolo lamatiaga ae taumafai e faatupu i tagata le manatu e faapea, o nei faiga e lē mafaamatalaina, e maua ai le fiafia, ma e mālie. E ono manatu se tasi e lē afāina le matamata i ata e iai faiga faatemoni po o malosia e lē faalenatura, ona e na te lē o faatinoina nei faiga. Aiseā o se lamatiaga ai lenei manatu?—1 Korinito 10:12.

16 E lē mafai ona iloa e Satani ma temoni o tatou mafaufauga. Ae e mafai ona latou mātauina o tatou faanaunauga ma le auala e tatou te mafaufau ai, pe a faia a tatou filifiliga mo i tatou ma o tatou aiga, e aofia ai filifiliga i faafiagiaga. Pe afai e tatou te filifilia ata tifaga, musika, po o tusi e faatatau i togafiti faataulāitu, faiga faalaua-

15. E faapefea ona tatou aafia i faiga faatemoni e ala i faafiagiaga?

16. Aiseā e tatau ai ona tatou teina faafiagiaga o loo aofia ai malosia e lē faalenatura?

tau, ulufia e temoni, faataulāitu, tagata oti e mimitiina toto o isi tagata, po o nisi mea faapena, o le a iloa ai e Satani ma temoni o loo tatou fia iloa e faatatau iā i latou. O lea o le a latou taumafai ai e matuā faaaafia i tatou i faiga faatemoni.—**Faitau le Kalatia 6:7.**

17 E mafai fo’i ona faaaogā e Satani lo tatou faanaunauga ia ola mālōlōina. E to’atele ua mafatia i aso nei ona o le lē lelei o le soifua mālōlōina. E ono faata’ita’i e se tasi ni togafitiga eseese ae e lē manuia. (Mareko 5: 25, 26) Atonu fo’i e matuā naunau ia malosi, ma i’u ai

17. E mafai faapefea ona faaaogā e Satani lo tatou faanaunauga ia ola mālōlōina?

la faalagolago iā leova pe a e ma’i



ina lotomalie e talia so o se togafitiga. Ae i le avea ai o ni Kerisiano, e ao ona tatou faaeteete ia lē filifilia ni togafitiga faafoma'i e aofia ai le faaaogāina o "faiga faataulāitu."—Isaia 1:13.

18 I Isaraelu anamua, sa iai nisi na faia "faiga faataulāitu." Na fetalai Ieova iā i latou: "Pe a faaloaloa mai o outou lima, e 'alo ese o'u mata mai iā te outou. E tusa lava pe tele ni a outou tatalo e fai, ou te lē faalogo atu lava i ai." (Isaia 1:15) Se'i manatu i ai, e oo lava i a latou tatalo e lē faafofoga i ai Ieova! E tatou te lē manana'o e faia so o se mea e faaleagaina ai la tatou faiā ma Ieova, ma taofia ai lana fesoasoani aemaise lava i taimi e tatou te mama'i ai. (Salamo 41:3) O lea, e tatau ona tatou iloilo pe e iai se sootaga o se togafitiga o le a tatou faia, i faiga faatemoni po o malosiaga e lē faalenatura. (Mataio 6:13) Pe afai e iai sona sootaga i na faiga, e tatau la ona tatou teena lenā togafitiga!—Taga'i i le Faaopopoga 32.

O TALA E FAATATAU I TEMONI

19 E manatu nisi e lē moni le Tiapolo ma temoni, ae o isi ua iloa e iai moni lava le Tiapolo ma temoni ona o mea na tutupu iā i latou. Ua matata'u le to'atele o tagata i agaga leaga ma ua faapologaina i tū ma aganuu faataulāitu. Ua faatupu e isi le fefe i temoni e ala i le faamatala o tala e faatatau i mea leaga e faia e temoni i tagata. E masani ona ofo tagata i nei tala ma fiafia e toe faamatala atu i isi. O na tala e masani ona lagona ai e tagata le fefefe i le Tiapolo.

18. O ā togafitiga faafoma'i e teena e se Kerisiano?

19. Aiseā ua fefefe ai le to'atele o tagata i le Tiapolo?

20 Se'i manatu i le mea lenei—e mana'o Satani ia fefefe tagata iā te ia. (2 Tesalonia 2:9, 10) O ia o sē e pepelo e na te iloa le auala e taa'ina ai mafaufau o ē e fiafia i faiga faatemoni, ma faatalitonu i latou i mea e lē moni. E ono faamatala e na tagata ni tala e faatatau i mea e latou te manatu na vāai ma faalogo i ai. Ae e uma ane ua soona faatetelē na tala ona o le faamatala soo. E tatou te lē manana'o e fesoasoani iā Satani e faatupu le fefe i temoni, e ala i le toe faamatala atu o na tala.—Ioane 8:44; 2 Timoteo 2:16.

21 Pe afai e i ai se mea na aafia ai se tagata o Ieova i temoni, e lē o se mea lelei ona toe faamatala atu i isi. E lē tatau ona fefefe tagata o Ieova i so o se mea e faia e le Tiapolo ma ana temoni. Nai lo o lea, e ao ona tatou taula'i atu iā Iesu ma le mana na tuuina atu i ai e Ieova. (Eperu 12:2) E le'i fiafia Iesu e toe faamatala atu i ona soo tala e faatatau i temoni. Na taula'i atu o ia i le fe'au o le Malo ma “mea matagofie a le Atua.”—Galuega 2:11; Luka 8:1; Roma 1:11, 12.

22 Ia aua ne'i galo, o le sini o Satani ia faaleaga la tatou faiā ma Ieova. E taumafai o ia e fai so o se mea ina ia faaleagaina ai. Peita'i, ua tatou iloa faiga a le Tiapolo, ma e tatou te maumaua'i e teena so o se ituaiga o faiga faatemoni. O le a tatou lē tuu atu “se mea e mautū ai le Tiapolo,” ina ia faavaivaia ai la tatou filifiliga maumaua'i. (**Faitau le Efeso 4:27.**) Ioe, pe afai e tatou te tetee atu i le Tiapolo, o le a tatou sao mai i ana mailei ma saogalemumu i le puipuiga a Ieova.—Efeso 6:11.

20. E mafai faapefea ona tatou faasalalau atu pepelo a Satani?

21. Nai lo o le faamatala atu o tala e uiga i temoni, o le ā e tatau ona tatou talanoa i ai?

22. O le ā ua e maumaua'i e fai?

1 O LOO PULEA E LE TIAPOLO LE LALOLAGI

“O le lalolagi atoa o loo nofo to‘ilalo i le
pule a lē o loo leaga.”—1 Ioane 5:19

O le ā le sini o Satani?

1 Peteru 5:8

E mana’o Satani ia lamatia
ma faaleaga la tatou faiā
ma leova.

Iopu 2:4, 5

E ita Satani pe a vaai atu
ua iloa ma alolofa tagata
iā leova.

2 AUA LE FEFE IĀ SATANI

“Ia outou gaua’i atu i le Atua ae ia tetee atu i le Tiapolo, ona sola ese ai lea o ia mai iā te outou.”—Iakopo 4:7

E faapefea ona iloa e mafai ona tatou tetee atu i le Tiapolo?

Faaaliga 7:9, 14

E faatapulaa e leova mea e mafai ona faia e le Tiapolo iā i tatou. Ua folafola mai e le Atua o le a faasaoina atu se motu o tagata e to’atele i le lalolagi fou.

2 Nofoaiga a Tupu 15:2

Pe afai e tatou te mafuta vavalalata atu iā leova, e lē mafai e Satani ona faale-againa la tatou faiā ma la.

1 Korinito 10:13;

Eperu 11:4-40

Ua folafola mai e leova e fesoasoani mai ia tatou tumau faamaoni, e pei ona ia fesoasoani i le to’atele i taimi ua mavae.

3 IA MATAALA I TOGAFITI A SATANI

“Tatou te lē vālea i ana togafiti.”

—2 Korinito 2:11

O ā ituaiga togafiti e faaaogā e le Tiapolo?

Ioane 15:19;

Faaaliga 12:12, 17

E pulea e le Tiapolo le lalolagi, ae e na te lē pulea tagata o leova, o lea ua avea ai i latou ma taula’iga o ana osofa’iga.

Kenese 3:1;

Kalatia 5:19-21;

Efeso 6:12

E taumafai le Tiapolo e sa’ili o tatou vaivaiga ina ia osofa’ia ai i tatou.

Levitiko 19:26;

Isaia 1:13, 15;

Mareko 5:25, 26

Ia faaeteete pe a filifilia togafitiga faafoma’i. E ono matuā naunau se tasi ia toe malosi ma i’u ai ina lotomalie e talia se togafitiga e faaaogā ai malosi-aga e lē faalenatura.

Teuteronome 18:10-12;

Galuega 19:19;

Kalatia 6:7;

Faaaliga 21:8

Pe afai e vāai mai temoni o loo tatou naunau e fia iloso o se malosiaga e lē faalenatura, o le a latou faaaogā na mea e maileia ai i tatou. O le a tatou lē faamaoni iā leova pe a tatou aafia i faiga faatemoni.

4 AUA LE FAASALALAUINA ATU PEPELO A LE TIAPOLO

‘O le Tiapolo o sē e pepelo ma le tamā o le pepelo.’—Ioane 8:44

O ā auala e tatou te ono faasalalau atu ai pepelo a le Tiapolo?

Roma 1:11, 12;

2 Timoteo 2:16

E faamatala e tagata tala e foliga mai ai e matuā malolosi le Tiapolo ma temoni, ae e lē o le tulaga moni lenā. Peita’i, nai lo o le toe faamatala atu o tala e faatupu ai le fefe, e tatau ona tatou taula’i atu i le faalaeiauina o isi.

Efeso 6:11

Pe a tatou mataala i togafiti a le Tiapolo, e mafai ona tatou tetee atu iā te ia ae mafuta vavalalata atu iā leova.

IA TUMAU I LE ALOFA O LE ATUA

“Ia atia’e iā te outou i lo outou faatuatua e sili ona paia . . . la outou faatumau iā te outou i le alofa o le Atua.”—IUTA 20, 21.

E TATOU te manana’o uma lava ia malolosi ma ola mā-lōlōina. O lea e tatou te taumafai ai e aai i mea’ai paleni, faamalositino e lē aunoa, ma tausī lelei o tatou tino. E ui lava o le faia faapea e mana’omia ai ni taumafaiga, ae e tatou te lē faavaivai ona e iai i’uga lelei. Peita’i, e iai fo’i se isi itu e mana’omia ona tatou malolosi ma ola mā-lōlōina ai.

² E tusa lava pe na lelei le amataga o lo tatou iloaina o Ieova, ae e mana’omia ona faamalosi atili pea la tatou faiā ma ia. Ina ua faalaeiau e Iuta Kerisiano “ia outou faatumau iā te outou i le alofa o le Atua,” sa ia faamatala auala e mafai ona latou faia ai faapea. Na faapea atu o ia: “Ia atia’e iā te outou i lo outou faatuatua e sili ona paia.” (Iuta 20, 21) E faapefea la ona tatou atia’e le faatuatua malosi ma faatumau ai i tatou i le alofa o le Atua?

IA FAAUAU ONA ATIA’E LOU FAATUATUA

³ E tāua ona e faamaonia e oe lava e sili atu ona lelei ala o Ieova. E mana’o Satani ia e manatu e faapea, e fai-

1, 2. O le ā e tatou te faia ina ia atili faamalosi ai la tatou faiā ma Ieova?

3-5. (a) O le ā le manatu e mana’o Satani e iā te oe e faatatau i tapulaa a Ieova? (e) O le ā sou manatu i tulafono ma mataupu sili-sili a Ieova?

gatā tele ona tausia tapulaa a le Atua ma o le a sili atu ona e fiafia pe a filifili e oe lava le mea e sa’o ma le mea sesē. Talu mai le taimi i le faato’aga i Etena, ua taumafai Satani e faatalitonu tagata i lenei manatu. (Kenese 3:1-6) O loo ia taumafai malosi pea i aso nei.

4 Pe e sa’o Satani? Po ua faasāsā na’uā tapulaa a Ieova? E leai. O se faata’ita’iga, se’i faapea o loo e savali i se paka matagofie. Ua e iloa atu se pā maualuga o loo poloka mai ai se vaega o le paka. Atonu e te mafaufau, ‘Matuā faalavelave tele lenei pā!’ Ae e faalogoina loa i le taimi lenā le tagi a se leona mai i le isi itu o le pā. O le ā sou manatu i le pā i le taimi lenā? Ua e lotofaafetai ona ua puipuia ai oe mai i le leona. Ua faatusaina tapulaa a Ieova i lenā pā, ae ua faatusa le Tiapolo i le leona. Ua lapata’ia i tatou i le Afioga a le Atua: “Ia faauau ona outou mafaufau lelei ma ia mataala. O loo fealua’i lo outou fili, o le Tiapolo lea, e pei o se leona o loo tagi leotele, e sa’ili se tasi e na te ‘aina.”—1 Peteru 5:8.

5 E finagalo Ieova ia tatou maua se olaga e sili ona lelei. E lē finagalo o ia e faasesēina i tatou e Satani. O le māfuaaga lenā ua ia saunia mai ai tulafono ma mataupu silisili, ina ia puipuia ai i tatou ma maua le fiafia. (Efeso 6:11) Na tusi Iakopo: “O lē e vaavaai toto’a i le tulafono lelei atoatoa o le sa’olotoga, ma tausisi i ai . . . o le a fiafia ai o ia ona o lona faia o lea galuega.”—Iakopo 1:25.

6 Pe a tatou mulimuli i le ta’ita’iga a Ieova, o le a faaleleia o tatou olaga ma atili ai ona māfana la tatou faauōga ma ia. O se faata’ita’iga, e tatou te maua aogā pe a talia lana valaaulia ia tatalo atu e lē aunoa iā te ia. (Mataio 6: 5-8; 1 Tesalonia 5:17) E tatou te fiafia pe a usiusita’i i

6. E mafai faapefea ona faatalitonuina i tatou e sili atu ona lelei ala o le Atua?

lana poloa'iga ia faapotopoto e tapua'i atu iā te ia ma fe-faalaieiaua'i, ma faia se sao atoatoa i le galuega tala'i ma le a'oa'o atu. (Mataio 28:19, 20; Kalatia 6:2; Eperu 10:24, 25) A o tatou mafaufau i auala ua fesoasoani ai nei vala ina ia malosi pea lo tatou faatuatua, ua atili ai ona faa-talitonuina i tatou e sili atu ona lelei ala o Ieova.

⁷ E tatou te ono popole o le a faigatā tele tofotofoga o lo tatou faatuatua i le lumana'i ma o le a tatou lē taulau. Pe afai e iā te oe lenā lagona, ia manatua fetalaiga nei a Ieova: "O a'u o Ieova, lou Atua, o Lē o loo a'oa'o oe i mea e aogā iā te oe, o Lē e ta'ita'iina oe i le ala e ao ona e ui ai. E lelei pe a e faalogo mai i a'u poloa'iga! Ona pei ai lea o se vaitafe lou filemu, ma lau amiotonu e pei o galu o le sami."—Isaia 48:17, 18.

7, 8. O le ā e fesoasoani iā i tatou e 'alofia ai le popole i tofotofoga e ono tula'i mai i le lumana'i?



⁸ Pe a tatou usiusita'i iā Ieova, o le a pei lo tatou filemu o se vaitafe e tafe pea. O le a pei lo tatou amio-tonu o galu o le sami e fafati pea i le matafaga. E mafai ona tatou faamaoni e faavavau iā te ia! Po o ā lava mea e tutupu i o tatou olaga, ua folafola mai i le Salamo 55:22: "Ia tuuina atu iā Ieova ou popolega uma, o ia lava e na te tausia oe. E na te lē tuua lava le tagata amiotonu ia tautevateva."

'FINAFINAU INA IA AVEA MA TAGATA MATUTUA'

⁹ A o e faamalosia la oulua faiā ma Ieova, o le a e 'finafinau ina ia avea ma tagata matua.' (Eperu 6:1) O le ā le uiga o le avea ma tagata matua?

¹⁰ E lē tau mana'omia ona tatou matutua ina ia avea ai ma Kerisiano ta'umatuaina. Ina ia ta'umatuaina, e tatau ona avea Ieova ma a tatou Uō sili ma taumafai ia vaai i mea e pei ona silasila i ai o ia. (Ioane 4:23) Na tusi Paulo: "O i latou e naunau i le tino, e taula'i atu o latou manatu i mea a le tino, a o ē e naunau i le agaga, e taula'i atu i mea a le agaga." (Roma 8:5) O le tagata e ta'umatuaina e lē taula'i atu lona olaga i mea faafiafia po o meafaitino. Nai lo o lea, e taula'i atu o ia e auuuna iā Ieova ma faia filifiliga atamai i lona olaga. (Faataoto 27:11; **faitau le Iakopo 1:2, 3.**) E lē taa'ina o ia e fai le mea sesē. O le tagata e ta'umatuaina e na te iloa le mea e sa'o ma maumaua'i e fai.

¹¹ E mana'omia taumafaiga ina ia avea ai ma tagata ta'umatuaina. Na tusi le aposetolo o Paulo: "O mea'ai

9, 10. O le ā le uiga o le avea ma tagata matua?

11, 12. (a) O le ā na ta'ua e Paulo e faataui i se Kerisiano e 'faa-aogā lona mafau'au'? (e) E faapefea i le avea ma sē e ta'umatuaina ona talitutusa ma le avea ma se tagata taalo?

aano e mo tagata matutua ia, o ē ua faaaogā o latou mafaufau e iloa le mea sa’o ma le mea sesē ina ua a’oa’o-ina.” (Eperu 5:14) O le upu “a’oa’oina” e tatou te ono mafaufau ai i le toleniina o se tagata taalo.

12 Pe a tatou vāai o taalo se tagata tomai i taaloga, e tatou te iloa sa alu le taimi ma fai ni toleniga ina ia atia’e ai lona tomai. E le’i fanau mai o ia o se tagata taalo. Ina ua fanau mai se pepe, e na te le’i iloa le auala e faaaogā ai ona lima ma vae. Ae a o faagasolo taimi, sa ia a’oa’oina le auala e uu ai mea ma le auala e savali ai. Pe a toleni, e mafai ona avea o ia ma tagata taalo. I se tulaga talitutusa, e mana’omia le taimi ma toleniga ina ia avea ai i tatou ma Kerisiano ta’umatuaina.

13 Na tatou iloiloaina i lenei tusi auala e mafai ona tatou mafaufau ai e pei o Ieova, ma vaai i mea e pei ona silasila i ai o ia. Ua a’oa’oina i tatou ia talisapaia ma nau-nau i tapulaa a Ieova. Ia fesili ifo iā i tatou lava pe a faia ni filifiliga: ‘O ā tulafono po o mataupu silisili o le Tusi Paia e faatatau i lenei tulaga? E faapefea ona ou faatatauina? O le ā e finagalo Ieova ia ou faia?’—**Faitau le Faataoto 3:5, 6; Iakopo 1:5.**

14 E faaauau pea ona tatou atia’e le faatuatua iā Ieova. E pei ona malosī o le tino pe a taumafa i mea’ai paleni, e faapena fo’i ona fesoasoani le a’oa’oina e faatatau iā Ieova e tatou te atia’e ai le faatuatua malosī. Pe a amata ona tatou su’esu’eina le Tusi Paia, e tatou te a’oa’oina upu moni faavae e faatatau iā Ieova ma ona ala. Ae a o faagasolo taimi, e mana’omia ona tatou malamalama i

13. O le ā e fesoasoani iā i tatou ina ia mafaufau e pei o Ieova?

14. O le ā e mana’omia ona tatou fai pe a manana’o e atia’e lo tatou faatuatua?

mea loloto. O le mea lenā sa uiga i ai Paulo ina ua faapea mai: “O mea’ai aano e mo tagata matutua ia.” E tatou te maua le atamai e ala i le faatatau o mea ua tatou a’oa’o-ina. Ua faapea mai le Tusi Paia: “O le atamai o le mea sili lea.”—Faataoto 4:5-7; 1 Peteru 2:2.

15 Atonu e malosi ma mālōlōina se tasi, ae ina ia tumau i lenā tulaga, e tatau ona faaauau ona tausia lelei o ia. I se tulaga talitutusa, o le tagata ta’umatuaina e na te iloa e mana’omia ona ia galue malosi ina ia malosi pea la la’ua faiā ma Ieova. Ua faamanatu mai e Paulo e faapea: “Ia tofotofo pea iā te outou po o outou iai i le faatuatua, ia su’esu’e ifo pea iā te outou po o faape’ī outou.” (2 Korinito 13:5) Ae e tele isi mea e mana’omia i lo o le tau ina faatuatua malosi. E tatau ona faaauau ona tupu-tupu a’e lo tatou alofa mo Ieova ma o tatou uso ma tua-fāfine. Na faapea mai Paulo: “Afai fo’i ua iā te a’u . . . le poto uma lava, ma pe a iā te a’u fo’i le faatuatua e siitia ai mauga, ae e leai so’u alofa, ua ou lē aogā.”—1 Korinito 13:1-3.

IA TAULA’I ATU I LOU FAAMOEMOE

16 E mana’o Satani ia tatou mafaufau e faapea, e tusa lava po o ā a tatou taumafaiga e fai ae e lē mafai lava ona tatou faafiafiaina ai Ieova. E mana’o ia tatou lotovaivai ma mafaufau e leai se vaifofō i o tatou faafitauli. E lē mana’o o ia e tatou te maufaatuatuaina o tatou uso Kerisiano, ma e lē mana’o fo’i e tatou te fiafia. (Efeso 2:2) Ua iloa e Satani o mafaufauga lē sa’o e mafai ona faale-againa ai i tatou faapea la tatou faiā ma le Atua. Ae ua

15. Aiseā e tāua ai ona tatou alolofa moni iā Ieova ma o tatou uso ma tuafāfine?

16. O ā manatu e mana’o Satani ia iā i tatou?



tuuina mai e Ieova le fesoasoani iā i tatou e tau faasaga ai i mafaufauga lē sa’o. Ua ia tuuina mai iā i tatou le faamoemoe.

17 I le 1 Tesalonia 5:8, ua faatusa e le Tusi Paia lo tatou faamoemoe i le puloutau lea e puipuia ai le ulu o se fita-fita i le taimi o le taua, e ta’ua “o le faamoemoe o le faa-olataga.” O le faamoemoe i folafolaga a Ieova e mafai ona puipuia ai o tatou mafaufau, ma fesoasoani e teena ai mafaufauga lē sa’o.

18 Na faamalasia Iesu ona o lona faamoemoe. Sa feagai o ia ma tulaga faigatā i le pō mulimuli na soifua ai i le lalolagi. Na faalata o ia e sana uō vavalalata. Na faafiti se tasi o ana uō e na te lē iloaina o ia. Na tuua o ia e isi ma sosola. Na tetee tagata o lona nuu ma alalaga atu ia

17. Aiseā e tāua ai le faamoemoe?

18, 19. Na faapefea i le faamoemoe ona faamalasia ai Iesu?



fasiotia o ia i luga o le laau e faapuapuagatia ai. O le ā na fesoasoani iā te ia e tumau ai i nei mea tigā? “O le olioli sa i ona luma, na tumau ai o ia e ui ina faapuapuagatia i le laau, na lē amana’ia e ia le mā, ma nofo o ia i le itu taumatau o le nofoālii o le Atua.”—Eperu 12:2.

19 Na iloa e Iesu o le a ia faamamaluina lona Tamā ma faamaonia le pepelo o Satani, pe afai e tumau faamaoni. Na matuā olioli o ia ona o lenā faamoemoe. Sa ia iloa ua lē o toe umi ona la toe faatasi lea ma lona Tamā i le lagi. Sa fesoasoani lenei faamoemoe iā te ia e tumau ai. I le pei o Iesu, e tatau ona tatou taula’i atu i lo tatou faamoemoe. O le a fesoasoani e tatou te tumau ai e tusa lava po o le ā e tupu.

20 E silafia e Ieova lou faatuatua ma le tumau. (Isaia 30:18; **faitau le Malaki 3:10.**) Ua ia folafola mai e “foa’i

20. O le ā e fesoasoani iā te oe ina ia maua se vaaiga sa’o?

mai . . . mea e mana’o i ai lou loto.” (Salamo 37:4) O lea, ia taula’i atu pea lou mafaufau i lou faamoemoe. E mana’o Satani ia mou atu lou faamoemoe ma ia e manatu o le a lē faataunuaina folafolaga a Ieova. Peita’i, e lē tatau ona e lolo atu i mafaufauga lē sa’o! Pe afai e te mā-tauina ua tau mou atu lou faamoemoe, ia tatalo iā Ieova mo le fesoasoani. Ia manatua upu o loo i le Filipi 4:6, 7: “Aua ne’i popole i se mea, ae ia faailoa atu o outou mana’oga i mea uma lava i le Atua, i le tatalo ma le faatoga, atoa ma le faafetai; ona leoleoina ai lea o o outou loto ma mafaufau i le filemu mai i le Atua, e silisili i mea uma lava e manatu i ai, e ala iā Keriso Iesu.”

21 Ia faaalu e lē aunoa se taimi e manatunatu loloto ai i mea matagofie o le a tutupu i le lumana’i. Ua lē o toe umi ona tapua’i atu lea o tagata uma iā Ieova. (Faaaliga 7:9, 14) Se’i mafaufau i le olaga i le lalolagi fou. O le a sili atu nai lo o so o se mea e tatou te mafaufau i ai! O le a tafieseā Satani, ana temoni, ma mea leaga uma. E lē oo iā te oe le ma’i ma le oti. O le a e ala a’e i aso uma e atoatoa lou malosi ma fiafia. O le a galulue tagata uma e galuea’iina le lalolagi e avea ma parataiso. O le a maua e tagata uma mea’ai lelei ma se nofoaga saogalemu e nofo ai. O le a lē sauā tagata ae o le a agalelei ma le faamaoni le tasi i le isi. Mulimuli ane o le a olioli tagata uma i le lalolagi i le “sa’olotoga mamalu o le fanau a le Atua.” —Roma 8:21.

22 E finagalo Ieova e avea o ia ma au Uō sili. O lea, ia faia mea uma e te mafaia ina ia usiusita’i ai iā Ieova ma mafuta vavalalata atu ai iā te ia i aso uma. Ioe, tau ina ia tatou tumau uma i le alofa o le Atua e faavavau!—Iuta 21.

21, 22. (a) O le ā lou faamoemoe? (e) O le ā ua e filifili e fai?

1 IA FAAMALOSIA PEA LOU FAATUATUA

“Ia atia’e iā te outou i lo outou faatuatua e sili ona paia.”—luta 20

O le ā e fesoasoani ina ia atia’e ai lo tatou faatuatua?

Efeso 6:11;
Iakopo 1:25;
1 Peteru 5:8

Ia mafaufau pe faapefea i le usiusita’i iā leova ona puipuia ai i tatou, ma fesoasoani e tatou te maua ai se olaga e sili ona lelei.

Mataio 28:19, 20;
1 Tesalonia 5:17;
Eperu 10:24, 25

O le tatalo, talanoa atu i isi e faatatau iā leova, ma auaufaatasi ma o tatou uso ma tuafāfine, e fesoasoani e faamallosia ai lo tatou faatuatua.

Salamo 55:22;
Isaia 48:17, 18

O le a lē tuulafoa’iina oe e leova. O le a e maua le filemu pe afai e te mulimuli i lana ta’ita’iga.

2 E AO ONA AVEA I TATOU MA KERISIANO TA'UMATUAINA

“Inā tatou finafinau ia ina ia avea ma tagata matutua.”—Eperu 6:1

O le ā le uiga o le avea ma Kerisiano ta'umatuaina?

Roma 8:5;
Eperu 5:14

E mana'omia le taimi ma taumafaiga ina ia avea ma tagata ta'umatuaina. O se Kerisiano e ta'umatuaina e taumafai e vaai i mea e pei ona silasila i ai leova, ma faia filifiliga atamai.

Faataoto 27:11;
Iakopo 1:2, 3

E avea lu'i o ni avanoa e faamalosia ai lou faatuatua ma faamaonia atu ai lou alofa mo leova.

Faataoto 3:5, 6;
Iakopo 1:5

Pe a tatou faia ni filifiliga, ia manatunatu loloto po o le ā e finagalo leova e te faia, ma ia ōle atu mo lana fesoasoani.

2 Korinito 13:5

Aua ne'i muta lou a'o-a'oina e faatatau iā leova ma faamalosia pea la oulua faiā.

3 IA TAULA'I ATU PEA I LOU FAAMOEMOE

“Ia tatou oofu i le . . . puloutau o le faamoemoe o le faaolataga.”—1 Tesalonia 5:8

E faapefea i le faamoemoe ona puipuia ai i tatou?

Eperu 12:2

O lou faamoemoe i le lumana'i o se mea e malosi tele. Mafaufau pe na faapefea ona fesoasoani le faamoemoe o Iesu ina ia tumau ai i faigatā na feagai ma ia.

Filipi 4:6, 7

Ia tatalo atu iā leova pe afai e te lagona ua tau mou atu lou faamoemoe. O mafaufauga lē sa'o ma masalosologa o le a faavai-vaia ai oe. Ae o le a foa'i mai e leova iā te oe le lototele ma le filemu o le mafaufau.

Malaki 3:10;

Roma 8:21

Ia manatunatu e lē aunoa i lou faamoemoe i le lumana'i. O le a sili atu le lalolagi fou nai lo o so o se mea e te mafaufau i ai

Salamo 37:4;

Iuta 21

E finagalo leova ia e iloa lelei o ia o lau Uō sili. Ia faia mea uma e te mafai ina ia usita'i iā te ia, ma mafuta vavalalata atu iā te ia i aso uma.

LISI O MATAUPU

- | | | | |
|----|-------------------------------------|----|--|
| 1 | Mataupu Silisili | 19 | Togisala |
| 2 | Usiusita'i | 20 | Faatāua le Ola o Manu |
| 3 | Sa'olotoga e Filifili Ai | 21 | Vaega Ninii o le Toto
ma Togafitiga Faafoma'i |
| 4 | Tapulaa Tauamio | 22 | Mamā Tauamio |
| 5 | Lotofuatiaifo | 23 | Amioga Lē Kea
Fauamaaa ma
Amioga Lē Mamā |
| 6 | Mata'u i le Atua | 24 | Taaloalo i Totogasā |
| 7 | Salamō | 25 | 'Autaunonofo |
| 8 | Faate'aina | 26 | Talagā Faaipoipoga
ma le Tete'a |
| 9 | Ta'ita'iga, Ta'iala,
ma Fautuaga | 27 | Faamālō ma Faalaeiauga |
| 10 | Faamaualuga ma le
Lotomaulalo | 28 | Faaipoipoga |
| 11 | Pule | 29 | Faia o Filifiliga Atamai |
| 12 | Toeaina | 30 | Mataupu Faapisinisi
ma Faaletulafono |
| 13 | Ulu o le Aiga | 31 | Faiga Taufaaasesē a Satani |
| 14 | Vaega Pule | 32 | Togafitiga Faafoma'i |
| 15 | Ufiulu | | |
| 16 | Solitū | | |
| 17 | Agaga o le Lalolagi | | |
| 18 | Liliuese Mai i le Upu Moni | | |

1 MATAUPU SILISILI

O tulafono a le Atua e faavae i ana mataupu silisili. O nei mataupu silisili o upu moni faavae ia e tatou te maua i le Tusi Paia. E fesoasoani iā i tatou e malamalama ai i le auala e mafaufau ai le Atua ma ona faaloga e faataatau i mea. E fesoasoani mataupu silisili iā i tatou e faia ai filifiliga lelei i le olaga ma faia le mea sa’o. E fesoasoani patino lava i tulaga e lē o ma’oti mai ai tulafono a le Atua.

► Mataupu 1, palakalafa 8

2 USIUSITA’I

O le usiusita’i iā leova e uiga atu i le lotomalie e fai mea ua ia fetalai mai e fai. E finagalo leova ia tatou usiusita’i iā te ia ona o le alolofa iā te ia. (1 Ioane 5:3) Pe afai e tatou te alolofa ma mau faatuatuaina le Atua, o le a tatou mulimuli i ana fautuaga i mea uma, ma usiusita’i iā te ia e tusa lava pe e faigatā. E tūa ona tatou usiusita’i iā leova, auā ua ia a’oa’o-ina i tatou i le auala e mau ai se olaga lelei i le taimi nei, ma folafola mai o le a tatou olioli i le tele o faamanuiaga i le lumana’i.—Isaia 48:17.

► Mataupu 1, palakalafa 10

3 SA’OLOTOGA E FILIFILI AI

Ua tuuina mai e leova i tagata ta’ito’atasi le sa’olotoga e filifili ai, po o le tomai e faia ai filifiliga. E na te le’i faia i tatou e pei o ni masini. (Teuteronomo 30:19; Iosua 24:15) E mafai ona faaogā lo tatou sa’olotoga e fai ai ni filifiliga lelei. Ae afai e lē faaeteete, e tatou te ono faia ni filifiliga lē lelei. O le iai o le sa’olotoga e filifili ai, o lona uiga e tataua ona tatou filifili pe e manana’o e faamaoni iā leova, ma faamaonia atu e tatou te alolofa moni lava iā te ia.

► Mataupu 1, palakalafa 12

4 TAPULAA TAUAMIO

Ua saunia e leova tapulaa tauamio, po o ta’iala e ta’ita’ia ai a tatou amioga ma gaoioga. E tatou te a’oa’oina mai i le Tusi Paia na tapulaa,

ma le auala e fesoasoani ai iā i tatou ia ola i se olaga lelei. (Faataoto 6: 16-19; 1 Korinito 6:9-11) E fesoasoani nei ta'iala e tatou te iloa ai le silafaga a le Atua i le mea sa'oma le mea sesē, iloa ai le auala e faaalua ai le alofa, faia ai filifiliga lelei, ma agalelei i isi. E ui o loo faaauau ona pa'ū maulalo tapulaa a le lalolagi, ae e lē o suia ai tapulaa a leova. (Teuteronome 32:4-6; Malaki 3:6) O le mulimuli i tapulaa a leova e puipuia ai i tatou mai le faaleagaina faaletino ma faalogona.

► Mataupu 1, palakalafa 17

5 LOTOFUATIAIFO

O o tatou lotofuatiaifo o le lagona i totonu o i tatou e iloa ai le sa'oma le sesē. Ua tuuina mai e leova iā i tatou ta'ito'atasi se lotofuatiaifo. (Roma 2:14, 15) Ina ia gaoioi ma le sa'oma o tatou lotofuatiaifo, e tatau ona toleni i tapulaa tauamio a leova. O le a mafai ai ona fesoasoani o tatou lotofuatiaifo iā i tatou ina ia faia filifiliga e fiafia i ai le Atua. (1 Peteru 3:16) E lapata'i e o tatou lotofuatiaifo i tatou pe afai o le a faia se filifiliga sesē, pe e oo fo'i faalogona tigā iā i tatou pe a uma ona faia se mea sesē. E mafai ona vaivai o tatou lotofuatiaifo, ae o le fesoasoani a leova e toe faamalosi ai. O se lotofuatiaifo lelei e maua ai le filemu o le mafaufau ma le mautinoa.

► Mataupu 2, palakalafa 3

6 MATA'U I LE ATUA

O le mata'u i le Atua, o lona uiga e tatou te matuā alolofa ma faaaloalo iā te ia, ma e lē manana'o e faia se mea e lē fiafia i ai lona finagalo. O le mata'u i le Atua e tatou te faia ai mea lelei ae 'alofia le faia o mea leaga. (Salamo 111:10) E uuna'ia ai i tatou e faalogologo lelei i mea uma ua fetalai mai ai leova. E fesoasoani fo'i e tausisi ai i a tatou folafolaga sa fai iā te ia, ona e tatou te matuā faaaloalo iā te ia. O le mata'u i le Atua e aafia ai le auala e tatou te mafaufau ai, auala e feutaga'i ai ma isi, ma filifiliga e tatou te faia i aso uma.

► Mataupu 2, palakalafa 9

7 SALAMŌ

O le salamō e aofia ai le lagona e se tasi o le matuā faanoanoa ona o se mea sesē na ia faia. O ē e alolofa i le Atua, e matuā faanoanoa pe a iloa ua latou faia se mea e feteena’i ma ana tapulaa. Pe a tatou faia se mea sesē, e tatau ona ōle atu iā leova e faamagalo i tatou e faavae i le tau-laga togiola a Iesu. (Mataio 26:28; 1 Ioane 2:1, 2) Pe a tatou salamō moni lava ma lē toe faia le mea sesē, e mautinoa o le a faamagalo i tatou e leova. E lē mana’omia ona tatou toe lagona le nofosala i mea sa tatou faia i le taimi ua te’a. (Salamo 103:10-14; 1 Ioane 1:9; 3:19-22) E tatau ona tatou tauivi malosi ina ia a’oa’o ni lesona mai i a tatou mea sesē, suia mafauauga sesē, ma ola e ōgatusa ma tapulaa a leova.

► Mataupu 2, palakalafa 18

8 FAATE’AINA

Pe a lē salamō se tasi na faia se agasala matuiā ma musu e mulimuli i tapulaa a leova, e lē mafai ona toe avea o ia ma sui o le faapotopotoga. E tatau ona faate’aina o ia. Pe a faate’aina se tasi, e tatou te lē toe faifai-meafaatasi ma lenā tagata pe toe talanoa atu i ai. (1 Korinito 5:11; 2 Ioane 9-11) O le faatulagaga o le faate’aina e puipuia ai le suafa o leova faapea le faapotopotoga. (1 Korinito 5:6) O le faate’aina o se a’o-a’iga fo’i e mafai ona fesoasoani i se tasi ia salamō, ina ia mafai ona toe fo’i mai ai iā leova.—Luka 15:17.

► Mataupu 3, palakalafa 19

9 TA’ITA’IGA, TA’IALA, MA FAUTUAGA

E alofa leova iā i tatou ma e finagalo e fesoasoani mai. O le pogai lea ua ia saunia mai ai le ta’ita’iga, ta’iala, ma fautuaga e ala mai i le Tusi Paia ma ē e alolofa iā te ia. Talu ai o i tatou o tagata e lē lelei atoatoa, e tatou te matuā mana’omia ai lava lenei fesoasoani. (Ieremia 17:9) Pe a tatou usiusita’i i ē ua faaogā e leova e ta’ita’ia i tatou, ua faaalua ai e tatou te āva ma manana’o e usiusita’i iā te ia.—Eperu 13:7.

► Mataupu 4, palakalafa 2

10 FAAMAUALUGA MA LE LOTOMAUHALO

Talu ai e tatou te lē lelei atoatoa, e faigofie la ona tatou manatu faapito ma faamaualuga. Ae e faatalitalia e leova i tatou ia lotomaulalo. E amata ona tatou faaalua le lotomaulalo pe a faatusatusa i tatou iā leova, ma iloa ai lo tatou matuā faatauva. (Iopu 38:1-4) O se isi vaega tāua o le lotomaulalo, o le taumafai lea ia matuā manatu mamafa i isi ma lo latou lelei nai lo o i tatou lava. O le faamaualuga e masani ona manatu ai se tasi e sili atu o ia nai lo o isi. O le tagata e lotomaulalo, e iloilo ma le faamaoni iā te ia lava ma iloa ona itu lelei ma ona vaivaiga. E lē fefe e faailoa atu ona sesē, e faatoese atu, ma talia manatu ma fautuaga a isi. O se tasi e lotomaulalo e faalagolago iā leova ma mulimuli i lana ta'ita'iga.—1 Peteru 5:5.

► Mataupu 4, palakalafa 4

11 PULE

O le pule e uiga atu i le aiā e avatu ai faatonuga ma faia filifiliga. O leova o le pule silisili i le lagi ma le lalolagi. Talu ai na ia foafoaina mea uma lava, o ia la o Lē e sili ona malosia i le vateatea. E na te faaaogā i taimi uma lana pule ina ia maua ai e isi aogā. Ua tuuina e leova i isi tagata le tiute tauave o le tausia lea o i tatou. O se faaa'oa'oga, ua iai sina pule i mātua, toeaina o le faapotopotoga, ma malo, ma e finagalo leova ia tatou lagolagosua iā i latou. (Roma 13:1-5; 1 Timoteo 5:17) Ae afai e feteena'i tulafono a tagata ma tulafono a le Atua, e tatau la ona tatou usiusita'i i le Atua nai lo o tagata. (Galuega 5:29) Pe a tatou taliaina le pule a i latou ua faaaogā e leova, e faaalua atu ai e tatou te faaaloalo i ana faai'uga.

► Mataupu 4, palakalafa 7

12 TOEAINA

Ua faaaogā e leova toeaina, o uso ua agavaa e tausia le faapotopotoga. (Teuteronomie 1:13; Galuega 20:28) Ua fesoasoani nei tane ina ia faamalosalia la tatou faiā ma leova, ma tapua'i iā te ia i se auala filemu ma

maopoopo. (1 Korinito 14:33, 40) E tatau ona ausia e toeaina ni agavaa patino o loo i le Tusi Paia, ina ia tofia ai i latou e le agaga paia. (1 Timoteo 3:1-7; Tito 1:5-9; 1 Peteru 5:2, 3) E tatou te fiafia e galulue felagolagoma'i ma toeaina, ona e tatou te maufaatuatuaina ma lagolagoina le faalapotopotoga a leova.—Salamo 138:6; Eperu 13:17.

► Mataupu 4, palakalafa 8

13 ULU O LE AIGA

Ua tuuina mai e leova i mātua le tiute tauave o le tausia o le fanau ma le aiga. Peita'i, o loo ta'ua i le Tusi Paia o le tane o le ulu lea o le aiga. Afai e leai se tamā i le aiga, o le tinā e ulu i le aiga. O tiute tauavea o le ulu o le aiga e aofia ai le saunia o mea'ai, lavalava, ma se fale. E tūua tele ona ta'imua o ia e fesoasoani i le aiga e tapua'i iā leova. O se faaa'oa'oga, e na te faamautinoa latou te auai e lē aunoa i sauniga, tala'iga, ma su'e-su'e faatasi le Tusi Paia. E ta'imua fo'i le ulu o le aiga i le faia o filifiliga. E taumafai o ia e faaa'oa'o iā Iesu e ala i le faaalii o le agalelei ma fetuutuuna'i, e lē sauā pe 'ina'inā. E fesoasoani lea ia iai se si'omaga alofa, ina ia lagona ai e sui uma o le aiga le saogalemu ma faamalosia ai la latou faiā ma leova.

► Mataupu 4, palakalafa 12

14 VAEGA PULE

O le Vaega Pule o le vaega lea o tane e faamoemoe e ola i le lagi, ua faa-aogā e le Atua e ta'ita'ia le galuega a ona tagata. I le ulua'i senituri, na faa-aogā e leova se vaega pule e ta'ita'ia le ulua'i faapotopotoga Kerisiano i la latou tapua'iga ma le galuega tala'i. (Galuega 15:2) I aso nei, o loo ta'imua le vaega o uso o loo auauna o le Vaega Pule i le faatonu-tonuina, ta'ita'ia, ma le puipua o tagata o le Atua. Pe a faia e nei uso ni filifiliga, e latou te faalagolago i le ta'ita'iga mai le Afioga a le Atua ma lona agaga paia. Na ta'ua e Iesu lenei vaega o tane ua faauuina, o le "pologa faamaoni ma le faautauta."—Mataio 24:45-47.

► Mataupu 4, palakalafa 15

15 UFIULU

E iai taimi e ono talosagaina ai se tuafafine e na te faia se mea i le faapotopotoga e masani ona faia e se uso. Pe a faia e le tuafafine lenei galuega, e faaalua lona faaaloalo i le faatulagaga a leova e ala i le faia o se ufiulu. Ae e iai lava tulaga patino e tatau ai ona ufiufi lona ulu. O se faa'oa'oga, e fai e le tuafafine se ufiulu pe a ia faia se su'esu'ega faale-Tusi Paia a o iai lana tane po o se uso papatiso.—1 Korinito 11:11-15.

► Mataupu 4, palakalafa 17

16 SOLITŪ

Pe a tatou solitū, e tatou te teena le faia o se vaega i mataupu faapolotiki. (Ioane 17:16) E lagolagoina e tagata o leova lona Malo. E tatou te solitū i mataupufai a le lalolagi, e pei ona faia e Iesu.

Ua faatonuina i tatou e leova “ia gaua’i ma usiusita’i i malo ma pule.” (Tito 3:1, 2; Roma 13:1-7) Ae ua ta’ua fo’i i le tulafono a le Atua e aua tatou te fasioti tagata. O lea, e lē faatagaina e le lotofuatiaifo o se Kerisiano o ia e auai i taua. Pe afai e tuu mai i se Kerisiano le filifiliga e faia galuega mo le lautele e sui ai galuega faavaegā’au, e tatau ona iloilo pe e faataga o ia e lona lotofuatiaifo e fai na galuega.

E na o leova e tatou te tapua’i i ai, auā o ia o Lē na faia i tatou. E ui lava e tatou te faaaloalo i tagāvai a le atunuu, ae e tatou te lē fa’alo i le fu’a pe usu le vii o le fu’a. (Isaia 43:11; Tanielu 3:1-30; 1 Korinito 10:14) E ta’i-to’atasi fo’i tagata o leova ma filifili e lē palota i so o se vaega faaupufai po o se sui tauvā. O le māfuaaga ona ua uma ona tatou filifili e lagolagoina le malo o le Atua.—Mataio 22:21; Ioane 15:19; 18:36.

► Mataupu 5, palakalafa 2

17 AGAGA O LE LALOLAGI

Ua faaauiluma e le lalolagi le auala e mafaufau ai Satani. O leni auala ua taatele i tagata e lē alolofa ma lē faaa’oa’o iā leova, ma ē e teena ana tapulaa. (1 Ioane 5:19) O na mafaufauga ma gaoioiga ia e i’u i ai, ua ta’ua o le agaga o le lalolagi. (Efeso 2:2) E faamautinoa e tagata o

leova e lē pulea i latou e lenei agaga. (Efeso 6:10-18) Nai lo o lea, e tatou te fiafia i ala o leova ma galulue mamafa ia tumau i le auala e finagalo i ai o ia.

► Mataupu 5, palakalafa 7

18 LILIUERE MAI I LE UPU MONI

E uiga atu i le tetee i upu moni o le Tusi Paia. O ē ua liliuese mai i le upu moni, ua fouvale iā leova ma Iesu, le Tupu tofia o le Malo o le Atua, ma taumafai e taa'ina isi e mulimuli atu iā i latou. (Roma 1:25) E latou te manana' o e faatupu masalosologa i mafaufau o ē e tapua'i iā leova. Sa iai nisi i le ulua'i faapotopotoga Kerisiano na liliuese mai i le upu moni, ma e faapena fo'i i aso nei. (2 Tesalonia 2:3) O ē e faamaoni iā leova e leai sa latou fesoota'iga ma ē ua liliuese mai i le upu moni. E tatou te lē faatagaina le fia iloa po o uuna'iga mai i isi, e tatou te faitau ai pe faalogo i manatu o ē ua liliuese mai i le upu moni. E tatou te faamaoni iā leova ma tapua'i atu tau lava o ia.

► Mataupu 5, palakalafa 9

19 TOGISALA

I lalo o le Tulafono a Mose, na talosaga atu le nuu o Isaraelu iā leova e faamagalo a latou agasala. Na latou avatu i le malumalu taulaga togisala na faaaogā ai saito, suāuu, ma manu. O le faia faapea na faamanatu atu ai iā Isaraelu, e finagalo leova e faamagalo a latou agasala o se nuu ma tagata ta'ito'atasi. Mulimuli ane, ina ua ofo atu e Iesu lona soifua e ufiufi ai a tatou agasala, sa lē toe mana'omia loa nei taulaga togisala. “E na o le faatasi lava” ona ofo atu e Iesu le taulaga lelei atoa-toa.—Eperu 10:1, 4, 10.

► Mataupu 7, palakalafa 6

20 FAATĀUA LE OLA O MANU

I le Tulafono a Mose, na faataga tagata e faaaogā manu mo meataumafa. Na poloa'ia fo'i i latou ia aumai manu e fai ai taulaga. (Levitiko 1:

5, 6) Peita'i, e le'i faatagaina e leova ona tagata e sauā i manu. (Faataoto 12:10) Na iai tulafono e puipuia ai mai i le faasauā i manu. Na poloa'ia tagata Isaraelu ia tausia lelei meaola.—Teuteronome 22:6, 7.

► Mataupu 7, palakalafa 6

21 VAEGA NINII O LE TOTO MA TOGAFITIGA FAAFOMA'I

Vaega ninii o le toto. O le toto e faia a'e i vaega autū e fā—o sela mūmū, o sela papa'e, o sela faato'a toto (*platelets*), ma le vaega faasuaivaia o le toto (*plasma*). O nei vaega autū e fā o le toto e ono vaevaeina i ni vaega ninii.*

E teena e Kerisiano tuigātoto e aofia ai le toto atoa po o so o se vaega o vaega autū e fā o le toto. Ae pe e latou te taliaina vaega ninii o le toto? E leai ni faamatalaga ma'oti o ta'ua i le Tusi Paia. E tatau la i Kerisiano ta'ito'atasi ona fai lana lava filifiliga e faavae i lona lotofuatiaifo ua a'o-a'oina i le Tusi Paia.

O nisi Kerisiano e filifili e teena vaega ninii uma o le toto. E latou te ono manatu o le Tulafono a le Atua iā Isaraelu, e tatau ona sasaa "i le palapala" so o se toto e aveese mai i se manu.—Teuteronome 12:22-24.

E ese fo'i filifiliga a isi. E faataga e o latou lotofuatiaifo i latou e talia nisi o vaega ninii o le toto. E latou te ono manatu e lē o toe iai se ola i vaega ninii o le toto o le manu po o le tagata lea na aveese mai ai le toto.

Pe a faia filifiliga e faatatau i vaega ninii o le toto, ia iloilo fesili nei:


- Po ua ou malamalama o le teena o vaega ninii uma o le toto, o lona uiga o le a ou lē taliaina nisi o vailaau ma fualaau e togafitia ai faama'i, pe e ono fesoasoani fo'i e taofia ai le alu o le toto?
- O le a faapefea ona ou faamatala atu i se foma'i, le māfuaaga ou te teena pe talia ai le faaaogāina o vaega ninii o le toto?

* O nisi foma'i e ono manatu o vaega autū e fā o le toto o ni vaega ninii. O lea la, e ono mana'omia ona e faailoa atu lau filifiliga e te lē taliaina tuigātoto o le toto atoa po o vaega autū e fā o le toto, ia e ta'ua o sela mūmū, o sela papa'e, o sela faato'a toto (*platelets*), ma le vaega faasuaivaia o le toto (*plasma*).

E LĒ TALIAINA

E FILIFILI LE KERISIANO

**Toto
Atoa**



Sela Mūmū	-----	Vaega ninii mai i sela mūmū
Sela Papa'e	-----	Vaega ninii mai i sela papa'e
Sela Faato'a Toto	-----	Vaega ninii mai i sela faato'a toto
Vaega Faasuavaia o le Toto	-----	Vaega ninii mai i vaega faasuavaia o le toto

Togafitiga faafoma'i. I le avea ai ma Kerisiano, e tatou te lē foa'i atu, pe tui ese o tatou toto ma teu a o le'i faia se taotoga. Peita'i, e iai isi togafitiga e faaaogā ai le toto o le tagata ma'i lava ia. E tataui Kerisiano ta'ito'atasi ona filifili le auala e taulima ai lona toto *pe a faia sona taotoga, se su'esu'ega faafoma'i, po o se togafitiga o loo maua i le taimi lenā.* A o faia na togafitiga, e ono matuā alu ese le toto o le ma'i mai i lona tino mo sina taimi.—Mo nisi faamatalaga, taga'i i *Le Olomata-mata* o Oketopa 15, 2000, itulau 30-31.

O se faaa'oa'oga, e iai se togafitiga e ta'ua o le *hemodilution*, lea e faa-alu ese le toto o le tagata ma'i i le taimi lava lea a o le'i faia le taotoga, ae tui i ai se IV e sui ai le toto lea e alu ese. Mulimuli ane a o fai pe faato'ā uma lava ona fai le taotoga, e toe faafo'i atu le toto i le tagata ma'i.

O le isi togafitiga e ta'u o le *cell salvage*, lea e toe faaaogā ai le toto o loo alu ese mai le tino o le ma'i i le taimi o le taotoga. I lenei togafitiga, e aumai le toto lea e alu ese i le taimi o le taotoga, faamamā, ona toe faafo'i atu lea i le ma'i a o fai pe faato'ā uma lava fo'i ona fai le taotoga.

Atonu e iai sina eseesea o auala e faatino ai e foma'i nei togafitiga. O lea, a o le'i taliaina e se Kerisiano so o se taotoga, su'esu'ega faafoma'i, po o se togafitiga o loo maua i le taimi lenā, e tatau ona ia iloa lelei po o le a faapefea ona taulima lona toto.

Pe a faia filifiliga e faatatau i togafitiga faafoma'i e faaaogā ai lou lava toto, ia iloilo fesili nei:

- Pe afai e faaalu ese se vaega o lo'u toto mai i lo'u tino, ma e iai sina taimi e ono motusia ai le fegasoloa'iga o lo'u toto, po o le a faataga a'u e lo'u lotofuatiaifo e manatu i lenei toto o loo avea pea ma se vaega o lo'u tino, ma e lē mana'omia ona "sasaa i le palapala"?—Teuteronome 12:23, 24.
- Po o le a afāina lo'u lotofuatiaifo ua a'oa'oina i le Tusi Paia, pe afai e aveesea se toto mai iā te a'u ma faafefiloi ma se vailaau, ona toe tui mai lea i lo'u tino a o faia se togafitiga?
- Po ua ou malamalama o le teena o togafitiga uma faafoma'i e aofia ai le faaaogāina o lo'u toto, o lona uiga o le a ou lē taliaina ai se su'esu'ega i lo'u toto, faamamāina o le toto, po o se masini e faaaogā pe a faia se taotoga o le fatu?

A o le'i faia filifiliga e faatatau i vaega ninii o le toto ma togafitiga faafoma'i e faaaogā ai o tatou lava toto, e ao ona tatou tatalo mo le ta'ita'iga a leova ona fai lea o ni sa'ili'iliga. (Iakopo 1:5, 6) Pe a uma, ia faaaogā o tatou lotofuatiaifo ua a'oa'oina i le Tusi Paia, ina ia fai ai a tatou filifiliga. E lē tatau ona tatou fesili atu i isi po o le ā e latou te faia pe a iai se

E ono faaaogā se pepa faaletulafono talafeagai, e pei o le Pepa o Faatonuga Faafoma'i, ina ia tusia ai lau filifiliga e teena tuigātoto o le toto atoa ma vaega autū e fā o le toto. O lenei pepa e ono puipuia ai oe mai i le faia o se tuigātoto. E ono faaaogā fo'i e tusia ai au filifiliga e faatatau i vaega ninii o le toto ma togafitiga e faaaogā ai lou lava toto.

tulaga faapena e tupu iā i latou, ma e lē tatau fo’i i isi ona taumafai e aiā i a tatou filifiliga.—Roma 14:12; Kalatia 6:5.

► Mataupu 7, palakalafa 11

22 MAMĀ TAUAMIO

O le mamā tauamio o lona uiga e mamā a tatou amio ma gaoioiga i le silafaga a le Atua. O le mamā tauamio e aofia ai mea e tatou te mafau-fau i ai, tautatala ai, ma mea e tatou te faia. Ua poloa’ia i tatou e leova ia ‘alofia so o se ituaiga o amioga lē mamā taufeusua’iga. (Faataoto 1: 10; 3:1) E tatau ona tatou filifili e mulimuli i tapulaa mamā a leova, a o le’i tupu se tulaga e ono faasoosoina ai i tatou e faia se mea sesē. Ia talo e lē aunoa mo le fesoasoani a le Atua ina ia mamā pea o tatou mafau-fau, ma ia maumaua’i e teena faasoosoga e faia amioga lē mamā. —1 Korinito 6:9, 10, 18; Efeso 5:5.

► Mataupu 8, palakalafa 11

23 AMIOGA LĒ KEA FAAUAMAAA MA AMIOGA LĒ MAMĀ

O amioga lē kea faauamaaa e aofia ai le tautala po o le gaoioi i se auala e matuā solia ai tapulaa a le Atua, ma atagia mai ai se uiga e lē mā. O le tagata e faia faapea e lē faaaloalo i tulafono a le Atua. Pe a faamaonia ua faia e se tasi ni amioga lē kea faauamaaa, o le a taulima e le komiti faafaamasinoga lenei mataupu. O amioga lē mamā e aofia ai so o se ituaiga o amioga sesē. E fua i le matuā o le tulaga e tupu, o nisi mataupu e aofia ai amioga lē mamā, e ono mana’omia ona taulima e se komiti faafaamasinoga i le faapotopotoga.—Kalatia 5:19-21; Efeso 4: 19; mo nisi faamatalaga, taga’i i le mataupu “Fesili Mai le ‘Aufaitau” i *Le Olomatamata* o Iulai 15, 2006.

► Mataupu 9, palakalafa 7; Mataupu 12, palakalafa 10

24 TAALOALO I TOTOGASĀ

Na faatulaga e leova feusua’iga o se faailoaga mamā o le alofa i le va o le tane ma le avā. Peita’i, pe afai e taaloalo pe faaogā sesē e se tasi ona

totogasā ina ia faamalie ai ona mana’oga taufeousua’iga, ua ia faaaogā la feusua’iga i se auala e lē mamā. O lenei masaniga e mafai ona faale-againa ai le faiā a se tasi ma leova, faatupu ai tu’inanauga lē talafeagai, ma sesē ai le vaaiga e faatatau i feusua’iga. (Kolose 3:5) E lē tatau ona lotovaivai se tasi o loo iai lenei masaniga lē mamā ma o loo faigatā ona tuu. (Salamo 86:5; 1 Ioane 3:20) Pe afai o le tulaga lenā o loo tupu iā te oe, ia tatalo ma le faamaoni iā leova ma ʻōle atu mo lana fesoasoani. Ia ‘alofia mea e pei o ata ma faamatalaga matagā taufeousua’iga, lea e faapogaia ai mafaufauga lē mamā. Ia talanoa atu i se tasi o ou mātua Kerisiano po o se uō ta’umatuaina o sē e usita’i i tulafono a leova. (Faataoto 1:8, 9; 1 Tesalonia 5:14; Tito 2:3-5) E mafai ona e mautinoa o loo silasila mai leova ma talisapaia au taumafaiga ina ia tausisi i le mamā tauamio.—Salamo 51:17; Isaia 1:18.

► Mataupu 9, palakalafa 9

25 ‘AUTAUNONOFO

O le ‘autaunonofo, o le tū lea e sili atu i le tasi le paaga faaipoipo a se tasi. Na faatulaga e leova le faaipoipoga i le va o le tamāloa e to’atasi ma le fafine e to’atasi. I Isaraelu anamua, e le’i taofia e le Atua ona sili atu i le tasi le avā a se tamāloa, ae e lē o lona finagalo lenā mai i le amata. I aso nei, e lē faatagaina e leova ona tagata e fai ni ‘autaunonofo. E na o le tasi le avā a se tamāloa, ma e tasi le tane a se fafine.—Mataio 19:9; 1 Timoteo 3:2.

► Mataupu 10, palakalafa 12

26 TALAGĀ FAAIPOIPOGA MA LE TETE’A

Na finagalo leova ia nonofo faatasi le tane ma le avā se’ia oo i le oti. (Kenese 2:24; Malaki 2:15, 16; Mataio 19:3-6; 1 Korinoto 7:39) E pau le māfuaaga e na te faataga ai ona tatala le faaipoipoga, o le faamaonia lea ua mulilua se tasi o le paaga. I lenā tulaga, e tuu atu e leova le faitalia i le paaga o loo mamā e filifili ai pe tatala le faaipoipoga pe leai.—Mataio 19:9.

O nisi taimi, e filifili nisi Kerisiano e tete’a ma a latou paaga e tusa pe

le'i faia se amioga lē mamā taufeousua'iga. (1 Korinito 7:11) I tulaga o loo mulimuli mai, e ono filifili ai se Kerisiano e tete'a ma lana paaga.

- Matuā lē mana'o e tausia le aiga: E musu se tane e tausia mana'oga faaletino o le aiga, ma ua i'u ai ina leai se tupe po o se mea'ai a le aiga.—1 Timoteo 5:8.
- Matuā faasauā: E sauā ma oo ai ina lagona e le paaga ua lamatia lona soifua mālōlōina po o lona ola.—Kalatia 5:19-21.
- Ua matuā lamatia le faiā a se tasi ma leova: Ua faasā e le tane po o le avā ma lē mafai ai ona auauna lana paaga iā leova.—Galuega 5:29.

► Mataupu 11, palakalafa 19

27 FAAMĀLŌ MA FAALAEIAUGA

O i tatou uma lava e mana'omia se faamālō ma faalaeiauga. (Faataoto 12:25; 16:24) E mafai ona tatou faamalosiā ma fefaamāfanafanaa'i i upu alofa ma agalelei. O na faaupuga e mafai ona fesoasoani i o tatou uso ma tuafāfine, ina ia tumau ma faaaaua ona auauna iā leova e ui lava i tulaga matuā faigatā. (Faataoto 12:18; Filipi 2:1-4) Pe afai e matuā lotovaivai se tasi, e tatau ona tatou faalogologo atu ma le faaloalo iā te ia ma taumafai e malamalama i ona faalogona. E fesoasoani lenā e tatou te iloa ai se tala e fai atu po o se mea e fesoasoani atu ai iā te ia. (Iakopo 1:19) Ia fai ma ou sini le taumafai e iloa lelei ou uso ma tuafāfine, ina ia e malamalama lelei ai i mea o loo latou mana'omia. O le a mafai ai ona e fesoasoani iā i latou ina ia sa'ili atu i le Puna o faamāfanafanaga ma faalaeiauga uma, lea e mafai ona faafouina moni ai lava i latou.—2 Korinito 1:3, 4; 1 Tesalonia 5:11.

► Mataupu 12, palakalafa 16

28 FAAIPOIPOGA

E lē o aumaia i le Tusi Paia ni tulafono ma'oti e faatatau i faaiipoipoga. E eseese aganuu ma tuutuuga faaletulafono a atunuu ta'itasi. (Kenese 24:67; Mataio 1:24; 25:10; Luka 14:8) O le vaega e sili ona tāua o se

faaipoipoga, o le tautoga lea a se ulugalii i luma o leova. E filifili le to'a-tele o ulugalii ia auai o latou aiga ma uō mamae i le taimi e fai ai a latou tautoga, ma fai e se toeaina se lauga faale-Tusi Paia. E filifili le ulugalii lava ia i le ituaiga 'aiga mo le la faaipoipoga, ma afai e fai se 'aiga, o le a fai pe a uma le faaipoipoga. (Luka 14:28; Ioane 2:1-11) Po o le ā lava le auala e filifili se ulugalii e fai ai le la faaipoipoga, e tatau ona la faamautinoa o le a faamamaluina ai leova. (Kenese 2:18-24; Mataio 19:5, 6) E mafai ona fesoasoani mataupu silisili o le Tusi Paia e la te faia ai filifiliga lelei. (1 Ioane 2:16, 17) Pe afai e filifili le ulugalii e faaaogā le 'ava malosi i le la 'aiga, e tatau ona la faamautinoa o le a lelei ona vaavaaia lenā faatasiga. (Faataoto 20:1; Efeso 5:18) Pe afai e la te filifili e iai ni musika po o ni faafiatiaga, e tatau ona la faamautinoa o le a faamamaluina ai leova. E tatau ona taula'i atu se ulugalii Kerisiano i le iai o se faia lelei ma le Atua ma le mauaina o se faaipoipoga taulau manuia, nai lo o le tau ina taula'i atu i le aso o le la faaipoipoga.—Faataoto 18:22; mo nisi faamatalaga, taga'i i *Le Olomatamata* o Oketopa 15, 2006, itulau 18-31.

► Mataupu 13, palakalafa 18

29 FAIA O FILIFILIGA ATAMAI

E tatou te manana'o e fai filifiliga lelei e faavae mai i mataupu silisili o le Afioga a le Atua. O se faaa'oa'oga, e ono valaaulia se Kerisiano e lana paaga e lē o se Molimau a leova, mo se taumafataga faatasi ma tauaiga i le taimi o se aso faamanatu a le lalolagi. Pe afai e tupu lenei tulaga iā te oe, o le ā e te faia? Pe afai e faataga oe e lou lotofuatiaifo e te alu, e mafai ona e faamatala atu i lau paaga afai e iai ni aganuu faapaupau o le a faia i lenā taumafataga, e te lē auai la i na aganuu. E tatau fo'i ona e iloilo po o le a tausuai ai nisi pe afai e te alu i lenā taumafataga. —1 Korinito 8:9; 10:23, 24.

Pe atonu e ofo mai e lou pule o le galuega se ponesi mo oe i le vaitaimi o aso faamanatu. Pe e tatau ona e teena le ponesi? Atonu e leai. O se tasi o vala e ono faalagolago iai lau filifiliga e talia pe lē talia, o le iloilo lea po o le ā le vaaga a lau pule e faatatau i lenā ponesi. Po o vaai i le ponesi o se vaega o le aso faamanatu? Pe e na o se auala e faalia ai

lona lotofaafetai? O le iloilo o nei fesili ma isi vala, e mana'omia ai ona e filifili pe e talia le ponesi.

I se isi tulaga, e ono foa'i atu e se tasi se meaalofa iā te oe i le vaitaimi o aso faamanatu ma faapea atu: "Ou te iloa e te lē faamanatuina lenei aso, ae ou te mana'o e te talia mai la'u meaalofa." Atonu o loo faaalua mai e lenā tagata le agalelei. I le isi itu, pe e iai se māfuaaga e te manatu ai o loo ia taumafai e tofotofo lou faatuatua, pe faaaofia oe i le faamanatuina o le aso faamanatu? Pe a uma ona iloilo, e filifili oe lava pe e talia pe lē talia lenā meaalofa. E tatou te manana'o ia lelei o tatou lotofuatiaifo ma faamaoni iā leova i filifiliga uma e tatou te faia.—Galuega 23:1.

► Mataupu 13, palakalafa 22

30 MATAUPU FAAPISINISI MA FAALETULAFONO

O le tele o taimi, pe a vave ona taulima ni feeseesea'iga ma taulima i se auala filemu, e lē mana'omia la ona avea ma ni mataupu tugā. (Mataio 5:23-26) O Kerisiano uma lava e tatau ona latou faamuamua le faamaluina o leova ma le tausia o le autasi o le faapotopotoga.—Ioane 13:34, 35; 1 Korinito 13:4, 5.

Pe afai e feeseesea'i ni Kerisiano i se mataupu faapisinisi, e tatau ona latou taumafai e fo'ia e aunoa ma le tuuina atu i le faamasinoga. O loo ta'ua i le 1 Korinito 6:1-8 le fautuaga a le aposetolo o Paulo e faatauu i le molia e se Kerisiano o le isi Kerisiano i le tulafono. O le molia o lo tatou uso i le tulafono, e ono ta'uvalea ai leova ma le faapotopotoga. O loo ta'ua i le Mataio 18:15-17 laasaga e tolu e tatau ona uia e Kerisiano, ina ia taulima ai tuua'iga matuiā e pei o le tautaaaleaga po o le tautaaalea. (1) E tatau ona latou taumafai muamua e fo'ia le mataupu i le va o i latou lava. (2) Pe afai e lē taulau, e mafai ona talosaga atu i se sui ta'umatuaina se to'atasi pe to'alua o le faapotopotoga mo se fesoasoani. (3) Pe afai e mana'omia, e mafai ona tuu atu le mataupu i le 'autoeaina e latou te taulimaina. Pe afai o le tulaga lenā, o le a faaaogā e le 'autoeaina mataupu silisili o le Tusi Paia ina ia taumafai e fesoasoani ai i ē uma o loo aafia ia maua se maliega filemu. Pe afai e iai nisi o loo aafia ai

e lē o fia mulimuli i ta'iala a le Tusi Paia, e ono mana'omia la ona faia e toeaina o le faapotopotoga se taulimaga faafaamasinoga.

E iai nisi o tulaga e ono talafeagai ai ona molia i le tulafono. Atonu o tulaga e aofia ai le tatalaina o le faaipoipoga, le aiā a se tasi e vaavaaia ai se tamaitiiti, le tologiina o tupe i se paaga ma le fanau pe a tete'a, tupe mai i le inisiua, gau se pisinisi, po o mavaega. Pe afai e faaaogā e se Kerisiano nei auala faaletulafono e taulima ai se mataupu i se auala filemu, e na te lē o solia la le fautuaga a Paulo.

Pe afai e aafia ai se solitulafono matuiā e pei o le faamalosia o se tasi e fai feusua'iga, faileagaina o tamaiti, faaoolima, matuā gaoui, po o le fasioti tagata, o se Kerisiano la e na te lipotiina i le tulafono se solitulafono faapena, e na te lē o solia le fautuaga a Paulo.

► Mataupu 14, palakalafa 14

31 FAIGA TAUFASESĒ A SATANI

Talu mai le taimi i le faato'aga i Etena, ua taumafai Satani e faasesē tagata. (Kenese 3:1-6; Faaaliga 12:9) Ua ia iloa afai e na te faasesēina o tatou mafaufau, e mafai la ona ia taa'ina i tatou e fai mea leaga. (2 Korinoto 4:4; Iakopo 1:14, 15) E na te faaaogā faiga faapolotiki, lotu, faiga faapisinisi, faafiafiaga, a'oa'oga, ma le tele o isi mea, ina ia faaauiluma ai ona manatu ma faafoliga mai ai e lelei.—Ioane 14:30; 1 Ioane 5:19.

Ua iloa e Satani ua puupuu lona taimi o totoe e faasesē ai tagata. O lea ua ia faia ai mea uma e na te mafai ina ia faasesē le to'atele o tagata e mafai ai. O loo ua'i faapitoa atu o ia e faasesē auuuna a leova. (Faaaliga 12:12) Pe a tatou lē faaeteete, e mafai e le Tiapolo ona faasolosolo ona faaleagaina o tatou mafaufauga. (1 Korinoto 10:12) O se faaa'oa'oga, e finagalo leova ia tumau faaipoipoga. (Mataio 19:5, 6, 9) Peita'i, e to'atele tagata i aso nei e manatu māmā i le faaipoipoga e faapea o se feagaiga e faigofie ona faamuta. Ua faaauiluma fo'i e le tele o ata tifaga ma polokalame i le televise lenei manatu. E tatau ona faamautinoa e lē o taa'ina i tatou i le vaaiga a le lalolagi e faatatau i le faaipoipoga.

O se isi auala e taumafai Satani e faasesē ai i tatou, o le uuna'ia lea o le agaga fiatuto'atasi. (2 Timoteo 3:4) Pe a tatou lē faaeteete, e tatou te

ono lē faaaloalo ai i ē ua tofia e leova i le tulaga pule. O se faata'ita'iga, e ono amata ona tetee se uso i le ta'ita'iga a toeaina o le faapotopopoga. (Eperu 12:5) Pe e ono amata fo'i ona fesiligia e se tuafafine le faatulagaga a leova i le tulaga ulu i le aiga.—1 Korinito 11:3.

E tatau ona tatou maumaua'i ia aua ne'i taa'ina e le Tiapolo o tatou mafaufauga. Nai lo o lea, e ao ona tatou faaa'oa'o i manatu o leova ma 'taula'i atu o tatou mafaufau i mea faalelagi.—Kolose 3:2; 2 Korinito 2:11.

► Mataupu 16, palakalafa 9

32 TOGAFITIGA FAAFOMA'I

O i tatou uma lava e manana'o ia soifua mālōlōina ma maua le tausiga e sili ona lelei e mafai ai pe a tatou mama'i. (Isaia 38:21; Mareko 5: 25, 26; Luka 10:34) I aso nei ua tele auala ma togafitiga faafoma'i e maua mai i foma'i ma isi. Pe a tatou filifili po o ā togafitiga e talia, e tāua ona tatou mulimuli i mataupu silisili o le Tusi Paia. Ia manatua e na o le Malo o le Atua e mafai ona faamālōlōina tumau i tatou. E lē tatau ona tatou soona ua'i atu i lo tatou soifua mālōlōina, ma lafoa'ia ai la tatou tapua'iga iā leova.—Isaia 33:24; 1 Timoteo 4:16.

E tatau ona tatou faaeteete ia 'alofia so o se togafitiga e foliga mai o loo faaaogā ai le mana o temoni. (Teuteronomie 18:10-12; Isaia 1:13) O lea, a o le'i taliaina so o se togafitiga po o fualaaui ma vailaaui, e ao ona tatou faia mea uma e mafai ai ina ia iloilo po o le ā le māfuaaga ma po o ā manatu o loo faaauiluma ai i na mea. (Faataoto 14:15) Ia aua ne'i galo e mana'o Satani e maileia i tatou ina ia tatou aafia i faiga faate-moni. Pe afai fo'i e tatou te masalosalo e iai se fesoota'iga o se togafitiga ma temoni, e sili ona lelei pe a 'alofia lenā togafitiga.—1 Peteru 5:8.

► Mataupu 16, palakalafa 18

Mo nisi faamatalaga, taga'i i le www.jw.org/sm
pe faafesoota'i Molimau a leova.